

3
IANI NICII

ERYTHRÆI

EVDEMIÆ

LIBRI DECEM.




COLONIÆ VBIORVM,

Apud IODOCVM KALCOVIVM,

& socios. CIO IO CXLV.

EVD E M I A
E V D E M I A hæc luce donetur. Colonia
Agrippinæ, Octobri C I C I C X L I V.

*Henricus Francken Sierstorpffius,
SS. Theol. Doctor; libro-
rum Censor.*



COLONIA AGRIPPINENSIS
BIBLIOTHECA
C. I. C. I. C. X. L. I. V.

HIERONYMO
ALEANDRO IUNIORI
IANVS NICIVS ERYTHRÆVS
S. P. D.



Eri, cum essem ociosus domi, quo molestis cogitationibus, quibus sæpe appetor, omnes ad me aditus obstruerem, cepi in manus librum, nuper à te editum; atque totum illud tempus, quod in ea lectione posui, ita ad nullos curarum scopulos mentem offendi, ut si tutissima aliqua navi vectus placidissimū æquor excurrerem. Detinebat me præsertim abundantia doctrinæ atque varietas, liquidum ac profluens & in nullas obscuritatis salebras incidens orationis flumen, & copia, in qua naturalis inest, non fucatus, nitor. Etenim, ut sæpius ex me audisti, tua cum lego, esse mihi satis doctus videor. nam dicis plane quod intelligam. sunt enim omnia in tuis scriptis aperta, dilucida, ac tuis moribus omnino similia; qui nihil simulatum, nihil fictum obtinent, sed, quidquid tibi intus in animo latet, aperiunt ac proferunt. At, si quando istorum scripta incidi, qui nunc in Academiis,

mīis, in schōlis, dominantur ac volitant,
 despondeo animum, ac pœnitent me, quod
 navaverim operam litteris. etenim in singu-
 lis quibusque versiculis hæreo; interdum
 verbum in illis nullum intelligo; quod tar-
 ditate ingenii mei, vel potius inscitia, fieri
 arbitror. Atque avocarem omnino animum
 ab his litteris, & ad alia studia transferrem,
 nisi me veterum scriptorum libri retinerent.
 Ad quos cum me converto, admirabili illa
 ac prope divina suavitate puritateque ser-
 monis recreatus, sentio mihi animos addi,
 atque in eam opinionem adducor, ut ipsis
 etiam antiquis istorum orationem visum iri
 obscuram existimem, si illorum ad aures ea
 venisset. Ac mihi quidem sæpenumero in
 novos istos scriptores intuenti, quærendum
 esse visum est, quid esset, quod homines in
 veterum lectione assuefacti, eorum, ut ita
 dicam, cantu suam non colorarent oratio-
 nem. At eorum unus hunc mihi demum ex
 animo scrupulum evellit; qui, interrogatus
 de hac ipsa re, inquit, Verba pura atque di-
 lucida, sententias apertas, & intelligentiæ
 cujusvis obvias, à delicatis & elegantibus
 hujus seculi auribus respui; ab eisque infini-
 tum quiddam expōsci. Sed infinitum istud
 nusquam cum reperiatur, illud, persuade-
 re conantur, in obscuritate sermonis ac
 sen-

sententiarum , tanquam aliquod mysterium , involvi. Atqui iudicium suum cum istorum auctoritate conjunxerat amicus ille noster , qui suis commentariis , regi , vel , ut Cicero inquit , deo Philosophorum , Platoni , an lucem an tenebras ? attulit. cum illi carmen egregium nobilis cujusdam poetæ legissem , atque expectarem ut clamaret , Pulchre , bene , recte ; non potuit melius ; alia , quæ admiratio dicat ; ecce tibi , mentum intorquet , atque , Luculentum est , inquit , hoc carmen , sed nimis apertum ac dilucidum : quanto illud esset illustrius , si plurimum doctæ obscuritatis includeret ? Hoc responso cerebrosus aliquis exarsisset ; ac derisori illi in os involasset. Quis unquam , obsecro , ex tenebris lucem expectet ? quis perspicuitatem sermonis cuiquam vitio vortit ? quis non eidem in orationis laudibus primas detulit ? Prima , inquit Cicero , laus in oratione , perspicuitas. Eam vero Quintilianus modo primam , modo summam eloquentiæ virtutem appellat , nullamque vitiosiores esse orationem affirmat , quam quæ egeat interprete ; denique , Est , inquit , obscurior , quo quisque deterior ? Quid multis moror ? poema ceteroqui egregium , quod esset apertum atque dilucidum , non aliam ob causam in

reprehensionem hominis docti incurrit. At hic fortasse ex eo hominum numero erat, qui, ut est in sacris litteris, lucem tenebras, & tenebras lucem appellant. Redeo ad istos rerum magnificarum, admirabilium, infinitarum artifices ac magistros; qui, quo auribus infinita expectantium occurrant, verba propria, ac rem explicantia, tanquam ante pedes posita, rejiciunt; abdita, abstrusa, recondita, è tenebris evocant; quæ nemini unquam sano venerunt in mentem, excogitant; eaque non circumvestiunt verbis, ut possint intelligi, sed sepiunt fumo atramentoque, ne percipi queant: semper tumidi, semper inflati, alas pandunt, montium vertices appetunt, nubes & inania captant. Qui, ut ceteris vitiis careant, vel hoc ipso corrupti existimandi sunt, quod tumidi: ut enim corpora, non robore, sed valetudine inflantur; ita etiam oratio, non viribus, sed morbo vitioque turgescit. Verum his artibus sese imperitis adolescentibus venditant, qui ea, quæ non intelligunt, admirantur & obstupescunt. In quo Plautino illi coquo similes inveniuntur, qui, ut se lenoni, cui coctum ibat, commendaret, culpabat condimenta omnia, quibus alii coqui cœnas condiebant, ac nova & portentosa condi-

men-

mentorū genera afferebat, cicilendrum, polindrum, macidem, cicimandrum, hapalopsidem, catara&triam; quæ omnia non rerum certarum, sed nugarum inanissimarum sunt vocabula. Ita etiam isti, non item ut ceteri Latini scriptores, orationem suam condiunt; videlicet sententiis acutis & gravibus, translatis illustribus, & ratione sumtis, verborum complexione tenera atque flexibili; sed sententiolis puerilibus ac prope ridiculis, translatis immanibus ac furiosis, vi impetuque tanquam in alienam domum irrumpentibus, denique inextricabili verborum nexu, omnia perturbant ac miscent. Sed cum in omni oratione eorum vanitas manifesta est, tum maxime in exordiis se prodit. non enim naturam ducem sequuntur, quæ res maximas atque admirabiles levioribus principiis prætexuit; sed statim ab initio montes transvolant, seque nubibus inferunt: nam minus altam & exaggeratam fore ipsorum orationem existimant, nisi se universa profundat, atque ita repente in altum advolet, ut mentis aciem effugiat. Venit mihi in mentem hoc loco Cæstii declamatoris, qui apud discipulos suos in schola responsurus orationi Ciceronis pro Milone, hoc utebatur principio: Si Thrax essem, Fufius es-

sem ; si pantomimus essem , Pantillus essem ; si eques , Melison. Aderat ibi forte Seneca pater ; qui , ut erat acri vir ingenio , & iudicio singulari , non continuit bilem , sed palam cunctis audientibus dixit , Si cloaca esses , magna esses. Tum risu omnes , qui aderant , emori ; Cæstius obmutescere , ut , qui Ciceroni responsurus erat , Senecæ quid responderet , non haberet. Illud in primis ridiculum , quod Seneca , nactus deinde in foro Cæstium , oborto collo , ad omnes eum Prætores abstraxit , & vario litium genere vexare joci causa cœpit. Verum cum , intervenientibus amicis ad spectaculum , & rogantibus , dixisset , molestum se amplius non futurum , si jurasset , disertiores esse Ciceronem quam se , nunquam , ut hoc faceret , vel joco vel serio effici potuit. Quid ? putasne quod Seneca , si revivisceret , hanc ab istis confessionem terroribus vel minis exprimeret ? Equidem arbitror , millies eos antea vitam amissuros , quam se Ciceroni postposituros. Vivit ; etiam nunc vivit , ac sine metu lapidum securus ante omnium ora perambulat , qui , cum Ciceronis orationes summis laudibus efferrem , quasi stomachans ait ; Quid , malum , in orationibus illis tot laudibus dignum invenias ? pueri hodie

die ita scribunt ut Cicerō. At ego hunc hominem non in jus ad Prætorem per jocum vocarem, sed, si regnum hic obtinerem, in vincula duci, atque ad triremim rapi juberem, ut remigum numerum augeret. Sed audi alterum, non minus flagitiose insanientem. Loquenti mihi de his ipsis Ciceronis orationibus apud unum de istis, qui volunt omnia calamistris inurere; Sunt, inquit, Ciceronis scripta telæ cujusdam instar simplicis ac nudæ, quibus ego varia ornamentorum genera, tanquam Phrygium aliquod opus, insuerem. Si adæo olim in rhetorem quendam exarsi, quod Manutium, Tursellinum, Bunellum, primæ notæ homines, ut nullius ingenii, carpebat, ideo quia eorum scripta ornamentorum, ut ipse agebat, sed ut ego soleo dicere, ineptiarum nihil haberent; quo stomacho, quæ iracundia me esse elatum in illum existimas, qui, hoc eodem genere, eloquentiæ parentem circumscriberet? Quod si huic inornatus est Cicero, in quo omnes flores, omnes verneris, atque omnis elegantiae nitor elucet, in cujus labris multo verius, quam olim dictum est de Pericle, eloquentiæ dea sessitavit; ornatusne Cæsar videbitur, cujus commentarii nudi existimantur ac recti, omni ornatu orationis tanquam veste detra-

& a? At si ineptus, stultus, insanus semper
 est habitus, qui eisdem commentariis, præ-
 bitam sibi potius, quam præreptam scri-
 bendi materiam existimavit; videat ille, qui
 ornatissimas Ciceronis orationes, tanquam
 infulas ducit, in quibus pueriles aliquas de-
 licias depingat, vel tanquam fores vel pa-
 rietes habet, quos elogiorum carbonibus
 impleat, ne in eorum stultorum numero
 sit habendus, quorum tutela ex lege XII ta-
 bularum ad agnatos & proximos abeat. Sed
 ego fortasse stultus, qui ea, quæ non intel-
 ligo, reprehendo, & inscitiae meæ culpam
 in abstrusam atque reconditam doctrinæ il-
 lorum vim varietatemque conjicio. Quam-
 obrem redeo cum illis in gratiam, me-
 que ad illorum sapientiam prope nihil esse
 confiteor: verum posthac ab eorum libris
 abstinebo, meque tecum vel cum iis oble-
 &abo, qui volunt esse nobis, qui non su-
 mus eruditissimi, familiares. Sed venit mi-
 hi in mentem, mittere ad te hoc breve opus,
 quod proximis æstivis diebus, fallendi tem-
 poris causa, ex quibusdam narrationibus,
 olim à me scriptis, paucis quibusdam ad-
 ditis texui. In quo si non eadem, quæ in
 tuis scriptis, orationis copia ac nitor elu-
 cet, eadem saltem mens & conatus appa-
 ret. Nam summa data est opera à me, si ta-
 men

men assequi potui, ut orationis cursus pure ac dilucide, velut liquidus ac profluens amnis, nulla verborum insolentia, nullaque obscuritate, tanquam cœno, perfusus, devolveretur. Sed ego insanio, qui, dum me debeam exolvere, tibi arctius obstringo: quantum enim ad id, quod tibi debeo, accesserit, si aliquid temporis in his percurrentis insumseris? Fac, me diligas, & valetudinem tuam, publico litterarum bono, cures diligenter.



L E C T O.

L E C T O R I
S A L V T E M.



*Pere precium me esse factu-
rum existimavi, si ab eis,
qui ad hac inspicienda ag-
grediuntur, pauca quaedam
antea preter. Primum, ut
persuasum sibi esse velint,
nullius à me hominis, quem quidem ego no-
verim, famam, hac narratione lacerari car-
pique; sed eos tantum mores exponi, qui jam
inde ab hominibus natis omnium populorum
judicio damnantur ac rejiciuntur. Deinde
nullam Remp. earum, quæ nunc vigent, in
hac civitate, quam ego describo, derideri at-
que contemni; sed improbis civibus ea vicia
assignari, in quibus, qui mœnibus eisdem
continentur, præsertim labuntur & cadunt:
ad eum finem, ut, prope in conspectum ad-
ducta deformitate sua, contemplantibus odi-
um ingenerent. Postremo, qui hæc attige-
rint, pro comperto habeant velim, in hac
scriptione nihil tam mihi fuisse propositum,
quam voluptatem aliquam legentibus que-
rere.*


rere. nam, qui ab iis se maxime vitiis abstinent, quæ in aliis reprehendent, erit causatur latenter ac festinantius prodeant, virtutibus longius: qui vero eorum aliquibus se esse affines intelligent, deformitate eorundem commoti, dabunt operam, Deo iuvante, ut ab eisdem emergant, & ad honestatis terminos, unde recesserunt, quam primum regrediantur.



A R G V-

ARGUMENTVM.

CVM Sejani conjuratio, contra Tiberium ini-
ta, palam esset, Flavius Vopiscus Niger, &
Paulus Æmilius Verus, ejusdem conjurationis
conscii, veriti ne indicarentur, statuunt, fuga
sibi consulere. quamobrem consensu navigio,
quod in Africam solvebat, post longam ac pro-
speram navigationem, adversa tempestate abre-
pti, ab eaque diu multumque exagitati, in unam
ex insulis Mauritaniae, Eudemia nomine, aliis
etiam Mauris incognitam, abstrahuntur; ubi,
naufrazi & incerti vagantes, à Gallonio, cive Ro-
mano, qui quinquennium ante eodem tempesta-
te delatus fuerat, excipiuntur, & partim ab eo,
partim suis ipsi oculis, de eorum hominum mori-
bus multa percipiunt.




IN EFFIGIEM
IANI NICII
ERYTHREI.

T Alis ab Ausoniis Erythraeus mittitur oris.
Plaude, Batave : tuos intrat imago sinus.
Sua da os, suave micat ; recreat facundia vultus :
Queque labris nequit lima , dat ipsa libris.
Irrita sedulitas , absentem fingere : presens
In Sophia chartis notior ille suis.
Tibri Pater , tales mittas, ditissime, nobis :
Doctior a. tandem ditior Ya fluet.

I. R. Ingelius, I. G. Amstelodami,
Octobris MDCCXLIV.

IN EFFIGIEM
ERYTHREI



IANVS NICIVS
ERYTHRÆVS.



A M Sejani conjuratio palam illu-
xerat, & Tiberii crudelis animus in
omne genus feritatis eruperat, cum
ego Flavius Vopiscus Niger, & me-
cum Paulus Æmilius Verus, qui in
ejusdem conjurationis societate, tan-
quam in equo Trojano, includeba-
mur, veriti ejus sævitiam, noctu
clam navim, quæ in Africam solvebat, ascendimus, ut
inde in remotissimas orbis terræ partes transferremur,
ubi neque Tiberii, neque urbis nomen audiretur. Sed
votis nostris fortuna, largius etiam quam optabamus,
occurrit. Nam, cum aliquandiu tranquillo placidoque
mari vecti essemus, decimo post die, sævo & implacabi-
li uti cœpimus. Etenim subito inhorruit, atque erum-
pentibus undique ventis ita desæviit, ut aliquot post
menses, naufragos nos & pene perditos, armamentis fe-
re omnibus amissis, in longinquas & incertas regiones
abstraxerit. Itaque sarcinulis nostris collectis, in quibus
erant geminæ complures, atque auri magna vis, in ter-
ram descendimus. Ac primo vastæ regiones occurrunt,
desertæ; nulla in illis arbor, nullum ædificium, nullum
culti soli vestigium. tum aperuere se campi, virenti gra-
mine læti, omnique florum varietate vestiti; liquores
amniū perlucidi; lacus limpidissimi, dulcibus aquis
passim manantibus decurrentibusque collecti; colles a-
mœnissimi, vitibus arboribusque consiti; quorum unus,
paulo eminentior ceteris, impositas sublimi vertice fe-
rebat ædes, modicas illas quidem, sed lepide factas at-
que venuste; ante quas formosissima morus, depellendi
æstus causa, ramos late fundebat. Quem locum domino
ad quietem animi & delectationem quæsitum esse, doce-
bat inscriptio ædibus præfixa.

*Formosi colles, Bacchi suprema voluptas,
 Et jucunda oculis arva beata meis,
 Fœcunda valles, semperque virentia prata,
 Qua vaga muscosis diffugit unda jugis;
 Hoc date pro votis, ut mens oblita malorum,
 Ocia pacatis degat amica locis.
 Elysios vobis jam sic non præferet agros,
 Notaque felici flumina ducta solo.*

Loci amœnitas, & lassitudo, fessos ad requiem vocabat; sed fames, & cupiditas cognoscendi, quo cœlo teneremur, quodque hominum genus ea loca teneret, progredi longius cogebat. Sed vix millia repsumus tria, cum nova rerum facies se offert; loca horrida, inculta, vepribus ac spinis obsita; speluncæ in incredibilem altitudinem depressæ; aditus asperi ac perangusti, modo ascensus, modo descensus, atque in præcipitia. Sed hæc quoque incommoda evadimus, & in æquatam agri planiciem devenimus: rursus flores lectissimi, aquæ perennes, arbores procerrimæ ac viridissimæ, & in summa ejus agri planiciæ, horti perpetua macerie conclusi conspiciuntur. In quorum aditu hoc hexastichon capitalibus litteris affabre insculptum perlegimus,

*Præcípites inter quas nunc Lucania montes
 Delicias nutrit, visere quisquis amat,
 Ne loca præruptis mirere horrentia saxis,
 Et sterilem denso robore fessus humum:
 Ad nova tantarum siquidem miracula rerum
 Debuerant faciles non patuisse via.*

Et quia loci cultus & elegantia spem dabat, brevi affuturum, qui nos certos faceret, quo sub cælo, aut quibus in regionibus animam duceremus, membra, longo itinere defatigata, in herba projecimus, sub umbra, quam multæ atque proceræ ulmi, ad opacandum eum locum patulis diffusæ ramis, efficiebant. Nec spes fefellit. nam haud ita multo post, magno cum strepitu, pessula ingentia foribus hortorum obdita removeri sentimus: atque ecce tibi, nobis sese in conspectum dat vir quidam, peregrino sane cultu, sed facie urbana, planeque Romani generis propria. Qui simul ut nos vidit, suspexit in cælum, & Grates, inquit, tibi ago, summe sol, vobisque

bisque reliquis, cælites, quod ego præter omnem spem conspicio in his regionibus nobilissimos adolescentes, populares meos. Sed quisnam casus vos huc detulit? facite me quamprimum ut sciam, nam consilio, atque etiam re, & opera juvero. Tiberii, inquam, sævitia, & Sejani conjuratio, nuper admodum detecta, cujus conscientia ambo devincti tenemur, nos in fugam impulit, ac tempestas in hæc loca projecit. Quid audio? inquit ille: Sejanus conjuravit in Cæsarem? At me Sejanus olim intimum consiliis suis habuit, cupiditatum suarum administrum ducemque præfecit: ego sum ille Gallonius, qui, ut saltem fama novistis, comitate facetiisque eram omnibus carus; sed, urbis perturbatus, Olysiptionem migrare statueram, ibique apud hospitem meum, quidquid reliquum erat, vitæ traducere. Itaque abhinc quinquennium, convasatis rebus carissimis, ac poetarum, oratorum, historicorumque fere omnium voluminibus in unum coactis, navem conscendi, sed non mihi minus quam vobis Neptunus imposuit, nam placide primum dorso exceptum tulit: tum velut equus acer & indomitus cœpit concussare, ac me velle dejicere: denique omnes cælestes maritimosque terrores diu perpeßum in hoc litus ejecit, non magis vobis, quam mihi ignotum. Sed, pro re nata, cecidit mihi sane res non infeliciter. non enim deferri quoquam poteram, ubi vellem esse libentius quam in hac insula. nam inveni hic homines voluptuarios multos, ac gutturi deditos, &, quod rem continet, præter nonnulla vocabula Græca, omnes Latine loquētes. Etenim, qua tempestate Scipionem Africanum, in Africam trajicientem, cum adversa tempestate conflictatum esse Cælius enarrat, ajunt, duas Romanorum militum triremes, vi ventorum à ceteris avulsas, fuisse in hoc litus abstractas. Sed milites in terram egressos, incolæ hujus insulæ benigne & humaniter exceperunt; ac primum hospitio, tum affinitate sibi jnnxerunt; postremo eorum sermone assuefacti, vernacula lingua paulatim omiſsa, Latine loqui cœperunt. At fuere præclara ingenia, quæ, cum se ad scribendum contulissent, egregia ac præclara multa, tum soluta oratione, tum versibus ediderunt, ac tum maxime, cum meo adventu Virgilii,

Ciceronis, Salustii, Cæsaris & aliorum hujus notæ auctorum, scripta aspiciendi potestas accessit; quos auctores hodie nemo est, quin habeat, quin legat, quin imitetur, præter paucos ineptos. Atque hæc una est ex insulis Mauritaniæ, Eudemia nomine. Sed interea, dum regionis hujus mores & statum vobis expono, reficite vos quæso esca & potione, quorum maxime indigeris. Statimque afferri jussit farcimina aliquot, caseum bubulum, veterem ac recentem, panes filigineos, frusta carnis vitulinæ assæ, capones semefos, præterea vina vetusta ac generosa. Ille vero, dum nos sic strati in herba discumbimus, Ita, inquit, ut occæpi dicere, postquam me Neptunus tres menses integros in ventre habuit, demum in has regiones evomuit. Vbi dynastæ ad quindecim summo cum honore & auctoritate rem gerunt, qui capiunt sibi sortito quotannis Regem unum, qui ceteris præsit, & summam imperii teneat harum regionum. Dynastæ vero, quod dixi, si, antea quam in eum ordinem cooptentur, uxores habeant, cum illis in summa rerum omnium abundantia, ætatem agunt; sin autem illis careant, nihil est, quod de uxore ducenda amplius cogitent: immo, qui sunt ejusmodi, si in eo magistratu fœminæ notitiam habuisse comperiantur, in magnam apud omnes infamiam incurrunt. neque est, quod putent, sua se posse flagitia occultare; ea enim, cum non humili obscuroq; loco sed edito & illustri admittantur, omnium statim oculis patent. Itaque, qui ejus honoris sunt cupidi, summæ sibi continentia legem indicunt, in omni victu cultuque fines modestiæ non transeunt, non rhedis auratis utuntur, non circumpedes sericatos circa se habent; pecunias, quas ex suis sacerdotiis redigunt, in usus pauperum conferunt: conciones quotidie ad populum habent, quibus popularium vitia acriter insectantur; ac præsertim iis persuadere conantur, non una cum corporibus animos hominum interire, sed esse æternos, ac superesse aliquid post mortem, quod ad ipsos pertineat; neque tricipitem apud Inferos Cerberum, Cocyti fremitum, transvectionem Acherontis, mento suinmam aquam attingentem siti enectum Tantalum, illudque, quod Sisyphus versat, saxum, inexorabiles judices Minoem

& Rhadamantum, fabulas aniles esse ac poetarum pictorumque portenta, sed certa atque gravissima apud Inferos improbis constituta supplicia. Atque interdum accidit, ut, quos genus hoc vitæ præter modum delectaverit, post mortem in Deorum numerum referant, eisque templa, aras, flamines instituunt, passimque ab omnibus ad eorum aras vota nuncupentur, victimæ cædantur, juramenta concipiantur. Sed quamvis hic apud eos honos longe maximus habeatur, adeo ut supra addi nihil possit; attamen si quis eum promerere studeat, huic homini pauci deos propitios, plerique iratos putant. nam præstare ajunt multo, unum diem in summis voluptatibus esse, quam multa sæcula in hominum memoria vigere. Longe alia est eorum ratio, qui sunt uxoribus præditi, iis enim, diis hominibusque omnibus approbantibus, licitum est, suo arbitratu vivere, voluptatibus indulgere, longe sumptibus progredi: iis permissum videtur, ut ex pecuniis, quas ex pinguibus sacerdotiis, quibus præditi sunt, colligunt, uxoribus in redimiculum præbeant, in collum, in crines; ut eisdem domos ac villas in urbium modum ædificent, Attalicis peristromatis ornent, supellectile aurea instituunt; (nam argentea apud eos eviluit;) rhedis serico constrictis, multoque interlitis auro, equos preciosissimos addant, sericis item atque auratis ephippiis ornatos. Denique persuasum est omnibus, in uxores eorum, quos vel meritum, vel ambitio, vel fortuna, vel casus in id dignitatis fastigium evexisset, omnem regalis opulentiae cultum convenire, quo una cum maritis fruuntur. Sed omnes simul Dynastæ, tum cœlibes, tum ii, quibus sunt uxores & liberi, de omnibus controversiis publicis una cum Rege constituunt, sacrificia procurant, sacerdotia inter se divisa habent; ingentes eorum redditus, quorum magnam partem in suos usus transferunt, ad victimas cœmendas, quibus Iovi, Minervæ, Apollini ac ceteris Diis sacrificent, atque ad ministros complures alendos, conferunt. Hic cum paululum interquievisset, Paulus Æmilius, redintegratis viribus, Dij, inquit, dent tibi quæ vis, nunquam esca una bene de me inervit magis, quam prandium, quod mihi dedisti. Sed illud nobis expedi; quis-

nam est hortorum istorum dominus, qui, ut inscriptio fronti affixa pollicetur, sunt octavum mundi miraculum? Tum ille, Non hos modo, inquit, hortos, sed etiam circumjectos hortis campos ille possidet, cui ego meas operas locavi. Hic est Dynasta Plusius, copiis, auctoritate, atque opibus ceterorum facile princeps. hic artis coquinariæ, cujus peritissimus habeor, in primis studiosus, quia bonas cœnas & prandia concinno, universæ familiæ quasi habenas mihi tradidit. itaque sum promus, condus, atriensis, prægustator, carpus. nam quæ apud vos servulorum sunt munera, hic liberis atque nobilibus mandantur. ego cocis, ego cellariis impero; ego contumaces, ac minus frequentes, mercedis, vel diariorum parte aliqua multo, neque quisquam mutire aut hiscere auder. Tum, Tu igitur, inquit Æmilius, si tibi est ocium, & si dominus ne vult, duc nos quantum potest in hortos istos; cupimus hercle eos aspicere. Vt lubet, inquit ille, nam & ego ociosus sum; & domino nihil gratius potest accidere; quem in summa rerum omnium abundantia non solum luxuria, sed etiam luxuriæ fama delectat. At ego de auro sollicitus, quod ferebamus, Quæso, inquam, Galloni, locum aliquem tutum inveni, ubi has sarcinas deponamus, quas in humeris usque à mari gestavimus. Bono animo este, inquit ille; hoc ad me recipio. Sumtasque in manus; Hui tam graves has, quæso! ait; ac pueris, quos secum habebat, portandas tradidit. Facta igitur potestate introeundi, primum in æquam & quadratam agri planiciem venimus, multis arborum, florum, herbarumque partitionibus ornatam & distinctam; in cujus medio fons nitet ingenti magnitudine atque admirabili opere factus: totum opus ab inferiori parte quadrilaterum est, à superiori rotundum. Ab inferiori per quatuor scalarum ordines ex æquo distinctos ad superiorem ascenditur. Vbi magna ex basi, plurimis succincta monstribus, inter leones quatuor totidemque gigantes è marinore ingens vis aquarum erumpit, & in subjectum defluit lacum; refunditurque per multa leonum capita, cancellis ibi circumductis affixa, in subjecta receptacula; & inde per occultos meatus ad alia leonum capita fertur, alteris cancellis paulo infra per-

perductis hærentia, ut iterum refluat. At verò pars inferior ob quatuor eos aditus, unde in superiorein aditur, quatuor etiam in partes scissa atque distracta relinquitur, quarum unaquæque pelagi cujusdam imaginem refert, tam prope ad similitudinem veri, ut, infra breve ejusdem spacium, æquoris imminetatem agnoscere, in liquidi fontis nitore similem placido mari colorem aspiciere videaris. Ad hæc, singulæ in singulis pelagis naves, ex malis & antennis tenuem ac similem velis humorem extendentes, cum tritonibus ternis buccina aquam fundentibus, tanto artificio confictæ versantur, ut naves non immòbiles stare, sed totis pelagis ferri, nec tritones buccina aquam spargere, sed inflare sonum leniter dicas. Prætereo obeliscos, vasa ex topho, ceteraque ornamenta, quibus omnes undique cancelli extrema omnium lacuum ora cinguntur. Nam alia longe admirabilia parvis & usitatis in rebus oculos immorari non sinunt. Etenim in summa ejus soli planicie binæ ædes excitantur, forma, magnitudine, cultu geminæ atque simillimæ. non alias magis regalis opulentia cultus exornat; depictæ porticus clarissima toto orbe terrarum maria & villas exponunt; impositæ ædibus præstegæ circumjectos late campos & colles ostendunt; hic laquearia, hic camerae extantibus, ac prominentibus figuris interlitis auro conspicuæ, hic picturæ summorum artificum manu elaboratæ, hic lecti pulcherrime strati, hic conopea, hic stragula vestis, hic denique quidquid Regum, usitatas delicias fastidientium, in aulis, luxuries invenit. Media inter ambas ædes tellus molliter in theatri formam attollitur; opinor, ut inde excitata tanti operis admiratione Natura tanquam artis ludos aspiciat. Per id theatrum, duplici scalarum ordine, multisque præterea aliis transversis, sed in unum exitum coeuntibus viis, in aream lapideis in aditu cancellis instructam adscenditur. Hic oculi, qui rebus à se antea visis nihil fieri posse perfectius existimaverant, nova atque improvisa re percussi, judicium suum contemnere incipiunt. Positæ in medio platani, non magis ad umbram hospitalem consociandam, quam ad conciliandam sua sibi proceritate ingentem admirationem, ramos extendunt.

Hinc & illinc ambulacra suis extenta porticibus, ex duplici columnarum serie, non ita latum, sed gratum villarum amœnitatem persequentibus diversorium præbent. Sed, magno vescendi studio incensis nobis, ingens pulsantis strepitus ab ostio veniens excipitur. missus à Gallonio, qui inspiceret, quisnam homo ita fores illas impeteret, refert, venisse à Dynasta Bibulo nuncium, qui eum opere maximo evocaret. Intromissus in hæc verba loquitur; Summus Bacchi præses ac Dynasta Bibulus, herus meus, jubet, nisi suam gratiam negligis, jam ut ad sese venias; cupere enim, ait, coram tecum de rebus gravissimis agere. Tum Gallonius, sane commotus, & majorem aliquam esse causam ejus festinationis suspicatus, Nuncia, inquit, domino tuo, jam ibi me adfuturum; & in nos intuens, Nihil, ait, à me faciendum est prius, quam ut hujus imperiis obediam; hic est enim magnus ille Bibulus, qui amplissimo munere præditus, magnam apud omnes retinet auctoritatem: vos me audacter sequimini: licebit enim, hæc præsertim occasione oblata, Urbis formosissimæ speciem, atque horum hominum vultus ac mores agnoscere: sed ne peregrinus habitus, omnium in se oculos attrahat, neque cogat quoscunque adire, appellare, quid velitis, quid veneritis, qui sitis, cujatis, unde sitis, vestes quas habetis, deponite, & induite alias, quas vobis præbebo, hujus regionis proprias. Cui ego, Amice, inquam, suades; age ut lubet: duc quo vis; haud sane usquam à pedibus abscedemus tuis. Mutata igitur veste, horam circiter diei undecimam, urbem magnificentissimam intramus: forum amplissimum & elegantissimum, basilicis, templis, porticibus septum adimus. In cujus summo clepsydra aspiciebatur, cum hoc epigrammate:

Vt petit ima gravis clepsydra conditus humor,

Sic cadit ætherco missus ab axe dies.

Heu properata nimis matura fata senectæ,

Si fugiunt anni more cadentis aquæ.

Si vix orta atas est, cum sua funera sentit,

Quod datur exiguum tempus, abibit iners?

Sola manet virtus, rapidis immobilis annis;

Cætera nativo pondere pressa ruunt.

Et quia anni fervidissimum tempus erat, credo aucupandi frigoris causa, multi viri nobiles, multique etiam, qui vespere vivunt suo, celeberrimas urbis vias, largifluos fontes, latissimas plateas, equis rhedisque vecti reptabant. Sed oculos in primis nostros, quorundam ad se splendor attraxit, qui, rhedis multo fulgentibus auro ostroque delati, quacunque pergerent, turbare ac permiscere omnia videbantur: nam eorum circumpedes turbam submovere; equos, asinos, carros, obviam venientes expellere; præterea cunctos tanquam Diis de Cælo delapsis illis assurgere, decedere, capita aperire, in genua procumbere, equos, ac rhedas sistere. Quod cum nos Gallonius eo splendore quasi perstrictos mirari adspiceret, Nolite mirari, inquit: hi sunt Dynastæ illi, quos dixi: viderisne ut iis honor habeatur, tanquam præsentibus Diis? Vah! inquam: qui cultus! quæ luxuries! at Romæ nemo senator, nemo Consul, ac ne Tiberius quidem, rerum dominus, hujus opulentia luxu decoratur: nam ille in omni cultu vix civilem modum excedit. Hoc interim spacio ad ædes magni illius viri venimus, vestibulum & ambulacrum ante ædes luculentum aspiciamus, intramus latius, ac primo pedem intro in peristylum ferimus. In cujus summo fons erat, eo dynasta dignus: Bacchi simulacrum, factum in marmore, cado insidens, mejere videbatur in lacum non subjectum, eratque magna in basi grandibus litteris incisum hoc epigramma:

*Impositum lacui magno qui cernis Iacchum
Mejere, sed liquido rore replere lacum,
Digna velit Baccho largiri munera, posce,
Pro gelidaque unda fervida musta dare.
Tum pateat vesica illi, nec calculus obsit,
Semper ut expulsa vina bibantur aqua.*

Gallonius rogat unum ex familiaribus, ut domino renunciet, se ejus vocatu accitum adesse: proinde imperet si quid velit. Respondet ille, omnes tunc ad eum aditus interclusos esse: nam psittacis, lusciniis, felibus, simiis, canibus, quos semper circa se habet, quosque plus oculis suis diligit, cœnam dabat, ac suis ipse manibus cibum præbebat. Cui Gallonius, Fac, inquit, sciat, me adesse,

cetera nihil moror. Interea dum ille it reditque , complura parietibus epitaphia, hinc & illinc affixa , conspicio. rogo quid sibi velint. respondet mihi unus, Hæc sunt epitaphia felium & canum defunctorum , quos dominus in deliciis habuit , quosque ipse multis cum lacrimis supremo mandavit officio. At ego in pugillaribus, quos semper mecum fero, cœpi ea describere.

Epitaphium Felis, nomine Nicolosæ.

*Si quæris, Nicolosa fui, non improba felis ;
Cui tulit immeritam sumpta lacerta necem.
Molliter erubui moriens incumbere lecto,
Languida vel duro fundere membra solo.
Pugnâque diu, morti non cedere nixa.
Sed frustra ; heu tandem perfida plus potuit.
Sic mihi perque domos, perque ardua tecta vagari
Semper, & æternum vivere posse datur.
At vos depictas squallentia terga lacertas,
Lurida in apricis insequar umbra locis.*

Epitaphium Ruspoli Catelli.

*Ergo tibi invisæ erunt flamina Parca,
Ruspole, amæ domini deliciaque tui.
Non ita sydereos violavit Lesbia ocellos,
Passeris extincti tristia fata gemens,
Vt potuit lacrimis temerare cadentibus ora,
Cum daret ille tuas munera ad inferias.
Sed valeant luctus. nam te non caca tulerunt
Tartara. sed celi lucida signa tenent,
Vt, canis arenti depulso sidere, posthac
Mitius æstates sub tua jura fluant.*

Cœperam aliud alterius felis epitaphium describere, cum Gallonius accersitur. accurrimus , scalas ascendimus, introducimur in eam diætam , ubi vir ille princeps epulabatur, in lecto eburneos pedes habente, ac purpura auroque constrato , obsessus undique felium & catellorum turba, quorum alius insistebat illi in humero , alius in collo, alius cibum petebat , alius uncipeditibus bolum è mani-

è manibus eripiebat ; alius latrabat , alius placide accubans domini misericordias expectabat. At ille , ubi nos venisse animadvertit, Gallonium intuens, Scin , inquit, quamobrem huc te accersiri jussi? Non equidem, inquit ille; sed, imperiis tuis obsequens, huc me conjeci , & expecto quid velis. Ego dicam tibi, inquit ille. Vidi hodie dum ociosus per urbem vector , in fenestra privatae domus ad Vestæ, ludere cercopithecus duos , quibus nihil dixerim me vidisse in vita venustius: fac mihi eos dono, precario, vel, si fieri aliter non potest , precio abducas : neque operi, neque sumptui parcas : nam ardeo cupiditate incredibili eos habendū. Scio , quos dicas, inquit Gallonius: mox imperium tuum exequar: & quamquam eorum dominus ita sit versutus & callidus, ut dolis capi difficulter possit, tamen, quo tibi animum expleam , fingam, inveniam, comminiscar rationem, qua os illi pulchre sit sublitum. Magnifice, inquit Bibulus, polliceris: at pol benefacta me hortantur tua, ut remunerer te grato aliquo munere: sed multa non possum ; & pauca pudet dare. Credo, ait Gallonius; ita vestra est benignitas. Abi igitur, inquit ille; ac rem strenuus age. Estne aliquid aliud, replicavit Gallonius , quod tibi mea ars efficere hoc possit amplius? Recte , ait. Itaque discedimus, ad ostium devenimus ; atque ibi hominem squalidum, ægrum, inter manus delatum, in gestatoria sella collocari videmus; quem ubi Gallonius aspexit, continuo, Quid istuc, inquit, rei est? ô mi Agrostes? (id illi erat nomen,) unde hic pallor in vultu? unde hæc in membris infirmitas? Quoniam miser febris quotidiana laboro; & male metuo, nisi quis me Deus respiciat, ut ex hoc morbo convalescam , vel saltem ne multos menses eodem implicatus detinear. Æsculapium & salutem, inquit Gallonius , ne quid sit hujus, oro: bono animo es; mox febris abscedet, ita supercilium salit. Sed unde tātus hic repente morbus invasit? & quo nunc æger defereris? nonne, quæ tibi sunt opus, defert hic princeps, qui tanta caritate feras etiam bestias amplectitur? Respondet ille; Causam morbi sustinet perpetuus scribendi, vigilandi, & hac illac concursandi labor, dum huic inservio: at nunc, quia per ægritudinem nulli eidem esse usui possum,

in nosocomium proximo Æsculapii fano conjunctum deferor : hem, quo redactus sum miser ! Dum sic queritur, ecce tibi in tempore advenit adolescens, Fossio nomine, collecto pallio, sudans, anhelus, & Facinus indignum ! exclamat: itane vir longe doctissimus, scriptor egregius, poëta summus, optimis atque sanctissimis moribus præditus, in nosocomio publico tanquam unus aliquis ex popello morietur ? istud igitur immortalitate dignum ingenium, ista virtus, ista probitas, iis auxiliis indigebit, quibus inquinatissimi perditissimique homines sæpe abundant ? ergo te viri illi principes quos longa consuetudine usque devinctos habes, ita foede ac turpiter deserunt ? Sed, ut illi tantum in se dedecus attrahant, ego tamen meum erga virum optimum studium, operam, officium desiderari non patiar. Ite, agite, deferre enim in domum meam ; ego tecto recipiam, ego in meo cubiculo, atque adeo in meo lectulo collocabo : ego exquisitos tota Vrbe medicos cogam, neque quidquam patiar illi deesse, quod ad levandam ægritudinem proffit. His actis, pedes prosecutus est eum, gestatores identidem admonens, ut pedetentim irent, ac sedato nisu, ne succussu morbus eidem efficeretur amplior. Nos vero, quia id diei tempus erat, ad ædes Gallonii cum ipso contendimus. nam paulo ante, ut ad se in hospitium diverteremus, impetraverat. Iamque aberamus ab his propius, cum ab Herinagora quodam, nuper inter dynastas adlecto, litteræ eidem redduntur in hæc verba, Herinagoras Gallonio salutem. Amplissimus dignitatis gradus, quem nuper ascendi, postulat, ut domum & familiam ita uxori meæ mihiq; amplam & ornatam institutam, uti me dignum est ; & persona quam gero. Verum, quia absum ab Vrbe, cogor hanc illi provinciam demandare, cui maximam rerum mearum fidem habeam, cuique meam in primis existimationem caram fore arbitrer. Quamobrem peto à te, pro nostra amicitia, ut negotium suscipias, atque ædes mihi laxas magnificasque conducas, ac præsertim eum familiarium numerum cogas, qui meæ dignitati conveniat. Quod autem ad hominum genus attinet, ut meam sententiam noris : cupio homines formosos, elegantes, ac bene vestitos :

stitos : neque refert, si sint impuri & inhonesti : dummodo sint apti. atque etiam ea te cura libero , ut ex doctis ac litteratis viris unum, aut alterum seligas , qui sit mihi ab epistolis & à cognitionibus. nam quidquid huic generi hominum datur, disperit totum. hodie enim quisvis vel amanuensis vel leguleius recte satisfacere his muneribus potest. Illud in primis memineris , ut cocum mihi solum præter alios quæras , quique mortuis etiam coquere, quod placeat , possit. Atque , in eo omnes industriæ diligentiaque tuæ nervos contendas, velim. Da operam ut valeas. His litteris perlectis, Gallonius me intuens, Qualis tibi, inquit , videtur hæc indoles ? Egregia sane , inquit, atque præclata : neque boni quidquam est, quod ab ea sperari non possit. Sed dum magni illius viri sapientiam admiramur, qui in uno coco eodemque optimo tantum ponat esse ornamenti universæ familiæ : incautum me, neque animadvertentem , pene rheda oppressit. sed nescio quis brachio prehensum in alteram partem abstraxit, periculoque furripuit. Sed ubi me ex timore collegi, quæro, quisnam esset ille tam potens, qui rheda obvios obtereret ? Tum Gallonius arridens, Erras , inquit : non marem sed sceminam ea rheda circumvehit: hæc est Pasicompsa, Dynastæ uxor, nobilis mulier ac nota : genere atque forma , præterea libidine atque luxuria, similis Salustianæ Sempronix. nam à teneris, ut ajunt, unguiculis , lascivos amores ac vetitos, honestis permixtisque præposuit. itaque eximium semper aliquem habuit, cui clam virum se tota permetteret. nunc autem, viro orbata , genio multo magis indulget. nam quantum illi ætas detrahit formæ, tantum libidinis addit. & quia ob formam immutatam , non facile in amore invenit qui cum ipsa faciant mutuum , suis copiis, quæ sunt amplæ , aliquot filios familias patri parco ac tenaci devinctos habet. atque in præsentia nescio cujus adolescentis inopiam sustentat, cujus, medium ad Iannum, omnis fracta res est. Est tamen non nemo, qui calcitret, respuat, neque putet ejus dona esse tanti : ut de quodam adolescente narratur , cui non cessat missitare litteras, misere scriptas. quibus ita demum ille rescripsit: (nam apud me habeo earum litterarum exemplum.)

Cleo-

Cleobulus Pasicompsæ, plorare, & male
rem gerere.

*Improba maturo cum sis jam proxima fato,
Flebilibusque rogis;
Quid totis rabido correpta furore medullis
Me violenta petis?
Qualis in herbosis furiosa libidine campis
Torva juvenca bovem,
Incassum precibus facilem, vel flectere durum
Imperiis properas.
Nam longo turpem sæclo non fastus amantum
Elanditiaque decent:
Vsq̃ue colum, & lana imbellis, nigraque culina
Munera versat anus:
Illic fabellas, inter selemque canemque,
Ingeniosa refert.
Nixibus at crebris effœta, remitte puellis
Mollibus & pueris
Et citharas dulces, choreasque, fidesque canoras:
Tu tibi sume malum.*

Perlectis his literis, usque adeo elœta est ira, ut sine ulla dubitatione insanire omnibus ac furere videretur, minitari absenti Cleobulo, vociferari, lacrimas non tenere. sed ille nihilo magis ejus lacrimis vel minis moveretur, quam si sit codex aut silex. His dictis, Gallonii ædes ingredimur, ibique omnibus in rebus liberaliter accepti, divertimus, jucundi sermonis ansam, Pasicompsæ ira luxuriaque præbente. Nam P. Æmilius, Exprobratio, inquit, senectutis mulieri bilem in nasum impellit. muliere impura nihil contumacius. quæ semel pudicitiam & pudorem ab se dimisit, nunquam, pol, ne quadrigis quidem albis, adipiscitur postea. quo Ceres & Bacchus immigrarunt, inde pudicitia, dimissis manibus, evolat. mulier, libidine incensa, mare est, quod nullis neque fluminibus, neque rivis expletur. æstus luxuriæ, ut ignis, non suppeditandis, sed subtrahendis libidinis alimentis extinguitur. mulierum insatiabilitas, potest quidem admissarios plures ad languorem dare, non tamen modum

modum sibi statuere. si, genere ac divitiis ferox, libido defæviat, nullis neque juris, neque legum, neque existimationis repagulis inhibeatur; omnia sibi licere, nihil esse nefas existimat. sermones, objurgationes, & inonita sunt lapides impudicæ, quæ illi cerebrum excutiant, non bonam mentem injiciant. ut miser est homo, qui libidini servit! qui in catenis sunt, si possint, vincula rumpunt; qui amorì obtemperant, graviores semper ipsi sibi compedes indunt. pudicitia cum deformitate corporis sæpe convenit; cum forma foedus raro contingit. quæ pudicitiam adhuc intra honestatis septa concludit, caveat, ne evolet: nam captivæ avis est similis, quæ, patenter caveam nacta, effugit, nec posteaprehenditur. unicum mulieris ornamentum est castitas, quæ si amittitur, nihil in ea residet quod precium aliquod habeat. quisquis ex muliere, castitatis decore eversa, boni aliquid colligere studet, nudo vestimenta detrahère postulat. Hæc, pleraque his similia, locutus P. Æmilius, lecto sese commisit.

L I B E R I I.



ET longa maris tempestate jactatos, & itinere superioris diei defatigatos, tam arctus somnus excepit, ut non antea dissolverit, quam orta lux omnia compleret. sed tandem expergefatos, & cubile egressos, Gallonius invitat in hortos cujusdam Dynastæ, qui, ut ille narrabat, ex summis vitæ ac fortunæ sordibus ad ingêtes divitias pervenisset. Nam accepi, inquit, detineri ibi ægrum adolescentem, mihi carissimum; cupioque, nisi aliter vobis videatur, eum invisere. Sed non pigebit vos illuc venisse. nulli enim sunt horti in his regionibus, quos magis visêdos dicatis. Cumq; nos non nolle dixissemus, secum una perreximus. Atque inter eundem, quæsimus de Gallonio, cur, si omnes Mauriatri essent, ibi fere omnes albi nascerentur? Qui respondit, primum, eam insulam longo intervallo à ceteris Mauris esse disjunctam. tum, mulieres eas, postquam se cum Romanis

Romanis miscuissent, patribus similes liberos genuisse. Inter hæc, atque alia, duorum millium passuum viam emensi, ad hortos perveniunt: pulsamus ostium: aperitur: intramus: atque, ubi ea pulchritudo recens ad oculos meos pervenit, non horti nescio qui, sed cælum ipsum, atque adeo ipsa Iovis regia, mihi pateferi visa est. Nam foribus apertis, operis universi forma tota simul se obtulit, & in conspectu proposuit. quæ forma tantam habet pulchritudinem, ut nulla species ne excogitari quidem possit ornatior. etenim æquata agri planities, quæ adeuntibus prima se objicit, ambulacris septa compluribus, præclaris distincta fontibus, ac variis amœna floribus, præfert in summo theatrum, multis scalarum ordinibus, nativo è marmore instructum atque compositum: & ex singulis scalis plures tum ebullientes, tum effluentes aquæ, velut aspicientium turba ad fontem in media cavea positum spectare, & placido murinure tanquam faustis acclamationibus operi plaudere videntur. Hinc & illinc à theatro lapideis scalis in novum artis miraculum scanditur. Æqua & quadrata planities complures dispositas in quincuncem arbores sustinet, sepitque locum maceries regia lauro contexta. platani incredibili proceritate principem in medio locum obtinent: infra earum fastigium humiliores multæ ab utraque parte arbores subsunt, iis quidem proceritate dissimiles, sed dignitate ac præstantia simillimæ, siquidem regie lauri sunt omnes prope ad miraculum pulchræ: in medio, sub procerrimis illis plantanis, mensa marmorea, pedum fere sexaginta in longitudinem, & quindecim in latitudinem patens, extenditur, quam à summo ad extremum, relicto hinc & illinc commodo ad cœnandum spacio, plures leniter erumpentes atque in se redeunt aquæ interfecant, gratum convivis liquorem & frigus præbentes. nam voluptatem positus in conspectu fons affert, ipsi etiam arti admirabilis. etenim Triton factus è lapide sedet eques in cancro, admotoque ad os cornu inflare sonum videtur: diceres eum audire, tantam artificii subtilitas fidei mendacio facit, nisi hunc ab auribus errorem quinque late manantes ex cornu rivi depellerent, tum inter canceri brachia sustentura

ætura flumini vel magno aquæ vis pellitur in concham, refunditurque ab eadem per sulcos ipsi hærentes in lacum sibi subiectum, rejicientem & ipsum per multo plures sulcos aquam in alterum infra se positum longe majorem lacum; qui saturatus aquis, superioris exemplo, quod superest, totum regerit ante pedes, terra excipiendum. postremo hinc & illinc ab hoc lacu duo fluminum simulacra perinagna ad eum implendum tanquam auxiliares aquas ex urnis emittunt, nec sine præmio filicis, musci, capilli Veneris, aliaque herbescentis viriditatis, quam circa ea subjectus elicit humor. Iam vero locus egregius, & in primis amœnus, qui non prætereuntis velocitatem, sed contemplantis tarditatem & moram desiderat, poscere videbatur, ut esset, ubi moraturus hospes consistere ac deambulare tutus à solis injuria posset. Itaque ab utroque fontis latere columnæ excitatæ complures, porticus duas effingunt, quas, tecti loco, plures virium propagines ita undique ambientibus ramis atque invicem complicatis integunt, ut vix in densam umbram penetrare solis radius possit. Nunquam oculi hac specie & pulchritudine capti satiarentur, nusquam aliquid melius ac perfectius quærerent, nisi duplex scalarum ordo, post fontem, quem dixi, in trianguli formam extructus, diu delectatos, neque tamen satiatos, eo illos vocaret, ubi extremos artis conatus aspicerent. Primum cancelli scalis præfixi, præclari ad aspectum, & certis ex locis aquas ebullientes, fontem, quem præ se habent, ornant, atque augent. Tum locus, in quem ascenditur, rebus magnis & admirabilibus plenus. Hic ars, sibi ipsi æmula, à se ipsa vincitur; hic Natura artis, æmulæ suæ, conatibus favet. nam aquas, quibus illa res admirabiles præstat, majore vi copiaque suppeditat; hic nemora non temere nata, sed ordine posita, latiore campo excurrunt; hic avium cavæ, columnis exædificatæ nemora ipsa ambiunt & continent. In aditu vestibuloque speciosissimi hujus loci, declivi quodam solo, catena jacet è lapide, per quam aqua ad cancrum, de quo antea diximus, influit, tanto artificio, ut, contortæ, convolutæque in plures circulos aquæ, annulos as-
simulare; tanto strepitu, ut propter vium, impetumque quo

defluunt , catenarum similem sonitum edere videantur: hæc autem catena, longiore tractu perducta, demum ita cancri brachiis adnectitur, ut eum colligare constringe-
 reque, ne commovere se possit, existimes. Ingentes paulo supra eam catenam fornices è lignea materia facti, prosequentibus eos ederis ambitiosissimis, attolluntur, in regiarum molis similitudinem; qui fornices inter ædiculas quatuor fastigiatas amplam & angustam sine fastigio ædem includunt; cujus medium fons tenet, sepulcralibus monumentis non longe dissimilis, ab imo latus atque rotundus; angustus & acuminatus in summo, acumen efficiente aqua, egrediente sursum è patera. Ut totum hoc opus ad regum maximorum delicias, non autem ad ejus libidines factum videatur, qui ceteris specimen esse jubetur. His igitur diligenter à nobis perlustratis, villam ingredimur, amplam illam quidem & rebus omnibus instructam, sed quæ nihil ad hortos. Vbi in amœno, lucidoque conclavi, serico sub conopeo, jacebat adolescens, magis corruptus deliciis, quam fatigatus aliquo morbo. Cui Gallonius, Quid hoc, inquit, morbi est? Febris, respondet. Caruistine illa heri, Gallonius repetit, vel nudius tertius? cœnavistine? Cum hæc maxime loqueretur, mulier adolescens, passis crinibus, cubiculum intrat, capite parietes verberat; clamat, Me miseram, quid video? cur ægritudinem istam, quæ te macerat, in me transferre non queo? quid me fiat, si quid humanitus tibi contingat? Ille sane commotus, Ne te crucia, inquit, ne mihi ad morbum hoc etiam, aspectus tuus omnem vim morbi diripiet. Et, quo flendi ac lamentandi pausam faceret, opiparum illi prandium parari, ac dona plurima congeri jussit. Nos, mulieris pietatem admirati, magnum atque spectatum egregii cujusdam amoris exemplum inspexisse testamur; ac de eo, qui cubiculi fores tuebatur, exquirimus, quid ea ad illum ægrum mulier attineat? num soror, num uxor sit, num affinis, vel cognata? Qni, Nihil horum ea est, ait; sed meretrix est in primis subdola, blanda, fraudulenta, avara, Nanna nomine; quacum ille menses abhinc quatuor stupri consuetudinem habet, atque adeo apud hoc cœnum amoris clavo fixus inhæret,
 ut nullis

ut nullis amicorum neque admonitionibus, neque precibus extrahi queat; & nisi ad rationis terminos, unde longius abiit, se propere redigat, quantum intelligo, omnis ejus res, brevi meretriciam in domum exulatum abibit. Et quo melius hujus meretricis ingenium moresque noscatis, accipite doctum ejus dolum, in quo superioribus mensibus mercator quidam adhæsit. Hic amabat eam perditæ; ac, ne cum quoquam alio esset, magna mercede in concubinato sibi conjunxerat: sed quantum illi misero ardoris faciebat amor, tantum etiam algoris zelotypia conflabat; Meritrix cata, quæ illum, hunc vorasse cognosceret, ut omnes faciunt, quæ se amari intelligunt, nihil tam laborabat, quam ut miserum eum haberet, & in primis ut ad sese cum anima, ejus habentiam averteret. Atque ad eam rem usa est hoc adolescente, cui servio; qui amore ipsius captus aliquot jam dies ejus ædes obambulabat, quemque pejus angue mercator horrebat. nam est in primis scitulus, mundulus, atque venustulus. Cœpit igitur illa adolescentis formam laudare, cincinnos efferre; ille miseri, & cultro, quem sub sago contexerat, minitari, si adolescenti obnoxia fieret. Vbi meritrix hominem umbraticum, magis timidam inter viros mulierculam, quam fortem inter mulieres virum, cultrum habere animadvertit, hæreditatem sibi obvenisse existimavit, ac, Crœsum, inquit, divitiis supero, si eum in me cultrum ille semel educat. Itaque mittit adolescenti qui dicat, ut proxima concubia nocte domum ad se veniat, ac sine ullo metu januam feriat. Vesper adest: mercator, re bene gesta, domum meretricis venit, cœnat, decumbit, cum ea litigat; queritur, quod adolescentem sese plus diligat: illa contra negare, sed frigide; interdum suspiciones injicere: ille stomachari, atque ira vehementius efferri: cum ecce tibi commodum adolescens ad januam adest; pulsat: ille, suspicione offensus & insidias metuens, è lecto se ejicit, ad fenestram advolat, & Quis, inquit, odiosus, hoc noctis, foribus istis insultat? Ego sum, inquit adolescens. aperi actutum, mercator, cognito adolescente, tum quidem omnem violentiam è pectore expromit; atque, Hinc abire

ni properas, ait, ferere. Et magis quo se iratum ostenderet, quam damnum vel malum daturus, districto cultro in Nannam incurrit. At illa, tanquam prædivinans quid futurum esset, dum ille in fenestra foribus injuriam factam queritur, furtim è lecto desiluerat, ac rubrica in eum usum quæsitâ dexteram impleverat. Venit ergo ille amenti similis, clamans, Itane, pessima? ante meos oculos amatorculum mihi tuum adducis? Vnaque opera femur illi dexterum & brachium lato cultro percussit. Illico illa dolis insistens, adnota ad os inanum, rubrica illud infecit, & simul, Obsecro, populares vicini, vestram fidem; subvenite, ferte inopi auxilium; malus hic mihi faciem feriit. quid agam? quo me vertam? audebone posthac ita deformis cuiquam in conspectum prodire? non faciam; lethum mihi consciscam. Hic etiam ab ancilla clamor extollitur, accurrunt vicini, januam effringunt, quærunt quid sit? Clamor utrinque, undique concursus. Ille miser, qui sibi esset conscius, nullum à se vulnus infectum mulieri, primo mirari, quod sanguis efflueret. tum, sibi metuens, fuga salutem quærere, ac noctis beneficio occultatus, in ades cuiusdam Dynastæ tanquam in aram confugere. Vbi postea, in ocio rem agitantem, non satis liquebat, quomodo illud à se vulnus exisset. Et secum, Ego, quod scio, latus illi & brachium, non etiam faciem verberavi, &, quod rem continet, non cæsim, sed gladii planicie. unde ergo vulnus habet? At simulat. at hisce ego oculis vidi. fit verisimile. nam non semper ita manus quo ea dirigitur, quamvis sit ad feriendum certa: tum ego iratus eram: ira cæca est, sensus adimit, mentem eripit. Quid igitur fiet? Dum in hac cogitatione curaque versatur, & simul altercantibus libidinibus tremit ossa pavore, statuit, per amicos interpretes, eam sibi placare, hoc est, argento mollire, & pecuniæ non parcere. Itaque allegat ad eam idoneos cum mandatis homines: qui quidem mulierem adeunt: at mala, quo doli procederent, unguentis sibi faciem inunxerat, fasciisque obligaverat. Illi pedetentim primum mulierem aggrediuntur, rerum vicissitudines memorant: laudant eos, qui simultates, occasione oblata, dimittunt. Non est passa mulier eos pergere

gere atque insequi longius; sed continuo exclamat, Ab-
 ite, abite; nihil mihi de istis factis; jam faxo, apud om-
 nes magistratus nomen ejus erit; jam illum perdam, si
 vivam, quæ me in perpetuum infamem stigmatem in os
 imposito fecit. ego illi ut parcam? ut placeo, mori me
 malim. Ah, ne sævi tantopere, inquiunt illi. res est ejus-
 modi, in qua casus dominatus sit magis, quam ratio. Er-
 go, excepit mulier, hoc prætor dijudicabit, cui diluci-
 de expedivisse me arbitror. Vbi illi hanc viam obseptam
 vident, alia aggrediuntur, Vide, inquiunt; mercator li-
 beralis est, ac fugitans litium: quid tibi vis dari in ma-
 num, ut totam hanc causam postularumque dimittas?
 Illa modo negare, rem tantam decidi pecunia posse; mo-
 do cum illi magis instarent, insanite, & intolerabilia
 petere. denique, ne longum faciam, ægre ab ea impe-
 tratum est; ut minis quinquaginta sibi satisfieri pate-
 retur, quæ dissoluta sunt statim. Sed neque illa decisione
 contenta fuit; voluit etiam magis hominem affecare. ita-
 que mittit ad eum, qui dicat, in ejus manu esse, eam sibi
 ab ore infamiam, quam ipse imposuisset, eripere. medi-
 cum esse quendam Campanum genere, qui omnium
 vulnerrum notas medicamentis abstergeret; sed opus es-
 se argento, quinque præsentibus minis. quod si fecisset,
 se in amore & gratia cum ipso futurum. Hic erat circu-
 lator quidam, nimis graphicus sycophanta, ad artes nu-
 gatorias circulatorum primus. Ille miser, qui Nannæ
 desiderium ferre non posset, ne passus est quidem se exo-
 rari; sed sine ulla mora illud dinumeravit argentum.
 quod cum ea nugator partitus est statim. Verum, quia
 mercator curationi intererat; hæc vafro illi ad deci-
 piendum ratio erat. fidem ex testudine detractam mere-
 trici ubi vulnus assimilabatur, inusserat; quæ alte ibi-
 dem inhærendo sulcum cicatrici non absimilem fecerat.
 hunc sulcum, præsentem mercatore, ungebat, obliga-
 batque diligentissime; clam eo fide illa iterum obstrin-
 gebat; sed quotidie remissius; quo fiebat ut paulatim de-
 leri videretur. Quid opus est verbis? vix dies octo inter-
 cesserant, cum plane omnis evanuit. Iam emanarat in
 vulgus, insigne in os Nannæ fuisse vulnus infictum, cum
 ecce tibi de admirabili novi istius medici curatione per-
 crebuit.

crebuit. Itaque tanti ad eum cicatrices habentium concursus fiebant, ut resisti non posset. Non defuit occasioni nugator, sed properavit eripere. nam, ab omnibus illis arrhabonis nomine pecuniis acceptis, se præda referfit, & die quadam ante lucem, non conclamatis vasis, castra commovit.

His peroratis, cœperat cubicularius ille alium ejus meretricis dolum exponere. sed dicere aggressum interpellavit Gallonius. qui, exiens ab adolescente, Heus vos, inquit; properandum est mihi in ædes Plusii, cui meas operas locavi. nam pene abiit hora, qua ibi me adesse oportebat, ut officium illud cui sum conductus exequerer. tum invitavit me ejus tonsor ad prandium; rogavitque, ut quos mihi commodum esset vocare; nam duabus umbris fore locum ajebat. itaque vos mecum adducam. delectabit enim, facetos horum urbanorum mores, præsertim in conviviiis agitandis, agnoscere. Tui sumus, inquit; duc quo lubet. Ne multa; In ædes magni illius viri venimus. Sciscitatur Gallonius, quid rerum agat dominus, num jam evigilaverit, num surrexerit. Respondet unus; Iam diu ille surrexit. nam, simul ac, inquit, cælum illuxit, è lecto prosiluit: ac, tonsore accersiri jussu, duas apud illum horas transmisit; atque, rasitando, tergendo, pingendo, ita miserum illum defatigavit, ut eum ad languorem, vel potius ad interitum, dederit: tonsore dimisso, in secretiore conclavi, se cum sarcinatore conclusit; sumptoque in manus circino, suo more experiebatur, num singula inter se puncta vestibus acu præfixa ex æquo distarent, num thorax vel sagus corpori eleganter hæreret; atque in hoc studio alteræ duæ horæ fuere consumptæ: nunc verò calcearium exercet; miserum habet; clamat, corium, quo calcei constant, non esse molle atque flexibile, sed durum ac rigidum; præterea calceos ipsos non esse habiles neque aptos ad pedes; irascitur, vociferatur; se Diis suis iratis natum esse queritur, cui nihil ex sententia contingat. sed mox, ut spero, calceolarius etiam ex hoc laqueo jugulum eximet. nam Flamines vocari, tus & merum parari jussit, quibus rem divinam Iovi optimoq; max. faciant, qua peracta, ut creditur, prandium inibit. Non malum est,

est, inquit Gallonius, ut in procœtonem me conferam, ibique ejus imperium expectem. Nos igitur, à Gallonio introducti, unum ejus angulum petimus, & collo obstito, quæ dicebantur, quæque ibi fiebant, excipimus. Ac primum orta est inter eos quæstio, quænam pullis gallinaceis æstate, quæ hyeme curatio, quod condimentum aptius esset. nec minima erat inter eos contentio. nam aliud alii placebat. Tum ille, qui hos sermones lacefferat, contradicentibus ceteris, ficedulam turdo, & coturnicem phasiano anteponebat; omnesque certatim illudebant unum ex eo numero, qui nullum in his rebus sensum habere videbatur; ac sordidum eum & incultis moribus appellabant; imo ne hominum quidem numero dignum esse ajebant. Ab hoc sermone ad carpendam lacerandamque mulierum famam digrediuntur: atque, alias parum honeste pudicitiam habere, criminari; alias, consciis maritis prostituere formam ac vendere; alias, forma egregia filias, his atque illis, non parva mercede, subjicere; multaque his addere, ac nomen etiam uniuscujusque mulieris dicere, quæ quia nullam earum notitiam habebam, oblitus sum statim. Erat hominum cultus elegantissimus, sed parum virilis; neque fere ibi quisquam erat, qui novas nuptas elegantia munditiisque non vinceret. Illud vero ridiculum, quod, cum duo inter se de amicula rixari cœpissent, eorum unus alterum, contumeliæ scilicet causa, hircum olidum, impurum, perfidiosum, obscœnum appellavit; ille, quo se laceffitus ulcisceretur, novas eidem contumelias studebatingere; sed cum maxime quæreret, nullum acrius maledictum invenire potuit, quam ut illi objiceret, quod incultus, inornatus ac male tonsus incederet. quod cum vehementer admirati essemus, audivimus postea, nullum apud eos haberi flagitium majus, quam tibialia ligaminibus sericis ad terram usque productis non adstringere, vel minimam in collari rugam admittere: nullum nefas grandius existimari, quam perpeti, ut in coma vel barba pilus unus ceteris altior excrescat, nec statim novacula revocare quod petulantius sese profuderit: nihil magis sordidum censer, quam, mensem integrum, eodem uti amictu. Sed improvisus Plufii adventus omnem

illis iram sedavit, & in tranquillo constituit. nam, qui velum allevabat, festive, Hens, vos, inquit; manus de tabula, magister adest. At ille, qui praeuntibus ceteris, vel procoetonem transiens, ad aram Iovis se confert, sacrificanti adest, revertitur, prandium poscit; Gallonius, ut omnibus rebus instructum sit prandium, curat. quo expleto, revertitur ad nos; atque, Is, inquit, qui me invitavit ad prandium, iussit sterni lectos in hortis urbi propinquis, ad fontem large manantem, at me hercle capietis voluptatem ex loci aspectu. nam & propter arborum viriditatem est longe amœnus, & propter viam decurrentium aquarum frigidissimus. Ne multa; eo deducimur, locum intramus. Vbi tantam aquarum vim cernimus, quantam uspiam nos non vidisse meminimus. etenim non certis fontibus, sed imbribus, non rivis, sed fluminibus, locus totus exundat. Specus sex, incertum natura vel ars in montis dorso cavavit; sed ita ut unis tribus alteri tres incumbant; asperis ac rudibus tophis lepide & jucunde perhorridi, ab his tophis, tum intra tum extra specus hærentibus, ac varia herbarum viriditate diffusis, aquarum imbres magni vehementesque procurrun, qui tum specus ipsos implent, tum latum ante specus ipsos lacum efficiunt: locum parietes, ab utroque montis latere producti, in latitudinem quadrant; per quos horriduli, & ipsos saxis intectos, quo incultæ illi specuum asperitati respondeant, perpetui defluunt imbres; habentque post se inter diffusa late nemora speciosissima ambulacra. hic talis est sonitus, qualem ex multis atque alte cadentibus aquis esse oporteat; talis species, quam fontes, nemora, ars denique & natura ipsa componant. In hoc tam amœno ac perfrigido loco, apud eum fontem speciosissimum, statutos lectos, & appositam mensam invenimus, ea epularum varietate constructam, qua extrui solet ab iis, qui amicos magnifice volunt accipere. Ecce autem, ex improvviso, ingens ad aures nostras clamor ac strepitus accidit. qui prandium dabat, convivas alios à se vocatos adesse narrabat. capita hominum numeravimus novem, attamen ex strepitu, quo in eum locum irruerant, sexcentos esse iurasses. Hi simul ut apparuerunt, tanquam hostes capta urbe solent,

cuncta

cuncta diripere, tuburcinari, vorare, œnophora exhaurire, & clamore omnia miscere. ille, qui invitaverat, pene irasci, clamare, ut manus lavarent, ut lectis se commendarent; atque ægre impetratum est, ut vellent accumbere. Tres erant lecti, & in singulis quaterni discumbimus; summus Gallonius; ac prope eum ego; tum Paulus Æmilius, infra, ceteri omnes. Hic tantum vini exhaustum est, quantum una vindemia colligitur. qui stellas numerare potest, numerum etiam cyathorum inibit qui sunt exhausti, atque ab implendis tradendisque poculis viri sunt quinque defessi. Sed inter clamores maximos, inter risus effusissimos, sæpe ructus, sæpius crepitus erumpebant; nulla alia vox exaudiebatur, nisi hæc, Bene mihi, bene vobis, bene Plusio nostro. Iam non in ventres, sed in cloacas, sed in barathra profundi vinum videbatur. Vix lauti quidquam in mensa apponebatur, cum direptum illud vidisses. Erat inter eos unus longe urbanissimus, qui cantharum, in quo potitabat, frustis esculentis tanquam rosis coronabat; & cum vino impleisset, in se totum ingurgitabat. hic clamores edi, hic cachinnos tolli, & faustis acclamationibus operi gloriosissimo plaudi. Productum erat prope ad vesperam convivium, nec bibendi modus ullus, nec satietas erat. Ecce autem adest à Plusio servus, qui Gallonio nunciat, ut, relictis rebus omnibus, curriculo ad Prætorem transeat, eique Plusii verbis exponat, ut honoris ipsius gratia Toxillum è reis eximat, & quamprimum incolumem ad sese remittat. Hic evictus, quod hæreditatem Veneri relictam expilasset, quod falsos testes subornasset, ac multa alia nefaria fecisset contra jus fasque, contrusus in carcerem fuerat. Itaque à reliquis convivis distrahimur, atque ad tribunal Prætoris accedimus. Hic magnæ cuidam quæstioni operam dabat.

Lictores mulierculam forma non mala, quam meretricem esse ajebant, in jus abstraxerant, ejusque opera male se fustibus acceptos querebantur, ac fidei faciendæ causa, brachia ac tergora plagis varia ostentabant. Rogat Prætor, cui tantum animi ad audaciâ fuerit, ut nuius meretricis causa publicas personas tam insigni affecisset injuria? Respondet unus, ceteris fortasse ad

dicendum paratior ; furem manifesto deprehensum rapi-
ebamus in carcerem ; qui , dum illac transimus , ubi
venefica isthæc inhabitat , sese è vinculis eximit , manus
nostras effugit , atque in unam ejus vici domum irrumpit.
nos insequi ; nec cum satis constaret quo se recepisset,
singulas ejus vicinæ domos perquirere. Ne multa ; ad ædes
hujus meretricis venimus , fores pultamus ; nemo respon-
det : calcibus impetimus ; tantundem : efringimus ; nihilo
magis. ergo scalas ascendimus , ac mulierem in lecto
jacentem invenimus. Tum ego, Quid est, inquam, quod
taces ? cur es passa fores efringi ? eratne ita magnum
recludere ? Illa in eodem silentio perseverare. Tum ego,
Vide, inquam, obstinatum ad tacendum animum , ut
sese offirmat ? propidum , jam aliquam ex te vocem
saltem ingratis eliciam. iratusque virgis graviter illi
latus impello. Tum demum illa, dolore coacta, Heus,
exclamat. Rem incredibilem ; vix Heus dixerat, cum,
imbris vel grandinis more, crebros nobis, in scapulas,
in caput , in brachia , fustium ictus sensisses irruere ;
neque tamen fustes , neque aliquis , qui verberaret ,
conspiciebatur. Nos , metu perterriti ac male multati,
terga vertere, per scalas præcipites currere, pedibus
salutem quærere. Interrogat Prætor , quemadmodum
id factum esse arbitrentur. Respondent illi fidenter,
se existimare, id sibi contigisse muliebribus veneficiis
atque cantionibus : ac, Tibi, inquit , nosse licet ab ista,
quam hujus rei testem adduximus ; hæc, ut de facie
coniciebamus , scortum erat diobolare pagoque pollutum.
Ac, prætorem intuens , Si mihi , inquit, fides publica
detur , rem omnem uti sese habeat aperiā. Iussa mulier à
præ tore, quæ sciret, edicere, Nos, inquit, meretriculæ,
si quando ab amatoribus nostris deserimur , ad eos
revocandos, frustulum panis cum caseo , certis quibusdam
precibus devotum, de fenestra dejicimus : at, si canis
atra voratum illud adveniat , impetratum inauguratumque
existimamus esse, & mox eum , quem volumus, adfuturum.
sed interea dum ille veniat (nisi si quæ malam rem
quærit) caveat oportet , ne verbum unum faxit. nam si
mutire audeat, feret infortunium. Bona hæc mulier venit
pridie ad me domum, querens , quod ama-

amatorculus ejus sibi graviter esset infensus, quod alium ad se virum, ipso invito, recepisset, ac propterea amorem & dona alio transtulisset: orabat, rogabat, ut sibi subvenirem, & rationem ostenderem, qua eum posset ad sese reducere. Ego ejus miserta, ne eodem redigeretur unde orta est, nempe ad egestatis terminos, frustulum panis cum caseo præcantatum porrigo, jubeoque ut deturbet in viam. Illa accipit, projicit; venit canis, devorat. tum fores claudit; in lecto se collocat, dum amator veniat, expectans. jamque rei nihil nisi eventus deerat, qui quidem facile ex sententia contigisset, nisi, quæ cuncta miscet, Fortuna prohibuisset. His dictis, obtinuit. Tum prætor jubet vinctam dicere. Quæ audacter respondet; nunquam se vidisse cuiquam pulchrius ligna præberi, quam sibi ac lictoribus præbita essent. Interrogat prætor, unde id factum existimet. Respondet illa, se existimare, deorum manium opera fuisse perfectum. Tum, Tu igitur, inquit prætor, venefica es? Mulier subdola, atque ad malitiam instructa, Nihil, inquit, minus; quin misere sum veneficiis aliarum obnoxia. nam prope est annus, cum à Lemuribus exagitor, maleficæ cujusdam invidia. ac sæpe est, cum, verberibus ad necem affecta, pro mortua inter vicinarum manus effereror. His auditis, prætor vicinis in hanc rem testimonium denunciari jubet. qui statim adeunt. sed, vicinitatis necessitudine, & ut à muliere gratiam inirent, eamque periculo damnationis eriperent, jurati, illud idem pro testimonio dicunt quod meritrix in defendendo responderat. Tum prætor à severitate in misericordiam versus, mulierem, velut lymphatam seu ceritam, de consilii sententia absolvit, de reis eximit, lictores abire in malam rem jubet. Consilio dimisso, prætor ex aula, ubi cognitioni operam dabat, se subducit, & in cubiculum abdit. non enim apud eos, ita uti Romæ mos est, judicia publica exercentur in foro, sed in ædibus magistratum fiunt. Gallonius, ut introducatur ad eum, postulat. se enim habere, quæ Plusii jussu eidem exponat. Cubicularii rem ad prætorem deferunt, qui, ut adesse à Plusio nuncium accepit, continuo intromitti eum imperat, sellas poscit, ac sedere Gallonium jubet.

Ille,

Ille, modestiæ scilicet causa, negare; prætor instare, neque se aliter eum auditurum dicere. Gallonius morem gerit; in sella se collocat; &, quæ à Plusio mandata habet, exponit. Quarum summa hæc erat; Ut reum illum, quem falsi & expilatæ hæreditatis criminibus accusatum habebat in carcere, sententiis iudicum absolvendum curret. hoc enim beneficio magnam se à Plusio gratiam initurum. Respondet Prætor, reum illum, esse scelerum caput; crimen manifestum, capitale, invidiosum; &, si juri legibusque sit locus, jam pridem, inquit, in supplicium, in crucem, abreptum eum oportuit. sed quoniam Plusio ita ille est cordi, rationem inveniam, qua incolu-
mis iudicium effugiat. res Veneris agitur; cui si quid adimitur, impune aufertur. dii boni sunt, liberales; nec, affecti injuria, irasci cuiquam sciunt. In pauca ut conferam; impensius etiam, quam exigebatur, promittit operam. &, quo ab hujus sermonis tristitia animus ad hilaritatem traduceretur, percontari cœpit ex Gallonio, quid rerum Plusius ageret, quo genere voluptatis pomeridianas horas deciperet, quot cyathos biberet, quot uncias cantharus caperet in quo potitabat; atque alia, id genus, multa, quibus egregie Gallonius satisfecit. Sed; cum jam advesperasceret, discessurus surrexit. quem Prætor, officii gratia, ad scalas usque perduxit, identidem admonens, ut suis verbis multam salutem Plusio diceret. Qui demum, ita honorifice acceptus atque dimissus, lætus nobiscum domum versus iter arripuit. Sed ad ostium amico cuidam veteri occurrit; quem post mutuas salutationes rogavit quid ageret. qui inquit; Iræ sunt inter Prætorem & Asterium illum divitem: eo, ut pacem conciliem. Quid audio? Gallonius ait. Asterius scit irasci? quem ego tam putabam tranquillum, quam est mare cum halcyonum foetura substernitur. At pol Asterius antiquum suum obtinet, respondit ille; sed Prætor solus est in fermento, ac totus tumet. Da mihi operam; ridicula res est.

Habebat Asterius apud centumviros controversiam de re pecuniaria cum Robusto Vrsaceo. Itaque eum vadatur. Continebat autem vadimonium, ut ad certam diem Vrsaceus in iudicio se sisteret ad sententiam iudicium

cum audiendam. Vrsaceus diem vadimonii obire contempsit. Quamobrem tanquam contumax condemnatur, ac secundum Asterium sententia profertur. Vrsaceus prætorem appellat, qui statim iudices perperam iudicasse pronunciat ideo, quia Vrsaceus vadimonio suo promiserat tantum ad eam diem se sistere, non autem iudicum sententiam accipere; ad quam audiendam novo erat vadimonio compellendus. Sed, cum clamaret Asterius, ac verbis vadimonii vim fieri diceret, quæ erant, ut Vrsaceus se sisteret ad audiendam iudicum sententiam; bonus prætor nullam ipsi fieri injuriam dicebat, quia verba illa *ad audiendam iudicum sententiam* non erant conjungenda cum verbo *se sisteret*, sed ab eodem interpunctionibus separanda. quamobrem cum per se sumpta novam orationem efficerent, novum etiam vadimonium requirebant. Asterius, hac tam insigni injuria verberatus, ad ultionem decurrit, ac, paucis diebus post, scribit prætori epistolam in hæc verba. Peto à te, domine prætor, ut in crastinum te mihi sistas, ad cœnandum mecum. Prætor postridie ad horam adest. Cui Asterius; Tibi, inquit, gratias ago, quod veneris; sed cras cœna dabitur. Quid hoc est? ait ille. nonne promisisti in hunc diem? Non, ait. At possum, inquit Prætor, epistolam tuam proferre, in qua me hodie vocas ad cœnam. Cedo epistolam, ait ille. ac sumptam in manus legit; ac, Nihil, ait, peccatum est à me, cum ita scripsi. nam post verba illa, *rogo te, ut domi mea in crastinum te sistas mihi*, interpunxi, quia illa altera *ad cœnandum*, sunt initium novæ orationis, atque alium diem indicant. quamobrem debebas expectare novam invitationem. Prætor iratus, Itane, inquit, magistratus eluduntur? haud impune hoc auferes. Nulla, inquit Asterius, à me tibi orta est injuria: à te ipso hoc profectum est totum. ecce exemplar sententiæ tuæ, ubi ita interpungendum esse decernis: at jura omnia clamant, ut, quod quisque juris in alterum statuerit, eodem ipse utatur. Prætor delusus &, quod magis ipsum urebat, incœnatus domum revertitur. Risimus insulsum prætoris acumen. At ego, Tanta ne, inquam, est apud vos penuria virorum prudentium, ut necesse habeatis hæc tãta munera ejusmodi pecudibus deman-

demandare? At ille, Non mirum est, ait. nam sæpe in hac Republica non virtus & merita, sed casus & gratia, magistratus honoresque conciliat. unde, doctis & illustribus prætermisissis, imperitis obscurisque ejus regendæ potestas tribuitur. His actis, ille ad prætorem Asterio conciliandum, nos ad stomachi frementis tumultus cibo ac potione sedandos processimus.

LIBER III.



AM sol oceano latus emerferat, ac terras exhilaraverat, toto cælo luce diffusa, cum nunciatur Gallonio, juvenes stare ad janua[m] duos quosdam, qui eum magnopere evocarent. Prodiit ille, & nos una secum. Rogat, quid velint. At illi, currendum est tibi, inquit in ædes Democriti amicissimi tui; curandumque, aut consolando, aut consilio, aut re, ut eam illi ægritudinem adimas, quæ misere eum arripuit. nam neque cœnavit heri vesperi, nec proxima superiore nocte potuit partem aliquam quietis accipere. rogatus, quid ægre sibi sit, non audet dicere; tantum suspirat, illacrimat. tu fortasse, pro amicitia quæ inter vos est, poteris ex eo tantæ ægritudinis causas exculpere. Quibus Gallonius, Nunciate, inquit, Democrito, nos ibi mox adfuturos. Sed placuit Gallonio, medicum arcessere, & secum ad ægrotum adducere. Itaque venimus in ædes cujusdam Aristarchi, qui, ut Gallonius narrabat, magnum in medicis nomen habebat; atque eum oppressimus, contemplantem in speculo formam suam: ac simul, ut Gallonium aspexit, quid tibi, ait, hæc figura oris videtur? Pape, inquit, nimis lepida, nimisque nitida. Quid corpus hoc? Vide ut est solidum, leve, succi plenum: ecquæ est mulier digna ad hanc formam? Nulla, inquit Gallonius. Sed missa isthæc face? & causam, quæ nos huc impulit, accipe. Venimus, ut te ad ægrotum adducamus, ex animi ægritudine pene confectum, atque illum ut sanum facias. Perfacile istuc quidem est, respondet Aristarchus; sed non est mihi ocium in præsentia

sentia ; nam promissi operas meas flammis magno Liberi patris, qui jam diu laborat stomachi vitio. Cui Gallonius, Si est ita, inquit , ut dicis , in publica commoda peccem , si tibi molestus sim. vale. Postquam discessimus, quærimus ex Gallonio, num sanus sit, necne, qui ad curandum insanum , eum adducendum curet , cujus caput Anticyris tribus sanari vix possit ? Arrisit Gallonius ; ac, Stultitia, inquit, in qua iste versatur, sane ridicula est atque faceta. nam cum sit forma adeo , ut videris, enormi & inhonesta , ut monstrum potius hominis dici possit , quam homo ; attamen Adonidi & Paridi præstare prædicat formam suam , omnesque se ultro sectari mulieres memorat. itaque , senem se esse oblitus, nihil eorum, quæ sunt adolescentium, à se alienum existimat. etenim amat, potat, cantat, saltat : & , quod magis miremini, canus, varus, gibbus, bucculentus, breviculus, niger , foetida anima cum sit ; in contentione amoris multis præclaris adolescentibus superior evadit , non aliis armis instructus, nisi pecunia , quæ cum aliis bonis, quæ secum affert, genus largitur & formam. verum hæc nota stultitiæ, multarum maximarumque virtutum excusatione defenditur. nam est philosophus egregius, medicus, poëta, orator ; & si ægrotum, quo properamus, inviset, continuo morbi genus aperiat , curationem illi morbo aptam adhibeat. Dum hæc loquimur , ac rideamus, ægri illius domum venimus ; intramus , videmus eum pallidum, mœstum, & in acerrima cogitatione defixum. Rogat Gallonius , quid sit attonitus , quidve pallidus ? Quia, inquit, animi incerore conficior novo, incredibili, acerbo. Rogat , num magnum aliquod facinus patrasset , unde judicium pœnamque metueret ? Negat. Quærit, num as alienum tam grande conflasset quod dissolvi non posset ? Negat id quoque. Instat , num pro altero spondisset ; num incendio, naufragio , ruina rei familiaris damnum fecisset ? Nihil est horum ; respondet. Cedo, inquit Gallonius, quid est, quod te ita miserum habet ? Illud, ait , quod mihi senectutem instare jam sentio, & , quod est consequens , mortem esse in propinquo. hæc cura tam alte mihi in animo insedit, ut extrahi nequeat ; ita eum acriter urget , ut sedari non possit.

possit. Tum Gallonius exclamat; Abi hinc, quo dignus es, cum ista tua tam insulsa stultitia. profecto si de omnibus stultis, qui ubique terrarum sunt, rex fiat, nemo antecedit, credo, tibi. Nunc enim vero, excepit ille, adigis tu homo me ad insaniam. tunc insanire vocas. incommoda senectutis enpendere, necessitatem consequentis mortis horrere? At Gallonius, Dic, inquit, mihi, quid sollicitudine ista, curaque, proficias? num te propterea senectuti mortique subtrahas? Ut te excrucies, torqueas, ut miserorum miserrimum facias, ne minimam quidem senectuti mortique moram injicies; quin etiam utramque maturiorem efficies. Cur ergo gratis miser esse vis? Quin tu sollicitudinem istam, quæ te excruciat, omitte; & dona præsentis cape lætus horæ. Quid potest esse mihi latum, excepit ille, exitum meum cogitanti? Me miserum, cum memini, jam jam fore cum ego propius sim abfuturus à morte. Quid si te, inquit Gallonius, mors antea quam senectus oppresserit? cui enim est exploratum, se ad vesperam esse victurum? Ut libet, inquit ille. quin, si me audiet, jã veniet, atque his angoribus animum exuet. O dignum, Gallonius exclamat, cui crassæ compedes impingantur: quod metuis, cupis; quo sollicitaris, inde finem sollicitudinum speras. Primum hoc expedi; Vtrum mortem in rebus bonis, an in malis ducis? Si in bonis; quid metuis? Si in malis; quid eandem finem malorum facis? Non potest ea res numerari in malis, quæ cetera etiã mala dissolvat. Ita me Iuppiter amat, ut tuarum miseret fortunarum; &, quoniam tibi insaniendum erat, aliquod saltem stultitiæ genus contigisset latum, festivum, exhilaratum. ita enim & tibi lætitiâ quæreretur, & nobis ludos parares, non autem utrisque molestiam, ut nunc facis, afferres. Tum ille, Derides me? inquit. quid? tu solus ita es sapiens, ut omni stultitia propemodum careas? erras; nulla est sapientia tam magna, quæ omni prorsus administratione stultitiæ vacet. Cui Gallonius, Ut istuc, inquit, tibi concedam; jam meæ me stultitiæ, cujusmodi ea sit in qua nunc versor, non pœnitet, cum alios nequiori, molestiori saltem genere stultitiæ, implicatos aspiciam. at si pergis ineptus esse, non video, qui modus, aut quis finis, stultitiæ tuæ futurus sit.

fit. etenim ægritudines alias, dies adimit; hæc, quæ de ætate prætereunte tibi ægritudo est, augescet quotidie magis; & quantum tibi ad annos addetur, tantundem etiam ad istam tam ineptam molestiam accesserit. Tum ille, Sine, ait, me esse miserum; neque præterquam, quas isthæc ægritudo molestias habet, addas. Quoniam, inquit Gallonius, tibi molesti intervenimus, geremus morem; abibimus. at moneo, ne me posthac accersiri jubeas. nam frustra jusseris. ac, si miseriis delectaris, deos oro, ut perpetuo sis miser. Nec plura locutus, se foras ejecit, atque ad demonstranda nobis præcipua urbis loca convertit, ædes videlicet sacras, theatra, porticus, fora, gymnasia, domus privatas. Quarum una, ampla sane atque magnifica, in fronte grandibus notis incisa præferebat hæc verba:

Dominus domus, iis, quorum operam sibi conducit, præter mercedem, neque beneficium, neque gratiam, neque pecuniam largitur. hoc illis esse prædictum vult, ne postea se fuisse deceptos querantur.

Tum ego; Laudo, inquam, liberum, & apertum ingenium hominis, qui neminem vana spe captum patitur apud se operam perdere. At, tum magis id dicas, inquit Gallonius, si scias quemadmodum servet, in eo quod promiserit, fidem. sed, quamquam totum se prodatur, ut vides; attamen, si emanet in vulgus, desiderari aliquem in ejus familia, incredibile memoratu est quam multi etiam locupletes ac domi nobiles eum locum quæsitum adveniant. adeo Dynastarum nomen hic sanctum habetur, ut sibi quisque honestum putet, sine ulla spe sese illis in servitutem dicare. verum, quem in hanc domum, siue voluntas, siue casus impellit, huic omnes putant & fortunam, atque omnes res bonas esse adversas. Hæc dicentem luctus & clamor ingens interpellavit; conversi videmus scrutarium in foro Cupidinis scruta popello vendentem;

Qui miser horrifonis implebat questibus auras.

Dilacerans seva pectora nuda manu;

Filius, & tristi flebant cum fratre sorores;

Latrabat tumida maxima voce canis.

*Ipse videbatur Brennus crudeliter ignem
 Romulidum tectis supposuisse ferox ;
 Vel Danaum Dolopumve dolis consternere ferro
 Pergama, & antiquas Laomedontis opes.
 Tum commota nimis vicinia tota reclamat ;
 Currit, ut afflicto sedula præstet opem :
 Atque, Vbi sunt fures ? ubi, pessima turba, latrones,
 Inquit, quique tuam diripuerunt domum ?
 Quid misero inveniunt tantos conflasse tumultus ?
 Quadrantem, furax quem puer abstulerat.*

Neque aderat uxor in turba lugentium. nam eam domi inclusam contineri aiebant cum institore nescio quo, quem, conscio marito, ipsa sibi custodem corporis sui & socium adjunxerat ; idque propter nescio quam timiditatem & inanes quosdam metus, à quibus verebatur, ne, dum maritus in foro mercenariis vinclis constrictus erat, corriperetur. quamobrem nihil magis quam solitudinem horrebat. At institor, scrutarii vocibus excitatus, sane commotus est, atque, ægre à mulieris latere avulsus, accurrit in forum, ut contubernali suo, quemadmodum uxorem, ita facultates atque animam tueretur. Venit igitur, in turbam se inserit, causam tumultus exquirat ; reperit, quadrantem furto sublatum totam illam turbam conflasse. Quamobrem, magna cura liberatus, detractam sibi è crumena drachmam scrutario tradit, qui, lætus pro quadrante subrogatam sibi drachmam fuisse, ad intermissa negocia se recipit ; ille ad mulieris meticulosæ custodiam regreditur. Erat ex adverso adolescens filius familias, mulieris ejusdem amore deperditus, sed patris parsimonia, & lex quinavicenaria, ut nihil esset quod daretur, id curaverant probe : restabat nihil aliud, nisi oculos pascere, sectari, in templa Deorum ducere, & reducere: neque tam erat ipsi molestum carere muliere, quam acerbum, alterum ea potiri; & si daretur optio, vel totam optasset ætatem sine illa vivere, quam pati eandem unum diem esse cum altero. Quocirca, ab amore ac zelotypia simul oppugnatus, rivalem suum apud scrutarium his verbis in suspicionem adulterii conabatur adducere, odio suo pietatis præferens speciem.

Quæ nova simplicitas hæc est, ridendæve conjux.

Vxori mæchum conciliare sua?

Nonne externa tuo cernis vestigia lecto,

Cum reducem vesper te facit esse domi?

Hoc ait & rumor. Non sentis murmura, & omnes

Conversos oculos in tua probra vides?

Quis tam stultus adest, vel tam sine pectore amator.

Tempora qui frustra commoda abire sinat?

Dum properat Cretem ventis dare vela secundis

Conjux, Tyndaridem Troicus hospes habet.

Si facit egregia uxoris te forma timere,

Illam crede mihi; sic bone tutus eris.

In longis poteris quamvis proficiscier oras;

Iam non insidias sit timuisse tibi:

Ante meum potius caput hac cervice recedet,

Quam violet thalami fœdera casta tui.

Non pudet excubias me cara ad limina semper

Ducere, non rixas inferuisse piget,

Aspera non hyemis incommoda ferre recuso,

Non fessum nuda ponere corpus humo:

Seu gelidus rapidis aquilonibus intonet æther,

Seu subitus multa decidat imber aqua.

Ipse aderit lateri custos mihi bellicus ensis,

Nec fiet longo cura labore minor:

Quaque feret gressus, sequar hanc seu templa Deorum

Visere, seu dicet velle redire æomum.

Non est passus scrutarins plura eum loqui; sed, Vna, inquit, opera, duorum labori parcam; tui dicendi, mei auscultandi. Tua isthæc magnifica verba atque promissa non pluris facio, quam plumas avium, papposque volantes. Etenim ne uno quidem nummo ditiozem mihi crumenam efficiunt: nihil mihi opus est eo, qui uxori meæ latus ab externis viris muniat. nam istortum defensorum abunde est domi. sed opus est eo, qui pecuniam & com meatum defensoribus afferat. Atque, ut tu noris, ille, quem tu mihi invisum facere properas, cum domum meam venit, non solus ingreditur, sed com meat cum eo vel pecuniæ sacculi, vel tritici æcervi, vel carna-

ria, vel casei, vel utres olivi. Itaque dum mihi sic usus est, illi maneat potius; tu aliam, quam tuearis, exquire. nam istiusmodi custodes tui similes nihil moror. Atque eodem tempore quo adolescenti illuderet, terga obvertit. Tum Gallonius, Censeo, inquit, domum eamus. nam est in animo vos, à prandio, viri cujusdam nobilis domum adducere, quo quintodecimo quoque die eruditi complures, tum exercendi, tum declarandi ingenii causa, conveniunt. Verum quod ad virum istum nobilem attinet, nolite existimare, quidquam ipso perfectius existere, vel in corporis, vel in animi dotibus. nam puer, omnium ætatis suæ multo formosissimus, doctorum hominum familiaritates expetiit, adeptas constantissime tenuit; & usque adeo eorum exercitationibus deditus est, ut unum ex illis corpus, nomine Academiæ nuncupatum, cogendum constituendumque curaverit; &, quia nullum potest corpus sine capite coalere, præfectus est illi unus, qui tamquam membris caput inhæreat: atque hodie ex vetere eorum instituto convenire frequentissimi debent in ejus ædes. Vbi etiam binos ejus liberos videbitis, ætate, ingenio, ac forma præstantes, sed magis sapientia ac probitate conspicuos. non enim eos parens, ad hunc morem, qui nunc increbuit, sed ad veterem disciplinam, optimam, sanctissimamque, instituit. quo fit, ut nullis iidem vitiis affines inveniantur quæ secum fert adolescentia, sed omnis in eis eximia ac digna homine nobili doctrina lauderetur, qui à gravioribus exercitationibus tanquam ab opere feriat, non tradunt se languori ac voluptatibus, sed in hæc amœnissima studia, tanquam in hortos, & ad hanc animi remissionem liberalissimam, conferunt. Quo die hic litteratorum conventus convocatur, eorum unus, qui eas sibi partes accepit, cathedram ascendit, ac ceteris academicis, paulo infra sedentibus, vel solutam orationem, vel carmen, vel ejusmodi aliquid dignum eruditæ auribus, profert. Transactis jam ejus partibus, princeps Academiæ à singulis Academicis vel odas, vel epigrammata, tanquam collectam, à convivis exigit; qui clara voce, quidquid nuper ingenio pepere-runt, exponunt. Vos igitur his studiis elegantissimis de-

ditos

ditos illuc adducam, quo aditus omnibus patet. Sed interea domi meæ sedete tantisper, dum redeam expectantes. nam promere, quæ opus sunt, debeo Dynastæ meo, ut sit paratum prandium; tum nos etiam de reliquiis prandebimus. Ille ita redit. Sed in redeundo quidam ipsi notus occurrit, & lateri adhæsit, neque, cum domum jam pervenisset, potuit eum à se divellere, sed, pertinaciter hærens, Prandebo, inquit, apud te hodie. Gallonius, dissimulans, Derides me, ait, ac ludis ludo tuo; dispeream si sim obsonatus ex tuis meritis. Ille, Nihil agis, inquit; vocata res est; hic sim hodie, oportet. Ac eadem opera pallium posuit, & gladium quo erat succinctus, & soleas exuit, & accubitum ivit. Gallonius, ut contendere durum est cum victore, manus dat, cedit, atque, Ut lubet, inquit; sed ita familiariter accipere, ut te huc venisse pœniteat. Ac, ne eum videretur invitus recepisse, frontem exprompsit, & ad hilaritatem animum dedit. Sed videre erat illius inhonestatem & aviditatem cibi, quemadmodum unumquodque, quod erat bellissimum, raperet, in os mitteret, voraret, ut se vino impleret. Postquam pransus & appotus est probe, deducit pedes de lecto, soleas induit, pallium & gladium repetit, ac lateri humeroque componit, salutatoque Gallonio discessit. Eo egresso, variis sermonibus pomeridianum illud tempus fefellimus. Sed ego, admiratus hominis impudentiam ac voracitatem, me continere non potui, quin quærerem de Gallonio, quid illic hominis esset, qui tanta vi expugnatum aliena prandia veniret. Qui ait, ex hoc eodem est oppido, eidemque Dynastæ, cui ego, operas suas locavit. Sed ejusmodi homines, qui versantur in aulis, si ex facie atque ex ornatu corporis æstimes, tibi videbuntur esse quantivis precii; si ex censu, cassa nuce inaniore invenies. ego magis misericordia, quam aliqua vi adductus, hoc à me prandium extorqueri sum passus. nam fortasse misero nihil erat domi quod esset. Sed quoniam satis quievimus, abeamus, censeo, quo nos ituros constituimus. Ac brevi anfractu in illius viri nobilis domum pervenimus. erat enim sita in ea urbis parte, quæ colitur & habitatur frequentissime,

me, quaque certis horis ultro citroque cōmmeare animi
causa omnis fere nobilitas solet. In ædium fronte, domi-
ni earum nomen grandibus litteris erat incisum, L V -
C I V S M I N V C I V S S I N I S T E R. Adeuntibus fons,
in medio viridarii elegantissimi positus, obijciebatur. Pe-
gaseus, factus è marmore, Phœbo Musisque circumdatus,
pede terram feriens, magnam vim aquarum in altum ex-
citabat. in cujus basi legebatur hoc epigramma in hono-
rem domini ab Arido academico factum.

*Hic, ubi dulce sonat cygnorum cantibus ather,
Atque Helicon novum Lucius instituit,
Conspicuum late fontem salientibus undis
Durus Pegasei suscitatur unguis equi;
Ut sit, ubi dominum tollatis in aethera, Musa,
Et testudinea, Phœbe superbe, lyra,
Quilibet insolito premeretur pondere, vestra,
Phœbe & Pierides, hoc erat artis opus.*

Postquam ea amœnitate ac pulchritudine satis oculos
pavimus, venimus in aulam tabulis pictis undique or-
natam ac refertam. In quibus primum tutelaris Aca-
demiæ deus colebatur. Tum in altera tabula multis Vir-
go voluminibus insidens conspiciebatur; in cujus dexte-
ra tuba hærebat, simiæque demortuæ duæ jacebant ad
pedes. in virgine, Academia referebatur; in sinu autem
extinctis, academiæ itidem duæ significabantur,
quæ ad æmulationem illius infelicibus ortæ auspiciis
brevis perierant. Ab utraque parte, duorum illustrium
Academicorum imagines ad vivum expressæ pendebant.
quorum alter, Bellino nomine, insignem eclogam edi-
dit, quæ hodie ab omnibus legitur; alter vero, Thalaf-
sicus appellatus, multa optimorum versuum volumina
scripsit, & in his fabulam Adonidis egregio poemate
cecinit. Erant autem omnes hæ tabulæ inaurata corona
vestitæ. Supra suggestum, Academicis dicturis extru-
ctum, ad quod duplici scalarum ordine ascenditur, insi-
gnæ Academiæ, Arpinatis pictoris nobilissimi manu de-
pictam, inhæret. Reliquos parietes singulorum Aca-
demicorum insignia vestiunt atque ornant. Sunt autem
insignia apud eos similitudines quædam, quibus unus-
quisque utilitatem, quam ex academicis exercitationibus
percipit,

percipit, addito aliquo brevi dicto, exponere atque oculis pene ipsis subjicere conatur: at erant ita apta, ita venusta, ut eorum cognitione nequaquam animum satiare atque oculos explere possemus. Sed quia audiendi gratia concursus fiebant, veriti, ne, dum ociosi spectamus, sedilia complerentur, sessum ivimus. Vbi oculos in se nostros macilentus quidam ac nati grandis attraxit; qui, hac atque illac concursans, hunc rogabat ut accederet, illi in aurem loquebatur, alium ducebat sessum, alii obviam ibat, neque ullam partem quietis accipiebat. Quæro, quisnam sit ille adeo negociosus, adeo irrequietus, qui nusquam consistat. Respondet Gallonius, illum esse Salvium Tifernatem quendam, Lucii Minucii contubernalem; cujus sollicitudini, diligentiaque Academiae universæ pondus incumbat: uno verbo, eum esse Academiae τὴν πᾶντα; ejusque in primis studium laudari in eo, quod litteratos omnes inquirat, agnoscat, amicitia comprehendat, obsequio tueatur, officiis beneficiisque omnibus sibi devinciat. quamobrem dum aliena negocia curat, sua negligit, prope ad egestatem redactus est. sed constans est omnium opinio, hanc hodie Academiam stare opera ac diligentia quam præstat. ille enim crebro academici uniuscujusque domum salutandi gratia venire, ille eos in hunc locum ducere, domum reducere; ille solus perficere, ut huic cœtui litteratorum numerus, neque frequentia desideretur. Hæc Gallonio fabulante, ex improvviso Salvius adest, ac cuidam, fusca facie nigroque capillo, Cumino nomine, qui tabellas, quas habebat in manibus, attente legebat, Quid tibi, inquit, videtur hæc oratio, qua Obtusus noster Nihil laudavit? Elegans, inquit, ille, atque venusta. Sed venisse hoc illi in mentem gaudeo, præferim mea causa. nam antea ferebam moleste, quod nihili homo haberet, ac propterea dabam operam sedulo ut aliquid essem. nunc vero cum tantum in eo, quod nihil sit, ponatur esse soliditatis & ornamentorum, jam mei non me poenitet, imo plane nihil esse delectat. Verum si Obtuso daretur optio eligendi utrum vellet, nescio an mallet esse nihil quam Cæsar. Sed obsecro, cedo mihi stylum. nam volo in his ipsis tabellis, in ima cera, aliquot versiculis hanc illi sententiam exponere.

Cuminus Obtuso salutem.

Ingemui quondam, traxique per ora ruborem,

Cum me forte aliquis dixerat esse nihil.

Nunc, Obtuse, Nihil cum sic tua pagina laudet,

Nec doleo, nec me dispudet esse nihil.

Sed peream, si, cum vel Caesar, vel nihil esse

Possis, malueris funditus esse nihil.

His scriptis, tradidit tabellas Salvio. quas ille solita sua festinatione Obtuso deferendas reddendasque curavit. Nos vero magna cupido inceserat uniuscujusque cognoscendi. Itaque volumus scire quid hic Cuminus hominis esset. Atque responsum est, eum esse virum Græcis & Latinis litteris doctum, atque ita Græce loqui, ut nullam nosse aliam linguam videretur. Atque eramus plura de eo audituri, nisi effusissimi quidam risus editi ab iis, qui nobis affidebant, curiositatem nostram alio avocassent. at ii Philosophi cujusdam ex eo numero ingenium & acumen irridebant, qui invenisset, densa omnia ac solida corpora esse perlucida; idque hac ratione conaretur ostendere. manum suam dexteram hinc & illinc supra lavam agebat, tanta celeritate, ut breve illud tempus, quo dextera excurrrens lavam obtegeret, aciem effugeret, ac propterea lava semper cerni videretur. At ille, sive hoc dissimulans, sive non animadvertens, rationem concludebat hoc modo, Nonne mea hæc dextera est corpus densum ac solidum? at sic impulsæ & agitata sæpius lavam contegit, neque tamen oculis eripit. sunt igitur omnia solida ac densa perspicua. Non intelligebat, dexteræ agitationem oculis, ut dicebamus, illudere; quæ si supra lavam immobilis staret, ita eam obduceret, ut cerni non posset. Docebat præterea, terram esse fluidam, atque in ea animantia omnia velut pisces moveri. Quid enim aliud, agebat, sunt illa corpuscula, quæ per solis radios aquarum in ore decurrunt, nisi terræ particulæ? sola igitur terra hæc inferiora occupat, quæque moventur omnia complectitur. Verum non audiemus hæc ab eo qui mox dicturus est. nam semper aliquid assert ingenio perfectum, atque elaboratum industria, ac præsertim judicio limatū. hic est ille Hiero

Volusius in primis doctus, humani ac divini juris peritus, Græcis & Latinis litteris, denique omni eruditionis genere excultus; qui plura & egregia volumina, tum soluta oratione, tum versibus edidit; neque, quamvis egregius, ad honores ascendit; id quod sæpe in hac Republica optimo cuique contingit. Hæc atque alia de illo audiebamus, cum interim ipse comparet in cathedra. Erat facie honesta, sed macie ac pallore, ex studiorum labore, non nihil obducta, & quia oculis minus utebatur, oculariorum præsidio munita; quæ illi res auctoritatem magis quam deformitatem addebat. Cœpit igitur culicem laudare; ea eruditione & eloquentia, sententiis adeo concinnis, adeo venustis, ut omnium consensu sit iudicatum, nihil ex eo loco auditum esse magis absolutum, magisque perfectum. qui postquam peroravit, descendit, ac sessum inter alios abiit. At Princeps Academicæ (qui erat adolescens rufus, genere summo, ingenio maximo, quique cursum suum transcucurrerat; nam quia ætate alii de ineundo studiorum curriculo cogitant, ipse eorum metam attigerat;) hic igitur, adolescens tam nobilis cœpit sigillatim unumquemque rogare, ut, si quid novi carminis haberent, in medium afferrent. Ac primus omnium rogatur Plusius Accipiter. hic capillo erat albo, sed ingenio & comitate neutiquam senex. nam dicebatur esse cavillator facetus, hilaris, jucundus, comis & amico amicus, ac poëta in primis suavis, argutus, ac lepidus. hic, inquam, clara & suavi voce recitavit hoc hexastichum, quod ad virginem scripserat, cui melimela muneri miserat.

Purpureis confersa notis melimela rubemus,

Et distenta gravi levius melle sumus.

At simul exiguo perfuncta senescimus ævo;

It rubor a nobis fœdaque ruga venit.

Sic crispanda manes, venient tibi fata senecta,

Et tibi pulchra gens purpura, virgo, cadet.

Et quia mos est illius academicæ, repetere quæ dicuntur, ut, si quid primo intellectum est minus, iterum prolatum rectius percipiatur; ideo satis mihi fuit ocii ad excipiendum ea quæ dicebantur. Secundo loco iussus est dicere Nicobulus Aridus, qui Claudium Magium mor-

tuum, magna apud eos homines fama ac nomine, quique olim Academiam illam princeps rexerat, laudavit, hoc carmine, in quo acute, ut mihi videtur, allusit ad insigne Academiæ, quod fons erat eximius, in cujus humore perlucido complures cygni natabant. & quia cœperat ita submisisse ab initio dicere, ut vix à proximis exaudiretur, Plusius, sua solita festivitate, Dic, inquit, Nicobule, clarius, ut, qui in ultima aula sedent, exaudiant. qui obtemperans ait :

*Navigat Elysium placido dum Magius amne,
Et fugit evictos nobilis umbra rogos,
Turba frequens passim viridantibus abdita silvis
Profilit, & totus emicat alta jugis :
Nescia sed, quali properaret navita mundo,
Quaritat, unde novum cymba referret onus.
Ast ubi Bellinum veteri dare plura sodali
Oscula, & amplexunectere colla videt ;
Fontibus ex istis tantum fluxisse decorem
Comperit, atque illis enituisse locis.
Protinus ingeminat plausus, festisque choreis
Mista refert blandis talia dicta modis:
Scilicet ille humor si tales educat umbras,
Hoc erit atherea clarius arce nemus.*

Nicobulo tacente, Fabullus Leonatus, sponte sua, nec expectato Principis jussu, Hoc, ait, epigramma Nicobuli revocavit mihi in memoriam odam, qua ego ejus, quem meminit, Bellini poëtæ clarissimi mortem deflevi. hanc ego, nisi aliter vobis videatur, exponam. Ut lubet, inquit Princeps. quidquid enim attuleris, proderit. Qui sic orsus est dicere,

*Quantus, heu, terris abiit relictis
Splendor ! heu quanto fremit aura luctu !
Occidit Bellinus, amor, voluptas,
Curaque Phœbi.
Ætheris vastas penetravit oras,
Sicut & velox petit ignis alta,
Et recurvatum celeris sagitta
Præterit arcum.*

*Stridet ut nervum fugiente telo
Fulminis ritu laceratus ær ;*

Morte Bellini repetentis astra

Sic gemit Orbis.

Ille sed Divum numero Iovisque

Institus, fertur rapido sonantis

Impetu celi, oceanoque serus

Mergitur alto.

Et trahens albos nova stella crines,

Monstrat, ut justis operata Divis

Inter aternos generosa Virtus

Fulgeat ignes.

Hunc Venus pulchro rutilans nitore,

Hunc sibi gaudet sociare Phœbus,

Et simul noctis reparare, juncto

Lumine, damna.

Frondebz textas hedera coronas,

Delphica & lauru, viridique myrto

Neclite, & magni date thura sacram

Vatis ad aram.

Dulce testudo resonare carmen

Docta, quod ripis remoretur amnes,

Evolet, dum par fidicen resurgat,

Cominus astris.

Assidebat Fabullo Lepidus Gallutius Sinister, Lucii Sinistri ædium illarum domini filius, paucis diebus ante, ob ingenii celeritatem, & eruditionis copiam, celerius quam per leges Academiæ liceret, in eum numerum cooptatus; atque erant omnes vehementer cupidi ejus ingenii speculam aliquam degustandi: sed ille, vel pudore liberali adductus, vel quod verebatur tot hominum eruditorum judicia subire, rogatus ut aliquid diceret recusabat. sed tandem ab amicis exoratus, Aliquot, inquit, versiculos proferam, quos mihi superioribus diebus, cum essent ruri, sum passus excidere. excitabat enim me & loci amenitas, & cæli salubritas, ac diei serenitas, ut anni tempus lepidissimum laudarem.

Iam tunc festivo resonet mea fistula cantu

Delicias teneras, & leti gaudia veris;

Hic, ubi rura suos pandunt lætissima vultus,

Collesque & campi, quos aura beata Favoni

Aspirans, niveo rutiloque exornat amictu.

O decus eximium, splendor nitidissimus anni,
 Ver, quo purpureo collucent arva colore,
 Floribus atque suis stellata decentibus audet
 Sidereo tellus forma contendere calo,
 Candida quos inter calathos imitata renident
 Lilia, narcissique, & purpurei amaranthi,
 Et molles viola, quas suavis pallor amantium
 Inficit & vario rerum natura colore
 Vestit. namque albent, speciem ducuntque cruoris.
 At rosa virgineo gremium suffusa rubore,
 Tum pudibunda comas viridi abscondisse galero,
 Tum revocare cupit roseos è limine vultus;
 Virgineasque inter residens fulgere papillas,
 Vel niveo pueri mirantis pollice carpi.
 Hac lasciva sinum pandit; post languida florem
 Excudit è gremio, nativo murice tinctum,
 Ac viridans campo gramen depingit aprico.
 Sed volucrum tenui modulatum gutture carmen
 Ut curas abigit tristes, atque ocia reddit!
 Sirenes nemorum picta, placidaque volucres,
 Innocuo pavidas rapitis quæ carmine mentes,
 Et mala demersas securo gurgite lethes
 Cogitis abluere invictas, animoque soluto
 Ducere sollicita jucunda oblivìa vitæ.
 Quo semper vestris resonent mea rura querelis,
 Hinc omnes abeant laquei, cumque aucupe viscum.
 Nec minus invisas avertunt pectore curas
 Cecropia volucres, tenui placidoque susurro
 Vel thyma carpentes, vel cerea tecta locantes.
 Iamne tuos taceam tantos oblitus honores,
 Lenè susurrantis caelestis anhelitus aura?
 Ut ferit usque meas veniens dulcissimus aures
 Spiritus iste tuus: quot naribus afflat odores!
 Nam per odoriferos colles, nabathæaque rura,
 Dulcia percurrrens ereptaque floribus ultro
 Munera grata refert, medio mihi lenis in æstu.
 Aura, mane, tantumque meo da mitis agello,
 Ut circum hac volites frondosa cacumina semper;
 Quo glacie ac rigidis niteant viduata pruinis;
 Nec desint apibus flores, nec amica coronis

Vel rosa, vel vivax apium, violaeque, vel alba

Lilia, velque ipsa nive candidiora ligustra;

Sive ferox urat sitientes Sirius agros,

Sive nives imbresque trahant cum murmure calum.

Placuit omnibus adolescentis indoles ad poësin; atque ea fuit opinio, dulcem illam atque decoctam, & tanquam de musto ac lacu fervidam eloquentiam, annorum decursu multo mitiorem ac suaviorem fore. Post hunc Liberalis recitavit hæc duo epigrammata,

Dum tua turgidulas impellunt lumina gemmas,

Ignem ferox valido pectora torret Amor.

Quid mirum, duplices si tunc radiata per auras

Emittunt ignes, & magis uda micant?

Sic tenui toties rutiloque infecta vapore

Cernimus ardentes sidera ferre faces.

Hic cum paulum tacuisset, Laudavi, inquit, lacrymas alterius: nunc meas conquerar.

Et mea perpetuis torrentur pectora flammis,

Vdaque largifluo lumina rore madent.

Num possunt liquidos oculi deducere fontes,

Et simul ardentes mittere corda rogos?

Cur rapidos lacrymarum imber non comprimit ignes,

Vel saltem irriguas non bibit ignis aquas?

Non mirum; crudelis Amor contraria nescit,

Atque imbrem facibus miscet, & imbre faces.

Vir hic apud eos homines habetur poëta tragicus, atque ejus scriptiones grande quiddam sonare, & tanquam classicum canere dicuntur; sed ex epigrammatibus, quæ attulit, conjecimus, habere eundem suavitatis non minus. Secutus est Sabellus, qui, Provocor, inquit, à Lepido Sinistro, ut carmen alterum recitem, quo proximis Kal. Maji ejus mensis amœnitatem laudavi.

Festivi mensis, festa venere kalenda,

Labentisque anni gloria Majus adest.

Ecce tibi roseo perfusus lumine Titan,

Luce refert nitidos & sine nube dies;

Cultaque odoratis depicta coloribus arva

Lilia cum violis ad nova ferta parant.

Cernuntur tenere per compita longa puella

Ferre sinus niveas purpureasque rosas,

Et

Et simul extructas cumulantes frondibus aras

Vndique sublata poscere dona manu.

Cur non sic totus decoratur floribus annus?

Cur ætas urit? cur fera sævit hyems?

Sed tibi vere novo reparantur gaudia rursum,

Et redit arboribus graminibusque decor.

At nobis simul ac melior defluxerit ætas,

Omnis abest rigidis flosque decusque genis.

Laudaverunt omnes genus illud scribendi latum, exhilaratum, amœnum; ac sensimus nos, qui audiebamus, in hilaritatem impelli. At Sextilius Ligur, qui ingenio, eruditione, doctrina ferebatur in primis, quique, ut agebant, præter libros optimorum epigrammatum, & luculentas orationes, in tabulam Cebetis doctissimos commentarios ediderat, Duo, ait, præclara ingenia, quæ ante me dixerunt, Veris divitias & præmia suis versibus extulerunt: at ego, qui tanto autumnum veri præstare intelligo quanto pluris sunt fructus quam flores & frondes, cum eo magis mihi arbitror rem esse. accedit, quod ætas mea propius abest ab autumno. quamobrem poena Punica, quorum illud tempus est ferax, conatus sum his versibus laudare.

Impiger extremos currit mercator ad Indos,

Et mare gemmiferum findere classe parat,

Vt, quos dant lapides Indi Tyriique colores,

Evehat in pompas, o nova nuptæ, tuas:

Hæc si purpureos imitantia grana pyropos

Murice vel gemmis splendidiora nitent;

Quin solis illinc oculis alimenta petuntur,

Insuper hinc roseum nectar & ora trahunt.

Postea iussus est dicere juvenis; nomen non inemini; in quo præsertim indoles mirifica inerat ad pœsin, quique, stans pede in uno, centum posset versus effundere. hic, Nescio, inquit, ntrum sit optabilius, ingenio an divitiis præstare; præsertim in his moribus, & in hac civitate. ubi divitibus solis præmia, voluptates, honores, & gaudia contingant: verum ego amico cuidam meo, fortunato homini ac nobili, qui tarditatem sterilitatemque ingenii sui, præsertim in versibus scribendis, querebatur, mihi que se invidere diceret, cui ad versiculos faciendos

ciendos natura ipsa tanta, ut dicebat, adjumenta tribu-
isset, hoc epigramma conscripsi.

Sudas, palles, contremis, & moribundus anhelas ;

Scribis ut averso carmina pauca Deo.

Stulte, quid infernas properas nunc ire sub umbras,

Fortuna facies cum tibi grata nitet ?

Illa tibi nummos, & culti jugera campi,

At mihi versiculos fundere posse dedit.

Quod si plus justa quereris mihi parte relictum,

Vt rata sint superis hac mea vota, roga.

Nempe, quibus tumidus graderis, mihi dona resignent ;

Te vena faciant uberiore frui.

Ianus erat quidam in eo numero, cognomento Thorio,
quique in eo conventu Offuscatus appellabatur, cui ve-
terum numismatum, & inscriptionum notitiæ, omnium
concessu primæ dabantur. & quamvis summam do-
ctrinæ & eruditionis laudem paucis concederet ; sale
tamen facetiisque facile omnes superabat. hic summe
expectabatur ab omnibus, ut diceret. semper enim ve-
nustum aliquod & facetum afferebat. Qui tandem ap-
pellatus à Principe, Deplorabo, inquit, hoc carmine,
adversam Cæsaris amici mei fortunam ; cui annos nato
duos supra triginta in sulcis rugosi illius menti nullus
adhuc potuit pilus radices immittere.

Sex Cæsar lustris binos adjunxerat annos,

Et nondum barba cinxerat ora levi,

Nec dare cessabat medicata liquamina mento

Sedulus, & votis sollicitare Deos.

Quod tandem faciles Dii concessere roganti,

Rugosæque pilis obriguere genæ.

Verum dum gaudet barbato incedere vultu,

Et sic formosum se putat esse virum,

Nescio quo fato, tanto qua parta labore

Barba fuit misero, non bene firma cadit.

Scilicet hæc superis est inconstantia magnis !

Tam parva eripiunt munera tam subito !

Hic simul omnes cachinnos extollere, ac eodem tempore
Latini sermonis puritatem elegantiamque, quam illud
epigramma præferebat, efferre. Erat ibi forte Quæstor
Euganeus quidam, summa auctoritate ac senectute ;
cujus,

cujus, in ædibus Gallonii scripta quædam aspexeram, quæ ita mihi placuerant, ut non facile quidquam me vidisse faterer, quod magis incorruptam illam Virgiliani sæculi scribendi rationem conservaret. De quo palam omnes loquebantur, debuisse illum jampridem ad summum dignitatis fastigium ascendere, si esset locus probitati ac bonis artibus. Itaque vehementer aures arrexe- ram. cupiebam enim eas voce illa erudita & digna Romanis auribus, oblectare. Sed ea spe prorsus excidi. nam ea ætate & auctoritate præditum virum omnes in parentis loco habent; ac bene & præclare secum agi existimant, si interdum ad academicas illas exercitationes, & in illum eruditorum conventum non gravetur accedere. Sed lenivit desiderium nostrum adolescens nobilis, Tyrrenus nomine; cujus majores, religiosissimi mortales, iidemque locupletissimi; quippe qui modio ac trimodio nummos metiti essent; sacella elegantissima, ædesque magnificentissimas, in ea urbe excitaverant. hic præstantissimum ingenium suum contulerat ad summam juris civilis scientiam; & jurisconsulto doctissimo se in disciplinam tradiderat; cujus artibus & exercitationibus ita deditus est, ut tamen, cum est ocium, præsertim rebus prolatis, versus componat, ea sermonis puritate elegantiaque præditos, ut admirationem faciant, eo urbanitatis colore conspersos, ut Romanis etiam hominibus possint imponere, ac persuadere, se idem cum ipsis natale solum habere. Rogatus igitur ut diceret, recitavit hoc epigramma de Cupidine & Apolline sub quercu dormiente,

Dum somnus placidis Phœbum circumvolat alis,

Et tegit umbriferis quercus opaca comis,

Vicina properans vidit de rupe Cupido,

Qui jussit celeres segnius ire pedes;

Ac, Solem video. dixit, recubare sub umbra,

Quaque diem retegunt lumina, nocte premi.

Erant in eo eruditorum numero quidam inimisti, à quibus nullum pensum exigebatur, sed præteribantur immunes. cujus rei causam exquirentibus nobis, respondit unus, illos esse ex vetere Academia, neque ullis legibus ad recitandum obstringi. Sed cum pergeremus interro-

gare,

gare, quo ex genere hominum vetus Academiā constaret, Ex optimo, inquit, genere, ac festivissimo. Ut enim cereræ res, ita etiam hæc Academia, à parvis initiis orta ad hanc amplitudinem, quam videtis, excrevit. etenim ab initio aliquot tantum adolescentes coiere in hanc domum per Dionysia, ut comœdiis agendis requiem sibi ac voluptatem exquirerent; & sunt isti, qui taciti inter alios sedent. neque mos iste exolevit, sed viget nunc etiam. nec ad has comœdias, ut leges eorum sunt, quisquam, nisi suffragiis, admittitur. & , si uno puncto minus tulerit, quamvis sit Dynasta, quamvis Rex ipse, repellitur ac rejicitur. nuptis tantum nobilibus earumque viris simul, liber ad eas aditus patet. non enim putant indecorum ac turpe fœminis primariis ætate ac forma præstantibus risum movere. Erat in hoc número quidam honesta facie, capillo candido, ac veste ad talos demissa, Ibero nomine; qui cum de more præteriretur, surrexit, ac, Nolim, inquit, videri in comœdiis tantum agendis satisfacere; cupio etiam in versibus faciendis probari vobis industriam meam: atque ostendam hoc epigrammate rationem tuendæ per ætatem valetudinis. Erecti sunt omnium animi ad audiendum. Qui sic inquit:

Æstate ut valeas tota, nec sæva Leonis

Vesani possit stella nocere tibi,

Os nigro semper madeat gelidoque lyao,

Et jaceant sicco cetera membra loco.

Risus est commotus, & simul amœnum hominis ingenium cunctorum approbatione laudatum. De hoc audiebamus, esse neminem in illo nobilissimo actorum grege, qui militem gloriosum ad veritatem propius exprimeret; hunc propter ejus suavitatem ab omnibus diligere; hunc in conventibus amicorum, in conviviiis, in computationibus principem esse. Restabat Micrus à Pisauro, qui fere semper postremus rogabatur. huic nemo voce, nemo ingenii celeritate præstabat, nemo erat in lacecendo respondendoque acutior, nemo in omni genere sermonis lepore ac festivitate conditior. præterea erat illi scribendi genus magnificum, enucleatum, dulce; sententiæ splendidæ & acutæ. Hic cum paratus ad dicendum venisset, noluit in quorundam ineptiis hære;

D

qui,

qui, cum multo ipsi malint dicere, quam alii audire, recusando excusandoque diem consumunt : sed libera ingenuaque fiducia sic ait :

*Dum pius Æneas flammis torretur Amoris,
Quas bibit ex oculis, dulcis Elisa, tuis,
Mene, ait, incolumem misere incendia Troje,
Ut Carthago novis ureret alta rogis?
Heu dispar morior ! potuit tunc addere famam
Mors mihi ; nunc misero vita decusque perit.*

Cogitabam aliud etiam vobis carmen recitare, quo Philippi copiarum nostrarum Præfecti conjugem nuper extinctam, loquentem induco. verum satietati aurium vestrarum potius occurrendum, quam aliis eas versibus onerandas censeo, quamobrem in præsentia supersedebam ; illudque in aliud dicendi tempus rejiciam. Sed omnes se statim velle audire dixerunt. Qui, solita alacritate, sic inquit :

*Vt mea perpetuum celebretur fama per ævum,
Spargitur hic lacrymis carminibusque lapis.
Sunt hæc grata quidem cineri pia munera nostro;
Attamen illa magis gloria summa placet,
Quod tibi conjugio fuerim sociata, Philippe,
Luminibusque ipsis carior atque anima.
Hoc mihi longa dabit secura tempora vita ;
Vnus eris titulis firma columna meis.
Versibus indigeant alia; mihi laudis abunde est,
Quod tali dicor nupta fuisse viro.*

Silentium, quo fuit exceptum hoc carmen, & cunctorum approbatio, non mediocriter placuisse illud, ostendit. sed cum jam nemo videretur superesse, qui diceret, discedendi causa omnes surrexerunt. At Hiero Volusius, qui ita copiose culicem laudaverat, manu silentium indixit, ac, Nolim, inquit, videri venisse a symbolus in hunc locum, vel potius in hoc litterarium quasi convivium, ubi à tot litteratis viris, tanquam à convivis, collectæ sunt exactæ. quamobrem ego etiam, in commune, aliquod conferam ; ac recitabo Iambum, quo Urfati, Virtutis & honoris Antistitis, nuper extincti, immatu-ram mortem desievi ; qui erat, ut scitis, exemplum innocentia virtutumque omnium.

*Præceptis in improbum nefas semper ruit
 Non aqua mens mortalium:
 Nec jussa legum comprimunt minacium;
 Nec sæva licitorum manus
 Peccare conantem securibus tenet;
 Nec dicta justis præmia
 Ad fulgidum Virtutis excitant decus.
 Sic recta, quæ sunt odimus.
 Quæ laus tibi, decusque quantum sæculis;
 Vrsate, restat omnibus,
 Quem nec virens ætatis ac florens decor,
 Nec purpura clarus nitor,
 Virtutis arcta perculit de semita,
 Traxitque segne in ocium?
 Miramur, atra te quod abstulit dies,
 Citoque mersit funere:
 At rara res non longa dat spectacula
 De se, sed interit brevi:
 Tu ætatis haud probæ, velut miraculum,
 Præcox in astra diffugis.*

Hæc cum dixisset, conclamatum est, ilicet. Itaque, facta potestate abeundi, consurgimus; relictaque academicorum corona, quæ obviam Hieroni processerat, eisdemque doctissimam illam culicis laudationem gratulabatur, una cum reliqua turba discedimus. At domus illius limen egressi, longum agmen impuberum puero- rum aspicimus, quî nudis pedibus atque oculis humi defixis, bini incedebant, ac nescio quod carmen flebili voce atque demissa canebant. hos magnus itidem puellarum numerus consequebatur, ad eundem fere modum concinentium. Quod sane admirantibus nobis, inquit Gallonius; Alexander, Daphnes & Apollinis præses, ac Dynasta clarissimus, sextum jam diem decumbit in lecto, gravi periculosoque morbo implicitus: atque, ut audiui, dum vos attentius dicta Academicorum excipitis, paucis abhinc horis, morbus illi amplior est factus; ita ut medici prope desperent. at hi pueri puellæque, quæ ejus misericordia sustentantur, ad omnia Deorum pulvinaria Æsculapium orant, ut sit propitius. & sane inagnum hæc Civitas damnum immaturo ejus interitu

faciet, quo nemo est qui sumptu ac magnificentia longius prodeat. His dictis, quia non multum ad solis occasum temporis supererat, pedetentim ac placide domum regredimur. Vbi nos primo cœnæ, tum lecto tradidimus.

Sed circa secundam noctis vigiliam expergiscimur, querulis lamentantium vocibus excitati, quæ totam viciniam impleverant. Quainobrem exterriti consurgimus, capita ex fenestra proferimus, easque lamentationes ex nosocomio Gallonii ædibus proximo venire comperimus. nullæ aliæ voces exaudiebantur, nisi illæ, Hei mihi, hei mihi! crucior, disrumpor; lien, hepar, intestina omnia seditionem faciunt, eruptionem parant. Erat nosocomium illud omnium ejus urbis maximum ac celeberrimum; ibique ad ægrotos procurandos magnus mercenariorum numerus conductus alebatur; quibus Magistri auctoritate & nomine imperabat senex quidam, ut dicebatur, præparcus & durus, qui nulli rei ita studebat ut parsimoniæ; verum nullum in ea re neque judicium, neque modum adhibebat; nam interdum, ut minam lucrifaceret, talentum magnum perdebat. At Gallonius, siue captus misericordia laborantium mercenariorum, siue vitio gentis humanæ avidus cognoscendi quid esset, Quid si adeamus, inquit, & laborantibus succurramus? Censeo, ait Æmilius. Atque una omnes, succincti gladiis, miseris in auxilium properamus. Sed, nosocomium ingressi, perreptamus usque illud omne, ad cœnationem. ad penum, ad tabernam aromatariam, quo non? neque quisquam occurrebat. unum in valetudinario medicum cucurbitulas ægrotanti aneas applicantem offendimus, eidemque cruorem ex cute securi ducentem. Postremo cum fieret obviam nemo, secuti querentium sonitum latrinam intramus; ubi totam familiam ventris necessitate compulsam coisse comperimus. Erant in eo loco stercorariæ sellæ plus quindécim, omnesque ad unam ab exonerantibus ventrem obsessæ. Sed, qui postremi accurrerant, rogabant primos, ut surgerent, ut locum darent: alii, iracundiores, se iis in gremium alvum educturos, minabantur: alii ad vim confugiebant, ac sellarum obsessores loco movere niteban-

nitebantur : omnesque strepitu obscœno simul atque odore locum implebant. Rogamus unum , qui surrexerat , unde natum esset , quod omnes una atque eadem hora citata alvus exerceret ? Respondet , se id vino tribuere , quod in proxima cœna bibissent. Etenim magister nosocomii , homo parvus ac tenax , cum facis magnam vim pluribus ex doliis collectam projici noller , consultavit cum cellario quemadmodum eam potantibus nobis obtruderet. Ille , ut à Magistro gratiam iniret , Coucinnabo tibi , inquit , ex hac face vinum ita purum , ita liquidum , ita simul mordax & lene , ut , qui degustet , non modo non aspernetur , verum etiam avariter in se illud ingurgitet. In pauca ut conferam , faciem illam diligenter collectam , multa vappa diluit , additisque ovorum vitellis , sulphure ac magna præsertim aluminis copia totam eliquat , ac pro vino hauriendam exhibet. Vix horæ quatuor intercesserant ab ejus epotatione , cum cœpit singulis nobis alvus effluere , atque acerbissimis doloribus distrahi. Hæc audientes , in eum plane risum effundebamur , ut prope ilia disrumperebantur. Sed Gallonius bono eum animo esse iussit. se enim sperare , vinum illud ipsis medicæ potionis loco futurum , quæ lethales morbos averteret , quos pestilens anni tempus induxisset. Statimque discedimus , lectum repetimus , redormimus.

LIBER IV.



Ostero die maturius multo quam pridie surreximus , ut reliquas ejus urbis regiones oculis lustraremus. Sed jam emanarat in vulgus , Dynastam Alexandrum , ea nocte , interiisse. Itaque plena erant omnia mœroris ac luctus ; omnisque ætatis atque ordinis hominum ad ejus ades , visendi gratia , concursus fiebant. Sed inter eos , qui ibant & redibant , dynasta unus alteri dynastæ occurrit ; atque illico ambo consistunt ; inter se amicissime salutant ; uterq ; alteri sancte affirmat , nihil eo sibi jucundius quidquam neque carius esse : tum pollicetur studium suum & operam sine

ulla exceptione aut laboris, aut occupationis, aut temporis; atque insuper addit, nihil fore ita arduum, ita difficile, quod pro eo susceptum sibi facile & jucundum non sit futurum. Hic Gallonius cachinnos extulit. Ego, admirans, quæsi de illo, quid rideret? Qui, Rideo, inquit, quia non facile est invenire duos mortales, majore inter se odio dissidentes, quam isti sint. vide ut mali dissimulant, ut se amplectuntur, ut pollicentur operas mutuas. alio hic more ac Romæ vivitur, ubi indictæ & apertæ inimiciæ magis exercentur quam tacitæ & occultæ. hic est frons omnium familiaris, multorum animus iratus, iracundiæ occultæ, blanditiæ apertæ. Ac dicturus erat plura de illorum hominum moribus, nisi clamor ingens interpellasset. Quamobrem conversi magnam puerorum aliorumque catervam aspicimus, qui sibilis ac vocibus senem unum sectabantur, pallidum, squalidum, ac pene ab inferis reducem. Clamabat unus; Heus tu? quid apud inferos agitur? suntne ibi popinæ, caupones? num ibi estur ac bibitur? Vociferabatur alter; Cur te noluit Orcus ad se recipere? fortasse ut esset qui pueris in ludum ire recusantibus metum incuteret! rogo te num tibi Pluto apodixim defunctoriam reddidit? Alii; Vtinam dynastæ Alexandro, quem modo Pluto surripuit, hoc quasi postliminio ad nos redire contingeret! at hoc est optare, quæ sperare facilius. ô factum male! hic, quem æquum erat in tenebris esse, ad aspiciendum solem revocatur; ille, qui, ob summum vitæ splendorem, clarissimum patriæ suæ lumen extiterat, communis lucis usura privatur. At nos, rei totius ignari, sciscitamus, quænam hæc fabula sit. Eorum unus, qui in jaciendis ridiculis ceteris argutior videbatur, Audite, inquit, rem ridiculam. Hic qui tanto comitatu domum reducit, elatus est pro mortuo, vivusque in conditorio depositus; ubi sine cibo triduum jacuit. Quibus auditis, horruimus, ac majore etiam exarsimus cupiditate audiendi. Qui fecit huic nostræ cupiditati satis. Sed antequam, inquit, ad rem aggrediar, necesse est, ut, quid hic hominis sit, vobis aperiam. Hoc, quem nunc videtis placidum, demissum, quietum, non est truculentior quisquam, neque flagitiis onustior, quamvis, deflexu

ætatis,

ætatis, non parum de solita sua ferocitate & impotentia remiserit. nam antea, supra quam dici potest, erat intemperans, iracundus, ebriosus, elatus, popino, manu & lingua promptus, in nocturnis bacchationibus princeps, in cadendis verberandisque hominibus dux aliis & magister, in excitanda turba ac seditione movenda prope singularis; in diris vero execrationibus nulla de causa in deos immortales jaciendis cuivis longe superior. At si ex factis præsertim judicare de hominū ingeniis licet, vel ex hoc uno ejus facinore, quo loco ac numero habendus sit, existimate. Cum juvenis ad Pultiphaeos venisset, homines barbaros atque à nostris moribus sane remotos, in quodam eorum pago deprehensus, interrogatusque quisnam esset; Malum, inquit, quod vobis dii dent magnum & maturum, nebulones, sycophantæ, latrones: quid ea res ad vos attinet? ite hinc in maximam malam crucem. Barbari tametsi non intelligerent, quæ ab eo dicerentur, tamen ex habitu oris, ex oculorum conjectu, ex vi, qua se eximere ex illorum vinculis conabatur, rati sibi ab eo maledici, statuerunt de communi sententia eidem caput uno ictu præcidere. At videte imperterritum hominis animum. cum inter ipsorum tela versaretur, cum ad mortem raperetur, cum etiam collo suo ferrum imminere, cum se vulnerari sentiret; Agite, clamabat, impuri, latrones, carnifices; vos ego ulciscar probe, si vivam. Verum cum eorū unus, qui hoc sibi sumpserat, ut uno ictu securis caput illi à cervice repelleret, id, quod conatus erat, non perfecisset, graviter in collo vulneratum & ad terram abjectum reliquit. At ille, quod robustissima valetudine est, ex eo vulnere brevi convaleuit. Tanta igitur accepta injuria, homo iracundus de referenda hominibus sacrilegis gratia sedulo cogitare, in varias cogitationes animum raptum, nullam partem quietis accipere. Sed cum jam pulchre omnia in corde instructa consilia haberet, alacris castra movit, atque ad suos hostes ire perrexit. Genus animadversionis cognoscite; & simul admiramini, tantum in uno homine fuisse animi ad audaciam. Nocte quadam intempesta usus opportunitate ventorum, subiecto paucis quibusdam casis igne, totum fere illum

pagum antea incendit, quam quisquam animadvertere aut animum recipere posset. ipse autem noctis beneficio occultatus in hanc urbem incolumis venit. ubi primam à dynasta Palladio in numerum suorum circumpedem receptus est; tum ab aliis deinceps dynastis pluribus. Sed demum homo inconstans ac levis, aulicam vitam pertæsus, ad uxorem habendam animum appulit. ne multa; Muliercula quadam ducta, locat virginibus Vestalibus operas suas. Scitis cujusmodi sit mulierum genus, varium, inorosum, superstitiosum, difficile. Ita cum bonæ illæ virgines exercebant, ut ne minimum quidem tempus, quietum esse paterentur: neque hibernis mensibus dies aliquis tam magna ac turbulenta tempestate erat, quin bis eundem in hortos Placidianos, qui millia quatuor absunt ab Vrbe, ad dynastam, in cuius patrocinio latent, ire compellerent. Quapropter, multorum mensium morbo ex frigore & labore contracto, denique, medicorum sententia, desperare de salute sua jubetur. Ille ridere ac medicos insanire dicere. se enim tum ipsis, tum liberis suis superstitem fore. At, dum his vocibus dicta medicorum eludit, linqui animo visus est, atque interclusus spiritus ita artè meare, ut omnem plane sensum effugeret. Omnia, quæ solent esse in mortuis, signa aderant, pallor oris, corporis totius rigor, nullus sensus. Ergo, tanquam mortuo, funus curatur ab uxore. cui nihil longius videbatur, quam dum cadaver illud domo efferretur. nam sæpe, ob impotentiam viri, non solum appellabatur superbius, verum etiam pulsabatur acerbius. tamen, ne in sermonem hominum vituperationemque veniret, non solum lacrimis, sed etiam sumptu, ut pauperculæ mulieris facultates ferunt, opinione sua extinctum supremo mandavit officio. Advocatis igitur Libitinariis, mortuus effertur, in conditorio collocatur, ostium conditorii præcluditur. Vix dies unus intercesserat, ab eo diè ex quo fuerat sepultura affectus, cum interclusa anima ad vitæ officia rediit; experrectusque, non una amplius nocte se cum uxore sua cubasse existimavit; elatoque paululum capite, veniens ab ostio conditorii, non bene præclusi, tenue nescio quod lumen accepit, ac, leviter cubito recens ibi positum

fitum mulieris cujusdam cadaver impellens, Heus, inquit, Milphidippa, (nam id uxori ipsius est nomen,) surge, atque aperi fenestram. Cui nihil Milphidippa respondit. Tum iterum, Heus, inquit, erisne hodie evigilatura? jam hora sumendæ potionis à medico indictæ præteriiit. Sed surdo fabulam narrabat. Quamobrem commotus, Quid est hoc? ait. numne ad mortuos loquor? At fœminam vide; antea, cum valebam, semper ante lucem experrecta mihi somnum excutiebat; nunc, cum nihil opus est somno, in eo tota desigitur. Sed cum lectulus ille solito sibi durior videretur, conatus est in alterum latus procumbere, ubi alterum hominis mortuû cadaver offendit. quod quempiam uxoris suæ mœchum esse suspicatus, Facinus indignum! exclamat. pessima ista mihi ante oculos, atque adeo in eundem lectum, amatorem suum adduxit; quid faceret, si me extinctum sepulchrum aliquod tegeret? & quo me turpius irrideat, simulat dormire. Elatusque iracundia, Mox, inquit, experiar, an suscitare te possim. Arreptoque altero ejus crure, cœpit eam hac illac impellere. Sed vix crus illud in manus sumpsit, cum à reliquo corpore totum avellit atq; distraxit. quo factò, tetrissimi odoris fœditate percussus, plane vehementer exhorruit: quocirca manibus explorans quærensque, quæ circa se essent, diligentius, neque aliud nisi tabularum frustra atq; ossa mortuorum attingens, tum demum agnovit, quorum confederit arvis. atque, O me miserum! inquit. sepultus sum vivus. aperite aliquis conditorium istud actutum.

Sed miser ignarus nequidquam hac dixit ad auras,

Quæ nullas audire queunt nec reddere voces.

Verum, siue deus aliquis eum respexit, siue casus adjuvit, in diebus paucis, quibus hæc acta sunt, bajulus quidam moritur, atq; in illud idem conditorium infertur: sed, aperto à vespillonibus ostio, clamare, qui intrus erat, cœpit. Afferte mihi prandiam. nam tertium jam diem sine alimento traho. Ad quam vocem exterriti tum vespillones, tum libitinarii, tum pollinctores, abjectis cereis, relictoque cadavere, fugæ quantum potest sese mandarunt. Non cessabat ille majore vocis impetu, ut inde extraheretur, clamare, atque, Vbinam gentium, inquit sumus?

*Quod genus hoc hominum, quæ gens tam barbara morem
Exercet? viri prohibentur munere lucis?*

Vel miser hic bajulus fortasse invitavit sese in popina
plasculum: quamobrem in somnum delapsus, antea
quam crapulam exhalavit, pro mortuo ad sepulcrum
abstrahitur. At illi, ubi paululum à timore animum re-
ceperunt, revertuntur, & cum eo, tanquam cum infernis
monstris prodigiisque, loquuntur. Quibus ille, *Luditis
me, inquit; ego vivo & esurio.* Et cuncta ordine nar-
ravit. Qui, habita dicenti fide, extractum inde, & cibo
ac portione refectum, domum ad uxorem reducunt. quæ
utrum majore admiratione vel odio corripienda sit, in
incerto est. nam, illuc isse virum rata, unde negant re-
dire quemquam, alium ex sententia sua sponsum sibi
delegerat. Hic locus erat interpellandi: *Quam, inquam,
illa cuperet, ut eodem modo mortuorum hic funera
curarentur quo Romæ curantur? ubi eorum corpora
ardentem in rogam conjiciuntur. non adeo nunc illa
post funus virum suum domum redeuntem aspiceret.*
*Credo, ait, si hic mos iste vigeret, ipsa rogam incen-
disset, ac suis virum manibus in ignem intulisset: tum,
quo omni plane metu solveretur, collectos cineres in
profluentem aliquem conjecisset. atque, quod ejus est
in virum odium, audire eam videor se macerare, inve-
nustam dicere, ac tantum ferundis miseriis natam queri.*
*Tum ego, Si, inquam, apud vos mortui reviviscunt, jam
nemo sit, quin malit hic pauper vivere, quam alibi re-
gnum obtinere. equidem, quod ad me attinet, non usquam
velim vitam exigere.* Qui ait, hoc iis tantum contin-
gere, qui Cocytum nondum transiniserint. nam, qui al-
teram ejus ambis ripam attigerint, una cum spe rede-
undi, simul cogi omnem hujus lucis memoriam amit-
tere. His actis, illum cum risu dimisimus: nos ad per-
lustranda cetera urbis loca perreximus. Sed tandem de-
fessi ambulando, & quia diei servidissimum tempus cœ-
perat, domum revertimur. Vbi ociosi, quid ageremus,
non habebamus. nam neque prandii tempus advenerat,
neque prius Gallonio potestas discumbendi dabatur,
quam dynastæ ipsius confectum esset prandium, mensæ-
que sublata. Itaque minus nobis molestas antemeridia-
nas illas

has illas horas elapsuras existimavimus, si eas cum Gal-
 lonio in illius dynastæ aula traduxissemus, ubi facile
 multa sese oculis atque auribus objecissent, quæ nos cum
 voluptate aliqua detinerent. Eo igitur imus, procceto-
 nem intramus, in unum ejus angulum soli secedimus.
 At boni illi familiares, more suo, consumendi ocii cau-
 sa, ad feriendam uniuscujusque existimationem linguæ
 gladios exeruerant. Ac primum notæ cujusdam mulie-
 ris famam lacerare cœperunt. tum alteri spectatæ san-
 ctitatis viro inveteratam illam probitatis ac fidei opi-
 nionem abrogare aggressi sunt. Erat unus ex illis refe-
 rens memoriter omnium ejus urbis meretricum nomi-
 na; atque earum multitudine, quæ erat innumerabilis, ac
 memoriæ vi, quæ erat incredibilis, Cyrus videbatur,
 qui lustraret exercitum, ac suo quemque militem nomi-
 ne appellaret. Alter convivatorem sordidum diris devo-
 vebat, quod sturnum pro turdo, vaccinam pro vitulina
 ipsi in prandiū apposuisset. Sed postquam non erat quem
 amplius læderent, defessi maledicendo, in dynastam Ale-
 xandrum sermonem contulerunt; quem omnium medi-
 corum opinione maturius extinctum affirmabant; præ-
 sertim cum neque ætate confecta, atque insuper robu-
 sta corporis firmitate esset. Tum quærebant, quemnam
 Rex amplissimo illi muneri, quoungebatur, suscepturus
 esset ex iis, qui tantæ spei imminebant; atque unus-
 quisque, prout ejus studium ex amicitia, vel spe aliqua
 utilitatis flagrabat, alium alii anteponebat. Sed, dum
 sermones cædunt, compareret unus in proccetone honesta
 facie; sed oculis in terram demissis; quem statim omnes
 adeunt, ambiunt, circumstant, & honorem nescio quem
 nuper adeptum gratulantur. atque unus præ ceteris
 amore in eum ac benevolentia prope dilabi ac diffuere
 videbatur, adeo ut interdum collacerimaret; interdum
 hæsitaret, tanquam si verba ad declarandam amoris
 magnitudinem apta non suppeterent. Gallonius mirari,
 ac sudario risum compescere. qui tandem, ad nos acce-
 dens, Non potest, inquit, dici, quos isti mihi cachinnos
 extorqueant. videtis eum, cui tot gratulationes habentur?
 hic paucis diebus ante apud nostrum dynastam,
 multum auctoritate & gratia valebat, adeo ut ejus con-

filio & auctoritate domi omnia administrarentur. quæ illi res magnam invidiam concitavit, multorumque paravit insidias. quas ille animadvertens, satius esse duxit sponte loco decedere, quam cum ignominia moveri. verum, ne tam honorem deposuisse, quam permutasse videretur, impetravit à dynasta in beneficio & gratia aliam provinciam, in speciem quidem honestam atque magnificam, sed, re ipsa, totam nugatoriam ac levem. venit igitur miser, ut dynastæ gratias agat. sed movet mihi risum in primis ille, qui ita docte simulatione benevolentiae odium suum obtendit. nam hoc homine nemo est illi capitalior neque infestior inimicus. atque ejus præsertim opera inductus ac depravatus est dynasta invidia atque obrectatione commodi ac laudis ejusdem: vide, obsecro, ut malus simulat, ut blanditur subdole, ut frigidam malitiose suffundit! Interea profilit unus in medium, atque, Est mihi, inquit, in cubiculo cœnophorum vini præstantissimi frigidissimique, quo nullum hac ætate dixerim me gustasse suavius. flos vini est, Liberi lepos, atque nna opera palatum vellit ac mulcet. Opportune, ait alter. nam ex quo surrexi, nondum villi quidquam exhausti; & quod diei tempus sit, vides. Mihi quoque, subdidit alius, siccae siti fauces arent; quas nisi propero vino conspergere, in pulverem abeant. Apprehensaque Gallonii dextera, Sitim, inquit, sedatum eamus. Etenim te ea etiam enectum aspicio; & simul experiamur an vera sint, iste quæ memorat. Gallonius morem gerit; sequitur, & nos una quoque. Itaque omnes in cubiculum illius irruunt, cœnophoro vim afferunt, atque uno pene haustu omnem animam intercipiunt. Erat ibi olla ad ignem apposita, agninis carnibus plena, nondum satis excoctis. has eorum unus ex aula diripit, in patinam infert, atque etiam tum fervidas affert in ventrem. alter frustulatim panem in patina secat, supra jus injicit, caseum minute concisum aspergit, piper addit, devorat. At ille, qui vinum laudaverat, facti poenitens, quia prandium suum diripi videbat, Quandoquidem, inquit, rogam incendimus, cur non etiam hunc diem ferme ad umbilicum mortuum in eo comburimus, ac lati prandemus? Sic agamus, inquit ille qui

quî panem ex jure vorabat ; Iubeat unusquisque afferri quæ sibi in prandium paraverat, & in commune conferri. Placuit omnibus ratio. At, Ego commeatum, inquit Gallonius, spondeo, quod satis sit mihi atque istis duobus hospitibus meis. Affert interea rumor, dynastam prandium poscere. Ad quam vocem Gallonius excitatus accurrit ; quæque opus sunt, parat ; neque ita multo post revertitur, plenus reliquiarum. Etenim dynasta, quia crudior erat, nihil præter juscumculum degustaverat, cetera intacta reliquerat. Quo viso mirabiliter sunt animi convivarum recreati, & unusquisque deos rogabat, ut, quoties sibi cum Gallonio discumbendum esset, dynasta crudus existeret. His dictis, omnes cum risu soleas ponunt, lectos inscendunt. Qui risus duplicatur interventu cujusdam litterati, quem pridie inter academicos illos me vidisse memineram. hunc esse ajebant philosophum summum, oratorem egregium, quique auderet in conventu poscere, qua de re quisque vellet audire. Sed hominem voluptarium & conviviis flagitiisque deditum conclamant omnes, ut adeat, soleas exuat, discumbat. Qui non patitur diu se rogari, sed statim ascendit, ac summus accumbit. Itaque hilariter estur, bibitur. Sed, ubi saburrati recte sunt omnes, inducitur sermo de mulieribus ejus civitatis, quas, paucis exceptis, criminibus avaritiæ impuditiæque coarguunt. At ego, ne mutus viderer, Ex omnibus, inquam, orbis terræ matronis nullas arbitror Romanis castitate pudicitiaque anteire : plenæ sunt omnes historiæ, plena antiquitatis memoria. Tum Philosophus ille, qui hos sermones lacessiverat, Tu mihi videris, inquit, in historiis Romanorum sane rudis atque hospes, qui non legisti, quid Salustius, Romanæ princeps historiæ, de Fulvia, de Sempronia, ac de multis ejus ævi mulieribus scriptum reliquerit. vel, si hæc non noris, ne ad aures quidem tuas pervenere quæ super ea re Horatius Romanæ fidicen lyra cecinerit ? cujus ego versus possum tibi recitare memoriter.

Motus doceri gaudet Ionicos

Matura virgo, & fingitur artibus

*Iam nunc, & incestos amores
 De tenero meditatatur ungui.
 Mox juniores quarit adulteros
 Inter mariti vina, neque eligit
 Cui donet impermissa raptim
 Gaudia, luminibus remotis.
 Sed jussa coram non sine conscio
 Surgit marito, seu vocat insilitor,
 Seu navis Hispana magister,
 Dedecorum preciosus emptor.*

Potuitne magis diserte projectos mulierum Romanarum ad omnem libidinem & intemperantiam mores exprimere? Tum ego, deprehensus, quemadmodum ine expedirem non inveniebam. sed, quo aliquid responderem, Quid ais, inquam, de Lucretia? nonne omnium pudicarum coryphæa dici jure optimo potest; quæ Tarquinii injuriam ita in se graviter animadvertit? quid potuit facere elegantius mulier cupida existimationis bonæ, quam ereptæ sibi pudicitiae dolorem voluntaria morte testari? tanquam si nulla ea vita sit, quæ à pudicitia spiritum non ducat. Longe alia mea est opinio de Lucretia, inquit ille, atque ea, quæ in animis omnium inveteravit. ego enim nullam illi virtutem, nullam continentiae laudem assigno, nam à Tarquinio oppressa, vel consensit stupro, vel non. si consensit; immerito principem inter pudicas locum usurpat. si non consensit; cur maluit violata sibi necem afferre, quam intacta à Tarquinio necari? Fortasse inquires; quo se pudicitiamque suam existimationi hominum vindicaret. nam si statim Tarquinio jugulum præbuisset, ideo ab eo interempta putaretur, quod cum servo adulterium commisisset. ergo erat aliquid, quod sibi magis cordi esset, quam pudicitia; nempe hominum existimatio. nam, si sola virtute duceretur, quæ, præter conscientiam, nullius præterea testimonium desiderat, quid de se homines loquerentur, non admodum laborasset: at si ad intimum hujus facti cubile penetremus, ab hoc suspicionis aditu, januaque patefacta, aliquod fortasse latens in eo crimen inveniemus. quomodo enim Tarquinius potuit, concubina nocte, penetrare in cubiculum mulieris, multis,

ut fit

ut sit verisimile, pessulis clausum? quomodo custodes mulieris fallere? cur à Tarquinio oppressa non exclamavit? ita enim familia tota accurrisset, ac scelerosus ille vel incepto destitisset, vel, si Lucretiam reluctantem enecasset, multos sceleris sui, multos pndicitiae illius testes fecisset. Nullum fecisset finem dicendi Philosophus multo Liberi flore completus, nisi exorta inter convivas turba dicentem interpellasset. Erat unus in iis, ut postea animadvertimus, ejus notae hominum, qui cibum è flamma præripiunt. hic precibus extorserat, ut in illum gregem admitteretur. sed vix lectum conscenderat, cum coepit ad omnes patinas procaces manus extendere, atque lectissimos ex iis bolos excerpere, tanquam si sibi soli prandium illud esset appositum. Ecce autem, primis escis assumptis, gallina Indica magno in catino porrecta succenturiatur, iis condita condimentis, ut nidore suo non latentem modo famem evocaret, verum etiam demortuam excitaret. homo æquissimus, tanquam si de ea captus esset judex, accito puero, quem suis imperiis præsto habebat ad januam, indicta causa, obvoluto eam capite domum suam auferri in exilium jubet, atque antea se exulem insons aspexit quam posset de defensione cogitare. quo viso, ceteri convivæ mirari, inter se aspicere, atque ad ejus impudentiam, sine voce, ac sine ullo sensu, hædere. sed hilaritas, quæ præoccupaverat mentes, nullum dabat iracundiae locum, sed omnes, dissimulato dolore, in suscepta festivitate perseveravere. Iam convivium properabat ad exitum, cum testuacea placenta, in repositorio collocata, tanquam in exodium prandii proponitur. Ut ille, qui gallinam Indicam, aliam capere civitatem jusserat, advenientem eam aspexit, fecit ingenium suum, atque illi miseræ imperat, ut domum suam in exilium eat, ac vestigiis iisdem gallinam Indicam sequatur. præsto adest puer, qui obtorta gula eam abripiat. Tum vero victa est convivarum patientia; & simul omnes, Enimvero hoc non est ferendum, exclamant. Sed cerebrofior unus. Nunquam hodie, me vivo, hæc placenta mutabit coloniam. Abreptamque ad se coepit attrahere; ille retrahere, ac, vii sibi fieri, dicere. Verum omnium minis perterritus, eorumque,

qu;

qui ipsi affidebant, objurgationibus correptus, se de-
 mum ab incepto removit, & in cubitum reposuit. Con-
 fecto prandio, unus ex convivis, cui alea vita erat, ta-
 los poscit, ac Philosophum in aleam provocat. Nos,
 cum somnus invaderet, surreximus, atque in domum
 Gallonii perreximus. ubi pomeridianum illud tempus
 partim legendo, partim quiescendo transmisimus. Sed,
 cum jam calor remisisset, Eundem est nobis, inquit Gal-
 lonius, in ædem Daphnes, quo universus hic populus
 hodie conveniet. nam inde nobilissimus ille dynasta ex-
 trinctus, magnificentissimo funere efferetur in ædem à
 se ædificatam, ut sepulturæ mandetur. nam mos hic est,
 defunctos in ædibus deorum humare. At ego, Duc nos,
 inquam, eo. nam nihil est, quod magis visendum existi-
 memus. Ne multa; domo egressi ad ædem Æsculapii
 venimus. quam magna refertam turba videmus. intra-
 mus; atque inter cereos quatuor positum adolescentis
 cadaver aspicimus. Rogat Gallonius, quisnam sit ille
 mortuus? quidve illi ad eum concursus velint. Respon-
 detur, eum esse Philotam quendam, cujus amore duæ
 illæ mulieres adolescentes paucis diebus ante interiissent.
 nam eundem, earum intellecta morte, animum despon-
 disse, ex eaque ægritudine in eo nosocomio vita migras-
 se. Quæro ex Gallonio, quem ille Philotam, quas mu-
 lieres narret? Qui, Res, inquit, digna est auditu; sed
 eam plane ita uti se habet explicare non possum. Ego,
 ait unus, vobis narrabo, si causa est cur audiatis; atque
 in verba conferam quam paucissima. At ego, Narra no-
 bis, inquit; nec verbis parce. nam rem gratissimam fece-
 ris. Quamobrem ille sic exorsus est.

In oppido quodam insulæ, huic regno finitimæ, ubi
 Thëridates rex summa cum laude justitiæ Rempubli-
 cam gerit, virgo erat nubilis, Olinda nomine, genere &
 copiis haud quidem summis, sed vultu adeo eleganti,
 adeo venusto, ut oculos in se omnium alliceret. sed in
 primis Philotæ, ejus civitatis longe primi, ita ad se ani-
 mum attraxit, ut vitam illi miseram & insuavem effice-
 ret. Cum igitur amore ac mœrore miser contabesceret,
 fecit id quod cuivis venisset in mentem, ut parentem
 virginis societate amicitiaque sibi conjungeret. in quo
 fuit

fuit felix. nam totum hominem brevi possedit. Verum cum ejus domum ventitaret, atque oculis, vultu, voce denique ipsa, amorem virgini suum significaret, parem in ea voluntatem ardoremque, id quod raro contingit, invenit. Itaque, usi licentia, quam ejus regionis inos tribuit, non cessabant inter se amplexari oscularique. Sed cum eorum oscula modum excederent, cœperunt esse suspecta parentibus Olindæ, cupidis in primis estimationis bonæ. Quamobrem, ab homine nobili, atque id ætatis, pudicitia filię non parum metuentes, aliquo eam præsidio munire constituunt. Sed, cum nullum sit tam firmum præsidium, quod non longa obsidione demum hostis expugnet, consuetudinem filia cum adolescente dirimere statuunt, eumque domi suæ finibus, quantum potest, expellere. Ne multa; adolescentem adeunt; quid de ejus amore compertum habeant, edocent; ostendunt, quam perniciosum futurum sit filia, si propter ipsum in sermonem hominum veniat; orant, obsecrant, ne tantam illi infamiam creet, sed ejus conspectum, atque adeo totam illam domum effugiat. Respondet adolescens, nullum se voluisse virgini dedecus, nullam ipsius contumeliam imponere; jam inde ab initio conjugium animo concepisse; hac nuptiarum fiducia, multa sibi persuasa habuisse. rogat, instat, ut eam uxorem sibi despondeant. Illi, non æquam esse suam factionem cum factione illius, ostendunt. se modicis opibus ac mediocri nobilitate esse; illum summis opibus ac summo genere natum. rem esse periculosam, repente ab asinis, ut dicitur, ad boves ascendere. proinde aliam sibi conditionem, alias nuptias quæreret. Postremo, cum magis exoraret, ita Philotas ab eis discedit, ut qui rem etiam atque etiam consideraturos, & cum parentibus ipsius sermocinatuos affirmant. Non procrastinant; Philotæ parentes adeunt, rem narrant. Illi gratias agunt: consilium dant, ut Olindæ sponsum quamprimum inveniant. Sunt omnes ejus regionis ad subita & repentina consilia propensi. Itaque parentes Olindæ statim illi virum inveniunt, adolescentem quidem nobilem, sed nihil ad Philotam. Nuptiæ statim fiunt, aguntur omnia raptim atque turbate. Verum tam præceps

E

confi-

consilium adeo impendentem viam malorum ab Olindæ peste non repulit , ut in eam etiam celerius attraxerit. Nam eo connubio mutus ille inter Olindam & Philotam amor nihilo remissior est factus. atque omnibus horis Philotas ante ædes Olindæ conspiciebatur , non sine vicinæ atque adeo gravi ipsius viri offensione. qui per amicos Philotam admonendum curavit , ut , nisi malam rem quæreret , eas regiones prorsus effugeret. Erat in Philota, ut in plerisque nobilium , contemptor animus & superbia ; ergo negligere , ac pergere , illac progredi. Hac insolentia pernotus vir Olindæ, die quadam, transeuntem eum , neque dum tale aliquid suspicantem, lato gladio cædit, & in fugam conjicit. Nolite quærere , quantas hæc tam insignis injuria homini iracundo & in primis elato faces adinoverit. amenti similis domum accurrit, gladium arripit, revertitur, inimicum suum etiam tum in ostio stantem aggreditur , eundemque fortissime dimicantem sub oculis suæ Olindæ transverberat. Res illico in iudicium adducitur ; adolescens tota insula conquiritur ; sed ille jam evolarat, atque huc recta contenderat. At iudex quæstionis , impulsu affinium, clamantium Olindam fuisse illi cædi caput, eam abripi & in carcerem condi imperat. ergo misera è complexu parentum ad tribunal iudicis, è geniali thoro, in carcerem rapitur. Sed vix intro in carcerem pedem tulit , cum ad alterum eam saxum nova tempestas afflixit. Etenim non in misericordiam modo prolapsus est custodis carcerum animus , sed amore vincæ exarsit. Noctu ad mulierem adit ; ut sibi morigera sit , rogat ; eam se ducturum uxorem domum affirmat ; dexteram in id, quod spondebat, obligandæ fidei causa , præbet. Respondet illa , non esse tum ei rei locum ; neque decere miseram, sordidatam, in iudicium capitis adductam, ac de vinculis dicere causam coactam , prope funestas nuptias facere ; expectaret dum è vinculis eximeretur. His sermonibus agre ab ea homo ille repellitur. Sed, cum cupido magis instaret, ab amore seu potius à furore consilium mutuatur. Equum comparat , zonam cum viatico sumit , seque fugæ cum Olinda committit. Vbi in quandam silvam ventum est, custos carceris, cui nihil

longius

longius videbatur quam dum in Olindæ complexum irrueret, simulata lassitudine, ex equo descendit, seque in eam cupide rejicit. Illa eum à se repellere, neque adhuc se esse liberam dicere. Ille orare ut sibi subveniret, ut ferret morientia auxilium; multaque id genus addere; sed nihil proficere. Facinus ininari; tantundem. Vbi eam videt nihilo magis minis quam precibus permoveri, ad vim confugit, atque extorquere ab ea complexum nititur. Illa repugnat, unguibus ac dentibus petit. Sed iniqua concertatio, quæ cum valentiore suscipitur. Iam nulla ad resistendum ratio supererat, jam prope erat ut succumberet, cum nova res victoriam illi certissimam attulit, & pudicitiam in tuto constituit. Dum luctat, animadvertit homini pugionem in zona pendere. Tum alacris, furtim eductum, ejus lateri, quantum potest, infigit; seque ita ambitiosissimis odiosi illius amplexibus expedit. Iam vero quid faciat? quid consilii capiat? sola est, mulier, adolescentula; nullus neque amicus, neque comes; loca aspera, deserta, devia. Non despondet animum, non abjicit; verum ad superius, alterum virilis audaciæ facinus addit. Muliebre vestimentum exuit; virile ex misero illo detractum induit, marsupium eripit, equum conscendit, atque amatorem suum, ubiubi ille sit, invenire constituit. Sed ad tantum iter viaticata admodum æstive erat. Etenim nondum ex insula pedem extulerat, cum pauxillulum illud nummorum, quod invenerat in marsupio, consumpserat, insuper equum vendiderat. Quamobrem fuit illi necesse homini cuidam nobili operas suas pro ephebo locare. Ecce autem novas tricas, nova incommoda. Erat illi filia virgo nubilis, forma non mala, cujus ad oculos simul ac recens ephebi pulchritudo pervenit, tantum etiam cordi confecit ardoris quantum maximum capere pectus virginis potest. sed illa nihil amabat; fumum atque umbram persequabatur. At primo amorem suum ephebo oculis, vultu significare. Olinda, in amoribus longe robustioribus occupata, non animadvertere. Tum illa, adolescentem existimans in amore rudem ac tardum, voce exponere, quod vultu intelligeret minus, atque orare, ut sibi

suppetias laboranti sufferret. Olinda, quæ sibi esset conficia auxilium quod expetebatur apud se non inveniri, risu dicta virginis excipere. Illa, se illudi existimans, Quid est, inquit, quod rides? num propterea tibi deridiculo sum, quia pereo? ah ne sævi tantopere. Tum Olinda, Vbi, inquit, me noveris, continuo omnis de me amor effluxerit, & amoris odium successerit. Sed obsecro, si quid amas, ne patri, neque cuiquam mortalium, indicium facias. mihi non magis virilis sexus inest, quam matri tuæ, quam tibi. in manu tua est, quod minus credis, experiri. At, si, quid istuc ornati sit, quæris, dicam; Amor me, & capitis periculum, in has vestes conjecit, ac virum mentiri coëgit. Ac protinus, unde esset, quem amaret, quem occidisset, quo tenderet, cuncta ordine narravit. Postremo orare coëpit, ut auxilium sibi nummarium, cujus esset in primis egens, afferret; hoc est, ut se viatico juvaret huc properantem. Quid? existimatisne, eam, hac re tam inopinata percussam, spem vel amorem animo abjecisse? nihil minus; imo utrumque constantissime tenuit. credo, quod in fabulis legisset, vel ex aliqua anicula audisset, olim nonnullam ex scœmina in virum fuisse conversam: existimabat, idem illi, quam amabat, posse contingere. Sed attendite, quo progrediatur. In Olindæ complexum ruens, affirmat, se sine ea nunquam unum diem esse victuram. Ecquæ mihi vita, inquit, expetenda est, si à te divellar? nulla quidem certe. bono animo es; mihi certum ac deliberatum est, tecum una proficisci, eandemque fortunam subire. Multa dixit Olinda, quo virginem de sententia dejiceret, sed laterem lavit. Quid multis moror? auro, argento, aliisque preciosis rebus convasatis, postridie, cum parens rusisset, una cum Olinda huc versus castra movit. Quo, celeriter secundo anni tempore perveniunt, & ad cauponem ambæ divertunt. Licebat eas cernere virili cultu tota passim urbe pervagari, ac formæ præstantia omnium ad se oculos rapere. Quam multos fuisse putatis qui eas sub illo ornatu puellas esse contenderent? Sed ejus in primis facies enitebat, quæ amatorem suum quæritum advenerat. Sed jam omnia odoranti investigantique suboleverat, eum in hac urbe versari. Quamobrem,

rem, hisce leviter pressis vestigiis, eum secuta, tandem, pro dolor, invenit jam aliquot dies immersum in gaudio meretrici cuidam operam dare. Ergo dolore amens, Itane, Philota, inquit, prorsus oblitus es mei? ergo frustra tantum laborem, tantam infamiam cepi? dum propter te patria carens impudicæ cujusdam moræ perambulo; tu interea loci te oblectasti, ac meretricios amores nuptiis præposuisti? Illico despondet animum, morbumque ex ægritudine contrahit. Rem incredibilem; Vbi hæc ægra fit, continuo illa altera ægrotare incipit: huic morbus augefcit; fit illi etiam amplior: postremo hæc moritur; mors itidem illam alteram occupat: ambarumque cadavera, eodem die, eodem funere, eodem feretro, in ædem Cupidinis, elata sunt, atque una eademque sepultura affecta, ut, quarum animos amor in vita junxisset, mors distrahere non potuisset, earum corpora unum atque idem sepulchrum haberet. Redeo ad Philotam, qui tantum mali insciens dederat. Qui, simul ac certior est factus, (nam Olinda ferme jam moriens rem omnem narraverat,) continuo exanimatus ad ædes Olindæ contendit, commodum, cum ea jam efferretur; & fusus in lacrymas, Ergo mea voluptas tibi mortis causa fui? nunquam me tantum à te amari intellexi. me miserum, non potuisse me tali ingenio frui! sed itidem de te ægritudo mihi vitam eripiet. ò præclarum è vita discessum, si in tuo complexu animam efflare licuisset. Atque ibat, ut sese in Olindæ cadaver abjiceret: sed ægre retentus, demum inde pro mortuo in domum amici ac popularis cujusdam sui refertur: sed, cum morbus augesceret, nec satis diligenter curari videretur, idem amicus in hoc nosocomium perferendum curavit, ubi viri nobiles apto in loco victu ac ceteris rebus quam commodissime habentur. verum, propter anni tempus grave, locum multitudine ægrotantium refertum invenerunt. quamobrem tantisper, dum aliquis convalesceret, fuit eum necesse inter plebeculam collocare. homo nobilissimus, ac suæ civitatis primus, cum se inter faciem urbis conjectum vidisset, tanta vi ægritudinis oppressus est, ut illo ipso die sit mortuus. Hic fuit finis amantium. Itaque, ut videtis,

Durius in terris nihil est, quod vivat, amante;

Nec, modo si sapias, quod minus esse velis.

Excierat nobis lacrymas funestus miserorum amantium casus; atque erat aliquid, quod volebam percontari; sed præripuit eum mihi clamor puerorum, admonentium, appropinquare pompam funeris, quo dynasta mortuus efferebatur. Ad quas voces ille accurrit, & nos etiam cupidos videndi secum attraxit. Erat totum illud agmen instructum hoc modo: Anteibant pueri puellæque, quarum magnus erat numerus, quas illius misericordia sustentabat. sequebantur collegia varia, quæ in ejus tutela latebant. Hos excipiebant candidati complures, qui inflexa ad miserabilem sonum voce diis inanibus flebile carmen atque funestum canebant. Tum ad cereos circiter quadringentos efferebatur dynastæ cadaver, in lecto purpura auroque constrato. Funus, honoris gratia, prosequiebantur dynastæ ceteri, qui præeuntibus ipsorum familiaribus, ac præterea inagno affectatorum numero, bini incedebant. Ordinabant agmen designatores non pauci, stipati lictoribus atratis. Quacunque funus pergeret, personabant viæ fletibus, percrepabat cælum ejusmodi vocibus,

Nunc tempus lacrymas, nunc querimonias,

Et tristi gemitus fundere carmine;

Nunc tempus, nitida veste recondita,

Atrum sumere pallium.

Eheu, præpropere funere concidit,

Sicut flos rapido turbine sternitur,

Ille ingens Alexander, & inclytus

Qua sol surgit & occidit.

Non sic monte super condita prominet

Vrbs, vel fax nitet, ut pectore candido

Illius, probitas, justitia, & fides

Fulsit, nudaque veritas.

O mors, docta prius salte recidere

Indignos obitu, & relinquere pessimos,

Tu tantos potuisti fera cernere

Luctus illacrimabilis?

Nec te longa piorum agmina civium

Moverunt, querulis sedula vocibus

Deplorantia, tolli sibi opem suis

Fidam rebus in arduis ?

Clamabant alii quis tunicas dabit,

Quis nudo fugiant frigora corpori ?

Instabant vidua, quis pueris patre

Orbis prandia dividet ?

Hæc atque alia his similia complura palam de eo prædicabat benevolens populus. Quamobrem omnium consensu tum est judicatum, homini sæpenumero ad gloriam plus prodesse fortunam, quam laborem vel industriam; siquidem vir ille, qui tam faustis vulgi acclamationibus mortuus exciperetur, sine multis litteris, nulla fere rerum gestarum gloria, sola opinione liberalitatis beneficentiæque eum sibi plausum confecisset. Sed inter cætera illud etiam felicitati ipsius tribuebatur, quod in summa rerum omnium abundantia, nondum alteram fortunam expertus, excessisset à vita. Animadvertimus inter perpetuas publici luctus querimonias fratris filii laudes admisceri. hunc vitæ integritate & elegantia, præterea optimarum artium studiis, patru dignitatem & gloriam antecessurum jactabant. Sed diei tempus admonebat ut de cœna cogitaremus. quocirca Gallonius servum suum obsonatum misit. Interim perductus est ad nos naclerus quidam, qui perendie à prandio, si ventus operam dedisset, explicaturus erat vela in insulam, ut agebat, amcenissimam feracissimamque, cujus insulæ civessent homines quieti, hilares, jucundi, voluptarii, itaque de nauulo cum illo convenimus. Postea abire cœpimus ad fontem ibi proximum, calorem discussuri qui membris inhæserat: sed quidam rheda vectus inhibuit. Qui magna voce inquit, O te ipsum Galloni, volebam. quæso, nisi est negotium, paululum da mihi operam. etenim te convento opus est. Vbi libet, inquit Gallonius. tuus sum. At ille proxime ad Gallonium accedens, pauca illi quædam in aurem instillat, rogatque ut dynastæ suo refundat. Postremo interrogat nos, unde veniamus. Respondet Gallonius, Ex æde Daphnes; quo duos istos adolescentes populares meos adduxi, homines nobiles ac literis deditos, qui etiam heri, magna cum voluptate, academicis exercitationibus

interfuerunt. Ille ad nos conversus, *Quam vellem, inquit, ibi ante quindecim dies affuissetis!* nam elegantibus sane verbis ostendi, solida omnia esse perspicua, terræque elementum ab his inferioribus perductum, ad cælum usque pertendere. Tum petiit à me, si quid in ea audissem elegans atque facetum. Qui, *Multa, respondi. sed in primis me mirabiliter delectasse Hieronis ingenium; quod ex culice, nihili bestiola, tantam vim laudum eruisset. deinde egregiam Gallutii adolescentis indolem ad poësin vehementer probasse. Fortasse illud, inquit, carmen recitavit, in quo veris laudes exponit. legi ego illud. nam ejus mihi parens ostendit. Sed quemnam potissimum tibi visus est imitari? Virgilium, arbitror, principem poëtarum. Istuc, ait, in eo mihi displicuit. & sane doleo, celere atque sublime optimi adolescentis ingenium apud Virgilii tarditatem humilitatemque religatum detineri, nec audere se altius attollere. Quid ais?* inquit. *tibine Virgilius serpere humi videtur?* Tibi quoque idem videatur, ait, ubi mea perlegeris. Tum, *Tu igitur, inquam, doctior, quam Virgilius? Doctior?* inquit. *quid est quod ais? sane pudeat me Virgilianis similes versus efficere. & si imperarem, ex omnibus eum bibliothecis amoverem, nullius ingenii minimæque doctrinæ auctorem. Audi quod ego de eodem argumento conscripsi, atque aude Virgilianam inopiam cum mea beatissima rerum verborumque copia conferre.*

*Ver ubi constituit bruma fera bella ragentis
Atque elementorum diras compescere rixas,
Ecce nitens alto vestigia promit Olympo;
Quaque movet gressus, manibus dat lilia plenis;
Atque Dea nares Zephyrus suspendit odore;
Floribus ac viridi depicta tapetia fronde
Substernit niveis fausto cum murmure plantis.
Tunc elementa, Dea venientis lumine, ponunt
Arma, suasque petunt, raptim, conterrita sedes;
Invisaque hiemis conclamant vasa; phalanges
Nec segnes audent aequo decernere Marte;
Sed nova diversum comportant bella sub axem.
Illa supercilio jaculatur fulmen amoris,
Deque animis tumidas pugnantum discutit iras.*

*Ficta quibus falsa succedunt oscula pacis
 Et simulatus amor, junctim & concordia mendax,
 Quam fera post hyemis tempestas verbere pellat
 Frigoris, expulsum revocans in regna furorem.
 Interea risus proscribit nubila cali:
 Fulmina nec rigido nec spicula grandinis arcu
 Funditat ira Noti; sed divitis aura Favoni
 Pregnantis gremium telluris mollibus implet
 Guttarum gemmis rutilans, spargitque decore.
 Ast ubi lata parit funditque puerpera flores,
 Ipsa laboranti Lucina munia præstat.
 Post lustrat solio residens regina nitenti,
 Agmina plantarum totis sibi subdita terris.
 Destinât atque igni, renuit qua ferre tributum
 Germinis, & fructus Natura solvere nescit.
 Continuo accurrunt omnes in veste virenti;
 Atque hac omniferam festinans curva reduclis
 Signat humum manibus; caput hac ad sidera tollit
 Velatum ramis, & nubibus oscula figit.
 Candidus ut niveis se vestibus inferat, amictu
 Ad puri remeans elementi jura nitorem
 Induit, in totum peregrina face solutus.
 Ecce cohors florum vaga prodit ut oscula donet
 Grata Dea manibus, forma quos præterit omnes
 Alma rosa, in vultu gestans insigne pudoris.
 Sed, dum pulchra ruunt proni ad vestigia Veris
 Sirenes nemorum, Cytharista ruris amœni
 Vinula diffundunt arguto gutture passim
 Carmina, qua sitiens avide dum perbibit auris,
 Ebria languidulo decumbit victa sopore.*

Dic, bona fide; acceperene unquam aures tuæ quid-
 quam perfectius hoc carmine? sive spiritus magnificen-
 tia, sive figuris sententiisque, cum validis tum etiam bre-
 vibus atque vibrantibus? vide ut in sensus influit, ut de-
 lectat, ut sententiarum numerus prope numerum verbo-
 rum exæquat! Ego primus elegans hoc scribendi genus
 inveni, in medium protuli, in morem induxi; ego hanc
 viam aperui, lustravi, meis vestigiis impressi: quæ qui
 voluerit persequi, ad nominis æternitatem sine errore
 perveniet. Sume igitur hoc carmen meo chirographo

scriptum, illudque tibi ad poësin magistrum adopta. Dum accipio, & gratias ago, Quid si, inquit Gallonius, ejus epistolas legeres? profecto, ex Pythagoræ sententia, diceres, immigrasse in eum animum Ciceronis, vel ejusdem eloquentiam hæreditate ad eum pervenisse. His auditis, sane commotus est totus, ac, Facis mihi, inquit, injuriam. nam pluris est una aut altera scriptionis cujusvis meæ linea, quam centum Ciceronis epistolæ. Quid est, dii boni, in eo oratore, nisi incitatus verborum cursus, ac sine sanguine ac nervis flaccescens oratio. Plura dicturum in Ciceronem, rediens à funere Alexandri dynasta quidam inhibuit; qui rheda exceptum ab oculis nostris abduxit. Quæro postea ex Gallonio, num sit aliquis cui eo homine esset opus salvo. Quamobrem? rogat. Quia, inquam, insanit. Nec mora; ad fontem ibi large manantem accedimus. Vbi oppressi sumus à philosopho illo, qui in prandio mulieres fere omnes impudicitia notaverat. Quo perfecto, innuit nobis Gallonius, ut regrederemur, atque odium illud effugeremus. Sed antevertit consilium nostrum Philosophi sagacitas. nam me prehensum pallio retinuit, & Quo, inquit, properas? Mane, obsecro. nam cupio perpetuum amicitiae socius tecum inire, quem hodie, ex disputatione habita, non alienum à litteris comperi. Arreptaque mihi manu, Cum noveris, inquit, nos, cunctis hominibus doctis antepones. nam si juratus meliorem rhetorem vel doctiorem philosophum quæreres, præter me non alium adduceres. ita ego sum magister solus præter ceteros. etenim non item discipulos doceo, ut alii doctores faciunt, qui eos, quos erudiunt, consenscere in scholis jubent; sed longe breviori methodo ac via ad summum Philosophiæ culmen adduco. ego primus hanc viam inveni, & si non piget calcare, me tibi in ea comitem ducemque profiteor. Sed non prius tibi dabitur hinc abeundi potestas, quam aliquod ingenii mei specimen capias. Et, quoniam cum historicis & oratoribus tibi magis rem esse animadverti, quam cum alterius artis magistris; Rhetoricæ totius formam in tabulis expressam dabo, quibus, in memoria tanquam in pariete defixis, unico aspectu omnia sese offerent quæ
in

in ea arte traduntur. Parce sodes, inquit Gallonius ; ne te defatiges ; neque præterquam , quas ipse calor molestias habet , adjicias. Nunquam perficies, ait ille , quin hujus studiis consulam hodie. Ego, quoniam aliter fieri non poterat , porrecto jugulo , me illi conficiendumtrado. Ergo incipit, In prima tabula Rhetorices definitio primum explicatur ; quæ est, Facultas videndi quid in unaquaque re sit persuasibile. Deinde ejus officium ostenditur ; quod est , Dicere apposite ad persuadendum. Tertio causæ ejusdem explicantur. Primum efficiens. Quæ constat inventione atque doctrina. Inventio est notatio & animadversio naturæ. Quæ natura nihil est aliud nisi innata ingenii aptitudo ad dicendum. Doctrina vero artem & exercitationem includit. Et est ars, præceptio , methodum dicendi præstans. Exercitatio, assiduus usus consuetudoque dicendi. Deinde finis ; qui est , Persuadere dictione. Tertio materia ; quæ est hypothesis seu causa , quæ definitur , esse rei aliqujus implicita circumstantiis quæstio. Postremo hæc tabula triplici genere causarum descripto concluditur ; videlicet demonstrativo , judiciali , ac deliberativo. Demonstrativum rei laudem vel vituperationem continet ; nempe amplificationem rerum bonarum vel malarum, quas rei inesse contendimus . ejus finis est honestas vel turpitudine. scopus , delectatio auditorum. tempus, præsens. Iudiciale positum est in controversia ; atque habet in se intentionem cum defensione. ejus finis est, justum & injustum. scopus , vel modus, judicis clementia aut sævitia. tempus , præteritum. Præterea judicia omnia vel sunt criminis, vel controversiæ. Criminis oratio duplex : categoria ; quæ crimen obijcit : apologia ; quæ diluit. Controversiæ itidem oratio duplex ; petitio ; qua aliquid postulatur : recusatio ; qua deberi negatur. Sequitur genus deliberativum. quod positum in consultatione habet in se dictionem sententiæ. ejus finis est, utile & inutile. scopus, deliberantis spes, metus, tempus , futurum. partes , suasio , quæ, quid faciendum sit, docet ; & recusatio , quæ contrarium defendit. Hæc igitur est prima tabula . in qua Rhetorices constitutio non minus ad veritatem exprimitur , quam si esset

si esset Apellis vel Zeuxidis manu depicta. Convertite nunc animum ad alteram tabulam, quæ partes & officia oratoris pene oculis subjicit. Tum vero victa est Gallonii patientia, ac, Mane, inquit, cogito te perendie ad cœnam invitare; ibi ociosius cupio tabulas, quas narras, aspicere. nam earum pulchritudo ad contemplandum non brevem aliquam moram, sed longum tempus efflagitat; quod dies jam plane demortuus denegat; & tu scis occupationes meas. Philosophus audito cœnæ nomine, frontem expromsit, hilarique voce, Ego quoque, ait, idem censeo. ego domi tuæ, magno istius cum lucro, ingenii mei divitias proferam; atque eadem opera, quæ dixi, quæque dicturus sum, aliquot in chartulis, velut in tabulis, descripta proponam. & si mihi iste ad discendum se tradiderit, unico fere mense, Logicæ, Physicæ, Metaphysicæque notitiam, non nævo aliquo aut crepundiis, sed corpore omni percipiet. earum ille imagines pluribus in tabulis descriptas, si cubiculi sui parietibus affixerit, quasi pinacothecam quandam instruxerit, longe iis elegantiores, in quibus Polydæti, Zeuxidis, Protogenis, & Parrhasii manus adorantur. Ego, collaudata illius doctrina, Gallonium abeuntem subsequor. Qui inquit, Nisi de cœna mentio esset injecta, nunquam hodie hirudo ista nos dimisisset. Sed vidistine, obsecro, hominem magis ineptum, qui quocumque in loco, quocumque inter homines libitum sit, de rebus gravissimis argutissime disputet? Ego tot delirantium somniis enectus, Quæso, inquã, Galloni, amoveamus nos hinc ocus, ne alius quispiam stultus odio suo nos platee conficiat. nam diis iratis nostris huc venimus. Tace sis, inepte, inquit Gallonius; tanquam si Romæ hujus generis stultorum multo majorem numerum invenire non liceat! Vera dicis, inquam, neque aliud quidquam habeo quod dicam, nisi, quod nemo sine vitiis nascitur, ac cum perfectis non vivitur. Hæc atque alia commemorantes, domū nos tandem recepimus. Vbi enim servum, quem Gallonius in macellum præmiserat, non solum obsonatu rediisse, verum etiam coxisse cœnā invenimus. Qua hilare comesa, post multos variosque sermones, lecto nos dedimus, totosque quieti somnoque in auroram usque tradidimus.

L I B E R V.



OSTRIDIE mane, cum necessitas nulla urgeret mature surgendi, in multam lucem somnum produximus. Sed cum diei tempus, atque hiræ latrantes, cibum exposcerent; subuculam, thoracem, femoralia, ac tibialia poposcimus. Quibus indutis, Cogito, inquit Gallonius, postquam mens dynasta à mensa surrexerit, ducere vos in buleutérion. delectabit enim, signa pulcherrima ex ære, vel marmore, tabulas pictas, summorum artificum manu confectas, aspicere. nam commune hoc, ad senatus habendos, ad magistratus creandos alendosque, ædes amplissimas habet, multis ejusmodi rebus refertas. Ibi Poliarchi (id enim magistratui illi nomen est) causas eorum cognoscunt ac judicant qui in id forum conveniunt. nam olim, antequam hæc Respublica in potestate ac moderatione dynastarum verteretur, ad Populi arbitrium judiciumque summa omnium rerum consiliorumque redibat; in eo summa potestas, summa auctoritas erat. sed post attritas civilibus discordiis opes, cum se dynastis permisisset, ne omnino spoliatus imperio videretur, rerum quarundam administrationem sibi retinuit: videlicet dat operam ut ab emptionibus ac venditionibus, edulcorum præsertim, fraudes amoveantur; nimirum ut eadem ad mensuram pondusve respondeant. itaque Poliarchi singulis fere rebus precia constituunt; numerum vel pondus assignant; & si quod est admissum facinus, si res pluris vendita, si sit ejus ponderi, videlicet assi, uncia vel sextans ereptus, iidem discernunt, multas pœnasque constituunt. atqui ad perquirendas fraudes certos quosdam constitutos habent, qui quotidie mane lanienas, thermopolia, ac fora circumeunt; & quoscunque carnes, vina, pisces, succidiam vel quid ejusmodi ferentes offendunt, sistunt; rogant, unde emerint, quanti; ac statera, quam ad eum usum ferunt, examinant, vel hemina metiuntur: ac, si res emptas ad mensuram pondusve non respon-

respondere comperiunt, venditorem cogunt id quod fraudaverit reddere; ejusque nomen ad Poliarchos deferunt; qui, habita deferentibus fide, absque alia probatione, reum vel pecunia multant, vel aliqua corporis pœna coërcent. quamobrem olim id muneris optimo cuique locupletissimoque dabatur, quo ejus testimonio credi posset, neque esset aliqua acceptæ pecuniæ suspicio: sed ita nunc mos viget, ut fere egentissimus quisque ab iis, qui summam habent auctoritatem in hac Republica, in hunc locum attrahatur. quo sit, ut fures manifestarii, fractis legum ac judiciorum laqueis, quibus obstricti tenentur, parva sæpe pecunia meritas pœnas effugiant. Tum ego; Nihil est, ô Galloni, (ut etiam pro Paulo respondeam,) quod malimus spectare, quam buleuterium istud quod loqueris. Mox, inquit ille, faciam cupiditati vestræ satis. eamus. Sed vix domo pedem efferimus, cum aspiciamus, honesta facie atque eleganti vestitu hominem domi cujusdam fores impellere. Cui mulier de fenestra, Quis, inquit, has fores pepulit? Ego sum; respondet. aperite aliquis, si vultis. Tum illa, Opportune advenis, here; non habemus domi olus in prandium; eme, nisi molestum est, obolo. At ille, Recte admones. ego afferam. facite ut paratum sit prandium cum venero. Fiet, here; inquit illa. i ergo cum diis benevolentibus. Quam lepide, inquit Gallonius, ancilla herum ab ædibus arcuit? Sed, ni piger hic paulum consistere, ludos aspicietis longe pulcherrimos. Habitat in his ædibus mulier formosa, & ætate integra, uxor ejus qui olus missus est emere. Hæc, conscio marito, cum publicano locuplete rem habet. sed, quo eum faciat arietem Phryxi, & usque ad vivam cutem auro detondeat, persuasit ipsi, se clam viro morigeram esse. nam, Si paululum, inquit, hoc illi suboleat, illico omnes perimus. tibi certe illud eveniat, quod mœchis solet; quia ille est homo iracundus, violentus, ferus. Sed, revera, nulla est ovis tam placida quam ille est hircus, neque qui magis in uxoris potestate versetur. Attamen, quo metui videatur, placuit inter ipsos, ut, si domum rediens, signo dato, intus esse mœchum accipiat, simulatione aliqua à foribus tantisper abscedat, dum sese foras ille

ille proripiat. Vix ea Gallonius dixerat, cum ecce tibi foris crepuit, ac mœchum evomuit. Dixit? inquit Gallonius. quid vobis videtur? At, si esset ocium inanendi hic, nec alio vocarer, ut scitis, videretis advolantes huc bajulos cum sportis, coctum olido hirci prandium ferentes. Et sane ferax est hæc tellus ejusmodi hominum. nec mirum si eorum numerus ferè in immensum excreverit. nam est hic quæstus multo nunc uberrimus. ille enim divitias, voluptates, honores parit, ille summorum hominum voluntates & studia conciliat. quamobrem, cui viro paulo liberaliori forma uxor evenit, si venalein eam habeat, manipulatim ad eum munigeruli, cum auro, veste, atque omnibus ad necessarium usum, accurrunt. Verum ideo hæc ars præ ceteris pøllet, quia, ut diximus, divitiæ in honore sunt, paupertas probro ducitur; ocium ac luxur expetitur, labor ac modestia defugitur. Sed inaritorum non unum est genus. nam alii, non dissimulanter & tacite, sed palam & aperte, sunt improbi; & dummodo præsto sit, quod edant, vel potent, suo arbitratu, quotidie, quid homines de se loquantur, nauci non faciunt. aliis paulo honestioribus quamvis idem propositum sit atque illis, nempe supra suas vires edere ac vestitui indulgere; attamen volunt existimari se id nescire quod sciunt, ac non videre quod vident: sed, quo liberior mœchis suas ad uxores aditus pateat, sæpe rus itant: interdum menses integros patria domoque carent: nec parum sæpe contingit, ut ab aliquo ex potentioribus, qui paulo solutiore animo eorum uxores secum habere expetit, vel triremi vel oppido præfiantur, ut illi non solum absint domo, cum navigant vel oppido præsunt, sed etiam libenter, cum honore ac beneficio absint; cum autem redeunt, hilare ac festivo ab uxoribus excipiuntur, amplexibus implicantur; profert alia purpuram, aurum, torquem; ostendit alia conopea, stragulam vestem, eburneos lectos; aperit alia penum, cellam vinariam, granaria; frumentum ostentat, quod annum illum familiæ sit satis; ac, Vide, inquit, quid mihi mater, quid soror die natali meo tradiderit; quid mihi cognatus, affinis, Quinquatriis, Compitalibus, Circensibus miserit.

Boni

Boni viri credunt, gaudent; neque altius rem esse indagandam existimant. Ajunt etiam, hanc tam ingentem meretricum multitudinem immanes illos sumtus peperisse qui nunc fiunt. Nonne vides, ut quævis mulier ancillarum gregem secum ducat? ut reginæ in morem aurata ac vestita incedat? imo cum unus aut alter sufficere earum sumtibus nequeat, plures amatores habere coguntur, atque inter eos partiri provinciam, hoc modo, ut ille in redimiculum præbeat, ille in collum, ille in crines, ille in cellam, ille in mensam. Dum hæc Gallonius narrat, ædes dynastæ præterimus imprudentes, quod cum sentimus, regredimur rursus; intramus, cominodum cum ille sterni sibi lectos ab architriclino jubet. nec mora; Gallonius culinam intrat, dapes instruit, ornat, in mensam infert; dynasta manus lavat, decumbit, prandet; pransus surgit, seque in cubiculum abdit. Nos ad buleuterium recta contendimus; ac Poliarchos offendimus, pro tribunali sedentes, juri dicundo operam dare. Circumstabant eos cetarii, caupones, coqui, factores, cupedinarii, piscatores, aucupes. horum tantus erat numerus, ut, nisi cancelli interjecti defenderent, Poliarchos opprimerent. odor, qui ab illis teter afflabat, locum implebat. clamor item, ab eisdem veniens, concitato mari similis videbatur. Aliud alius orabat. mihi multam ne irroget. me de reis eximat. clamabat alius, Circumvenior, Poliarchi, nisi subvenitis. hic falsum indicium detulit. alius veterem cum Poliarcho amicitiam cominemorabat. ille nummos numerabat. alius deum atque hominum fidem implorabat. Sed, cum satis disceptatum esset, quia dies ille, dies erat curiæ, & maximis de rebus atque gravissimis senatus erat habendus, conclamatum est, I licet. hac præconis voce cohibiti litigatores cuncti discedunt. Poliarchi descendunt, atque expectati veniunt in curiam, quo jam bulentæ (ita enim senatores vocant) frequentes convenerant. Illis ingredientibus, honorifice à cunctis assurgitur. Sed Gallonium in primis cupido invaserat cognoscendi, quæ tanta res eo die senatum extra ordinem cogeret? Estne, inquit, hostis ad portas? Cui responsum est, statuendum esse falsis muriaticis precium, quorum plenam navem biduo

biduo ante ad litus illud fortuna detulisset. deinde, decernendum esse quot pira vel pruna vendenda sint obolo. Postquam igitur confedere buleutæ, unus ex Poliarchis, qui ætate ceteris antecedebat, facit mentionem, placere statui, si Patribus conscriptis videatur, ne falsamentorum libra carius nummo vendatur. vilitatem eorum annonæ declarat; iniquitatem cetariorum exponit, qui ea, quæ vilissime emerent, carissime venderent. Erat summa voluntas senatus, ut fieret senatusconsultum in Poliarchi verba. Itaque sententiæ dicebantur, cum cetarii minoris asse & semisse falsamentorum libram emissent, placere, non pluris eam nummo licere ab ipsis revendi. Eo die transigi nihil potuit, quod & id temporis erat, & improbi illi invenerant homines, qui dicendo tempus consuinerent. Dimisso senatu, dum etiam tum Poliarchi inter se colloquuntur, accurrit unus, qui corrumpi prandium nunciat; ac inonet, ut venire accubitus properent; diem esse ad umbilicum dimidiatum mortuum. Ius orat, inquit unus ex Poliarchis; eamus. Et, dum festinat, inspicit in turba Gallonium; vocat, atque, Heus tu, inquit, hodie apud nos sis volo, & tecum isti quos ducis. Benigne, ait Gallonius. Et simul occupationes varias excusat. Cui ille, Nugas agis, respondet. nam, si mutire audes, te pro potestate vinciri, & in carcerem condi jubebo. Tum Gallonius arridens, atque in nos intuens, Mos gerundus est, ait, nisi in custodiam abripi maluimus. At ego, Semper, inquam, triclinium carceri, epulas catenis anteponerem: tu tamen age, ut lubet. Ego quoque satius esse censeo, inquit Gallonius, vinculis elcaris ad mensam plenam deligari, quam in carcere crassas compedes ferre. Præeuntem igitur sequimur; & in conclave perducimur amplum, lucidum, pulcherrime laqueatum, peripetasmatis stratum, ornatum signis lepide eleganterque dispositis. erat in medio triclinium ample magnificeque constratum. erat præterea abacus seorsim exposita; nullum in ea vas fictile; omnia erant argentea, pollubra, gutti, patinæ, vasa vinaria, salina, pocula. Occurrunt servi complures, simili vestitu, ex purpura auroque contesti; pistes eos vocant; qui aquam nivatam manibus tradunt. Lavamus; ac jussi lectos

F

ascendi.

ascendimus : summi, Poliarchi ; nos, iuni decumbimus ; ceteri convivæ in medio. Continuo epulis mensa completur ; feruntur aves, farcinina, pisces , glandia, denique quidquid anni tempus luxuriæ suppeditat. Vix cœptum est fieri prandio funus, cum Poliarchus natu grandior , quasi stomachans , Mihi, inquit , siti fauces lippiunt; nimis diu siccus hic jaceo. ferte aliquis poculum : properate. Accurrunt ; afferunt. Quod ubi labris admovit, Pape, inquit, non vinum hoc , sed Iovis est poculum. unde, obsecro, prodiit ? quis illud deus ex cœlitum mensis ad nos demisit ? Respondit puer , qui ministraverat ; Fuit hodie vobis muneri missum. A quo ? inquit. quis est tam potens cum munere hoc ? Hic est, ait, ille caupo, qui delapsus est in illam fraudem tam sceleratam, ut mistum pro mero divenderet. Et vir hic tantus ob tam levem noxam perdendus est , inquit Poliarchus, & non potius servandus , qui tam præclaras potiones concinnat, quæ prorogare vitam hominibus possint ? e- quidem si perpetua hæc felicitas esset , sperarem , hoc vino vel ducentos annos me posse vivere. Et simul calices majores poscit, allatos circumferri iussit. Erat prope me Iberus ille academicus, homo, ut diximus , urbanus ac facetus. qui dum ingurgitat in se merum illud faucibus plenis, nec laudandi finem facit , pars siluri , quam antepositam habebat in lance, dimissis manibus , avolavit commutavitque coloniam. quod ille , in se reversus, pistium dolis, ita ut erat , factum existimans , Plagigerum genus hominum, clamat; ubinam gentium sumus ? inter Lacedæmoniosue , an Cilices? reddite quod surripuistis ; referte ineam mihi partem siluri. Convivæ ridere ; Poliarchi amicum tollere , & , ne quam turbam efficeret , suas eidem partes contribuere. Ille quiescere, atque iram in tranquillo constituere. verum , quoties erat bibendum , quod alternis pene bolis fiebat , contra fures patuarios hac se ratione munibat ; altera manu cantharum corripiebat , altera patinam harpagabat. & sane non erat opus minore apparatu adversus tot alitum præsentis insidias: vigilandum erat, in custodia manendum: nam vix lepidum aliquod obsonium apponebatur, cum è conspectu abibat ; vix oculus vel manus à patina disce-

discedebat , cum milvus vel accipiter aliquis avertibat obsonium ; ut diceret, ibi non prandium , sed Hecataë sacrum fieri. Post hæc accedunt symphoniaci decem , & incipiunt tibiis scitissime canere. Percrepabat conclave illud totum suavissimæ cantu symphonix , neque aures meæ antehac dulcius quidquam acceperant. Sed Iberus , cui de filuro manus adita erat , Obtundunt, inquit, nos isti ; jamdïn poculum posco , neque quisquam audit. amoveantur hinc, obsecro; nihil opus est cantu. Vera narras , inquiunt Poliarchi. Fugite hinc ab oculis, ac pro tibiis amphoras sumite ; neque vento, ut adhuc fecistis, sed vino , ambas strenue buccas inflate. Non ita celeriter terra deorsum, vel sursum flamina, contendit , ut illi lagenas invadunt, rapiunt, in sese invergunt , vel potius in barathrum fundunt. Illis è conspectu sublati , rogavit Iberus ille, num caupo, qui tam bonum vinum dedisset , sapius delinqueret ? Sapissime, inquiunt Poliarchi. sed non magis accipiter vel milvus rete , in quod induit sese , dirumpit , quam iste judicia omnia legesve perfringit: nec , si maxime condemnare eum placeat, id nobis per dynastas licet , quorum magnam partem munere aliquo sibi devinxit. nam aliis cellam vinariam instruit , aliis præbet quotidie quod potent. itaque, cum est opus, pro illius incolumitate atque salute, non secus ac pro ipsorum gloria, fortunis, ac fama, decertant. Sed ejus improbitas nobis quoque usui est. semper enim aliquid ab eo corradimus, vel pecuniam, vel vinum, vel delicatum saltem obsonium. Erat Græculus quidam in illis, naufragio, itidem ut nos , illuc appulsus ; qui, cum vinum ebibisset , reliquum sic è poculo ejiciebat ut id resonaret : quod Iberus ferens indigne, Videturne tibi, inquit , hoc vinum dignum quod ejiciatur ? tum ego ad elidendum in pavementis sonum ex vino relinquerem , cum lora aliqua vel vappa mihi esset ingratis potanda : at suavissimi hujus vini ne guttam quidem patiar deperire. Atque una opera ingentem pateram implet, eamque vini meri, ita ut matre erat natum, exhaurit: qua epota , quidquid eidem villi adhæserat , cœpit lingua delingere. Quamobrem totum illud convivium redundavit hilaritate & joco. Quo con-

fecto, accedit œconomus ad Poliarchos, oratque, ut, nisi molestum esset, paululum sibi operam darent; habere se res non parvi momenti, quas ipsos scire quamprimum expediat. Iussus, quæ vellet, nobis præsentibus dicere, narrat, nullum fere reliquum esse in culina peniculum, quo ollæ patinæque abstergantur. nam partim usu consumptos, partim, quod uncti essent, à muribus fuisse corrosos. proinde argentum enumerent, quo novos cœmat. Respondent illi, majorem esse rem hanc, quam ut ipsi de ea statuerent. nam decernere, ut pecunia ex ærario depromatur, non ad ipsos, sed ad senatum universum spectare. se tamen, honoris ipsius gratia, senatum quamprimum convocaturos, atque operam daturus, ut rei tam necessariæ, quanta maxima potest celeritate, obviam eatur. His actis, suum quisque in cubiculum requietis causa se contulit: nos ad tabulas pictas, & signa pulcherrima aspicienda, oculos animumque convertimus; &, quia nulla aspiciendi satietas erat, quatuor fere horas in eorum contemplatione consumpsimus. Sed, inclinato in vesperam die, discessimus. Inter eundem sciscitamus à Gallonio, cur invitatus ad prandium tam opparum non continuo accurrisset, sed vi ac minis prope attrahi maluisset. Quia, inquit, pudebat me conspici cum talibus viris accumbere. Quid? aio; nonne honestus est ille honoris locus? Est, inquit, honestus; sed interdum non sunt honesti qui in eum ascendunt. nam hodie statuarii, pictores, sarcinatores, ac, si diis placet, mediastini, gratia vel precio ereptum eum adveniunt. Quamobrem ex nobilibus, præter paucos, qui bonis elaverunt, vix quisquam invenitur qui magistratum hunc petat: imo sæpe multi ultro oblatum sibi recusant.

Inter hæc Aridus academicus nobis occurrit, consistimus. Rogat ille Gallonium, unde veniat? quo tendat? Responder, Modo ex bulenterio discessimus. Quid, ait, negotii tibi fuit in bulenterio? venistine eo advocatus cuiquam, vel cauponi, vel cupedinario? Minime, inquit; sed prandimus ibi invitati atque adeo coacti ab Euclione Poliarcho Megadoris filio, ejus qui fullonicam fecit. Audio, inquit. Sed bene vobis fuit. vino ac lepidis victibus? Sic, ait Gallonius, ut mihi nunquam in vita

in vita fuerit melius. Gaudeo, inquit Aridus, si quid tibi evenit boni. Sed tu quo te agis? ait Gallonius. Nescio, inquit Aridus, neque quo eam, neque quid agam. vix potui me divellere à quodam, qui lateri meo inhæserat, nec me volebat amittere. Exhibam ex delubro Apollinis, quo frequenter orandi causa venio; atque sit mihi obviam quidam senex bene vestitus, ac salvere me jubet; salutanti mutuam salutationem reddo. At ille, Quamvis antehac, inquit, non sis usus amicitia mea, nec fortasse me noveris; attamen jam pridem te ob tuas virtutes colo, & amicum habere expeto. Ego gratias ago; neque in hac mea mediocritate ingenii fortunæque quidquam esse affirmo, quod ille miretur atque suspiciat: neque tamen audebam interrogare quis esset? At ille, si me noveris, inquit, noveris sane hominem probum, & in primis cupidum existimationis bonæ. non enim invenies mei loci atque ordinis alterum, boni nominis æque studiosum, quique uxorem ac liberos habeat pudicitia fama clariores. Atqui scias, prius proditurum me meam vitam, prius pecuniam omnem, quam vel levem aliquam in existimationem meam labem admittam. nam quid mihi opus est vita, quid opibus & divitiis, parte aliqua existimationis amissa? præterea octavo quoque die, puro me flumine abluo, & diis agnam sacrifico. Sed meas conturbat rationes filius, minus mihi obsequens, quam parenti par est. hic paucos ante dies rivalem suum cominus gladio transfixit, orcoque transmisit; ideo nunc exulat. sed intra breve tempus restituetur; ita ille mihi promisit qui rerum potitur. Sed, quamvis in iram pronus, præstat tamen forma ac virtutum multarum laude. etenim annos natus non amplius viginti, à capillis usque ad unguis totus luculentus est atque festivus. in ludo gladiatorio, in arte equitandi, neminem metuit, una ætate qui sit. præterea cantat quod Apollo etiam invidet. Tum ego, Hui, inquam, puerum elegantem narras. ô felicem matrem, quæ talem peperit! Sed quod illi dicam esse puero nomen? Puffillo Pleuræ, inquit. At ego, Estne, obsecro, maritus? Istiuc dii prohibeant, inquit. nam hercle etiam hoc unum deesset solitudinibus, quibus ille me onerat.

sed est illi soror, quæ nupta est cum adolescente in primis lepto ac viris principibus caro. hæc, præter formam de cuius elegantia ad aures tuas pervenisse verisimile est, ita scite fidibus canit, ita ad fidium cantum suavissimam vocem accomodat, ut Iovem etiam possit de cælo deducere. quamobrem tanti ad eam audiendam principum virorum concursus sunt, ut, cum eorum amplitudinem & numerum domus mea non caperet, fuerit mihi necesse ædes longe laxiores in celeberrima urbis parte conducere; atque heri minas octo pro semestris habitationis mercede persolvi. nec mirum, si omnes ita avidas ad eam aures afferant. Iam pridem non est audita. modo enim ab Anthimo rege revenimus, qui nos, ad nuptias sororis suæ maximis præmiis accitos, menses apud se continuos octo detinuit. Hanc diligo, quæ mihi morigera est, ac deos metuit; hanc curo unam, quæ me curat nitidiuscule, vestit, ornat. Sed, quo pacto res ipsius, quæ pauperula est, tot sumptus sufferat, non esse arbitror boni parentis exquirere. His auditis, vix tandem intelligo, hunc esse Pleuræ notissimæ meretricis patrem; ac, pudore supra quam dici potest metuque correptus, ne conspicerer ire cum illo in via, multa excusando, e-mentiendoque, ab ejus latere me tandem evelli, atque illam infamiam effugi.

En vobis, inquit Gallonius, alterum genus hircorum, quod eram oblitus. id cum sit turpissimum, simulatione honestatis ac sanctimoniam, opinioni hominum se commendare nititur. Sed istius impudentia eo est intolerabilior, quod rei apertissimæ clarissimæque tenebras offundere conatur, ac contendere, mero meridie tenebras esse. Nam, quod ait, filiam suam à Rege Anthimo accersitam ad nuptias, aperte mentitur. illuc enim perducta est ab adolescente, qui eam usurariam habet, sed, ob flagitia, & turbas quas effecit, ejus regni finibus, quantum est, pulsa se recepit in patriam.

Sed de his hæcenus, inquit Aridus. Nihilne allatum est ad vos de fuga Lyconis trapezitæ? Nihil, inquit Gallonius. Sed quid audio? Lyco trapezita fecit id quod servi improbi solent? Quod si verum est, profecto de-

cem

cem minæ, quas heri apud eum deposui, periere. Bono animo es, inquit Aridus; hoc infortunium est tibi commune cum multis. nam heri non cessavit à mane ad vesperam usque argentum ad se allatum accipere; omnibus acceptum referre; nemini expensum ferre; iis, qui transmissæ pecuniæ syngraphas afferebant, varias occupationes excusare, atque ut postridie reverterentur orare. quàmobrem expletus pecunia, concubia nocte, fugam arripuit, vel potius occultavit se in ædibus alicujus potentis, cujus præsidio septus pecunias, quas surripuit, in tuto constituat. Sed ex multis, qui ad hunc scopulum offenderunt, fuere virgines honestæ complures ac viduæ; quæ, ut dotes suas, unicum pudicitæ ac solitudinis suæ præsidium, à domesticis furibus conservarent, prædoni huic argentario ultro diripiendas detulerunt. O pessimum hominem, & cruce ac suspendio dignum! atqui esset optandum, ut Harpaxis, qui proximis annis decoctoribus nomen dedit, similis inveniretur. non enim pessime cum creditoribus ageretur. Tum ego, Quis est iste Harpax? Hic est pannarius notissimus, ait, qui tabernam pannariam ad imum Ianum habuit, ibique juventutem suam exercuit. verum ante quatuor annos, laboris fortasse pertæsum, libido ingens invasit decoquendi, salvis imo etiam florentibus rebus suis. neque enim illi navis naufragio, neque inerces incendio perierant, nec extraordinarii sumptus æs alienum grande conflaverant; imo contra, semper omnia ex sententia processerant, ac vita ipsa duriter ac parce producta pecuniam opesque congefferant. Num tibi parsimoniæ illius argumentum dari aliquod postulas? accipe. Opistographa non abjiciebat, sed diligenter collecta, ad epistolas, quas ipse aliis mitteret, amiciendas conservabat, funiculos, quibus epistolarum sibi missarum fasciculi obligabantur, non incidebat, sed solvebat, & in alios usus convertibat. sexcenta sunt, quæ memorem, si sit ocium. At hic mortalis, ita parce parcus, die quodam à prandio accersit ad sese sororis suæ filium, quem domi secum alebat: ostendit illi, quam pulchrum sit divitiis affluere: fidem, probitatem, bonam famam, esse rerum inanissimarum vocabula; neque enim ad-

huc bonam hanc existimationem & famam se esse usum pro nummis apud pistorem & lanium; neque vidisse unquam, hoc precio aves, pisces, & cupedia in macello coëmi; sed præsentī pecunia: satis labori, satis industriæ à se traditum esse; nunc anteauctos labores, & tractari mollius annos, aliud vitæ genus exposcere, nempe lepidum, liberale, amcenum, confertum voluptatibus: sed non posse rem ipsorum, quæ non ita magna sit, tot sumptibus suppeditare; statuisse se petere auxilium ab alienis pecuniis; hoc est, decrevisse se locupletare cum alterius damno, ac, Beati erimus, inquit, si argentum, quod debetur, non reddimus. Tu interea, dum pomeridianum hoc tempus quieti somnoque concedo, curriculo hinc ad quæstorem excurrere; ab eoque simulato rerum nostrarum naufragio ac ruina, precibus, lacrymis diploma vel iussum extorque, quo caveatur, ne creditorum quisquam molestus sit nobis. de reliquo mihi curæ erit. sudabunt, si dii volent. neque erit difficile impetrare quod cupimus, cum apud quæstorem plurimum gratia valeamus. furtum erit manifestum, invidiosum, turpe, fat scio; præterea una in tota civitate fabula erimus: sed quid mea? numne in manu mea est quid vulgus loquatur? His dictis, ociosus ab animo, torum somno se tradit. Ille ad imperata facienda digreditur, quæstorem adit: quemadmodum Harpax bonis elaverit, & creditorum sævitiam extimescat, narrat: ac simulationem illam malus, & lacrymis & vultus confusione, convestit: postremo, ut avunculo suppetias ferat, exorat. Ille habita dicenti fide, ac misericordia commotus, plus etiam quam expetebatur attribuit. Re bene gesta, ovans domum revertitur, avunculum adhuc stertentem offendit. neque voluit dormientem excitare; sed, diplomate ad cervical ejus appposito, cubiculo egreditur. Harpax expe-
rectus, dum etiam tum pandiculans oscitatur, fit ut chartam illam sibi ad caput appositam naso diverberet. sumptam in manus, inspicit, legit; ac præ gaudio, Sum dives, exclamat. ac sororis filio, qui ad eam vocem accurrerat, Maeste, inquit, virtute juvenis; pulchre, strenue, lepide: nunc noster es; laudo; dignus es, pro hac insigni tua in avunculum pietate, qui meis facultatibus pari-

pariter mecum utaris , aut etiam amplius. Nec mora ;
 tabernam vestiariam, ut mos est decoctorum , occludit,
 ac pro decoctore se gerit. Spargitur interea rumor, Har-
 pacem decoxisse. mirum, novum , incredibile omnibus
 videri, eum, qui quatuor horas ante opibus & existima-
 tione valuisset, puncto temporis , his omnibus eversum
 concidisse. At creditores non sibi desunt ; ad Prætorem
 accurrunt. rem narrant. ut in carcerem detrudatur o-
 rant, impetrant; lictores domum Harpaci advolant, ir-
 ruunt, impetum in eum faciunt , vincula injiciunt. Ille
 quæstoris diploma licitoribus in os objicit, impetum ad-
 imit, audaciam eripit , atque , ultro derisos , una cum
 creditoribus in malam rem ire compellit. Creditores,
 ubi hanc rem esse occisam vident, universi conveniunt ;
 queruntur, consultant; quid optimum factu sit quærunt.
 sed omnia consilia frigent ; quid agant , non inveniunt.
 Sed, dum ita æstuant , procedit in medium unus qui e-
 rat in consilio, clam ab isto summissus, quique magnam
 pecuniæ rationem se cum eo habere assimulabat ; ac, Si
 licet, inquit, loqui, quod sentio, ego darem operam, ut,
 si fieri posset, ad aliquam cum eo pactionem conditio-
 nemque venirem. nam quamvis multa apud eum bona
 reperiantur, attamen magnam eorum partem, dotis no-
 mine, sibi mater vendicat , magnam etiam sororis fi-
 lius, quorum singuli tum magnitudine pecuniæ , tum
 temporis intervallo, unicuique nostrum antecedunt. In-
 ventus est nemo, qui non cum eo transigendum putaret.
 satius enim esse ajebant , partem aliquam crediti quam
 totum amittere. & simul isti negocium dant , ut homi-
 nem adeat, causam creditorum suscipiat , & quam mi-
 nimo potest detrimento rem cum eo decidat. Postridie
 revertitur, vix Harpacem eo à se perductum narrat , ut
 singulis creditoribus intra biennium dimidium ejus,
 quod debet, exolvat : illud à se extortum , & quidem
 summa cum vi, ut ejus, quod promitteret, prædes ma-
 trem ac sororis filium daret. Clamant omnes , Audaciam !
 impudentiam ! quid enim excogitari impuden-
 tius potest, quam velle dimidiam crediti partem sibi re-
 mitti, & ad id, quod superest , enumerandum biennium
 exposcere? Tum ille, qui retulerat, Agite, inquit, ut

lubet. matris ac sororis filii creditum totas ejus facultates exhaurit sane. quod ad me attinet, mihi certum ac deliberatum est cum illo transigere. At miseri creditores, postquam ira deferbuit, inter sacrum saxumque se positos esse intelligentes, statuunt, de communi sententia, fortunæ cedere, atque id, quod dabatur, accipere. Decretum fit in verba illius qui rem proposuerat; ac scribendo ad unum omnes interfunt. Harpax, tanta repente pecunia locupletatus, ad clivum Iani, amœno atque ab arbitris remoto loco, ædes magnificas, ac viridarium illis adjunctum, magna mercede, conducit; rhedam & familiam comparat; ornat quotidie laute magnificeque convivium; &, quo aliqua se simulatione existimationi hominum vindicet, ut non suo, sed fortunæ vitio naufragium bonorum fecisse videatur, templa deorum immortalium frequentat; ad omnia eorum pulvinaria, positis genibus, orat: sed cum

Iane pater clare, clare cum dixit Apollo,

Labra movet, metuens audiri; Pulchra Laverna,

Da mihi fallere, da sanctum justumque videri;

Noctem peccatis, & fraudibus objice nubem.

Hæc cum Aridus dixisset, silentium est consecutum. Sed paulo post Gallonius, tanquam ab aliquo somno excitatus, sive dolore naufragæ, vel potius pessundatæ pecuniæ, percussus, sive iracundia elatus, Fures, inquit, isti, & prædones manifestarii, si meo arbitrato liceat, omnes pendeant. Sed quonam meo fato fieri dicam, ut nemo abhinc triennium conturbaverit, quin meas etiam fortunas perturbaverit? nonne Pleusides ille, qui ante duos annos argentariam fecit, mihi etiam imposuit? nam minas quatuor abstulit. At me non fefellit, inquit Aridus. nam faciem cum aspiceres, nonne ipsum caput & supercilia olere crucem & clamitare furcas videbantur? At fecit eleganter, excepit Gallonius. nam prius quam pecunias cujusquam attingeret, clam omnes in publicas tabulas referendum curavit, nihil sibi esse in terris ubi in suo pedem poneret, sed ad patrum amitamque quæ sua putarentur, omnia spectare. tum cœpit ab omnibus pecunias accipere, permutare. postremo, refertus pecunia, in proximum huic insulæ regnum,

gnum, ad expugnandas aliorum pecunias, castra commovit. nam audio, novam ibi argentariam, hoc est, novam prædandi rationem instituisse. Sed cur non etiam, inquit Aridus, huic narras Septimi Pleusippi furtum, omnium quæ memoravimus improbissimum? fortasse, quia immunis ab eo discesseris, neque una cum aliis fueris detonsus. Non ædepol, Gallonius ait, in mentem venerat. nam tantus est istorum furum numerus, ut non sit mirum, si mihi nonnemine eorum, multitudo subducatur. Sed quæso, narra tu illi. ira enim, qua efferor, pæne mihi mentem extorquet. Tum Aridus, Libenter, inquit.

Hic Septinus, quem dicimus, argentariam, quam multos annos fecerat, ex improviso dissolvit; atque imperat filio, quem maliciose emancipaverat, ut novam argentariam instituat; & pecunias, quas in nominibus habebat, quæ erant maximæ, ac debebantur ab iis qui tunc solvendo non erant, à se coëinat. Ille, uti erat imperatum, facit; ac novus trapezita pecunias ab omnibus accipit patrique deinceps, pro nominibus emptis, solutionis jure dinumerat. At pater postquam illam rei familiaris lacunam explevisse visus est satis, filium appellat, ac, Satis, inquit, fili, officio nostro fecimus, satis rei familiari nostræ prospeximus, satis Lavernam propitiam habuimus, ægre enim ferebam prope conturbasse rem nostram, debitorum improbitate. nunc autem, cum eam in suam rationem revertisse jam videam, æquum arbitror, ut pecuniis miserorum innocentium parcamus: nam, quemadmodum eos laudo, qui dant operam rei suæ, etiam cum alterius injuriæ; ita eos odi, qui cupiditate longius prodeunt, nec finem prædandi constituunt. Quamobrem facias, censeo, quod vulgus argentatiorum solet, ut fuga rem solvas, hoc est, tantisper te in aliquam dynastæ cujuscumque domum abdas, dum ego creditoribus tuis aliqua decisione faciam satis. Neque minus meæ partes erunt, perficere ut quamprimum tibi prodire in publicum liceat. Non moratur, sed statim summittit aliquot, qui spargant in vulgus, filium decoxisse. Ad hanc vocem creditores accurrunt, Septimi domum

domum obsident, bona describunt, tabulas obsignant. Fit obviam illis septimus, & Quid, inquit, domi meæ vobis debetur? Iam scies, inquiunt. ambula in jus. Ille non invitus sequitur; venit ad prætorem; ostendit, nihil eam rem ad se pertinere; filium emancipatum suas res ipsum agere. Ergo liber dimittitur; illi tristes abscedunt. Verum pater amantissimus, memor polliciti sui, de filio reducendo cum creditoribus agit. Quibus convocatis, ejusmodi conditionem affert, qua miseris crediti major pars deperibat. Illi, qui eas pecunias in conclamatis haberent, pauxillum, quod deferbatur, tanquam de cælo demissum arripiunt. Verum felicitates ferre nunquam solæ contingunt, sed nexæ copulatæque inter sese proveniunt. nam qui ita fuerat felix in furando, obtinuit etiam, ut mala illa nomina quæ filio divenderat, bona evaderent; ab eisque totum, quod sibi debebatur, exigeret; multumque deprecantibus nonnullis, ac bonam copiam ejurantibus, ne unius quidem assis gratiam faceret. Unus adhuc scrupulus adolescentem cupidum existimationis bonæ torquebat, videlicet infamia turpitudineque, qua sese constrinxerat. ac, Poterone posthac, agebat, ora civium aspicere, aut populo huic os inenim ostendere? Cui pater, Tace, inquit, stulte; pecunia hic, non fama, respicitur: dum ea integra sit, si qua famæ labes infedit, facile eluitur. Sed statim filius, Arbitror, inquit, ð pater, me rationem invenisse recuperandæ existimationis amissæ. Est hic Philosophus, ex Stoicorum disciplina, magna apud omnes existimatione ac nomine, qui festis diebus, in concionibus, quas habet ad populum, luxuriam & avaritiam nostrorum hominum infectatur; enim omnes tanquam de cælo delapsos intuentur. hunc ego sectari constituo, & arctissima mihi familiaritate conjungere. ita enim facile, quod deliquerim, in ejus probitate occultabo. Placet patri ratio. Itaque se illi Philosopho applicat, ejus lateri hæret, concionanti assidet, pallium servat, linteum, quo sudorem abstergat, desert. Sed, dum vult occultare se; prodit; dum nititur infamiæ vulnera sanare, exulcerat. magis enim homines in hac tam putida simulatione stomachantur, ac offendantur. Hæc Aridus verbis acerri-

me persequens, ocularibus ex theca detractis, nasoque adhibitis, in summam plateam aciem intendit. Quo etiam Gallonius intuens, Ecce, inquit, Salvium Typhernatem, cum Lepido Gallutio Sinistro, Minutii filio. hunc Lepidum Aridus statim laudabit atque extemporibus versibus ad studium virtutis impellet. Neque Gallonius aberravit. nam Aridus advorsum Lepido veniens sic orsus est:

*Pieridum lux alma, vale, generosa Sinistra
Progenies stirpis, qua non præstantior ulla,
Seu pietate virum, numero seu certet arorum.
Te salvare jubet longo gravis Aridus avo,
Sed gravior vasto veteris sub pondere culpa,
Qua sursum nitentem animum compellit ad ima,
Scilicet assiduus peccandi contulit usus,
Vt tennes misero subsint in prælia vires,
Si ferat arma furens vitiorum cominus agmen.
At tibi cana senum teneris mens hæret in annis.
Atque tenax probitatis amor, laudumque cupido.
Sed quem pulchra suo sapientia nectare pascit,
Quid mirum, falso nequeat si ludere fuco,
Vel turpi maculare luto male sana voluptas?
Maeste animo, maeste ingenio, sic ardua magni
Amphitruoniade virtus laudata nitescit.
Ille iter angustum laxo, præruptaque saxa
Floribus & campis potiora putavit amoenis.
Hoc est, post habuit rigido damnata labori
Ocia, & ancipiti plumosa cubilia bello.
Hinc superans diram prostravit cominus hydram,
Notaque fatali portenta labore subegit.
Nempe domat validisque ligat fera monstra catenis;
Nec generosa putat quidquam insuperabile virtus.
Tuque etiam ingenuas centum, puer, aptus ad artes,
Argilla quidvis imitabere flexilis uda,
Si cultura frequens menti non desit opima.
Eia age, ne cesses. nam qua tibi gaudia surgent,
Ardua dum feriet volucris tua gloria pennis
Æra præpetibus, teque altis inseret astris?
Præterea, qua dira cohors, qua sæva malorum
Agmina prætereant, toto qua pectore tristes*

*Diffugiant cura, dum sic ea spernis & horres,
Quæ lacerant animum stimulis ardentibus ægrum,
Insiciuntque notis lacrymarum fonte luendis?*

O si demensa metiri tempora vita

Sit mihi fas iterum, quam non ego segnis, ut ante,

Molliter exacta repararem damna iuventæ,

Ad tua commissum repetens vestigia cursum?

Sed cum non redeat defluxi temporis ætas;

Restat, inoffenso cernam te pergere gressu

Per pulchras artes ad celsa culmina laudis;

Immistusque tuo turba qua pendet ab ore

Effusus hilari reddam tibi pectore plausus;

Vel si docta chorus Musarum carmina dicter,

Vel si suspiciant oculi te nulle loquentem,

Vel si patronum causis sibi quisquis adoptet.

Dic patri interea multam fratrique salutem.

Sed quolonga patri contingant gaudia de te,

Aurea fila neat Lachesis, nec divite lana

Cesset honoratam digitis producere vitam,

Ille prius longos quam Nestoris impleat annos.

Non cessasset utique ad noctem versus effundere, nisi Gallutius, qui fortasse aliquo properabat, salvere iustum reliquisset. Vnde conversus ad Gallonium, Doleo, inquit, me tibi attulisse nuncium non ita jucundum. Imo gratias habeo, ait Gallonius, quod ejus me participem feceris. Restat mihi rogandus dynasta meus, ut mittat Prætori, qui dicat, ut honoris sui gratia, in causa Lyconis, nulla mihi fiat injuria. non enim dubito quin pro opera, quam illi fideliter navo, patrocinium meum sit arrepturus.

Sed discedentes remoratur Iberus ille, qui in Academia rationem tuendæ per ætatem valetudinis quatuor versiculis comprehendemat, quique revertebatur ex buleuterio, ubi à Poliarchis, præter prandium, merendam etiam exegerat. Ego non invitus restiti. eram enim cupidus hominis suavissimi degustandi. At eum videmus pedissequos atratos post se duos habere. Rogat Aridus, quemnam lugeat mortuum? num fratrem? num sororem? num amitam? num materteram? At ille, Me, inquit, lugeo extinctum. Quid ais? sanasne es? inquit

Ari-

Aridus. si ad istam rationem sunt omnes mortui, mortem nihil moror. Respondet; Ego dicam tibi. Neminem habeo, neque cognatum, neque affinem, qui mihi mortuo funus faciat, neque mea causa sibi familiæve suæ filium atrum imponat. Ergo illud officium, quo cariturus sum mortuus, ipse mihi ex parte vivens impertio. Imo si scias, ubi mihi sepulcrum faciendum locaverim, laudes. Fortasse, inquit Aridus, in æde Apollinis, Minervæ, vel Martis? Minime; ait ille: sed Ad murum urbis, in ea parte, ubi paululum ille inclinat atque propendet; qui locus Ad murum obliquum appellatur. nam arbitror me invenisse rationem à nemine adhuc excogitatam, qua meum nomen futuris omnibus sæculis in hominum ore defigam, vel saltem vivacior quam Ennius volitem per ora virum. nam ibi, ut scis, malleo hastato ac pila lignea luditur: erit itaque saxum illud meum perpetuus scopus, signumque ubi ludentes colliment; perpetuoque audientur hæc verba, Dirigamus pilam ad saxum Iberi, neque multi dies intercedent, cum locus ille, commutato nomine, saxum Iberi vocabitur. atque paucos hic habeo versiculos, quos saxo illi incidendos locem. Obsecro, inquit Aridus, nisi molestum est, perlege. nunquam enim propagandi nominis causa elegantius quidquam me audisse confiteor. Tum Iberus, Nihil possum tibi roganti negare.

Hic situs ille jacet, qui nomine dictus Iberus

Tempora militiæ floridiora dedit.

Post, aula totos per denos contulit annos,

Cum largas mendax polliceretur opes.

Sed vix emunctam nummis recreare crumenam,

Vel sicco potuit pellere ab ore famem.

Nunc, ubi propendet declivi vertice murus,

Malleo & è ligno luditur usque pila.

Mortuus aeternum sperat per sæcula nomen,

Si stet pro signo, quod pila missa petat.

Risimus omnes elegans & amœnum hominis ingenium. Sed ille, Missa isthæc, inquit, faciamus. Cras volo, Aride, prædiolum tuum invisere. præpara mihi jentaculum, vel potius mensam pollucibilem extrue. sed cave in primis, ne aliquam mihi vappam apponas: sed
vinum

vinum invenias, quod sit suavissimum. nisi tibi vites præcidi, & caput male multari postulas. Tum Aridus ridens, Placide, inquit. non nunc hic fabula datur, ubi tu gloriosum ac ferocem militem agas. ac, medicinam quandam ingressus, scripsit amico cuidam suo hanc epistolam,

*Cras mecum ruri conviva recumbet Iberus,
Integer ac validus, cui bona vina placent.
Hac dare si nequeo, tumidus mala multa Lavernæ
Ingerit & capiti non numeranda meo.
Quod ni quadrant al vini mihi miseris, olim
Quo repuli febrim, pestiferamque situm,
Huius jam rabies malefana refringet Iberi
Et ruri vites, & mihi suste caput.*

Hac epistola perlecta, actisque Arido gratiis discedimus, & cum Gallonio ad ejus dynastæ ædes recta via contendimus. Gallonius, sine mora ad dynastam introducit. Sed paulo post tristis egreditur. Quæro, quid tristis sit? Nihil, respondet. Sed, conjectis in cælum oculis. O quinquennium, inquit, apud istum male contritum! Dii, facite, ut ejus opis nunquam indigeam. Rogo iterum, quid sibi evenit? Incipit; Postquam ab eo intro, solum eum deambulanti inveniō. Qui ad conspectum meum substitit, expectans quid vellem. Narro, quemadmodum Lyco os mihi subleverit. Oro, ut me per nuncium Prætori commendet. Eripit mihi ille orationem, ac, prominenti rictu contractoque supercilio, Sanusne, inquit, es, qui hæc postules? nescis, mihi religionem inesse? Vel jus tecum facit; vel non. si tecum est; nihil tibi mea opus est commendatione; facile à prætore æquissimo quod justum est impetrabis. si tibi jus adversatur, mene idoneum censes, qui vim legibus afferam, quiq; judicum religionem mea commendatione pervertam? Ego bilem non continui, sed, Quam pridem, inquam, hæc te incessit religio? non eras adeo religiosus, cum Toxillum hominem impurum atque sacrilegum ita commendabas, ut non posses vehementius. Ille iratus, Vide, ait, arrogantiam hominis & impudentiam, non prægustatorem mihi conduxi, sed dominum & magistrum. Commendavi illum, quia mihi libuit:

nunc

nunc non libet. Quid hoc? audistin? an nondum etiam ne hoc quidem? His auditis, non expectandum censui, dum fustem suumeret, ac me plagis contunderet. Quid? inquam ego: idne tristis es? tantane tibi amicorum penuria est, ut nunquam sit auxilium, nisi in hoc uno? Nulla apud nos vilior est, inquit, annona, quam hominum officiosorum. nam sunt dynastæ omnes in hanc rem ad ambitionem usque propensi. Verum id causæ meæ adversarium est maxime, putabit enim prætor, me, fracta apud dynastam meum navi, adventiciæ nescio cujus commendationis tabulam arripuisse. quamobrem cum hac suspitione non modo ille me ad voti mei successum, tanquam ad litus, non impellet, verum etiam exortæ tempestati exagitandum exorbendumque concedet. Tum ego, Quid facias? iussitandæ sunt principum virorum injuriæ, & dolor tuus, ex hac repulsa conceptus, donariis leniendus, quibus ab eo quotidie compleris. Derides, inquit Gallonius, tu me? genium meum iratum habeam, si toto hoc quinquennio, quo hujus diaria rodo, ex illius donariis, nummo uno aureo sum factus locupletior. at, si illum audisses, cum conduceret operas meas, continuo jurasses, omnes ejus facultates, ac divitias, futuras mecum cum ipso communes: ita promissa largiter extendebat. ac meminini in primis, esse pollicitum, O Galloni, modo aliquid inveni, in quo mea tibi gratia prodesse aut opera possit; in ea re faciam, ut meam in te voluntatem studiumque cognoscas. nunc autem quo promissa spectaverint, vides. Hic ego, correptus furore poetico, extemporale hoc carmen effudi,

Quid dominum tumida contundis verbere lingua,

Quod tibi promissam ferre negarit opem?

Non jure irrisum sic te indignaris in uno;

Cum tot deludant decipiantque dolis.

Spem mentitur ager, calum tibi saepe serenum

Imposuit, fregit portus & ipse fidem.

Aut simul hæc odios durus complectere: vel, si

Nolis, cur uni parcere, inepte, negas?

Sed hæc hæcenus. Nolo, ait Gallonius, inhumanitas cujusquam mihi hilaritatem meam, & cœnæ curam eripiat. obsonatum eamus; &, quo intelligatis, nullam

cujusquam injuriam posse meum mihi morem excutere, volo vos hoc vespere unctius quam antea nitidiusque accipere. Itaque progressi in forum, polimenta agnina, pullos, pisces, ac scitamenta plura coëmimus, redimus, coenamur, ac coenati cubitum imus. At Gallonio ira, ex ingrato heri sui animo excitata, somnum avertebat; atque has identidem ab eo voces eliciebat: *Quam multa in servitute iniqua expetunt! Opulento homine, eodemque iniquo, nihil est deterius; ingrato nihil impensius. Populo nihil perniciosius, quam Princeps munificus malis, avarus probis. Virtus ibi corrui, ubi, si quid recte cuipiam facias, perit. Semper virtutis præmia apud improbos erunt, si iis, quibus ea sunt in manu, nulla sit fides. Qui servit ingrato, piscatur in aëre, ac rete jaculo apros in mari venatur. Sereni hyeme cæli, & æstate humilis instar est dives, qui large pauperi blandus est verbis. neutri enim fides habenda. nam mutantur extemplo. Nequit ibi durare vir probus, ubi malevolentes sunt, quique bonis invidiant. Potentiorum animis nihil obscurius: advertunt graviter, quæ non censeas: iram ferunt, cum pacem credas: malevolentiam, cum amorem existimes. At P. Æmilius, dormiendi quam philosophandi cupidior, Quid tu, inquit, cum istis tuis sapientibus dictis? aut tace, aut dormi. nihil est opus lamentationibus ubi ad lapides loqueris. iniqua est concertatio, quæ cum valentiore suscipitur. indigna digna sunt habenda quæ faciunt heri. irritat crabrones, qui opulento faciem obvertit. stultitia est, ei te esse iratum, cujus potestas plus potest. non decet superbum esse eum, qui eget alterius. Immo, excepit Gallonius, sis confidens oportet, si de te meruit bene. Miseria est, intelligere, esse ingrata alteri, quæ benefeceris. Improbus est homo, qui beneficium scit sumere, non autem reddere: perfidus, qui dives est lingua, inops opere, sublestus fide. Malefactorem est amitti satius, quam beneficium deferi. Exprobratio beneficiorum, subjecit Æmilius, non mutat ingratum, sed deteriorem facit; non mitigat, sed incendit; non sanat, sed exulcerat. Animum compone, si sapis: animus æquus, de recto nunquam statu dejicitur. Summa virtus est, si usus veniat, ferre fortiter malum:*

malum: virtus præmium est optimum: virtus anteit rebus omnibus: virtus omnia in se habet. Omnia adfunt bona quem penes est virtus. Iam, inquit Gallonius, philosophatum est satis. Agam ut potero; quoniam non licet ut queo. Diisne adveser? Titanum insaniam subscribam? Nam potentioribus obsistere, est gigantum more bellare cum diis. Sed, priusquam somnus obrepit, licetne alterum hominis istius factum exponere; in quo sunt omnia, ut mihi videtur, peccata; superbiam, crudelitatis, avaritiæ? Modo breviter, ait Æmilius. nam quod noctis tempus sit vides. Non accusabis, inquit Gallonius. brevior ero, quam est pomilio. Est inter honorarios istius familiares Nicius quidam Rufus, honesto loco natus, ac litteris deditus; præterea ita fortunæ bonis instructus, ut nihil cuiusquam indigeat; qui ante annos quindecim magnis pollicitationibus attractus est ab isto in suam familiam, ut ipsi esset à studiis. nam pudere eum cœperat, omnia fere in ipso pecudis similia quam hominis. Itaque cupiebat eruditi cuiuspiam opera à brutorum similitudine, quantum poterat, abstrahi. At Rufus, cui nulla in re cum aulicis convenit, noluit esse una in unis ædibus; sed alias conduxit, à tergo illis annexas; ac, dynasta sciente, perfodit parietem, qua esset commeatus per culinam ad ipsum. nam, cum ejus domus, quæ instar urbis habet, longe introrsus pertineat, ac fere ab omni parte innumeris privatis ædificiis contineatur; non nisi longo viarum ambitu ad ejus adiuturum perveniri potuisset: quod Rufo perincommodum cecidisset; hyeme præsertim; quo tempore, singulis fere noctibus, multas apud dominum horas transmittit. Sed ferme in mensibus paucis, quibus hæc acta sunt, lodicula, trita, lacera, quæ in istius barbari hominis suppellectili numerabatur, coco surripitur. Quod ubi rescivit, existimans, ab eo commeatu illud furtum egressum, ira percitus, perfossum parietem jubet sine mora restitui. Itaque honesto homini, ac nitidiuscule à puero domi suæ habito, quinquennium fere totum, fuit necesse, quotidie, intempesta nocte, ac sæpe tempestate perfrigida, imbribus maximis, sub Iove puro, longis viarum anfractibus se domum recipere. qui nulla con-

ditione tantam in se contumeliam atque contemptum suscepisset, nisi in tam maledica civitate inconstantis hominis famam pertinuisset. Sed censeo quiescamus.

LIBER VI.



Ostquam aurora illuxit, lecto surreximus: & cum abeundi tempus instaret, profectiorem adornare instituimus. Itaque lineas vestes ac laneas emimus. ad hæc, ne eodem ac reiniges vino uti, ac nautico pane semper vesci nobis esset necesse, vina optima, siligineos panes, pernam, laridum, fumen, farcimina, atque alia id genus edulia congestimus. relinquebatur zona pene inanis à pecunia. Re adeo iter habentibus necessaria, hæc quoque data est opera à nobis, ut impleretur. Quocirca sinaragdos, chrysolithos, adamantes, margaritas, & alias ejusmodi gemmas, quas Roma detuleramus, habere venales. coepimus. Quibus inspectis, Gallonius, Mæx, inquit, erunt partes, efficere, ut quanti plurimi isthæc vendatis. nam eorum precia, quæ Romæ fortasse ob eorum numerum jacent, hic ad summum hominum luxuria cupiditasque perduxit. etenim tota hæc insula, ut vino, oleo, tritico, auro, & argento abundet, ab his tamen deliciis sane nuda est & vacua. & raro huc mercatores commeant cum ejusmodi mercibus. Sed opus est conciliatore aliquo, qui emptorem adducat. At ego dabo vobis intercessorem, quo omnes ad ejusmodi venditiones utuntur. Sed properato opus est, ut eum domi opprimamus. Nos dicto audientes, addimus gradum. Sed properantes Aridi academici servus offendit, ac, Salvere te, inquit, jubeo, Galloni. Quo te agis? quid sibi vult ista tua tam præpropera festinatio? Ad ædes, inquit, Zanchæ vicini tui (id enim proxenetæ illi erat nomen) me confero; ita nunc subito objectum est mihi negotium, ut eo convento opus sit. At volo te, ait, itineris hujus laborem lucri facere. non est domi. At, si tantopere conventum cum expetis, quid meream, si ostendero, ubi parvulo labore,

labore, nullo errore reperias? Cedo, inquit Gallonius, tibi sit; neque occupatis moram injicias. Reliqui eum nuper, ait, in officina Natalicii aurificis, ad medium Ianum. Sed rectius feceris, si placide ambulaveris, neque te ob hanc causam ruperis. nam illum audiui, cum diceret, se multas horas ibi futurum, Pamphilo operam daturum, qui uxorem duxit. Quid ais? inquit Gallonius. Pamphilus uxorem duxit? Certe, ait ille. Et, quod magis mireris, fabri lignarii filiam in matrimonio sibi conjunxit. Sed rem omnem ex ipso comperies. nam palam omnibus narrat. Habeo tibi, inquit Gallonius, magnas gratias. Sed quo iter est tibi cum his tabellis quas gestas? Defero eas, ait, ad Thersippum dynastam, quem herus meus invitat in villam quam habet in agro qui Cinnus vocatur. At licet eas tibi legere si velis. sunt enim versibus scriptæ; neque præterea arcanum aliquod continent. Libenter, inquit Gallonius. Acceptasque mihi tradidit. Quas attente dum perlego, Æmilius in pugillaribus, quæ habebat ad manum, excripsit.

Thersippe, & studiis, & meritis potens,

Incessanti adhibe vim sapientia,

Ac, te respiciens, qua strepitantibus

Humet Cinnus aquis, impiger advola.

Quid curis animum solvere parcimus?

Vt gestit volucris, functa laboribus,

Silvarum in viridi ludere vertice;

Sic constricta diu mens volitare amat,

Non implexa operum nexibus arduis.

Illic non lapide alta extruitur domus;

Non auro paries, non laquear nitet:

Sed parva atque habilis temporibus casa

Subsidit, viguit cum probitas magis.

Te virtus facilem reddidit; & potes

Æquus delicias ferre potentium,

Despectamque inopum pauperiem pati.

Has ego litteras, semel iterumque perlectas, reddidi servo qui tradiderat. Qui, valere jussus, persecutus est iter quod susceperat. Nos pedetentim ac placide, ex illius consilio, petere Ianum cœpimus. Sed, in eundo, libuit mihi percontari ex Gallonio, quid hominis hic Thersip-

pus esset? num litteratus, cui docti homines scriberent, num ruris amator, qui villarum amœnitates persequeretur. Atqui, inquit Gallonius, hic est vir, suo judicio valde sapiens, sed, aliorum existimatione, non stultus. præstat ingenio, notitia antiquitatis, juris Civilis scientia. verum hæc ille majora multo existimat esse, quam quanta in ipso existant. nam facie, vultu, admirando irridendoque, persuadere conatur, in ejus labris eloquentiæ deam hæzere, atque in ipsius pectore Jurisprudentiam, tanquam in arce, regnare. attamen litteratis juris, qui honoris eum causa sectantur, præbet se benevolum, & amantem: sed ejus hæc in illos voluntas tantum intra verba concluditur, ac raro, vel nunquam, ad facta digreditur: & vix unus aut alter invenitur, qui ejus auctoritate vel gratia ad divitias honoresque pervenerit. Sed eccum, ipse adest, atque ille est quem gestatoria inclusum sella deferri videtis. Erat æstas summa, calores maximi; & tamen sella ferebatur, ita ab omni parte clausa, ut nihil esset ad omnes cujusvis auræ vel levis incursum magis munitum ac tectum; solum ad accipiendam lucem binæ hinc & illinc & in fronte fenestellæ, crystallis tamen obductæ, patebant; ipse vero multis sibi caput velis devinxerat, ac pallio corpus diligenter involverat. Nos exquisitam hominis diligentiam in frigore propulsando mirati, ac prope medium Ianum emensi, eo loci devenimus ubi proxeneta ille dictus est esse; atque eum invenimus, medium inter duos sedentem, cachinnos effusissimos edere. Prior occupat Gallonius, ac salvere eum jubet; geminas explicat, atque, emptorem ut inveniat, rogat. Ille in manus sumit, inspicit, laudat, & Commodiorē, ait, hominem & adventum non vidi. nam hodie instruendus est mihi Pamphilo mundus muliebris, quem mittat uxori quam duxit. Audivi, inquit Gallonius, ac miratus sum, adolescentem, adeo locupletem ac nobilem, ad eam humilitatem descendisse, ut fabri lignarii filiam pro nixore velit habere. tantane hodie conditionum penuria laboratur? Ita, inquit Zancha, sese res habet; fieri aliter non potuit; vis eum coëgit. At quæ vis, ait Gallonius, cogit, ut quam nolis accipias? Res est ridicula, inquit ille, ac modo istis

narrare

narrare occeperam. Repete, nisi molestum est, ait Gal-
lonius. nam gestio audire. Date igitur operam, inquit.
Sed conantem dicere juvenis antevertit, qui, ex improvi-
so, erumpens, his Natalicium dictis aggreditur. Quid,
obsecro, mulieris mihi in matrimonium dedisti? qua
muliere nulla alia est flagitiosior ac nequior. modo pe-
ne eam cum adolescente nescio quo caput limantem op-
pressi. At si mihi post hunc diem aliquid tale suboleat,
faxo foris vidua te patrem suum invisat. Qua re Nata-
licius non mediocriter perturbatus inquit; Adeone mi-
rum tibi videtur, si intemperanter mulier adolescens fa-
cit? paucas quippe invenias, quas adolescentiæ æstus in
has delicias ac blandimenta non abstrahat. non possunt
hæc ab adolescentia sejungi; quæ etiam simul cum ea de-
fiorescunt ac desinunt, interea sine ut det aliquid tem-
poris ad ludum ætatis. Sed, quantum audio, matrisfat.
nam, quæ mater ejus, uxor mea, lusit ad hunc modum,
potuerunt populo viritim dispertiri: nunc autem, æta-
te confecta, ita est aliena ab his nugis, ut nulla sit æque
castior ac melior materfamilias. Adolescens nihilo hac
responsione placatior factus, nescio quid mussans, pedem
retulit. Quo abeunte, sic orsus est Zancha.

Est in hac urbe Baldoccus quidam, ad Forum Apolli-
nis faber lignarius, fide, ac simplicitate magis ad veterem
illorum hominum famam, quam ad eum morem qui
nunc increbuit, referendus: neque, quod in eo reprehen-
das, quidquam invenias, præter studium vini, quo adeo
tenetur, ut horam abire nullam sinat, in qua, ut ipse lo-
quitur, non heminam saltem vini intestinis aspergat: ce-
terum nihil in eo simulatum, nihil fictum; contra, nuda
& aperta sunt omnia. Vnde fit, ut opportunus injuriæ
habeatur. siquidem, cum omnibus sua consilia credere,
fidem habere, depositum nullo teste reddere solitus sit,
à veteratore aliquo circumventus, sæpe decipitur. Hic
habet in matrimonio Antinam popularem suam, non
magis vitæ societate, quam morum similitudine sibi
conjunctam. nihilo enim est suo viro acutior, nihilo ad
cavendum instructior. quæ affinitatibus conciliandis,
mundis muliebribus æstimandis, novis nuptis ornan-
dis sectandisque locat operas suas. quo fit, ut fere

eam semper domo abesse contingat. Hæc unicam ex Baldoccio suo filiam habet, Tensa nomine, omnibus quidem gratiis venustior, sed improbitate atque nequitia vereratori cuivis facile parem. nam supra quam credi possit, est cata, confidens, audax, fallax, loquax; habet os, linguam, perfidiam, malitiam; simulare ac dissimulare omnia parata; inficias ire, ac jurejurando suo vincere, ut nec vidissent homines quæ viderant, neque fecissent ea quæ fecerant. Hanc, ita ut deformavi, plenæ maturitatis virginem, parens uterque, foras abiens, id quod minime opus erat, superioribus mensibus solam domi relinquebat; satis à prædatoribus corporis fore tutam pater existimans, si tabernulæ suæ ostio, digiti unius crassitudine, perticam transversam objecisset. Sed, tanta hæc, tanque munita præsidia, contra hostium insidias haud satis tuta fuisse, res ipsa ostendit. nam Pamphilo, adolescenti, ut nosti, longe lepidissimo, pervia fuere. Ergo proximis Saturnalibus, cum Baldoccus solito maturius domo migrasset, ut amici cujusdam sui vina degustaret, nudatum propugnatoribus vallum hostis ingreditur; commissoque prælio, præda potitur. Quid multa? dum Baldoccus amplis & profundis cantuaris potitans hilarem sumit diem, amatores ad ebrietatem usque sese voluptatibus expleant: neque eo tantum die suo obsecuti sunt animo; sed deinceps diebus omnibus, qua hora Baldoccus, communito, ita ut dixi, ostio, in popina aliqua Libero operam dabat: ut non alias tutior intra ea castra aditus esset, quam cum essent vallo munita. Verum kalend. Maji, Baldoccio & Antina domo egressis, dum liberius genio amatores indulgent, prope factum est, ut manifesto in flagitio deprehenderentur. Nam, cum advesperasceret, neque aliqua ludendi satietas esset, ex improvviso parentes Tense domum adveniunt. Quamobrem magnus adolescentem metus invadit. Cui puella, nihil exterrita, Ne pave, inquit; mox tibi fugæ rationem expeditam dabo. unum mihi dolet, quod voluntate mea celerius abstrahimur. A planicie recta sursum ascendendo, in solariolum pervenitur, quod ad dexteram cubiculum habet adjunctum, ad sinistram in culinam exit. ubi tunc temporis tritici ingens sacculus

saccus continebatur. quo illa cultello dissuto, amplam tritico ad egrediendum fenestram aperuit, & clamore sublato, Subvenite, inquit; saccus à muribus corrosus frumentum omne diffundit. Ac, dum parentes accurrunt, festinant, ac fugiens triticum quasillis excipiunt, adolescens vasa collegit & castra commovit. At Tensa minus eam voluptatem faciens, quæ cum periculo metuque conjungeretur, cogitare secum ipsamet cœpit, quam ratione eam puram sine timoris cujusquam face perciperet. Et, in regionem suarum astutiarum ingressa, contra parentum simplicitatem dolos instruxit, atque, ut est in excogitando inveniendoque acuta, paucis diebus post cum ad se Pamphilus venisset, suamque ex eo voluptatem expleisset, reversis sub vesperam parentibus, incestam se atque exanimatam ostendit. Interrogata quid esset, non audebat dicere, sed pro verbis lacrimarum vim dabat. Verum aliquando, coacta, dixit, esse quosdam Lemures, qui humana forma atque figura domos virginum celebrarent atque eas misere deperirent. unum ergo istorum Lemurum à se visum, forma adeo liberali, adeo venusta, ut nihil supra. Cui mater, Quid audio? inquit. vide ne id timor oculis persuaserit. Sed Tensa, Erras, mater. nunquam hilariore animo fui quam cum eum aspexi. Tum Antina, Bono, inquit, animo es; atque istam ægritudinem, quæ te inacerat, amove. mihi enim spes est, posthac nunquam tuis istam oculis larvam occursum. Ah nescis, mater, inquit Tensa, quam alte ea mihi hæreat in animo. His dictis, ad ea, quibus maxime indigebat, hoc est, ad cibum quietemque se contulit. Postridie revertitur Pamphilus novus dæmon, sed ex eo genere quos incubos vocant. Qui, ut se ad parentes mulieris conciliaret, in aures & torquem novo opere factum Tensæ reliquit. quæ ipsa lætanti animo parentibus suis ostendit. illi in manus sumere, contemplari, laudare, & tanquam ex Vulcani officina profecta mirari; jamque se adigi sentiebant, ut tam elegantem ac tam liberalem dæmonem absentem diligerent. Sed dona perpetuando assecutus est Pamphilus, ut nihil eisdem se carius existeret. Antina, ut mos est mulierum, ardebat cupiditate incredibili ejus lem-

ris conspiciendi. sed paululum timore perterrebatur. verum, tum frequentibus Pamphili donis, tum filia oratione confirmata, quæ de ejus forma ac venustate mira narrabat, suis eum oculis videre constituit. Est, ut probe nosti, Pamphilus annos natus undeviginti, capillo subcrispo, nigris oculis, candidisque genis leviter rubore suffusus; ne tenue quidem barbae vestigium inhæret; præterea vestitu ornatuque corporis, prout ejus opes ferunt, quæ sunt satis amplæ, semper excultus. Quamobrem simul ut Antinæ pervenit ad oculos, Hui, quam est elegans! inquit. ubi sunt, qui totum istud genus Lemurum forma esse horribili prædicant? jam pol, si ad istam faciem sunt omnes, nihil moror, quo minus quantum est ubique Lemurum meam in domum immigret, ne semper cadaverosam Baldoccii mei faciem necesse habeam aspicere. Sed jam Baldoccius rem apud vicinos omnem divulgaverat, de amoribus Lemurum, de ipsorum donis; mirosque de sua stultitia ludos sermonesque præbebat. Interrogatus, an dæmon hic cornibus præditus esset, Quid, malum, inquit, vobis venit in mentem cogitare istuc de eo quo non facile quidquam dixerim me vidisse in vita venustius? At hoc ridiculum est, inquit alter, quod, cum ipse cornibus careat, te cornutissimum faciat. At te magnus perdat Iuppiter, inquit Baldoccius, qui umbras aëre ventoque constatas humano more concumbere existimas. Quid si, excepit alter, ventus hic masculus filia tuæ ventrem impleverit? quid dicturus es? Alii, quos Baldoccii stultitiæ miserebat, pro amicitia & vicinitate eum, ut magnam infamiam fugeret, admonebant, & sycophantam illum domo fuste quantum potest ejiceret. Hos ille ex invidentia loqui dicebat. è re enim sua esse, ut non unus modo, sed mille etiam Lemures domum suam incolerent. Tum, Tu igitur, inquit unus, ob leve nescio quod lucrum tantum in existimatione tua damnum accipias? at vide, ne, ubi filiam dare nuptum voles, hæc mala illi umbra plurimum obsit. nescis quantum fama ad conciliandas nuptias valeat? Cui Baldoccius, Tace, inquit, inepte? non tu nunc mores hominum vides?

Quojusmodi hic cum fama facile nubitur?

Dum dos sit, nullum vitium vitio vertitur.

Quid opus est verbis? Baldoccio persuasum erat, posse antea asinos volaticos esse, quam ullum sibi filiaque suæ dedecus ab umbris, quæ aëre ventoque constarent, inferri. Sed opinionem suam fefellit eventus, nam aër ille in humorem crassum carnosumque conflatu, Tensæ præter modum ventrem inflavit. Ac primo persuasit parentibus, non in visceribus, sed in cute morbum hædere, atque aqua inter cutem laborare se dixit. Tum, cum partus instaret, matri veram morbi causam aperuit, sed ejus culpam non ad dæmonem illum familiarem suum, nec ad virum aliquem, sed ad somnium quoddam referebat. menses enim abhinc septem se meminisse somniare, ab adolescente quodam comprimi, atque ab ea die paulatim ventrem intumescendo ad eam altitudinem excrevisse. Antina, tametsi stulta est, ac mater, non continuo huic fabulæ assensionem adhibuit; sed, ut quemque vel medicum vel amicum occurrerat, statim, num virgo absque ullo concubitu prægnans fieri posset, interrogabat. Cui alius aliud respondebat. Erat tamen nonnemo, qui diceret, num, quod vigilans filia passa esset, somnio tribueretur? Cui illa, Cave, inquit, istuc de filia mea tibi veniat in mentem, qua ne columba quidem ulla est purior nec sanctior. Tum ille, Quasi columbæ, ait, parere non soleant! Ne multa; tantisper Antina suspenso incertoque fuit animo, donec columbum columbam ineuntem intueretur. nam, cum ad rimulas ostii, quid intus geritur, aucupat, videt id, quod jam pridem, nisi stulta esset, intelligere potuisset; ac tum deum, quo ex Orco Erinnyes illa prodiisset, animadvertit. Itaque dolore amens, clamores tollere, popularium fidem implorare, impurissimum sycophantam, familiaris suæ pestem, corruptorem filia, manu tenere se dicere. Hic vicini omnes accurrere, adolescentem objurgare, qui tam impudenter honestos homines luderet, & virgini ingenuæ vitium afferret: ad hæc minas addere; carcerem & prætozem objicere, qui ejus supplicio injustam optimis viris infamiam notam elueret. Scitis quam parvo momento adolescentis animus huc illuc impellitur.

pellitur. Sed Pamphilum non tam illorum minæ, quam Tensæ amor consuetudoque, movebat; cui amori, nisi prospectum interea esset, dissidium, distractio, vastitas imminebat. Quæ re permotus adolescens, locuples ac domus suæ nobilis, eo descendit ut fabri lignarii filiam sibi in matrimonium dari deposceret. Quam statim Baldocius eidem sponndit. Sed videre videor jam diem illum quo adolescentem hujus matrimonii pœniteat. At non erit illi difficile, inquit Gallonius, ab eo discedere cum volet, atque alteram genere, copiis, & existimatione sibi parem adjungere. Quod ego admirans, Audieram, inquam, matrimonia hic esse perpetua, ac tantum morte dissolvi. quæ igitur via hoc nefas aggredietur? Ea, inquit, quæ inultorum jam trita itineribus patet, quamque Antiphila nuper inivit. nempe, si testibus planum faciat, eas nuptias non rite, nec legibus, sed vi, metuque fuisse conjunctas. nam p̄tor vim factam restituit. Quid audio? Natalitius ait; Antiphila vidua est, viro superstitē? ea, inquam, Antiphila, quæ Demophonti aromatario nupserat? Ea ipsa, inquit Gallonius. Etenim, cum, sæpius in adulterio deprehensa, à viro verberaretur, quadriennio post, quam in viri inantum convenit, commenta est, matrimonium illud metu fuisse coactum: ideoque dissolvendum dirimendumque curasse: quod statim perfectum est, scribæ cujusdam opera. Cujus sane ordinis ad hæc atque alia nefaria perpetranda improbissimis hominibus plurimum prodest audacia. Sed tanta nos voluptate affecerant docti Tensæ doli, & ad decipiendum tam scite instructa in corde consilia, ut exclamarem, Pluris est, ô Zancha, tua isthæc lepidæ atque jucundæ narratio, quam gemmæ, quibus nobis opus est venditis. Si ita, inquit Zancha, tibi videtur, cedo gemmas: atque illud insuper redde, quo minoris sunt gemmæ. Sed vos arbitror ludere, neque huc logos emptum tanto precio venisse. Sequimini igitur me. Manuque prehensos duxit in forum, jussitque numerari nobis à trapezita tria talenta magna argenti. Nos læti, quod mercimonium nostrum tam lepide processisset, ac referti pecunia, domum regredimur.

Sed redeuntes in turbam incidimus. Nam dynasta Orius,

Orins, qui erat etiam sacerdos Cereris, sacra eidem facturus in ejus sanum solemniter ritu prædibat. Præcedebat familia ejusdem tota, & in ea alii honesti viri complures, qui eum honoris gratia sectabantur. Proximi veniebant ministri. quorum alius urceum, alius pateram, alius acerram plenam thuris ferebat. Hos sequebatur flamen amictus læna; & quacunque iter faceret, dabat illi viam nobiles atque plebei; aperiebant capita, & procumbebant in genua. In his, qui de via secesserant, agnovimus aliquot, qui triduo ante in illo eruditorum conventu magnam ingenii laudem erant adepti. Ipse vero flamen erectus ac celsus nemini se dabat, omnes æque despiciebat. Erat inter plebeculam, quæ ad visendum accurrerat, tunicatus unus, cum castula scortea, præinctus zona, ad quam ferramenta multa pendebant, videlicet malleus, forceps, scalprum, sacculus plenus clavorum. Hunc Flamen, ita ut erat ornatus, ad se vocat, sibi comitem addit: interrogat, quid rerum agat, ut valeat, num equo, quem ipsi curandum locaverat, dolores pedum remisissent, num aliqua salutis spes esset. Quod ego vehementer admirans, Cur hic, inquam, Galloni, vir summus, tantoque sacerdotio præditus, quo tempore, pontificiis insignibus ornatus, rei omnium gravissimæ daturus est operam, tot honestis viris contemptis ac spretis, pannosum hunc eligit, quicum eat in via ac sermones instituat? Quæ tam inter se distant, quam Pontifex & faber ferrarius? Quid tam alienum ac discrepans, quam læna pontificis & fabri ferramenta? Equidem nequeo satis mirari rationem istius. Inepta mehercle est, inquit Gallonius, & stulta. Sed quid facias? hic, ut ex ornatu pores conjicere, equos soleis induit. Sed eo more hic vivitur, ut principibus viris longe sit carior equus vel simia, vel aliqua alia nihili bestia, quam quidquid est ubique litteratorum hominum & honestorum: nam, si eorum aliquis æger in lecto decumbat, neque quisquam invisit, neque significatione aliqua ejus sibi salutem cordi esse declarat. at, si equo pes doleat, ecce subito clamores, querelæ: quicunque equos calceant evocantur, vota pro ejus salute nuncupantur, invisuntur; operæ, sumptui, labori non parcitur. Hoc ideo fit,
quia

quia homines probi, doctique, nullo sunt honore vel numero; bestiae in precio habentur. Possum illud addere, quod in hac Republica omnia ea munera, quae debentur industriæ, amicitiae traduntur & gratiae. nam si, verbi causa, eligendus sit aliquis ab epistolis, vel à cognitionibus, non continuo ille conducitur qui sit eloquentissimus ac doctissimus; illum conducunt potius quem amicus commendat, vel utilitas ususque suadeat. Quo fit, ut istorum epistolae ac iudicia, id quod minime ipsi laborant, ab iis irrideantur apud quos haec studia vigent. Tum ego stomachans, Eamus, inquam, domum, ac jentaculo nos reficiamus. pudet enim diutius in hac urbe versari, quae peior est ea quam fugimus. Venimus igitur domum, mensulam appositam invenimus; decumbimus. Paulo post adest à nauclero nuncius; qui magnopere ejus verbis nos admonet, ut, si ituri sumus, eamus; ventum operam dare, ac nos solos esse in mora. Quamobrem confurgimus, vestes acceptas à Gallonio deponimus, nostras induimus, & cum eo ad portum una contendimus, navem conscendimus; & Gallonium, semel iterumque complexi, donatum torque, annuloque cum gemma, relinquimus.

Sed vix Gallonius abierat, cum adest pictor quidam, quem Ballionem vocabant, atque opere petit maximo, ut navi nobiscum una tollatur cum muliere, quam uxorem esse suam ajebat. Navarchus, qui eum nosset, quique ejus artificio delectaretur, quamvis plena navi, non respuit; & simul, Quid, inquit, audio de uxore? nonne isthaec est Nice, vulgare scortum? ecquando tibi esse coepit uxor? Dicam, ait Ballio. Erat mihi cum isthac commercium una cum aliis pluribus. sed decem abhinc dies, cum ab ea noctem emissem, nescio quis deus fuit mihi auctor, ut à meretricio quaestu abductam in matrimonio mihi locarem: atque, eadem nocte, una cum suis rebus, meam domum abduxi: eademque opera ædes illas locandas inscripsi. Postridie mane veniunt amatores. Venit primum Callidius frumentarius. qui ædes videt inanes & inscriptas. quarit, rogat ex iis quibus testibus has compedes indui; (nam, re vera, nihil aliud est uxor, nisi vinculum merum;) ac comperit, eam mihi nupsisse.

Ædepol,

Ædepol, inquit ille, si ita est, tritici decem modii, quos dedi ut hæ mihi fores in hunc annum paterent, ad mariti granarium transierunt. Venit Creopolis lanus, qui carnariis duobus grandibus se circumductum queritur. Adest Thermopota cæupo, qui item per hanc rationem vinum, quod esset mulieri hunc annum satis, sibi ereptum fuisse deplorat. Accurrit Harpax decoctor, ac minis quindecim, ex iis pecuniis quas à creditoribus abraferat, se fuisse tactum indignatur. Properant etiam alii mercatores; quorum singulis suam illa operam, mercede accepta, locaverat; omnesque tanquam furi manifestariæ faciunt absenti convicium. Itaque paucis diebus post, in jus ad Prætorem veniunt; universi impetum in eam faciunt; singuli eidem litem intendunt. Sed, cum tam multis non posset obfisti, neque illa è re sua esse existimaret, quod semel in se ingurgitasset, evomere; statuit tanquam oppida hostilia eos habere, hoc est, direptos everfosque relinquere, atque in Geryonis regnum mecum una transmittere. Fecistis eleganter, inquit nauclerus; neque aliter factum oportuit. Ædepol, possunt illi præficas conducere, quæ pecuniæ, quam repetunt, naniam canant.

Erat in eadem navi scenerator, domi suæ nobilis, qui ex ipsa importunitate atque molestia natus videbatur. adeo erat importunus ac molestus. Hic, tanquam si in amatoribus Nicæ ipse esset expilatus ac deceptus, continuo, ore amarissimo, cœpit inclementissima, tum in Nicem, tum in totam meretricum nationem, dicta dicere, &, Quid mirum est, ait, si perfide, si maliciose, si nequiter, si avare mulier meritrix facit, cui vita est, alterum fallere, ac blandiciis, & illecebris, bonis patriis evertere? Est meritrix tanquam immensa quædam vorago & gurgis vitiorum. est meritrix calamitas, quæ prædiorum fructus intercipit. est scopulus, ad quem adolescentium præsertim fortunæ, fama, salus offendit ac frangitur. est profundum, quod fundos ædesque arripit, haurit, devorat. Est mare acerrimum, quod nunquam datis satiatur, neque expletur. immo mare haud æque est avidum, ut meritrix. nam in mare quod influit, occulte relabitur, ut iterum refluat: at in domum meretricis quod

quod intrat, continuo disperit, neque uspiam apparet. Vultin' experiri? projicite istam in mare: hujus contactu statim mare aquis, tanquam bonis, elaverit; ista illis sese ditaverit: mare exhaustum, evaserit; isthæc, nondum expleta, aliquid etiam amplius hiaverit. Non tulit Ballio insolentiam hominis atque fastidium. Ecquid tibi, ait, à muliere ista debetur? ecquid tibi venit in mentem non recte in illam dicere? qui alterum incusat probris, eum ipsum se intueri oportet. Tanquam non isthæc, quæ loqueris, & multo etiam majora, in sceneratorem convenient! Si illæ sunt avidæ; vos estis hiantes: si illæ procaces; vos perjuriosi: si illæ teterrimæ; vos sacerrimi: si illæ sunt gurgites; vos estis barathra: si illæ sunt mare, vos estis orcus, qui cuncta in se congerit, nec quidquam regerit. Quod autem, quidquid illis datur, non appareat, edacissimæ vestræ pecuniæ perficiunt, quæ, intolerabili à vobis mercede locatæ, quidquid attingunt, devorant. nam ubi miseris atas, morbus, vel aliquid ejusmodi, quæstui modum facit, aurum & argentum, quod amatores congesserant, ad vos advolat, pignori opponitur: sed, cum immanissimi illius scenoris solvendi facultas non suppetat, pro scenore, & pro sorte, quod est allatum, abripitur, & in vestrum profundissimum barathrum, nunquam inde emersurum, immergitur. Itaque, si meritrix est mare; vos estis vorago, quæ mare ipsum absorbet: si illa est perniciēs adolescentium; vos estis lues quæ æque utrisque infesta desævit. Non pertulit homo elatus & iracundus has tanquam verborum faces, quas ipsi Ballio admovit; sed graviter exarsit, ac superbissimas acerbissimasque in eum contumelias effudit. At Ballio, qui nihil hominem metueret, una cum uxore, conatus est in os seni involare: sed nos non permisimus. Verum nihil ægrius est factum, quam ut ab insolentissimo illo sceneratore manus abstinerentur.

Sed, sublati discordiis, consecuta est hilaritas jocusque. Nam pictorem illum navarchus rogavit, ne gravaretur exponere, de peregrina nescio qua, quemadmodum res sese habuisset. Qui statim, Cum venissem, inquit, Aspim, ab oppidi illius domino conductus, ut ambulacri cujusdam parietes picturis vestirem, accessit eodem

dem Lyus, notissimus Cynicus, summus rerum humanarum contemptor, ac vitiorum infectator acerrimus. Qui cœpit crebras ad cives conciones habere, ac loqui liberius de eorum improbitate atque nequitia. At cum oppidi dominus, ejus se objurgationibus in primis expecti intelligeret, lectica impositum, ditionis suæ finibus ejiciendum eum curavit. Verum ita illinc discessit, ut magnam sanctitatis innocentiaque de se opinionem apud omnes relinqueret. At postridie oppidum illud intrat peregrina virgo, Vestalis habitu: non ex genere earum, quæ communium parietum septis inclusæ, seorsum à reliqua turba ævum agunt: sed ex illarum numero, quæ libere, qua libet, incedunt; quo nimirum ostendant, posse etiam inter virorum cœtus castitatem & ceteros laudabiles mores coli. Huic virgini Minervæ sigillum, ex ære, tanquam crepundia, in collo pendeat. Vnde apud omnes magnam de se castitatis opinionem concitabat. Quam etiam majorem faciebat ex eo, quod se sororem esse Lyi simulabat, atque clarissimas orbis terrarum peregrinationes suscepisse narrabat. Etenim, se venisse, aiebat, ad Cererem Ennensem, ad Apollinem Delphicum, ad Dianam Ephesiam, ad Iovem Ammonium, Dodonæum, denique nullum esse locum aliqua deorum immortalium religione prædictum, quem non ipsa adiisset, lustrasset, venerata esset. Itaque, tum pro eo, quod Philosophus ille magno erat apud omnes honore ac nomine, tum etiam ob tam insignes ab ipsa obitas peregrinationes, quarum notitiam non aliam habemus præter eam, quam ex Latinis monumentis accepimus, fiebat, ut summe ab omnibus expeteretur, ac certamen esset inter mulieres nobiles, quænam earum prior hospitio illam acciperet, convivam sibi adhiberet, suum in cubiculum, atque adeo suum in lectum, dormitum adduceret. putabant enim, ex virginei illius corporis contrectatione sibi etiam posse sanctitatis ejusdem quidpiam hære. Quid verbis opus est? summæ cujusdam gloriæ instar habebatur, saltem una semel nocte cum illa concubuisse, ut etiam, quibus id minus contigisset, de hoc falso gloriarentur. & quod magis miremini, inter Vestalium septa, summa

cum earum Antistitis voluntate, intromissa, aliquot ibi noctes exegit. Sed tandem, memor aliarum urbium, quarum etiam mulieribus castissimi sui corporis copiam fieri æquum esse existimabat, cœpit profectionem ornare. Hinc mulierum earum lamentationes, hinc fletus exorti: quæ mulieres, multo quam par erat celerius, illud sibi solatium eripi querebantur. etenim jucundissima illius consuetudine nequaquam se esse satiatas clamabant. Sed earum querimoniis aures obstruxit, seque in proximum oppidum contulit, Basilico nomine. Vbi vidua quædam primaria portarum custodibus in mandatis dederat, ut, si quam mulierem, peregrini habitus, pedem intro ferentem aspexissent, continuo ad se domum adducerent. Hæc, genere, copiis & existimatione suorum civium facile princeps, aliquot disposita domus cubilia habebat, ubi peregrinis mulieribus hospitium præbendum, pedes abluendos, cœnam dandam, lectos sternendos, curabat. Hoc igitur novum sanctitatis prodigium simul aspectum & ad viduam deductum est. Vbi, cum cognationem, qua Lyo tam arcte implicabatur, & clarissimas illas à se obitas peregrinationes frequenter in ore haberet, perducta est in conspectum ac colloquium piissimæ illius fœminæ. Quæ adeo castimonia sanctissimisq; illius sermonibus delectata est, ut noctu, exclusa ancillula, quæ in suppedaneo apud ejus pedes lecto cubitabat, peregrinam introduxerit, atque in illo eodem ancillari lectulo collocaverit. At bona peregrina, mediam circiter noctem, cum ex screatu ab oculis viduæ somnium abesse cognovisset, cœpit, dentium se invicem verberantium fragore, sumnum corporis totius horrorem assimulare; &, interrogata quid esset, se subita correptam febris lethale totis artubus frigus concepisse respondit. At vidua, misericordia capta, suum in lectulum venire eam jussit, secumque stragulum, & ceteras vestes, quibus tegeretur, afferre. Quæ non est passa se iterum rogari, sed confestim, dicto audiens, viduæ lectum inscendit. Sed illam non ita multo post sopor rursus invasit. Rem miram, extemplo sanctissima illa peregrina, ex pudica virgine in salacem virum conversa, tanquam admissarius quidam equus, conatus est dormien-

nientem opprimere. At illa, eo conatu experrecta, Quid est hoc? ait. Cui novus hic vir, Recte, inquit. pone metum. ego, ut me tibi indicem, vir sum, qui hoc ornatu utbes circumeo, ut mulieribus, libidine incensis, sed propinquorum vel exstimationis metu in officio retentis, sine cujusquam offensione animum expleam. Quid putatis lectissimam scēminam in eas angustias comprehensam egisse? quid consilii cœpisse? num fortasse animum despondisse, vel, quod cuivis ineptæ venisset in mentem, clamores extulisse, vel popularium fidem implorasse, unde concursus vicinorum fierent? Nihil horum. sed hilari fronte, Bene agis, inquit. dii tibi multa dent bona pro hac in nostrum genus misericordia. Sed non te pigeat hic paulisper manere, dum corpus abluam. jam diu enim factum est postquam non lavi, neque enim olim, nisi tanta solita eram viro operam dare. Atque eadem opera ancillam quantum potest hinc abigam, ne quid persentiscat, vel indicium faciat. Tum revertar ad te, ut occasionem tam lepidam mihi in sinum delatam arripiam. Ac, lecto desiliens, ancillam convenit, admonet, ut unum ex familiaribus excitet, qui, subucula ac soleis tantum indutus, ne ceteras vestes sumendo tempus terat, curriculo ad prætorem se conferat; eumque suis verbis oret, ut lictorum ad se cohortem mittat; rem esse flagitiosam, turpem, ac dignam cui quam prius obviam eatur. Ille advolat, rem narrat; prætor non procrastinat, ire lictores jubet. qui veniunt, ac syncophantam illum comprehendunt, vinciunt, in carcerem abstrahunt. Ne multis morer; quæstione habita, post triduum, pannosi habitu, ad supplicium datur, hoc est, homini suspendio vita eripitur. Cujus facti rumor cum ad nos permanasset, ego, quo certior fierem, clam Basilicum usque me contuli. unde reversus Aspiam, ut quemque eorum aspexeram, quorum uxores gloriabantur se dignas fuisse habitas quæ vim illam sanctitatis atque pudoris lecto exciperent, oscularentur, contrectarent, continuo ajebam, O te felicem, in cujus domum boni tantum contigit immigrare. ille negare factum: ego instare factum. sed ideo id eum inficiari, ne mihi invidiam faceret. Atque, in eadem dissimulatione perseve-

rans, nullius rei me tam pœnitere affirmabam, quam quod ejus imaginis formam non in pluribus tabulis descripsissem, easque venales habuissem. Nam pro numero emptorum, ajebam, ac pro vestra in bellissimam illam virginem pietate, totum hunc annum opus mihi non defuisset: quamobrem brevi ad magnas pecunias pervenissem. Ne multa; omnino nemo inveniebatur qui sycphantam illum pedem intro in suam domum tulisse, confiteretur. Non magis attente, quam hilariter, lepidum sycphantæ illius commentum acceptum est, quod invenerat, ut mulierum, quæ ubique sunt gentium, potiretur: fuitque non nemo, qui felicitatem illam homini invidisset, si eidem diuturniorem eam esse licuisset.

LIBER VII.



Am valido, quemque maxime optaveramus, vento, in altum delati, placido tranquilloque mari adeo delectabamur, ut, quemadmodum de Achivorum exercitu Pacuvius inquit, lati piscium lasciviam intueremur: cum subito, adversa coorta tempestate, eundem in locum rejecti sumus unde discesseramus. sed Neptunum arbitror fluctus commovisse maritimos, quod certi cujusdam senis, Ligurino nomine, qui nobiscum una vehebatur, fastidium insolentiamque perferre non posset. Huic, supra quam dici potest, moroso atque difficili omnia exhibebant negocium; volatus avium, auræ sibilus, remigum laborantium in reddenda anima sonitus; quibus etiam minitatus est crucem, si ita respirassent ut aliquis ejus ad aures sonus veniret. Toto illo navigio una cum servo prosecutus est culicem, qui dormienti sibi in aurem insusurraverat. Multa alia prætereo, ne sim longior, quibus odium illud propemodum nos enecavit. Nobis igitur, ita ut dixi, in litus expulsis, ægre impetratum est à navarcho ut liceret Gallonium invisere. nam se velle, ajebat, simul ac contrarius ille ventus confedisset, navim solvere, neque diem posterum

rum expectare. propterea properaremus redire. Quamobrem sine ulla mora ad ædes Gallonii venimus per angiportum, quod ad eas recta ferebat. Qui, ut nos aspexit, majorem aliquam esse causam reversionis nostræ existimavit; ac, dimisso Plusio Accipitre, de quo supra commemoravimus, ejus reversionis causam efflagitat. Nos exortam tempestatem, & simul odiosam Ligurini importunitatem exponimus; ac, Si, inquam, iterum cum eo navigandum sit nobis, nihil est opus carnifice qui animam adimat; satis eam nobis suo ille odio præripiet antequam portum conspiciere valeamus. Ne miremini, inquit Gallonius; æque ille est terra marique omnibus, quibuscum vivit, odiosus. atque, ut sciatis, vicinia, in qua nuper habitabat, vota fecit, pro illius abitu, vel potius interitu. nam gallos gallinaceos, quotquot circa ædes ipsius erant, capiendos interficiendosque curavit, eo, quod interdum sibi aliud agenti aures obtunderent. præterea insignem canem, qui ob ejus festivitatem ab omnibus diligebatur, quique latratu fures arcebat, catapultæ à catapultario emissæ dilaceravit, causatus, quod ipsi volenti quiescere somnos abigeret, sed re verâ, quod sit odiosus, sævus, truculentus, immanis. Quid? nonne multis persecutus est noctibus noctuam, quæ occentabat fenestram cubiculi, in quo jacebat, quod oscinem eam esse avem diceret, eique, cui concineret, semper aliquid triste prædiceret? itaque, post multos labores, insidiis exceptam obtruncavit; ejusque caput hastæ præfixum, trophæi loco impostum suis ædibus habuit. At nihil inest in hoc homine, ut sciatis, præter corporis proceritatem, generis splendorem, summamque superbiam. Erat olim etiam dives; sed nuper in mari bonis elavit. itaque nunc trioboli homo est, vel potius nihili bestia. Sed abeat, naviget; deos oro, ut perpetuum hoc illi sit iter. Arbitror, me Plusium Accipitrem Offuscato reconciliasse. Quid? ajo, erantne inter eos inimiciæ? Maximæ, inquit, & capitales. Sunt in suburbanis istis arenariæ complures tortuosæ, ac labyrinthicis flexibus & erroribus similes. in eas abavi horum hominum, religiosissimi mortales, cum palam non liceret, furtim ad sacra Cæceri Liberoque facienda conveniebant; eorumque reli-

gionis non pauca etiamnum in his locis vestigia cernuntur. Est antiquitatum istarum studiosus Offuscatus, ut nostis; qui sapius, omnibus ceteris curis, se abdit sub terras, ac dies noctesque integras in perlustrandis locis illis religiosissimis cum voluptate traducit. Plusius, qui potando, edendo, scorta ducendo, rem perdidit, qui- que cupiat aliquid invenire, si possit, quo vitæ priori reddatur, sibi persuaferat, magnæ cuiuspiam utilitatis gratia Offuscatum loca ista humi depressa celebrare, hoc est, thesauris defodiendis operam dare, & magicis eam ad rem artibus uti. itaque ad maximas se posse divitias pervenire existimavit, si in societatem ab eo reciperetur. Nec sibi defuit. nam, die quodam, inventum seducit, abreptaque mann, Dic, obsecro, inquit, quid tibi negotii est sub terra? cur atatem exigis in arenariis? At ille, Quid putas? delectat me religiosos majorum nostrorum ritus pernoscere. At Plusius, Tace, inquit; quasi nos inter nos nunc primum noverimus, nunquam te tam religiosum agnosci. immo thesauris defodiendis te locupletas. Tum Offuscatus; Quid tibi venit in mentem suspicari, veteribus illis fuisse thesauros? quibus probitas erat pro opulentia, pietas pro divitiis. Nihil agis, inquit Plusius. non sum adeo in nostris annalibus hospes ac rudis, ut non legerim, sanctissimos illos homines scyphis aureis diis libasse, & ad nocturna orgia argenteis candelabris præfixos cereos habuisse. Proinde, pro nostra amicitia, me tibi socium adscribito. gestio enim mihi aliquas pulcherrimi hujus operis partes adsciscere. Offuscatus, cognita Plusii vanitate, lepidos sibi ludos ad omnem voluptatem & ocium esse oblatos existimavit, neque ulla ratione dimittendos censuit. Ac primo cœpit eum rogare, obsecrare, ne se proderet. capital enim facere, qui magicas artes colat. Itaque, Si me, inquit, diligis, si mea tibi salus cordi est, quod scis, nescis, & quod vides, non vides. Quod autem petis, ut te in societatem recipiam, non meæ sunt istæ partes, sed ad Stylium amicum nostrum pertinent, qui abest hinc millia passuum circiter centum. sed honoris tui gratia perficiam, ut minus horis tribus totum hoc iter conficiat, & ad Iani quadrifrontis templum adveniat. Et gaudeo

deo mehercle hanc à te mihi occasionem fuisse oblatam: volo enim par illi referre, cujus olim cantionibus ferme horis quinque in hanc urbem ex patria sum extractus. O istuc si dederis, Plusius exclamat, magnus profecto vir es. Obsecro, Offuscatus ait, compesce vocem, ne clama; abi domum; & cura te, ut, cum est opus, sis mihi præsto ad Ianum; ego cum clavo laminali illic adero. Hic est clavus quidam æneus perantiquus, in Aridi museo nuper ab eo conspectus. qui, quoniam characteres quosdam & notas habet impressas, visus est in primis ad eludendum Plusium idoneus magicæ artis cupidum. Interea Offuscatus ad Stylii ædes accurrit, qui pridie ejus diei è patria redierat; Plusii stultitiam enarrat; quemadmodum ludos eum fieri velit, exponit. Convenit inter eos, ut Stylius hora ejus diei undecima ocreatus, tanquam si tum primum urbem ingrederetur, autè ædem Iani quadrifrontis appareat, atque Offuscatum increpet, quod se minus horis tribus in urbem extraxisset. Plusius maturius, quam erat imperatum, domum ad Offuscatum venit; urget, instat, ut eant; nihil sibi videri longius, quam dum ex veteri aliquo sepulcro aulam auri plenam effodiat. Itaque eunt, veniunt. Offuscatus in æde Iani, in dextero ad lævam angulo, clavum laminalem solemnibus quibusdam verbis à se nuper inventis humi defigit: tum schedulam laneo funiculo alligatam ad Plusii collum appendit; in qua inscriptæ erant litteræ, duo PP. duo CC. & unum R. Quærentibus nobis, quibus fabula narrabatur, id quid esset, dixit Offuscatus, *Plusius perdidit cerebrum cum re*. Hanc illi schedulam imperavit ut sibi nunquam adimeret, sed perpetuo eam sineret tanquam crepuidia in collo pendere, si vellet caput à Lemuribus salvum domum referre. Tum incipiunt deambulare. Multisque spatiis jam factis, ecce tibi Stylius adest. Prior Plusius eum aspicit; atque illico lætus exclamat, Venit. Eunt illi obviam, reditum gratulantur, salvum eum esse jubent, ad cœnam vocant. At Stylius commoto similis, Itane, Offuscate? inquit. sed ludis me ludo meo: jam non est quod tibi succenseam; ego quoque te olim ad eundem ludificatus sum modum. Quæ cum ab eo dicerentur, Plusius Offuscato

accedens, summisſe, O virum ſummuſ, aſebat, atque præſtanteſ! ô ſingulareſ hominē, ac prope divinuſ! Sed poſt mutuas ſalutationes omnes ſimul ſeſe Stylio comites addunt. Sed, cum videt Pluſius in via, ubi quiſque Styliuſ aſpiciat, ire eidē obviaſ, ac veniſſe eum ſalvuſ gaudere, obſtupere; Offuſcato latus fodere, & in aureſ, O virum maximuſ! dicere. Offuſcatus, id ſe moleſte aſſimulans ferre, Parce, inquit, voci; nec me eas perdituſ. Tum Pluſius, Ne time; egone, ait, ut capitis hominē mihi amiciffimuſ, & tali virtute prædituſ, perdam? me ſatiuſ eſt mori. Ne longuſ faciam, adeo Pluſius hæc ſibi vera eſſe perſuaſerat, ut Cræſſi divitias cum theſauris ſibi à Manibus commonſtrandis non permutaſſet. Sed, qua homo garrulitate eſt, non potuit ſe continere, quin reiſ totaſ amico cuidaſ ſuo aperiret, qui Styliuſ optime noſſet, eundēque pridie ejus diei, quo Pluſius hæc à ſe viſa narrabat, conſpiciatus fuiſſet. Atque ille continuo hominē data eſſe verba intellexit; cœpitque eum acriter objurgare, quod id ætatis homo, eoque ingenii acuminē prædituſ, duobus adoleſcentibuſ ſe irridenduſ præbuiſſet, ac, ſi pergeret credere, prope eſſe, ut ipſuſ lapidibus pueri iſectarentur. Quod ubi audivit, adeo vehementer exarſit; ut propemoduſ ex ore flammas evomeret; ac ſicam rapere, minitari abſenti Offuſcato; ſequē vel medio eum in foro obtruncaturuſ, aſſerere. Ego, ad eum placandū interpres datuſ, vix orſuſ erain loqui de conditionibꝯ pacis, cum mihi orationē eripuit, ac, Tace, inquit, egone ut redeam cum illo in gratiam? dii me perdant, ſi mihi erit amicuſ. jam apud me teſſeraſ fregit. abeat, quærat aliū, quem ludat. Ego cum hanc viam obſeptam viderē, cœpi alia eum aggredi, ac, Vide, inquam, tua iſthæc pertinacia te potiuſ, quam inimicuſ perdit. an neſciſ quantam tibi potationē, ſaturationē, & gaudiū eripiaſ? nam promiſit, ſi te ſibi placarem, opiparam ſe tibi cœnam hodie, in qua velles popina, daturuſ. Neque hæc me ratio feſellit. nam vix popinæ cœnæque mentio injecta eſt, cum homo, alieni cupiduſ cibi, & in primis popino, benigne gratiam fecit ne iratuſ eſſet, & quo vellem ſe deſcenſuruſ ſponſondit. Sed

dit. Sed properandum est mihi ad Thaumantinn bibliopolam. In cujus tabernam litterati fere omnes sæpe conveniunt. eo enim venturus dicitur insignis philosophus, quem vos non nostis ; cui singulare ingeniū, summa humanarum divinarumque rerum scientia, præterea dicendi vis egregia, ac memoria plane prodigiosa, Teratis cognomen invenit ; jamque ab omnibus Teras appellatur. hic bibliopolis imperat, nec, absque illius permisso, aliquod scriptorum genus edi, aut venale haberi, aut importari in hanc urbem potest. Eo illum rogatum, ut amico hinc meo, quem videtis, insignis cujusdam voluminis edendi potestatem faciat. Et, quoniam taberna illa propius abest à portu, non arbitror à rationibus vestris alienum, vos illuc venire ; quo, cum nuntiatum fuerit navim solvi, nihil in vobis sit moræ. Tum amicus ille, qui erat librum editurus, Quoniam, inquit Plustimentio facta est, volo, si non sit odio, vobis exponere, quemadmodum illi nuper à duobus sycophantis manus adita sit de pauculis aureis nummis, quos unicuique egestatis suæ præsidium ad extremos sibi casus reservaverat. Hi sycophantæ, quos dixi, forma insignem puerum nacti, primum corporis obsequio sibi devinxerant ; tum quæstus sui gratia ad omnes sycophantias & dolos probe formaverant. Hunc in triviis atque plateis præire jubebant ; præeuntem furtim ipsi subsequerantur. Puer, ita uti erat edoctus, ut quemquam offenderat, quem de facie, à puerorum concubitu non abhorreere existimaret, ita salvere eum jubebat : rogabatque, ut aliquem sibi ostenderet, qui se in servitutem reciperet : etenim, domi suæ nobilem, patris sævitia eo redactum esse, ut patriam fugeret, summaque cum inopia conflictaretur ; & jam diem unum sine cibo agere. Ille, tum misericordia, tum pueri specie captus, sequi se illum jubebat ; ac simul ac eum eo domum intraverat, introrūmpebant illi etiam, quorum adventu puer, ut erat præceptum, ligulas solvebat, sibi que vestimenta ad pedes ire sinebat. Tum illi, clamore sublato, Itane, ajebant, tu fratrem nostrum natu minimum ad nequitiam trahis ? Evocate huc aliquis lictores, qui vincitum hunc ad tres viros trahant. (nam pueris liberis vim inferri nefas hic

grande habetur.) Alter vero, Quid est opus, ajebat, licitoribus? egomet licitorum, ego judicis, ego carnificis partes suscipiam, & corruptorem hunc, ut par est, obtruncabo. Tum vicissim conversus ad puerum, patria quadam severitate. Non te pudet, ajebat, tam insignem generi nostro notam inurere? cedo, quid te ad hanc turpitudinem adigit? num fames? an non suppetit tibi domini nostræ affatim quod edas ac bibas? abi domum, inastigia; nisi tibi dorsum virgis despoliavero, Iovem quæso ut mihi sit semper iratus. At ille miser, inter sacrum & saxum positus, quo judicium vel mortem effugeret, cogebatur se pecunia redimere. Hoc rete capti sunt multi, sed unus in primis, ex insigni Philosophorum familia, quem non est necesse nominare. Hic malacum pallium, vestem lineam, ac multos præterea nummos aureos passus est sibi auferri, quo se tricis illis impeditum expediret. Alter vero, ceteroque vir bonus ac prudens, sed pueri illecebris in hanc fraudem inductus, non solum coactus est in præsentia nummos dare, verum etiam sancte affirmare, ut, nisi vellet indicari, quoties ab ipsis conspiceretur, quod de industria fiebat fere quotidie, toties senas se eisdem drachmas ad pedes projecturum. Plusius igitur, qua est in his rebus cupiditate, (nam sæpe à matre & ab uxore deprehensus in furto, sandaliis est male multatus,) tanquam famelicus piscis ex hac nassa cibum petitem accurrit. quem illi eodem modo circumventum omni auro, quod habebat, dispo-liarunt. Inter hæc ad Thaumantis tabernam pervenimus. Ac multos ibi videmus dispositis in sellis sedere. Quos inter unus, corpore paululum obeso, magno capite, capillo flavo, ore rubicundo, versus nescio quos alteri, qui ipsi affidebat, recitabat. Fusco huic esse nomen ajebant, qui nuper Heroidarum quarundam epistolas, Ovidii ad exemplum, ediderat. Alii duo inter se de quodam adolescente, Pusillo Cæsari nomine, tabe paulo ante consumpto, commemorabant: quem, ingenii magnitudine, rerum maximarum scientia, atque omnis elegantia doctrinæ, cum altero nescio quo conferebant; quî itidem ad miraculum doctus cursum suum transcucurrerat, & paulo supra hanc ætatem, in ipso ætatis flore de-
cesserat.

decefferat. Sedebat etiam inter eos Vranus quidam, cui summa ab omnibus pingendi laus tribuebatur; ac præfertim artis delineandi primæ omnium concessu deferebantur. neque inter litteratos illos versabatur ut pictor, sed ut litteris præditus. nam eum esse astrologum, mathematicum, poetam, atque ingenii acumine & inventionem non multis modo suorum æqualium, sed superioris etiam ætatis antecire constabat. quanquam, ex invidentia, nonnemo ejus laudibus conaretur detrahere. Ad hunc allatæ sunt ab Arido litteræ, in quibus ille de Merlini cujusdam senis injuria querebatur, qui, neq; rogatus, neque coactus, sed sponte sua, acetum pro flore vini veteris miserat. Hunc esse ajebant senem odiosum, malum, molestum, avarum, contumeliosum, stercorem, quique femoralia urina ac stercore imbuta quotidie domum ad uxorem referret. Has ille litteras, clara voce atq; distincta, semel atque iterum legit. quo factum est, ut etiam ediscerem, ac, ne exciderent, meum in codicem referrem.

Pictorum lux alma, vale; cui carmina Phæbus

Dulcis & Vrania nomina clara dedit.

Vt modo Merlinus ludos me fecerit, audi,

Putidus ille, malus, decrepit usque senex.

Fit mihi laniculi supremo in vertice collis

Obvius, & tremula talia voce refert:

Est mihi, si nescis, vinum, quod vincere nectar

Possit, & atherea ducere ab arce Iovem.

Ac rogat, instat, clamat, ne sua dona recusem,

Hauriam & è plenis limpida musta cadis.

Torreat casu misere sitis aspera fauces,

Improbis immerito cum mihi verba dabat.

Nullas necto moras, vacuam sed mitto lagenam,

Quam plenam larga reddidit ille manu.

Toxica, crede mihi, non vina fuere; nec ullum

Tetrius in terris arbitror esse merum.

Namque, rato vinum vacuis committere venis,

Aique avidam sicco pellere ab ore sitim:

Herrendum subito talos it frigus ad imos,

Et prope, præcluso gutture, vita fugit.

Hoc tamen ipsa domus reficit se pallida potu

Merlini, hunc dulci præficit ambrosia.

Quæris,

*Quæris, tam rigido cur gaudeat uxor aceto,
 Et soror, & famulus, filius, atque nepos?
 Scilicet hoc miseri firmant munimine pectus,
 Intestina gravi ne vomat ore foras,
 Hic simul ac muccis & olenti stercore sædus,
 Naribus & stomacho dira venena refert.*

His lectis, risus est ab omnibus sublatus. Tum alter; Audite, inquit, aliam comici ac stulti hujus senis ineptiam, vel flagitiū potius, supplicio dignum. Cum paucis ab hinc diebus in procœtone Bibuli dynastæ una cum aliis multis versaretur, dum ad eum intromitteretur expectans; lepida ac liberali forma adolescentem aspexit. hunc, relictis ceteris, petit, aggreditur; rogat, quid rerum agat, ut valeat, ut crebro scortetur; nunc ei rei tempus esse: admonet ut meminerit non semper eam sibi, quæ nunc esset, ætatulam fore. Respondet adolescens, se quidem à morbo valere; sed ægrum esse à crumena: propterea scortum fere nullum attingere. Hoc igitur, Merlinus ait, te voluptate ista omnium maxima prohibet? Bono animo es; inveni quod ames; de reliquo meæ erunt partes perficere tibi ne desit argentum. Ego quoque adolescens fui, scio quid sit rumpi tentigine, & numinis carere. Propterea æquior sum in adolescentes judex. Cura, inquit adolescens, ut sit quod dem. nam arbitror me invenisse quod placeat. est hic in proximo scortillum non illepidum, nec illiberale, ad quod animum jam pridem adjeci: sed negat illa facere mecum mutuum, cui ne teruncium quidem sciat esse, ipsi quod dem. id tibi, si lubet, ubi erit ocium, ostendam. Vel jam est ocium, Merlinus ait. eamus. gestio argentum quamprimum tibi depromere. Eunt igitur una simul, & ad domum cujusdam meretricis perveniunt; pulsant fores: meretrix aperit; intrant: adolescens rogat, illa mercedem postulat, Merlinus spondet. qui interea dum puer scortum intus accumbit, pro foribus servat, & ex vetere crumena tres extrahit drachmas; quas deinde scorto persolvit. eas mulier tristis accepit: nam ex Merlini locupletis hominis liberalitate longe majora expectabat. Verum, cum fere quotidie adolescens cum tribus ad eam drachmis accederet, neque ulla mercedis accessio fieret, diutius

diutius dolorem dissimulare non potuit, &c. Me pol, inquit, ut video, diabolare scortum arbitramini, quod tam parvo conducitis. nunc autem, ut meam sententiam sciatis, tibi, adolescens, edico, nisi ad quotidianas ternæ alteræ coaccendant drachmæ, huc pedem intro non feres. Tum Merlinus, stomachans, Propudium populi, dic, inquit, quantum temporis isthæc tibi opera præripit, adolescentulo quam locas? sane adeo est pauxillulum, vix ut queat æstimari pecunia; ne dum male drachmis tribus compensatum queraris. tanquam si ignorem eandem te operam nummo solere aliis addicere: vel si sit cara meretricum annona! nil hodie est vilius. alio igitur ibimus: eoque lucrum istud, quod negligis, transferetur; tu vero egebis. Nemo fuit ex eo conventu, qui hanc olidi & capularis senis in filios familias sub patre parco & duro liberalitatem & misericordiam cum risu non audiret. Sed, cum unus effusiores ceteris cachinnos extolleret, iniecit aliis curam quærendi quid esset quod rideret? Qui rogatus, Famulus ille, inquit, qui ab Arido litteras attulit, revocavit mihi in memoriam ridiculum ejus facinus, quo non facile quidquam dixerim me legisse vel audivisse jucundius. Quo tempore vaser ille Rufo tabellioni, qui postea decoxit, navabat operam famulus, drachmas ab eo denas in dies singulos accipiebat, quibus obsonaret. Sed, cum die quodam cum drachmis decem obsonatum, ut consueverat, isset, vidit in medio foro hominem, qui, Prætoris permissu, plenam sortibus urnam habebat. cui, qui fortunam experiri cuperet, tres drachmas numerabat, & sortem unam educebat. Itaque magna eum cupido incescit fortunæ periclitandæ; atque drachmis tribus, ex iis, quibus domino emere obsonium debebat, persolutis, fortunam invocat. at fit, ut sortem beneficiariam educat; quæ videlicet pollubrum illi argenteum cum gutto dabat, minis decem æstimatum. at ille, pollubro guttoque relicto, minas pro eis novem accepit. nam, cui pecunia quam fors magis placebat, ejus precium decuma detracta persolvebatur. Precio igitur accepto, reliquum nummorum, quibus emere obsonium debebat, in proxima popina profudit, neque domum redire curavit.

curavit. Rufus, cum multas horas expectasset, & jam meridies appeteret, neque ille appareret, iratus, quod impranso ille sibi dies esset transigendus, mandat lictoribus, ut inventum eum abripiant, & in carcerem abstrahant. At ille ex pecunia, quam ex sorte redegerat, preciosas sibi vestes à chorago conducit; ac circumpedes duos varia indutos veste sequi se jubet; atque ita ornatus, basilice magnificeque ante officium Rufi se infert. Sed simul aspectus & cognitus est, Rusoque demonstratus. Qui surgens, recta ad eum properat. ille contra pariter fert gradum, confert pedem, ac salvere Rufum jubet. A quo interrogatus quid illud ornati esset, respondet, ab homine sibi propinquo hæreditatem, ad talenta videlicet quadraginta magna, obvenisse. itaque, pro re, nitorem sumere, & gloriam pro copia. Rufus, cujus res tendere ad ruinam cœperant, in spem fortunæ melioris erectus, tacitus intra se, Dii, inquit, me respiciunt, si vera hic memorat. sed oportet ita esse. nam quid illi veniat in mentem, hoc fingere; ubi nihil est lucri, me fallere? Quamobrem credit, novas spes sumit: nec jam facit convicium, ut servo; sed habet honorem ut domino. it illi comes exterior in via: domi suæ hospitium præbet: &, quoniam preciosa ipsi supellex nulla erat, stragulam vestem sericam, & conopœum item sericum, non parva mercede conducit. At, ubi blanditiis atque muneribus satis eum delinitum putat, talenta quatuor poscit mutua; quæ propediem eidem se numeraturum promittit. Homo liberalissimus, Quid ais, inquit, quatuor? decem roga. nam gestio promittere, quæ, cum tibi erit commodum, reddes. Rufus, ex lætitia vix sui compos, latari, ac diis gratias agere, quod rebus suis desperatis ac perditis tam præsens auxilium obtulissent. & quo magis obnoxium sibi hominem redderet, ac de decem talentis fidem servare compelleret, argentum fœnori sumit, quinquaginta videlicet minas; ex eisque ornat ample magnificeque convivium. dynastam Eugenium, tunc temporis opibus & gratia florentem, cujus patrocinio se tuebatur, ad cœnam vocat: convivales ludos exhibet: comœdos, qui minimum agant, adducit. Licebat nebulonem illum cernere dynastæ amplissimo

fimo proximum accumbere, affidere, crebro aliquid in aurem dicere, tanquam si esset par illi splendore, dignitate, potentia. ea pecuniæ vis inest. Quid verbis opus est? minus quinque diebus quinquaginta illæ minæ dilapsæ sunt toræ. At nugator ille, cum aliquot jam dies ad Rufi mensam ubereim ac plenam, sua ex sententia, se saburrasset, celocem alio direxit; & die quodam, à prandio satur abiit è domo. vesper adest; non redit: unus, alter, tertius dies abit; nihilo magis. Rufus, qui jam explorata ac domi condita decem illa talenta sibi esse existimabat, neque uno numino passus esset à se auferri si quis emptor venisset, animum prorsus abjicere, conqueri, ac lamentari fortunas suas; sua sibi stultitia, quia hominem non asservasset, decem talenta fuisse erepta dicere. Sed octavum post diem, cum in officio suo testium quorundam juratorum dicta exciperet, ecce tibi homo solus, pannosus, ac sordidus, adest. agnoscitur, ac Rufo in interrogandis testibus occupato statim ostenditur. qui, relictis rebus omnibus, desiluit ex scamno, atque hominem rogat, ubi sint circumpedes varia veste induti, ubi preciosa femoralia, ubi sericum amiculum. ea ille chorago, qui locaverat, ut par erat, reddidisse respondit. & simul de pecunia, quæ ex beneficiaria ipsi sorte obvenerat, ociose ac lente narravit: nunc vero redire, ut solita mercede suas ipsi operas locet. Falsa sunt igitur, inquit Rufus, quæ de quadraginta talentis, ex propinqui morte ad te perventis, commemorasti? Tam vera sunt, inquit nugator, quam verum est, solem media nocte lucere, vel mortuos vivere. Cur igitur, Rufus ait, simulasti? Quia, inquit, volui per hanc rationem experiri, qualis sit vita nobilium ac beatorum. atque equidem suavem ac jucundam eam esse comperio. vah! quantum inest in ea boni! divitem me esse natum oportuit. nam scirem bene esse, atque animo obsequi. Rufus iratus, homini in os involat, ac plus quingentos colaphos ac pugnos infregit. At ille pulsanti, os ultro objecit. Sed, postquam Rufum clamando verberandoque ad languorem datum videt, Age, inquit, omitamus nugas; quin jubes me domum ire, quæque opus sunt mihi depromi, tibi ut sit paratum prandium?

Rufus,

Rufus, sentiens dum eum ferit plus sibi nocere, destitit, ac, Qui verberat, inquit, lapidem, perdit manum. Tum, placatior eidem factus, claves tradit, & nummos, quibus obsonatum eat. Delectati sunt omnes mirum in modum hoc hominis facto; atque eum nugatorem lepidum, & sycophantam graphicum statuerunt esse. Iam omnes conticuerant, cum pictor Vranus, Quoniam, inquit, cecidit mihi peropportune, ut in hunc eruditum hominum conventum venirem, legam vobis, si placet, Phalæcium breve carmen Bibuli magni Liberi patris antistitis iussu à me nuper effectum, quo columba, quæ fuerat homini in deliciis, in ejus osculis & amplexibus mortua laudatur. Cumque omnes se non nolle dixissent. Sub hac, inquit, conditione legam, ut, si quid in eo titubatum fuerit, indicetis, vel corrigatis potius. debet enim grandibus litteris marmorea in tabula incidi, ac parieti, una cum aliis epitaphiis, quæ ibi cernuntur, affigi.

*O factum male, nequiterque, sava
Mors, quæ quidquid adest ubique amœnum,
Pulchrumque, ore petit voraciore.
Caram sic rapuit mihi columbam,
Olim ut pessima Lesbia Catulli
Dulcem passerem ademit, & nitentes
Infecit lacrimis genas misellis.
Heu, quomodo dolor abripit gementem!
Et quid facta queror rapacis orci?
Non ille id voluit nefas, nec ipsam
Ditis regna tenent tenebricosa;
Verum pulchra Venus suo venustam
Gaudet nunc dare curru columbam.*

Conclamatum est, Pulchre, recte, bene. Tum rogatus est quidam, cui multæ, ut dicebatur, inerant facetiæ, multusque in jocando lepos, cuique cor erat acre aceto, ut laceffitius non ferret injuriam, rogatus est, inquam, ut carmen recitaret, quod in Tigellum decoctorem scripserat. Recitabo, inquit ille; modo vobis molestus ne sim. Nobis, inquiunt, qui te id ipsum rogavimus? Tum ille; Vltus sum, inquit, hoc carmine, execrandam pessimi illius decoctoris avaritiam, qui creditores suos,

suos, ut nostis, ex creditoribus Hercules fecit. nam decumam eis partem dedit, sibi novem abstulit; atque, pecuniis undique ereptis confertus, recusavit una cum aliis vicinis suis pauculos ad comœdiam coëmendam nummos conferre.

Cum binos scena nummos conferre Tigellus

Difficili vultu servitiaque negat,

Miraris, tam parcus homo, cur turpiter olim,

Naufragus ad Ianum fregerit unde ratem?

Erras; nil passus damni est. sed maxima falso

Sub decoctoris nomine furti facit.

Nam cui debebat centum sextertia, dixit,

Vel te suspendas, vel tibi sume decem.

Nec tamen est ausus quisquam mutire; sed ultro

Illius in leges creditor omnis abit.

Quid facias, strictus supra, si pendeat ensis?

Victori supplex non dabis ipse manus?

Nonne facis lucri, quidquid tibi latro relinquit?

Ipsam demum animam non sua dona putas?

Non tam civis erat nobis, sed latro Tigellus;

Qua non surripuit, dona fuisse putat.

Vix postremam horum versuum syllabam recitaverat, cum unus intervenit, qui, Venio, inquit, à foro; ubi Coschini Iudicis prudentiam, justitiam, æquitatemque supra modum sum admiratus. Etenim illi ejus iudicio de re privata interfui, quo nec gravius, neque severius, neque æquius ullum Rhadamas vel Minos ipse fecisset. Neque expectavit dum rogaretur; sed, attentis omnium animis, sic orsus est.

Mulier vidua minas septuaginta exegerat, quas vicino cuidam suo, in mercimoniis quibusdam coëmendis occupato, multis ab eo precibus rogata, mutuas dederat, quas ille quartum post mensem se eidem renumeraturum promiserat, & syngrapham scripserat, qua mulieri, ut affirmabat, cautum erat. Verum, cum ejus pecuniæ dies non advenisset solum, sed multos jam dies præterisset, neque pecuniæ reddendæ mentionem plus faceret, quam si nunquam accepisset; cœpit eam mulier efflagitare. Ille, Dabo innox; post paulo:redito cras. nunc non est ocium dicere, ac diem ex die ducere. At, ubi se mu-

lier duci diutius videt, hominem aggreditur, & , Quo-
 niam à te ludibrio, inquit , habeor , pecuniam creditam
 lege judicioque reposcam. Tum ille iratus, Age, inquit,
 ut lubet ; nihil à me tibi debetur. Itaque mulier curri-
 culo in cujusdam tabellionis officium venit , ubi scribæ
 aderant plures. Quorum uni rem narrat, & syngrapham
 tradit. Qua ille perlecta, risus effudit ; ac mulierem ju-
 bet eam sociis ostendere. qui effusissimos item cachinnos
 edidere. Quod mulier admirans , Quid , inquit, isti sibi
 volunt ? quid rident ? atqui, si sedes , & quasi regio ridi-
 culi, deformitas est , non adeo me turpem agnosco , ut
 rideri debeam. Ad pauca ut redeam , ad tabellionem
 mittitur. qui , re perspecta , mulierem fuisse deceptam
 intellexit : Atqui noli, inquit, mirari, si rideris. tibi e-
 nim os sublitum est pulchre. nam inficiator ille qui syn-
 grapham scripsit, nihil in eam intulit nisi sæculare car-
 men Horatii, *Dianam tenera dicite Virgines*. Tum mu-
 lier flere, lamentari , deum atque hominum fidem im-
 plorare. At tabellio , Parce , inquit, fletibus: potius
 Coschinum judicem adi, qui , pro sua auctoritate at-
 que sapientia , aliquid inveniet , quo nebulonis istius
 frans detegatur. Mulier exanimata accurrit , & ad do-
 mum judicis venit, commodum cum ille, litigatoribus
 à præcone dimissis, è tribunali descenderet. accedit, in-
 juriam sibi factam expostulat ; narrat, quemadmodum
 ab inficiatore illo pecunia dotali sit everfa, quam il-
 li mutuam dederat , ut mercimonium ex ea coëme-
 ret ; genus etiam mercimonii , in quo collocata fuif-
 set, exponit ; syngrapham affert , quam deceptor ille,
 cautionis loco , conscripserat. Iudex , re cognita,
 mulierem ludos esse factam pro certo existimavit ; ac,
 sane commotus , bonum eam animum habere jubet,
 & in proximum cubiculum tantisper secedere , dum lu-
 dificatorem illum ad sese arcessat. Mittit igitur , qui
 eum vocent. Venientem humaniter excipit , sedu-
 cit. rogat, quid rerum agat, ut valeat. ut merces, quam
 proxime coëmerat , lucro eum affecisset, interrogat.
 qui, non male sibi negotium sub manus successisse, re-
 spondit. rogat rursus , num mutuam eam ad rem
 sumptum , mulieri reddidisset ? respondit ille, se qui-
 dem

dem mulierem nosse; sed neque illi, neque mortalium cuiquam, nummum ullum debere. tum iudex, prolata in medium syngrapha, quæsit, num chirographum suum agnosceret? non est ausus negare: Sed, quonam, inquit, hoc spectat? Eo, ait Iudex, ut minas septuaginta statim dissolvas. nam, si cuivis alteri tecum res esset, eundem paterer legis præscripto atque ordine agere, teque iudicio non antea damnarem quam legitima omnia conficerentur: sed, quoniam cum Diana & Apolline omnis tecum res est, pedem ex hoc cubiculo non feres, nisi eisdem, quod satis sit, facias. Sed, cum ille clamaret, seque iniquo iudicio opprimi diceret, Iudex, Evocate, inquit, aliquis lictores, qui vinctum hunc abstrahant, & sanctiorem in carcerem condant: atque una operâ rhedæ equos adjungite; nam mihi Rex sacrorum adeundus est, ac de improbissimo istius furto docendus. Tum ille, vinculorum metu adductus, & simul veritus iram Regis, si tam insignis fraus illustraretur, multis cum precibus impetravit à Iudice, ut liceret sibi mulieri satisfacere; ac, missis qui pecuniam afferrent, eandem, cui debebatur, enumeravit.

Hæc cum dixisset, quidam ex eo conventu petiit alte suspirium, atque, Utinam, inquit, talem ego iudicem fortitus essem, non equidem in optima mea causa iudicis iniquissimi sententia succubuissem. Erat mihi lis & controversia cum quodam Laurente de mutuo. Datus est mihi iudex à Prætorè Cratinus, iudex nequam ac levis; iussusque, ut, si pateret, Laurentem mutuam à me pecuniam accepisse, nec restitueret, condemnaret eum. Planum facio testibus, me eidem pecuniam enumeravisse; chirographum etiam illius ostendo. Iudex, rem sibi compertam esse, ac meridiana luce clariorem, fateatur: verum opere me orat maximo, ut ipsum mihi iniquum ejurem. Cui ego, Quid ais? inquam, iniquum mihi illum ejurem, quem mecum sentire videam? non ædepol faciam. At ille, Ita dico quidem, ait; tu age ut lubet. Ego sine metu ac sine cura esse. quid enim dubitarem? res erat facilis; faciebant omnia mecum, jus, æquitas, iudicis voluntas; cum ex improvviso nunciatur, pronunciasse iudicem, nihil mihi à Laurente deberi.

deberi. Accurro; rogo, cur tam iniquam adversus me sententiam dixerit, quem toties in hac causa superiorein esse affirmasset? Audite hominis impudentiam. Iure tibi, inquit, hoc accidit. quoties edixi, ut me tibi iniquum ejurares? Erras, si credis, velle me res meas florentes affligere, ut jacentes tuas extollam. At postea comperi ex iis, qui fuere conscii, ea me iniquitate onerasse, ut ab homine potentissimo gratiam iniret, qui majorem ipsi in modum adversarii mei causam commendasset. Sed, cum judici maxime irascitur, factus est etiam commotior, repentino cujusdam adventu, quem nuper nescio quod volumen de illustribus sui ævi scriptoribus edidisse ajebant: cui, Non te puduit, inquit, ad tot illustrium virorum numerum Iani culcitrarum concinnatoris nomen adscribere? non fuit religio, plebeias idiotæ nescio cujus cantilenas, quæ in popinis, in triviis, in ganeis cantitentur, vel in flabellis describantur, cum tot egregius præstantium virorum operibus componere? fortasse, quia tibi culcitram gratis effecit, dignus visus est, qui in doctorum hominum numerum veniat. Abi, meum nomen ex albo tuorum litteratorum erade: ego operis, quod edidi, exemplaria undique omnia conquiram, atque igni delenda committam: nam præstat indocti & illiterati famam subire, quam una cum Iano ac sui similibus inter litteratos referri. Inter hæc exauditur foris clamor strepitusque armorum, accurrimus, ac duos videmus districtis gladiis unum appetere, à quo se fuisse pulsatos querebantur: ille vero, lancea ex proxima popina sublata, se tueri. cui, dum pugnat, patinæ argenteæ duæ mappa involutæ, & ad zonam alligatæ, solvuntur, ac decidunt. Fit, ut casu sagittarius quidam ignotus illuc perveniat, qui voce puerorum excitatus est, ut sagittis eorum audaciam reprimeret qui uni negotium facerent. at ille, tanquam arcus intendendi causa, sese demittens, furtim è terra patinas sustulit, atque, omnibus ad pugnam intentis, se una cum illis è turba subduxit; nec visus est uspiam. Pugna dirempta, placuit Gallonio & nobis ad portum accedere, ne si ventus constitisset, navarcho in quæstione essemus. Ergo imus. Sed nondum tempestivum ad navigandum mare invenimus.

Quam-

Quamobrem hortatu Gallonii, proximam Cereris edem subimus. Vbi adolescens mulier, quam esse cerritam aiebant, adjurabatur. illa modo se humi sternere, modo hac illac versare, tum ejulatus edere, spumas agere, atque deliramenta ejusmodi quamplurima facere. medicus, curationi præpositus, à septem lemurum legionibus obtineri agitarique eam aiebat. quos lemures certis quibusdam carminibus conabatur de corporis obfessi possessione depellere, Orcumque ire compellere. illi contra obniti, repugnare, resistere: sed demum, tanquam cantionum earum viribus impares, se victos lateri; verum tergiversari, ac dieculam ad egrediendum poscere. medicus negare, terrere minaciis; atque id unum instare, ut discessionem facerent. qui demum, mulieris ore eruptione facta, egrediuntur; ac miseræ, in exeundo, vomitum provocant; qui, neque atram bilem, nec flavam, nec simile quidquam effudit, sed acus, ligulas, funiculos, capillos, unguium præseginina, clavulos minutulos, & quod incredibile memoratu est, digiti pollicis crassitudine, ac palmari longitudine ferreum clavum. hæc medicus diligenter collecta edito in loco collocabat, populo aspiciendi potestas ut esset. eaque mulieri, veneficæ cujusdam opera, in melimelo voranda esse tradita; ac demum, vomitione excussa, unam tantum lemurum legionem secum traxisse narrabat: reliquas cum aliis æque portentosis rebus in ventre mulieris sibi castra munisse: sed fore propediem, ut illæ quoque suis socios vestigiis prosequerentur, quæque adhuc venter intus prodigia concluderet, foras evomeret. Nos, rei novitate attonitis similes, non satis intelligebamus, quomodo melimelum unum tam multas res capere, vel eas mulier prudens, sciens, mandere, vorare, ac mansas anno post integras evomere potuisset. quomodo enim acuum clavulorumque acuminia nihil gutturi, nihil ventri nocuerunt? Quid? clavum illum palmarem utrum minutissimas in partes dentibus divisum atque confectum in ventrem abstulit, an integrum voravit? si divisum; unde ad ferrum comminuendum ea vis erat in dentibus? si integrum; quomodo non est ab eodem strangulata? Sed hunc nobis scrupulum evellit unus, qui

spectaculo aderat. qui quidem, *Quam lepide, inquit, nebulo iste se nobis dare verba putat? ut malus nos asinos, plumbeos, stipites, non homines retur? tanquam si non sit palam, unde portentosa illa defluerint!* quod neque vos falleret, si ejus à manibus oculos nunquam dimovissetis. Etenim ea est præstigiatoribus istis celeritas manuum, ut, nisi admodum attendas, oculorum aciem effugiat. Tum, Tu, inquam, nullas esse cerritas, vel fanaticas, vel lymphatas existimas? Vtinam, ait ille, dii facerent ne essent! sed paucas admodum licet hoc morbo correptas invenire. nam hodie, ut quamque viri sui odium cepit, & alterius cupiditas inquit, cujus potiundi facultas non suppetat, continuo se circumferri jubet pro cerrita. aliis simplicioribus si pes, si caput indoluit, si crus, si femur, si brachium intumuit, si bilis atra tristes cogitationes induxit, statim veteratores isti, qui hoc se artificio tuentur, vel eodem ad suas libidines utuntur, hunc larvarum ac lemurum metum incutiunt, ac pecuniam auferunt, qua Hercules invocetur, vel Ceres placetur, vel olera aut alia ad suffitus faciendos emanantur. alii, libidinosi, sumpta occasione, ad mulierum familiaritates sibi aditus muniunt; virgines ac matresfamilias sæpe nobiles simulatione curationis attrahunt, & si fortuna, vel casus conatus eorum adjuvet, etiam denudant. itaque, per hanc rationem, amores difficillimos atque carissimos sibi conficiunt, sine sumptu, sine molestia, sine dispendio. Vera loquitur vir iste, inquit alius, qui sermonem hunc auribus legerat: & quo magis istorum vobis improbitas testata sit, exponam quod ego hisce met oculis vidi.

Quo tempore eram Regi Alectrio à cubiculo, (hic est Rex vastissimarum earum Regionum longe maximus, atque clarissimus,) venerunt circumforanei ad nos aliquot, cum muliere, in quam multa lemurum millia confluisse jactabant: cœperuntque suggestum, in foro sub regiae domus fenestras excitatum, ascendere. atque ibidem mulier clamare, ejulare, hac illac se agere, in illorum brachia rejicere. illi retinere, Herculem invocare, Cererem, Apollinem, Iovem, ut essent propi-

tii, orare. lemures , injecto tantorum Numinum metu, ne tantulum quidem commoveri ; sed obfesso in corpore, tanquam in arce, majori se præsidio munire. mulier, tanquam si ipsius ore responsa lemures darent, vario linguarum genere uti ; ad interrogata respondere : & in primis affirmare, nullum eorum lemurum ne latum quidem unguem ab se longius discessurum, antequam ipsa Dianæ Daphnitæ ædem attingat ; ipsam solam posse ipsis imperare ut exeant : at si Iupiter veniat, ac duodecim deos plusquam in cælo est deorum immortalium, secum adducat, ultro etiam irrisus ac deceptus abierit. Aberat ea ædes illinc decies centena millia passuum. Tum illi efficacissimis verbis populo misericordiam commovere : mulieris inopiam afferre, cui ne pauculi quidem nummi, qui essent ad ejus diei cœnam satis adessent, ne dum suis opibus tam longam peregrinationem susciperet ; proinde ad eorum opem confugere ; orare ac deprecari, ut miseræ subvenirent, zonam instruerent, ac viaticum ad iter ornarent. At populus sane commotus misereri, accurrere, stipem conferre, illi gratias agere, pietatem laudare ; ac, se multa postridie, ac ceteris deinceps diebus, jucunda de cerrita illa daturus, polliceri ; proinde solita cum stipe parati ad spectandum accederent. Rex, qui rem omnem ex fenestra acceperat, me præsentem, dat cuidam negotium, ut abeat, quærat, investiget, unde, qui, cujus fortunæ, & professionis sint ii, qui cum populo egerant. Ille obtemperans currit, homines adipiscitur, subsequitur clanculum ; videtque, in hospitium ad cauponem divertere. ne multa ; cauponam intrat ; cubiculum, ubi cubent, observat ; alterum eidem adjunctum ingreditur ; & interea, dum illi absunt, terebra satis latum in pariete, qui erat factus è tabulis gypso circumlitis, foramen aperuit ; atque inde cœpit venaturam oculis facere, & aucupium auribus. Illi revertuntur, cœnam poscunt, atque, ut in eos est earum gentium, tradunt se hilaritati jocisque ; cantant, saltant, mulierem mediam arripiunt, sternunt humi, amplexantur. Posthæc cœna venit, apponitur, accubitus itur, estur, bibitur, lætitiæ, hilaritati, lu-

disque non parçitur. Sed , postquam vino epulisque datum est satis , traduntur mulieri ediscenda quæ postero die populo vendituri essent. & quamvis,

Si quid faciendum est mulieri male ac maliciose,

Ea sibi immortalis memoria est , meminisse, & sempiterna :

attamen, quia metus erat, si quid titubatum esset, ne doli aperirentur , coacta est sapius dictata repetere. Tum cœptum est cogitari de somno. Duo erant lectuli seorsim positi, qui, eorum opera, junguntur , atque ex duobus unus efficitur. Illi simul omnes sese commendant. His actis, speculator à Rege missus , satis jam satis rem esse claram existimans, quærendi finem facit , atque abiit, ut Regi, quæ viderat, cuncta narraret. Qui Rex gavisus est se opinione sua non fuisse deceptum. Itaque jubet omnes in carcerem condi, atque , habita quæstione, quæ explorator viderat, ipsorum confessione proferri, & in publicas tabulas referri. qui , manifesto deprehensi, non sunt ausi negare. Genus animadversionis cognoscite , & simul Regis prudentiam admiramini. Imperat his, ut palam in foro, atque ex eodem suggestu, quo populo fucum factum advenerant, palinodiam cantent , & tanquam cornices oculos cornicum effodiant. quod si recusent facere, statim in crucem agantur. Ac, ne saxis obruerentur, undique armatos disposuit, qui vim populi imperumque repellerent. Illi , crucis metu , imperata fecere ; ac postridie Regis jussu exulare coacti , regni ejusdem finibus exceßerunt.

Sed cur abit oratio mea longius, neque se urbis nostræ terminis continet ? nonne hic apud nos deorum immortalium flamines , qua sunt avaritia, lymphatum fere semper aliquem , vel verum vel fictum , ad populum convocandum , precio in ædes sacras inducunt ?

Est in hac urbe Fanum Mercurii, omnium maximum ac sumptuosissimum , cujus erat olim ædituus Alexis quidam, spurcus homo , & flagitiosus. Hic , è numero quadruplatorum deterrimus , ac fœdis puerorum amoribus notus , furti sæpe se alligaverat : præterea decretam semper aliquam domum habebat , in quam , quidquid

quid erat ubique lenonum, aleatorum, perductorum, conveniret; demum, in quam omnes omnium libidines commearent: nemo in eam puer pedem intro ferebat qui pudicitiam salvam inde referret; nemo in eam castus ingrediebatur qui non inde aliquo pollutus flagitio regrederetur. Quibus artibus fiebat, ut omnibus carus in primis existeret. Sed demum à duce lictorum clam veneno sublatuſ est, propterea quod falsum indicium ipsi detulisset. cujus postea Prætorem ac Regem sacrorum participem faciens, quibus id falsum esse constabat, habitus fuerat ab iis vel malignus, quod falsas criminationes, vel indiligens, qui res minus conquistas & exploratas afferret. attamen Dux idem lictorum palam multis audientibus dixit, damnum se hujus impaturo interitu facere, quo exploratore cohors prætoris nullum neque meliorem, neque sagaciorem haberet. In hac igitur æde sacellum est Cereris perantiquum, ferreis clathris septum; maxima antiquissimaque religione præditum, quod lapidem habeat inclusum, in quo sedisse dicitur Ceres, lassitudine victa, cum Proserpinam quæreret. Hunc lapidem ad cerritos expiandos magnam habere vim dicunt. Conduxerat per id tempus Vranius, nobilis pictor, tabulam quandam pingendam, in qua describeretur, quo pacto suæ Dianam Virgines, ex venatione sudoris ac pulveris plenam, sacro amne lavissent. Hunc, die quodam, à mane ad vespertum, vox ex adverso clamantis aures verberavit, qui, completis sacris, & instante jam noctis tempore, nihil de vocis contentione remitteret, sed eandem vehementius intenderet. Sensit Vranius, vocem illam ex Cereris sacello prodire. Confert se illo, atque hominem ibidem inclusum, quid clamaret, interrogat. Qui, Conductus sum, inquit, hodie ab Alexi, quindecim obolis, ut pro cerrito me geram, atque ædem clamoribus & ululatibus impleam: ego ad ravim usque clamavi; neque homo adest cum mercede: & quod molestius mihi est, ventris desiderio differor: quod si cessat venire, & clathros istos recludere, hic profecto alvum educam. Tum Vranius; Ita factò opus est. age, ventrem exonera; & quod egresseris, cum ille venerit, ac te mercede pacta fraudaverit, in os eidem impingito.

Hæc elocutus obticuit. At Paulus Æmilius, Vbi sunt, inquit, qui ajunt, Romæ tantum sycophantas & veteratores inveniri? Quantum audio, ubique locorum moribus eisdem vivitur. Interim veniens à navarcho adolescens, nunciat, fluctus confedisse maritimos, ac statutum eidem esse navim solvere; & ad proximam insulam remis velisque contendere; proinde properaremus venire. Nos dicto audientes accurrimus, & navarchum cum chirurgo litigantem offendimus. qui eum opere orabat maximo, ut se cum aliis vectoribus in navim exciperet. navarchus recusabat, quod plena navis neminem præterea caperet. Gallonius chirurgum rogat, unde tanta hæc navigandi cupido eum incesserit, qui semper à mari abstinuisset. Respondit, patris sævitia contingere, ut patriam sedem exilio permutet, qui ipsum ædibus foras eiecisset. Heri, ut scire vos arbitror, nos, qui vulneribus manu medemur, servi in crucem acti cadaver à triumviris rerum capitalium accepimus, quo ad remedia vivorum incideremus, ac viscerum posituram, colorem, formam, ac magnitudinem pernosceremus. Ego jecur à reliquo corpore avulsum domum attuli, quo omnes ejus partes, fibras, membranulas, quibus adnectitur septo, quod à præcordiis uterum dividit, diligentius contemplerer; illudque jecur rastro cubiculi mei parietii affixo suspendi; & quia mihi erat negocium in foro, discedo. Aliquanto post cum prandii tempus jam præterisset, domum redeo, cubiculum intro, aspicio, neque jecur invenio; quæro ab ancilla, quid eo factum sit, & cur, me absente, ausa sit illud attingere. hinc magnum mihi cum ea litigium exoritur. Quo clamore excitatus pater meus eo venit, & Quid hoc clamoris est? ait. quid vos velitamini inter vos duos? Ego, Propudium istuc, ajo, jecur à me studiorum causa allatum sustulit; neque possum scire, quid eo sit factum. Tum pater, Quid clamore opus est? inquit. ecquid mulier deliquit, si abstulit? Vt tu scias; coximus, ex eoque paulo ante fecimus prandio funus; neque alias esca una palato meo sapiit magis. experire; tu quoque idem fatebere. nam tua tibi pars in arca servatur. Ego, ex ira, vix mei compos, (non enim erat ita facile jecur alterum invenire.)

nire,) Elegans, inquam, facinus fecisti; crucifixi hominis jecur vorasti. Pater, qui nollet hoc sibi dictum, exarsit, ac, Pessime, exclamat; tua causa factus sum hodie anthropophagus. cur non antea dixisti? cur illud clam habuisti? abi hinc in malam crucem, & cave, te mihi posthac ostendas: quod si post vesperum in his regionibus conspicer, frustulatim differam, ac mordicus tibi jecur abripiam, ut cum prandio cœna conveniat. Ego patris conspectum veritus abeo, atque alias regiones persequor. Et, quamvis parce admodum viaticatus sim, facile tamen, ut spero, meo artificio me tuebor. Non si ne horrore & stomacho dicta adolescentis excepimus: hominem tamen risimus, qui se humanis carnibus saturasset. Illum vero bonam mentem habere jussimus. Et nauclerum oravimus, ut in navim reciperet. Qui negavit id fieri posse, si senex ille odiosus veniret, qui, quæ erat superbia, omnes morabatur. Ac dicturus erat plura de hominis insolentia atque fastidio; sed nos ad se Plusius attraxit; qui in crepidine portus lectitabat alteri nescio quod carmen; ac vultu & significatione videbatur eidem applaudere. Qui, ut nos aspexit, evocavit, atque, Audire, inquit, lepidum carmen ab Arido, Virgilio adolescenti missum; qui filius est fratris Vrsati, magni antistitis atque dynastæ; quem nuper extinctum deflevimus.

*O surgens populi spes nova, Virgili,
Vrsatique domus delicia, & decus;
Ut fausto exoriens omine, lucidum
Celi sydus ades, leta micantibus
Virtutum radiis lumina proferens!
Cum natura tuis laudibus obsequens,
Nec parvum ingenium crediderit tibi,
Nec clausum studii finibus unci,
Parva sicut aquam mole coercitum;
Sed magnum, atque potens claustra refringere,
Perque artes varias serpereliberum;
Ceum flumen validum, cum imbris, aut suis
Præpollens opibus, præterit alveum,
Ac per longa vagum rura perambulat.
Nam, centum ingenuis præditus artibus,*

Festinas

*Festinas solida ad culmina gloria
 Magnis pene puer tendere passibus.
 Ecquis non avidis ebibit auribus,
 Quos fundis nitidos pectore diviti
 Sermones, roseo ac nectare fervidos;
 Vel si Pieriis verba liges modis,
 Vel si des numeris pergere liberis?
 Quem grata implicitum compe de non trahat
 Ad sese probitas hac tua, moribus
 Condita egregius, nudaque veritas?
 Cui non mira ferant gaudia, qua feris
 Ludens pulchra moves praelia belluis?
 Sive aprum sequeris, sub jove frigido;
 Seu cervam validis conficis ictibus.
 Nec mirum, à teneris si hareat unguibus
 Vis hac tanta tibi, namque domi pater
 Splendet, splendet avus, qui valet ad chelyn
 Dulcis Trheiciam sistere flumina, &
 Quercus acereis ducere montibus.
 Illis fortis adest & sapientia
 Lali, & Scipiada robur amabile.
 At dum te puerum fingis, & instruis
 Mores ad patrios sedulus, obtines,
 Ut cum jam fuerit fas tibi vivere
 Ævum, sponte tua, propositi tenax,
 Obsistas solida mente libidini,
 Ducenti cupidos in vetitum nefas.
 Sic, qua recta oriens æra verberat
 Pinus, vel tenero cortice fraxinus,
 Cum late foliis fulserit ardua,
 Non imbres metuet, non tumidos Notos,
 Nec flexo feriet nubila vertice.*

Delectavit me mirum in modum carminis cultus &
 nitor; ac, Libenter, inquam, Plusi, ejus exemplum me-
 cum afferrem, si esset ocium describendi; sed, mox dis-
 cessuri, temporis angustiis opprimimur. Plusus humani-
 ter, Habeto, inquit, hoc tibi. nam unde descripsi, sex-
 centa possum exempla depromere. Accipio, & gratias
 ago. At ille eodem puncto temporis demonstravit digi-
 to Philosophum, ex ea familia quæ Minervæ cultui se
 voti

voti religione obstringit. Summa eorum hominum professionis hæc est, ab uxoribus, & ab omni genere concubitus abstinere: unum sibi quorannis ex ipsis, magistri nomine, cunctorum suffragiis eligere, cujus imperio præsto sint ad autum: simili omnes vestitu uti: una cibum capere: nunquam solos, sed binos, ternos vel quaternos incedere: voluptates omnes respuere: virtutes amplecti; eam in primis, qua Minerva se jactat, nimirum castitatem. disciplina à Xenocrate, Platonis auditore, inventa ac profecta existimatur. itaque ob hanc opinionem virtutis, honoris gratia, à cunctis, illis assurgitur, deceditur, & tanquam præsentibus diis honor habetur. iis licitum est, sine maleficii suspitione, in ædes nobilium introire; ad intima eorum cubicula penetrare; mulieres, absentibus maritis, invisere, alloqui, consolari; consilio, opera, & auctoritate juvare. Vnum igitur ex istis nobis Plusius ostendit, atque, Hic est, inquit, ille, qui hodie intestabilis vivit. Quærimus, quid sit hoc. Respondet; Hic est Philosophi illius comes, qui Pamphilam Lysimachi nobilis viri uxorem quotidie adibat, ac, remotis arbitris, solus cum sola multas in cubiculo horas traducebat. Hic vero jejunnus, una cum ostiaria, puella non illepada, in altero cubiculo servabat, ne alius adiret. Sed, die quodam, defessus expectando; puellæ inquit, Dic, obsecro, quid negotii intus isti in cubiculo gerunt? Quæ ridibunda atque hilaris, Quid putas? ait. se mutuo ad castitatem cohortantur. Hæus tu; lolione victitas, an veterno laboras, qui rem manifestam non videas? illi animo obsequuntur suo; & sapiunt, mea sententia: nos vero inertes ac jejuni eisdem excubias agimus: cur idem ad exemplum nos quoque hilares non sumimus dies? Non fuit opus multis verbis, hominem, & ætatis calore, & occasionis illecebris, & mulieris oratione incitatum, ad nequitiam impellere. sed veniebat illi in mentem professionis suæ, & voti, quo se Minervæ obstrinxerat: sed virginem plusquam se sapere existimans, Alii, inquit, Minervæ fidem, in eo, quod promiserint, servant; mihi certum est occasionem tam bonam non amittere, sed ad id vela dare, unde status ostenditur. Atque una opera virgini in gremium illabitur.

tur. Neque id eo tantum die factum est, sed omnibus deinceps diebus, quoties socius in cubiculo clausus navabat operam dominæ. Sed tandem, processu temporis, virgini corpus extumescens, fecit, ut dominus, uxore præsentē, ejus tumoris causam deposceret, & cum res esset palam ac dissimulari non posset, flagitii auctorem exquireret. At uxor, cui plenum erat corpus fallaciarum & doli, quæque nosset, ancillæ dedecus cum ipsius infamia esse conjunctum, iratæ similis, Vide, inquit, os hominis, ut simulat, se nescire quod scit, nec fecisse quod fecit; tanquam sit obscurum ad quem tantum nefas pertineat. tu, improbe, hanc culpam commeruisti. me miseram, non posse me, domi meæ, cujusquam, vel ancillæ, vel liberæ, pudicitiam ab istius injuria defendere! cum hoc me patiar esse in matrimonio, qui domi pellices habeat, & uxoris rem negligat? ideo ne tali viro nupsi, ut hæc videam, & has contumelias feram? Ille, qui sibi esset conscius, nullum à se virgini vitium fuisse oblatum, uxoris jurgio incensus, quo ostenderet, nihil ad se crimen illud attingere, impetum in virginem fecit, ac, Mihi, inquit, indica, cujus sis grvida. Sed, cum illa dissimularet, ne, cum alterius flagitio, dominæ præterea dedecus invidiosa proditione detegeret, ardentius inflammatus, Non potero, inquit, hodie à te verum exculpere? Eductumque pugionem in virginis guttur intendit; & continuo eam se jugulaturum interminatus est, nisi indicaret, qui prior ipsi pudicitiam pepulisset. Quæ tandem, mortis metu adducta, ab hoc viro castissimo se fuisse vitiatam exposuit, dum socium intus cum domina conclusum expectat. Ille, tanquam furiis actus, ad ædes Philosophorum accurrit; magistrum appellat, flagitium in virginem admissum exponit, ac, nisi clamore & conviciis impleri totam urbem postulet, impurum illum tanquam noxam sibi dari contendit, quo ejus supplicio atque cruciatu dolorem suum lenire, & saturare animum possit. Magister suo ab alumno crimen depellere, ac peccare eum largiter dicere, qui tantam Philosopho illi, viro sanctissimo, infamiam creet, quo nemo ea in domo neque frugalior neque castior inveniretur. Ille instare factum: magister negare factum.

Sed,

Sed, cum ille altius vocem tolleretur, veritus magister, ne concursus vicinorum fieret, ac facinus divulgaretur, blandè hominem aggreditur, ac domum ut abeat rogat; se enim rem tantam inquisiturum, neque impunitam dimissurum. Qua ille oratione impulsus paululum iram suppressere, & quoad magister promissi sui summam expleret, expectare constituit. Interim Philosophus, qui stupri fuerat accusatus, magistri jussu, in carcerem conjicitur, & poculum, ubi cicuta vino diluta erat, offertur, arque optio eidem datur, ut vel illud hauriat, quo hausto, horæ unius intervallo vitam amittat, vel testes demetendos exhibeat. Ille, subductis rationibus, satius existimans esse quovis modo quam nullo, testes lubens objecit. Aliquanto post, obducto jam vulnere, magister Lysimachum convenit, rogatque, num de alumni sui innocentia certior sit adhuc. Ille andacter, nihil sibi certius esse, respondit, quam ab homine illo nequissimo fuisse virginem vitiatam: nec posse rem dissimulari. Tum magister; Jam faxo intelligas quanto in errore verferis. Ac vervecem illum venire jubet, & præsentè Lysimacho vestes ponere. Quo factò nudatum genitalibus inguen aperuit. Tum magister, tanquam commotus: Quid ais? inquit, hicne idoneus tibi videtur qui mulieres prægnantes faciat? quem, inde à puero exectum, jampridem ob insignem vitæ innocentiam Matris magnæ antistitem esse creatum oportuit? Tu posthac, cum agitur boni cujuscumque viri existimatio, linguam comprimas, si sapias, nec continuo falsis hominum de illo rumoribus aures præbeas. Ille his præstigiis profecto delinitus est, ita, ut ubi esset nesciret, nec haberet in præsentia quid responderet. Quamobrem, tum judicium, quod Minervæ alumnum invidioso crimine diffamasset, tum uxoris iram metuens, statuit cum ea redire in gratiam, & sibi ipsi non credere.

Adeo delectavit me vafra illæce Magistro familiæ suæ existimationi hominum vindicandæ suscepta ratio, ut non alias magis hominis cujuscumque sagacitas & solertia majorem in admirationem impulerit. Sed Gallonius, Ostendam, inquit, vobis, si vultis, senem illum
muc.

muccidum, qui acetum pro vino misit. Respiciamus, ac videmus senem, siccum, incurvum, rugosum, colore mustellino, capillo subnigro, neque ulla adhuc canicie infecto; qui meretricis de fenestra sciscitabatur, quid ipsi ab illis ædibus deberetur. Merlinus, Aperi, inquit. te mihi est opus conventa. Meriprix, Non est, ait, operæ in præsentia; cum amatore meo sum occupata. Sed continuo Merlinus exclamavit, Redde mihi argentum quod surripuisti, venefica. ego te impudicam, non etiam rapacem, existimabam. Mulier, flocci eum non faciens, abiit, ac frustra litigantem reliquit. At senex nihilo minus clamabat, Redde argentum, impura. nam, nisi reddis, hic te pipulo differam ante ædes. Gallonius accurrit, quærit pro amicitia de eo, quid factum sit, quod ita clamet? Ille, Solebam me, inquit, à prandio, animi causa, in domum istius propudii conferre, ac pomeridianas cum ea horas in lecto traducere. hodie, cum ex consuetudine cum ea jacerem, furtim è lecto desiluit, atque mea ad femoralia recta iter habuit, mihiq; nihil tale suspicanti marsupium eisdem annexum exenteravit; postea rediens, institit, oppressit, ut surgerem, atque amatori cuidam suo, qui maximo sibi usui esset, locum darem. Ego surgo, obtempero, morem gero; abeo; venio ad Ianum, ut paxillulum nummorum, quod de ratiuncula amico debebam, exolvam; manum in crumenam infero, ac nihil in ea relictum invenio; parenticida ista omnem illi animam intertraxerat. sed dum Merlinus infelix crumenæ suæ fatum deplorat, adest, qui nunciat, senem illum morosum, qui erat in expectatione, subita correptum febris lecto teneri, nec, de medicorum sententia, posse tuto mari se credere. Naucerus deæ Febri gratias agens, quod vomitum illum à sua navî removisset, adolescentem medicum, de quo diximus, introducit. Nos, semel, iterum, ac tertio Gallonium amplexati, valere iussimus; & vitam Neptuno commisimus.

L I B E R V I I I.



EX omni hominum numero, qui erant nobiscum in navi, unum omnes adiebant, circumstabant; rogabant, quoniam pacto fortuna ita repente ex summis opibus rede-gisset ad incitas militem quendam, cujus nomen non memini, ex quodam honorariorum militum ordine, cujus ipse auctor extiterat. Etenim in iis regionibus plures ejusmodi militum ordines inveniuntur, qui Y Græcum palliis asutum gestant ex serico, sive albo, sive rubro, sive simplici, sive argento auroque interlito, prout ordinis cuiusque ratio postulat. Rogabant igitur, quamnam sua culpa, tam fortunato homini, ex improvise fortuna terga vertisset. Qui respondit; neque illum fortunam unquam respexisse, neque latifundiis prædiisque locupletatum fuisse, quorum fructus tantos illos tamque ingentes sumptus sustinerent. Sed mirum est, quomodo ita instructus ad malitiam fuerit, ut callidis consiliis ac dolis eam sibi vim auri paraverit, quæ tam diu infinitis ejus sumptibus suppeditarit. Principio cum pedem intro in eam insulam tulit, egens, pannosus, alieni indigens, pane victitabat emendicato ab iis qui, suarum cœnarum reliquiis, pauperum inopiam alunt: cum ecce tibi, ex improvise, auri montes adeptus, ex Iro fit Cræsus vel Attalus; atque ædes magnificentissimas, magna mercede conductas, Attalicis peristromatis ornat; penum, granarium, cellam vinariam instruit; ex honestis hominibus familiam cogit; circumpedes multos varia veste induit; quotidie exornat ample magnificeque triclinium; nullum vas exponit nisi argenteum; Cereales mensas dat, quarum reliquiis catillones se complures implebant. Quid multa? Herculi quotidie sacra fieri existimasses. nummos aureos modio ac trimodio metitur. Rei novitas ad sese omnium oculos attrahit. Spargitur in vulgus, ejus domi aurum effici. Atque hic rumor Regis sacrorum aures attingit. Qui, pro imperio ac potestate, dat Quæstori negotium, ut quærat, investiget, inspiciat, num aurei

K

illi

illi nummi , quibus ille circumfluebat, probi sint, an adulterni. Qui nullam interponit moram , sed una cum lictoribus hominem adit , aurum proferre iubet. Qui alacris profert. Quæstor nummos sumit ; semel , atque iterum , ac sapius inspicit ; ac nihil deprehendit in eis viciis. Miles , quo res clarior atque testatior existat , eorum non parum multos atque omnes duplos , forcipe cædit, quo melius, si quid forte intus fraudis occultetur, appareat ; eosque deinde, tanquam fastidiens, abjicit, & colligendos lictoribus tradit. Quæstor ita discedit , ut eum & copiose ornatum , & omnis fraudis suspicione vacuum arbitraretur. Id Quæstoris arbitrium tantam illi divitiarum opinionem confecit , ut palam omnium ad eum concursus fierent , tanquam ad Midam , ut inaurarentur. beatus sibi videbatur , qui posset illi aurum credere , quod paucis diebus post pulchre sibi sceneratum diceret. Angebat hanc de se opinionem sumptu ac magnificentia , qua eatenus prodibat , ut certis quibusdam anni temporibus , præsertim Aphrodisiis , Veneris honoris gratia , cui ille militabat , puellis aliquot innuptis vestes præberet ; daretque operam , omnibus rebus instructum paratumque convivium ut esset; ad quod non solum summates viri , amicique omnes , sed quicumque vellent , adhibebantur. Quæ liberalitate , in eam opinionem homines adducebat , ut pro certo crederent , auri conficiendi rationem à plerisque tentatam, sed à nemine adhuc inventam , ipsum solum tenere. Neque ipse dissimulabat. nam palam sæpe multis audientibus dixit , in manu sua esse , paucis horis , nullo fere labore , auri massas , quantas vellet , habere. Neque dicto fides aberat. Etenim cum non parum sæpe infiniti illi sumptus, quidquid erat domi , nummorum hausissent , ac ne teruncius quidem unus vesperi superesset , postridie mane aureorum acervi in mensa conspiciebantur. Oris commendatio , & naturalis quædam virtus orationis , non parvam iis , quæ dixerat , fidem conciliabat. ea enim erat sermonis efficacia , ut videretur non posse obsisti. Præterea tantos sibi spiritus , tantam arrogantiam sumferat , ut par esse principibus postularet , summorum Regum oratores præ se contemneret , ac principum

civitatis affinitates appeteret. Qui hac fama impulsus, quod illi Iuppiter de cælo aurum plueret, ultro etiam veniebant, ut gnatas ipsi suas in matrimonio collocarent. Sed ex omnibus conditionibus, Viæ filia placuit, virgo formosissima, & Regum etiam aliquot stirpi annexa. Iamque prope erat, ut in viri manum conveniret; (nam convenerat, ut ne quid ea dotis ad ipsum afferret;) quæque opus erant ad nuptias aderant omnia; conopea, quæ Reges etiam ipsos decerent; rhedæ serico constrictæ, auroque contextæ; varia vestis ac sumptuosa, ad ornatum epheborum atque circumpedum; aliaque id genus quamplurima. In quibus comparandis æs alienum grande conflaverat. Quod ubi virginis matri oboluit, (est enim ea sagacitate, ut decipi non possit,) continuo, ex ipsa re, incidit suspectio: Hæc æs alienum contractum, argentum scænorum sumptum, credita pecunia res emptæ; non cohærent, nam si fontes auri nosset, ut prædicat, nulla versura, sed præsens pecunia, ad res emendas adesset. profecto hujus magnifica verba, ni fallor, aliquid doli alunt. Atque ab hoc suspicionis aditu ad ejus doli cubile ita pervenit: creditores militis vocat; quid de eo suspicetur, exponit. dat illis consilium ut prætoris decreto, tanquam si non sit solvendo, & fugam adornet, eum abripiendum in carcerem current. nam, si hanc contumeliam tam insignem in se accipiat, neque argentum promat quod illis persolvat; manifesta res est; hic merus est sycophanta. Illi consilium laudant, gratias agunt. Curriculo ad prætorem eunt, desiderium suum exponunt. Ille, cui militis insolentia erat invisæ, ejusque immoderati sumptus suspecti, nihil illis est ausus negare; sed jubet, ut ante noctem in vincula conjiciatur, nisi vel debitum integrum solvat, aut satis vel cauto det. Itaque ille miser lictorum turba circumfusum se antea videt, quam aut id leviter odorari, aut aliqua ad ipsum permanare potuerit; præsertim cum animum attendisset ad cavendum. neque, ut socors & ignavus, se in eorum potestatem tradit; sed, educto gladio, conatus est ferro viam sibi munire ad fugam. sed frustra. nam à duce lictorum percussus in capite, coactus est consistere, seque constringendum ab-

ripiendumque in carcerem tradere. ubi paucos post menses, ex animi ægritudine, diem obiit supremum. Sed compertum est postea, nullas illi nuptias cordi fuisse, unde enim uxorem, eo præsertim genere ortam, cum tanta familia aleret, cui nihil erat in terris ubi in suo pedem poneret, neque aliud aurum vel argentum conficeret, nisi quod dolis atque fallaciis ex aliorum crumenis exprimeret? sed, solum, inquam, fuisse propositum, per simulationem nuptiarum, alios usque ad vivam cutem auro tondere, & in primis mercatorem locupletissimum magno adamantium numero circumducere, qui omnes erant talenta auri ad quinquaginta. à quo si clam, precario, vel simulatione emptionis, potuisset auferre; celocem habebat paratam, qua se in patriam reciperet, ac fuga rem solveret. Sed in primis ad eos avertendos, usus est occasione conjugii atque nuptiarum. nam ideo se velle eos emere agebat, ut in veste uxoris Phrygio opere elaborata illigaret infereretque. Itaque frequenter ad domum mercatoris venire: phrygionem etiam cum particula quadam ejus vestis adducere: unumquemque adamantem in manus sumere, inspicere; experiri, num oculis in phrygio opere relictis convenirent: dicere jam diem nuptiarum appetere: sed neque precium solvere, neque certam solutioni diem præstitueret; unum instare, de tradendis adamantibus, vehementissimeque contendere. Mercator, qui eos invitus non haberet; Ne numquam quidem, inquit, ex his potest à me quisquam auferre, nisi præsentem pecuniam. Ille elate magnificeque, ut consueverat, loqui, ac, Tu mihi, inquit, formidas credere? cui alii sexcenta tanta soli enumerarunt, neque sunt decepti in eis. neque est alter hodie quisquam, cui æquè recte credi homines putent. an nescis, quod mox possum te auro totum obruere? Scilicet ita res est, mercator ait; non possunt aliter à me auferri. Tua isthæc magnifica dicta hinc aufer. nunquam enim me hodie inducent ut tibi teruncium credam. At miles, ubi fidem suam sic concidisse animadvertit, continuo despondisse eum animum ajunt.

Tum unus, qui sermoni intererat; Miles hic astu maliciaque victus est, inquit, à Geta, qui anno superiore ex

ultimis ac remotissimis orbis terræ partibus in eam insulam, unde solvimus; venerat. Hic captus amore Philargyriæ, Agathonis clepsydrarum artificis uxoris, munera illi miserat, armillas, periscelides, torques, inanes, anulos. Quæ omnia ab aurifice amico suo mercede conduxerat. Sed cum jam suam ex ea libidinem expleisset, ac pertæsus mulieris avaritiam esset; rationem excogitavit, qua ea, quæ dederat, eodem unde venerant reverterentur. Quæ sane ratio feliciter cessit. Venit die quodam ad mulierem domum, perturbato similis. Quem illa continuo, quid tristis sit, rogat, quidve turbatus? Quia, inquit, mihi litigium fuit cum aurifice, unde emi aurum, quo te donavi. Qui quidem insanit de precio, neque quidquam pudet. & quia scit, illud ad te advolasse, neque me posse reddere, litium terrore ad suas conditiones conatur attrahere. ac modo, se mihi dicam scripturum ait; modo lictores & carcerem minitatur. denique multis modis ferox est, atque acer. Sed vin' tu facinus lepidum, quo oculi illi doleant, facere? redde aurum, quod dedi, ut sibi habeat; ita enim illum probe ulciscemur, si ea iterum venalia sit habiturus, quæ jam se vendidisse crediderat. tu interim hanc syngrapham collybisticam cape, nuper ad me domo allatam; unde talenta bina statim accipies; quæ vel in novis ornamentis, vel, si magis libeat, in fœnore collocabis. Mulier, quamquam astutia atque malicia infra se alias omnes longo intervallo relinquat; attamen, majoris spe lucri, barbari hominis consilio superata est: & continuo, accepta syngrapha, data omnia restituit. Quibus ille acceptis, & aurifici, qui locaverat, redditis, velis remisque contendit in patriam. Mulier vero decepta, talenta illa in somnis exegit.

Dnm nos mulieri catæ ab homine externo tam pulchre os sublitum fuisse ridemus; ecce tibi lembus contra nos remigio contendit; neque aves, neque venti citius. Vbi, cum abesset à nobis propius, hominem inter lictores quatuor medianum & catenis vinctum aspiciamus. Qui statim à navarcho est cognitus, atque, Apollinis ædituus, inquit, à fuga retractus, ad iudicium, vel ad supplicium potius, attrahitur. Nos, vicio humani ge-

neris , incendimur studio cognoscendi ab eo , cuiusnam rei capitalis affinis inveniretur ? Qui non invitus huic nostræ cupiditati morem gessit. Atque , Hic , inquit , ædituus ingenuum formosum puerum , qua est in his rebus cupiditate , ad insaniam adamabat ; ac tundendo atque odio dabat operam sedulo , ut in cubiculum suum perduceret. sed non poterat perficere. nam puer , gnarus qua de causa arcesseretur , novas semper causas fingebat ne veniret. At ille , libidinis æstu tanquam furis actus , hanc excogitavit rationem , qua ad se vel invitum attraheret. Erat puero in deliciis accipiter , ita ab eo assuefactus , ut , missus in sublime , ad ipsum eum præda in pugnium reverteretur. Hunc , dum puer domo abest , ædituus ad se deferendum curat. Itaque mittit , qui pueri verbis eum sibi dari efflagitent , quem dicant in proxima urbi villula aucupio operam dare , ac vehementer avem illam cupere in prædam emittere. Familiares , qui nihil suspicarentur , sine mora dederunt. Puer domum rediens , neque accipitrem videns , quid eo factum sit , rogat. Illi datum esse ajunt homini missum à se ex proxima villa , ubi aucupabatur. Ille clamare , ac flens dicere ; Nullam à se villam inspectam , nullum aucupium institutum , nullum hominem missum. sed ubiubi est , diu ille celari non poterit. nam omnia odorabor , omnium ædes interrumpam , inspiciam , omnes in eis angulos perlustrabo. Sed quærenti fit obviam ædituus. Qui , Scio , inquit , quid quæras. sed quærendi operam luci facito ; meæ domi tuus est accipiter. veni , sis ; nihil est in me moræ , quin statim accipias. Puer , cui nihil longius videbatur , quam dum accipitrem suum recuperaret , sine alia cura ædituum præeuntem sequitur , ejusque cubiculum intrat. Ille statim pessulum ostio obdit , ac misere multis precibus , blanditiis , ac promissis puerum , ut sibi sit inorigerus , orat. Quæ audiens , vix tandem misellus ille in eas se plagas induisse cognovit , quibus nihil antea æque metuerat ; ac multis cum lacrimis orare hominem caput , ut sibi haberet accipitrem , tantum abeundi potestatem faceret. Ædituus eum modo promissis lenire , modo minis terrere , quo sibi obnoxium redderet. Sed ; cum nihil proficeret , ad vim confugit :
ac du-

ac duplex telum exeruit ; atque , Vtrum , inquit , vis , elige . nam , velis , nolis , alterutrum tibi excipiendum est . Horribilis ejus facies fecit , puer animi ut incertus foret , utri necandum se traderet . non enim satis erat exploratum , unde levius esset vulnus accepturus . Sed , dum deliberat , venit ædituo ab ejus fani antistite nuncius , ut relictis rebus omnibus curriculo ad eum contendat . esse enim ipsi opus eo convento . Qui vocatus accurrit . Puer vero solutus omni periculo , diis gratias agens , sine accipitre domum revenit ; ac vix sui compos , ex metu , patri rem omnem , sicuti gesta erat , exposuit ; ac , Nisi , inquit , bonus ille antistes , quamvis nesciens quid boni ageret , subvenisset , filio tuo discisso disruptoque funus hodie curasses . Pater ira percitus ad antistitem venit ; æditui flagitium narrat ; ac primum diis , tum ipsi , se vitam filii referre acceptam ait , quæ impuratum illum accersiri jusset ; secus enim ille cruciatu maximo peremptus apud mortuos esset . Antistes , æditui sui nequitiam ferens indigne , amicissimis verbis à se hominem dimittit ; & simul se curaturum spondet ; ne qua in posterum filio ipsius ab illo oriatur injuria . Neque expectavit dum ira defervesceret ; sed statim ædituum ad se accitum , ut par erat , objurgavit ; jussitque ut statim , atque accipitrem ad puerum retulisset , urbe illa , atque adeo tota insula , ante noctem excederet . Qui dicto audiens , sed plenus iræ ac malevolentiae , ad pueri domum venit , commodum cum pater abesset : eumque ab ostio provocat foras : sed casu tum puer torminibus excruciatum , lectuloque affixum , prodire non potuit . At ille accipitrem ancillæ cum redderet , cultrum , quem sub veste contexerat , profert atque , Hic , ait , illi totus intra viscera excipiendus fuerat , si prodidisset . ejus enim causa hinc exul ejicior . Ac statim deinde pateris , patellis , urceis , phialis , acerris , argenteis omnibus , quibus Apollini sacra fiebant , convasatis , clam in proximam atque huic imperio subjectam insulam fugit . Vbi in patella ferrea , à caupone , apud quem diverterat precario accepta , vasa illo sacra comminuit , ut ad ignem eliquata in unam argenti massam redigerentur . Sed vix ignem sensere , cum

streptus, crepitus, sonitus, tonitrus, subito, propere & valide tonuit, ita ut ædes ruere viderentur. Accurrit caupo, & familia ejus tota, ac patellam illam, ad ignem appositam, cum frustulis illis vasorum, & sacrilegum illum, eo crepitu ad terram abjectum, aspiciunt. Sublatum magistratibus tradunt. A quibus in custodiam datus, jussus est de vinculis apud ipsos causam dicere. Nunc vero ad antistitem fani, quem expoliaverat, mittitur, ut ibi de eo legibus judicium fiat, vel potius, ut de confesso supplicium sumatur. Audierat hæc quidam, quem ex supercilio, quadam quasi nube obducto, promissaque barba, ac dentibus attris, esse sapientem intelleximus; qui, suspirio alte petito, hæc contra lascivos amores verba fudit sapientia,

Hei, mihi quis numeret qua fert non sanus amator?

Ah, gravis interdum mors venit atra minus.

Sape sibi misero sua gaudia luget adempta,

Sape dolet lasam conqueriturque fidem.

Solane mortales, inquit, perjuriam mentes

Versant? ah, nullum crede fidele caput.

Tamne cito fugiat, venit qua sera voluptas?

Tam fixus tristi sit mihi mente dolor?

Vera quidem memorat, duro est de marmore damnum;

Sed bona de fragili dixeris esse luto.

At tibi si placeat stabilis simplexque voluptas,

Illæ est at hæc sola vocanda locis.

Vel si par petitur, similisque in amore, voluntas,

Mens est in facili tota locanda Deo.

Mutuus inde potest contingere pectoris ardor:

Cetera sunt tacitis insidiosa dolis.

Et nusquam nisi vera trahes solatia calo,

Gaudiaque impuris non violata notis.

At qua pulchra nitent, mutatos reddere vultus

Tam cito cum videas, nec tetigisse velis.

Lubrica sunt, moneo. liquidoque similissima calo,

Quod nunquam nitido jugiter ore micat.

O quoties subito nigra caligine claudi

Est visus, fuerat qui sine nube, dies!

Quam multos videas latos tumidosque secundis

Rebus, post liquido rore rigare genas!

Fortuna celeri versamur turbine, vasto

Navis ut in pelago, dum furit aura Noti.

Nam modo, quæ saliens feriit vaga sydera, puppis

Tartara præcipiti tendit ad ima pede.

Quam sæpe aurata conspectus nuper in aula

Cogitur in viles pauper abire casus !

Nulla fides igitur sit inanibus addita rebus ;

Quæ permixta malo damna pudore ferunt.

Ingeniique bonis securus nitere. namquæ hæc

Firma manent ; mutant cætera sæpe vices.

Dumquæ licet, pulchris animum virtutibus orna,

Innocuos peragens & sine labe dies.

Sed longas ne nocte moras. nam diffugit ætas,

Et properans nigro mors venit atra pede.

Ac tibi post tardum incutient tua damna pudorem,

Et mage, si feriat conscia corda, timor.

Si redeant votis acti male temporis hora ;

Quæis superos precibus sollicitare velim,

Redditus ut mihimet, commissa rependere damna,

Spesque simul nitar sumere mente novas,

Tuque vaces culpa ? Memori si mente recurras,

Præsentem nobis semper adesse Deum ;

Et superesse novos post ardua fata labores ;

Infernasque domos ; Tisiphonemque feram ;

Sævæque terrificis horrentia monstra colubris ;

Nigraque sulphureis ire fluentia vadis ;

Æternasque oculis lacrimas sine fine cadentes ;

Quæque nihil frangunt pectora dura, preces ;

Præclusamque viam miseris, nomenque salutis,

Quod rigido fixæ stent adamante fores.

Tunc tibi, nec noceant oculi crinisque puella ;

Præstinguatque aciem nec male fultus honor.

Quin si fœdus amor cervicibus hæreat, ultro

Captivo retrahas libera colla iugo ;

Turpibus ac niveo pulsus è pectore flammis,

Non tibi post simili ferveat igne secur.

Videbatur fuisse plura dicturus, nisi orta inter nautas rixa omnem ab eo concionem avocasset. Nam cuncti eam sedatum ierunt. Itaque à corona relictus obticuit, neque inceptum carmen, & ad finem laborans, absol-

vit. Nos vero soli in stega relictī, occupamur ab uno ex illis philosophis, quos Minervæ castitatem suam dicasse supra commemoravimus. Cujus si faciem aspexisses, quantivis tibi precii visus esset. ea enim illi in vultu severitas inerat, ea in incessu gravitas, ut Socratem vel Xenocratem, aut aliquem ex veteribus illis Philosophis dixisses, qui incredibili robore animi & continentię indole præditi, respuerunt omnes voluptates, & directum ad virtutem iter habuerunt. Hic nos, inquam, aggreditur, ac salvere prior jubet. Tum, Novi vos, inquit. nam sæpe vidi ire una cum Gallonio in via. Sed quid vobis venit in mentem, eam urbem relinquere, qua non facile est in toto orbe terrarum invenire alteram neque venustiore, neque deliciis pleniorē? omnino Amor, Voluptas, Venus, venustas, gaudium, ludus, jocus, ibi habitant, & amoenitates suas exercent. Quantarum misero mihi ab ea per vim avulso voluptatum distractio, dissidium, vasticies venit! Cum me ab ea sejunxi, & in navi pedem posui, sensi partem mihi viscerum inearum abrumpi. Sed fieri aliter non potuit; superioris jussu urgebat; obsequendum illius mori atque imperiis fuit; qui me in proximam insulam, sectę nostrę propagandę causa, & in primis castitatis amorem in hominum animis frequentibus ad populum concionibus inserendi gratia, mittit. At vobis, quantum intelligo, ad indagandas percipiendęque voluptates dux defuit. nam si me magistrum adhibuissetis, in quas vos ego regiones voluptatum deliciarumque deduxissem? Sed facere non possum, quin signa & notas locorum indicem; quibus cognitis, si vos illuc iterum redire contingat, velut aurum, innumerabiles voluptates ipsi vobis fodere, & nullo errore invenire possitis. Facite igitur, ut memori hæc animo dicta inhæreant. Sed fugit memoria, nisi litterarum præsidio retineatur. Habetis hic tabellas & stylum? Minime, inquam. sed habemus pugillaria. Recte ait. Scribe igitur. Si vos meritricum munditię capiunt, Clæretam lenam in vico Tusco adite. ea ad vos puellarum greges adducet; atque eas siccas, succidas, quam lepidissimas, quam adolescentulas maxime; & quod refert, minime vulgo pollu-

polluctas; ac tam multas, ut quotidie conditiones mutare possitis. At, si virgines vos delectant magis, in foro boario Phanostratam petite. ea semper bolum aliquem habet domi sepositum, quem vobis advenientibus objiciat. Vel, si inveneritis vos ipsi quod ametis, in ea re utilitatem faciet, ut cognoscatis suam. nam ea eloquentia est, ut vel virgines Vestales possit ab earum septis abducere. Verum, si nuptæ nobiles cordi sunt magis, non est discedendum in hoc genere ab Angello nostri ordinis. ille solus quantum est ibi matronarum habet in potestate. ac vobis indicabit, quali unaquæque earum sit pede, quo femore, quibus brachiis, clunibus. nam quamvis summe officiosus sit, æque tamen sui meminit; neque mulierem fere aliquam alteri utendam exhibet, quin sibi quoque usurariam faciat. Ille igitur, honoris mei gratia, summo genere, summaque pulchritudine matronas dabit, quibuscum voluptates inmaximas capiatis. Sed distrahit me à vobis debitus Minervæ majorum gentium numini à nobis cultus, quo deam quotidie certis quibusdam precibus veneramur, ut sit propitia, neque castitari, quam profitemur, maculam aliquam aspergi permittat. Abeunti Paulus Æmilius, Grates tibi, inquit, agimus. &, si ea nobis repetenda urbs sit, in illo tam vasto deliciarum mari, quod prædicas, imperiti ac rudes, cum eo, quem ostendis, cortice nabimus.

Sed, eo ab oculis amoto, unus, qui furtim ejus dicta sublegerat, O tempopa! inquit; ô mores! en cui tuas mulieres credas! en cui tuos liberos in disciplinam tradas. iisdem enim præceptis teneras illorum mentes effingit quibus vos conatur imbuere. & hic homo tam continens ad exterarum nationes laudator castitatis publice mittitur! quem, cum dicere cœperit, concio tota, tanquam è sinu Minervæ delapsus, aspiciet; eo impetu, eo ardore animi, ea gravitate verborum sententiarumque, libidinis vitia persequitur. sed, simul ac peroravit, si virginem, vel nuptam, in quam lascivire possit, offendat, statim re ipsa ostendit, quænam sua ipsius sit de rota hac re voluntas atque sententia. Angellum vero, quem nominat; pudet dicere nefanda ex sese
quæ

quæ dedit. nam, quod fecit flagitii, potest populo viri-
tim dividi. quam multis ille matribus familias pudici-
tiam expoliavit! quam multis probrum castis, labem
integris attulit!

Ac sermonem longius protraxisset, nisi interpellatus
fuisset faustis acclamantium vocibus, Euge, evax; venit,
venit. Nos caput attollimus, ac triremes ad triginta ce-
leri adversus nos cursu tendentes aspicimus. Hæ dice-
bantur Parthenium dynastam vehere, virum principem,
omnibus naturæ fortunæque bonis cumulatissimum;
qui, non ita multo ante in eum ordinem allectus, venie-
bat, ut una cum aliis dynastis Remp. illam capefferet.
Ingentes viri principis virtutes, nno ore ab omnibus
summis in cælum laudibus elatæ, injecerunt nobis cupi-
ditatem ejusdem non nâvo aliquo, sed corpore, ut dici-
tur, omni cognoscendi. Ac certatim unusquisque huic
nostræ cupiditati conabatur occurrere. Sed unius tan-
dem aptior ad hoc munus eloquentia vicit. qui, Si ve-
lim, inquit, omnia, quæ de eo dici possunt, exponere,
dies me antea deficiat quam oratio. atque in demortui
dynastæ locum suffectus, plus illi ordini splendoris at-
tribuit, quam ab eo ipse acceperit. nam quamvis locus
ille æque summis atque infimis pateat; nec magis dyna-
sta sit qui ex summo loco, quam qui ex infimo in eum
ordinem venit, attamen laude & gloria præstat alius a-
lii longissime. Hic ex longa planeque innumerabili Re-
gum maximorum serie ortus, in ipso ætatis flore, & in
summa rerum omnium affluentia, legem sibi ipse indi-
xit innocentiae, virtutumque omnium. atque, si, detra-
ctis omnibus viciis, fingendus nobis sit omni laude cu-
mulatus dynasta, hic profecto quasi forma est & chara-
cter eorum, &, quemadmodum nihil est tam in aliquo
genere perfectum, quin perfectius sit id unde il-
lud, tanquam ex ore aliquo, quasi imago exprimi-
tur: ita etiam, si quis sese ad ejusdem vitæ similitudi-
nem formet acingat, longe infra ejus excellentiam in-
veniat. Nullæ latent in ejus animo ad occultandas in-
sidias latebræ, nulli recessus, nulla sunt illi ad deci-
piendum instructa in corde consilia, nulla infusata ma-
levolentia, vel assueta mendaciis, vel fucata, vel fallax,
vel

vel erudita artificio simulationis ratio inest. Pietatem, religionem, justitiam, sua sponte, non quæstus, aut commodi cujusquam gratia, colit. Præterea præstat ingenio, eruditione, doctrina. Domus ejus litteratorum hominum frequentia celebratur; ita ut quædam velut officina sapientiæ existimeretur; ubi statim ex omnium ingeniorum flore Academia excitabitur; quorum doctissimis sermonibus, qui harum politissimarum artium studio tenentur, mirifice delectentur, atque proficiant.

Sed attentos nos interpellavit subitus nautarum cachinnus ac sibilus; quos navarchus, vir prudens, qui sciret quid riderent, acri castigatione compescuit, ac tacere jussit. nam, cum respexissent, triremes quatuor viderant, quæ dynastas aliquot in regnum Geryonis reportabant, unde ad Regis sacrorum comitia velis remisque contenderant, persuasi à mathematicis, qui ex positione astrorum prædixerant, intra paucos dies Regem, qui tum rerum potiebatur, orco destinari. sed, cum vidissent, mensem ab ea prædictione jam elapsum esse, neque spem aliquam ostendi, ut apud inferos Regis dicam ex urna Minos educeret, tristes, nec sine risu, eodem unde discesserant, revertebantur.

Verum amcenitatem, festivitatem, lætitiæque exercentibus ceteris, unum aspiciebamus, seorsum ab aliis, tristem, capite denüsto, tabulatum obtueri. Paulus Æmilius, sive misericordia, sive vitio hominum qui ocio diffuentes aliena curant, eum adiit, rogavitque quid tristis esset; cur, aliis in lætitiæ effusis, frontem contraheret, aliorumque lætitiæ velut oppederet? Qui, Hanc, inquit, mihi tristitiam bellus creât affinis meus, qui sororem mihi suam in matrimonio collocavit. nam cum domi meæ dotem enumerasset, quinquaginta videlicet minas, mihi dat virginem in manum. ego, tum ejus quamprimum potiundæ desiderio incensus, quia forma non mala est, tum etiam, ut concubitu firmiores eas nuptias efficerein, cum nova nupta me in cubiculum abdo, atque ociosus ab animo argentum ibi enumeratum in mensa relinquo. at bonus ille vir, interea dum me intus cum ea oblecto, sublato argento, clanculum se ab ædibus foras ejecit, nihilque mihi reliquum fecit nisi plorare.

plorare. eo nunc in proximam hanc insulam, quo profugisse eum ajunt, ut lege judicioque quod mihi sublatum est persequar, vel potius, ut prædoni illi animam adimam. Cui Paulus Æmilius; Næ tu flagitiose stultus es, ait, qui alteri malum pro bono, injuriam pro beneficio rependas. tunc satis pro merito gratiam illi refferas, qui tibi uxorem, placidam tanquam ovem, reddidit? non enim, dote freta, ferox esse in posterum poterit; sed te in domini loco verebitur, inेतuet, atque omnibus tibi in rebus morigera erit. Deme igitur supercilio nubem, teque una cum aliis hilarem præbe, ac, si me audis, domum revertere. nam, si uxor tibi forma est luculenta, ut dicis, cum illic sint voluptarii ac locupletes tam multi, manipulatim munerigeruli ab illis convenient.

Sed, cum maxime miserum illum consolari conatur, prodit alter, æque tristis; atque, Huic, inquit, dos, mihi uxor est elapsa è manibus, neque, postquam fugit, inveniri uspiam potuit. uter ergo nostrum miserior vivit? Cui Paulus Æmilius; Ain'? fugit? at eam diligentius tuis propinquorumque tuorum custodiis asservatam oportuit. quod si fecisses, non eam nunc lugeres amissam. At ille, Nimis quidem eam arcte habui. nam, & quod misere amabam, & quod crebræ adolescentium quotidie præter ædes meas itiones reditionesque suspectam mihi reddiderant, ne latum quidem unguem pedem domo sinebam efferre; neque Argus ita vaccam à Junone sibi commissam custodiebat, ut ego eram oculatus in mea servanda. Cujus rei facultatem meum mihi artificium dabat. Etenim coquus sum, ex eo genere, qui nunquam eunt foras coctum, ut ceteri. sed domi, quod mihi affertur, curo, atque ita suavitate condio, ut placere etiam mortuis possit. quamobrem nunquam mihi opus deest. Verum proximis Cereris vigiliis à me opere petivit maximo, ut se in ædem Cereris ducerem; atque ita apte elocuta est ut persuaserit. Itaque circiter quartam noctis vigiliam surgo, Vulcanum in cornu includo, atque, ut me præeuntem sequatur, jubeo. Imus, atque angiportum sordidum ac lutulentum intramus: sedulo eam moneo, ne luto vestigia defigat, atque, Leonica, inquam, (id est illi

illi nomen,) cave lutum, cave lutum, Leonica. Respi-
cio ; sed Leonica jam è conspectu evolarat. Ego exani-
matus accurro, ut euntem persequar. sed nugæ: noctis
enim beneficio occultatam assequi non potui. Nihilo
magis tamen quærendi labori vel operæ parco, (nimis
illa quidem cordi cara est meo,) sed perrepto totum op-
pidum, ad ædem Cereris, ad ædes amicorum, propin-
quorumque, quo non? Nunc statutum est mihi, cir-
cumjectas huic imperio insulas omnes eam quæsītum
adire, neque antea quærendi modum facere, quam in-
veniam, inventamque mecum domum reportem. Tum
P. Æmilius; O stulte, inquit, quereris, te fuisse mole-
stia ac sumptu levatum? Quod si ægre tibi illud est ta-
men, quod careas uxore, summaque in ea voluptatem
ponis; reddē huic dotem, quam à tua acceptam retines;
tu vero suam ab eo uxorem accipe. nam, si sapit, remit-
tet tibi istam voluptatem, & ea se carere patietur. ita
utrique vestrum, quæ optat, evenient; illi dos, tibi uxor.
Valete.

Interim ex alto procul insula illa conspicitur, unde
ædituum ex fuga retractum esse narravimus. Placuit na-
varcho, illuc navem appellere, ut vinum, quod ibi
præstantissimum nascitur, emeret, & in navim impo-
neret. Accedimus, portum intramus, ibique adole-
scentem vita functum audimus, qui dynastæ Vio fue-
rat in amore atque deliciis, quique ex maximis divi-
tiis, quibus ab eo fuerat locupletatus, sua stultitia, ad
summam sese inopiam atque egestatem adegerat. De
hoc adolescente narrabant, cum olim ejus dynastæ,
quem diximus, domi honorarios inter ephebos alere-
tur, ac propter summam ejus superbiam insolentiam-
que ferri non posset, jussu esse domo illa egredi, &
in malem rem, quantum potest, abire. Itaque ab om-
ni ope desertum se in patriam recepisse. Vbi, cum ne-
que arrogantia, neque insolentia desisteret, sed nova
quotidie designaret, raptum fuisse ajæbnt in vincula.
Sed ea, solita audacia, rupisse, ac rursus ad dyna-
stam ex fuga venisse: egisseque per amicos interpre-
tes summates viros, ut, honoris ipsorum gratia, apud
illum

illum in veterem amicitia gratiaque locum restituere-
tur : quibus dynastam audacter respondisse , se quidvis
antea passurum , quam talem domi suæ virum habere :
tum demum illum, de hac spe dejectum, novam tentare
fortunam, novasque amicitias experiri constituisse ; at-
que eadem opera lembum conscendisse. Sed operæpre-
cium est, intelligere , quemadmodum Neptunus , qui
nosset, fortunam, quam ille quæreret , esse in ea terra
quam linqueret , eum à mare repulerit. Evolarat jam è
conspectu lembus, ventis operam dantibus: cum Neptu-
nus iussit Æolum receptui canere, ac ventos navigationi
illi secundos contrahere, vinculisque constringere , ad-
versos autem solvere, qui mare commoverent , eodem-
que, unde solverat, lembum impellerent. Ille, Neptuni
imperii obsequens , ventos illos è carcere eductos im-
misit in mare. Sed vix eruperant , cum , impetu facto,
lembum invadunt, ac versoriam capere , seque ad reli-
ctas regiones recipere cogunt. Ad litus igitur ejectus, e-
gens, ac pene pannosus, quam spem aut opem, aut rebus
suis consilii quid capefferet , non habebat. Aberat illis
diebus dynasta Vius, ac villarum suarum amœnitatibus
fruebatur. Verum aderat Styliolus adolescens , qui tum
temporis apud dynastam illum plurimum auctoritate &
gratia pollebat. (nam eximium semper aliquem habuit
ignavum, inertem, sine gente, sine nomine , cui præmia
rei pecuniaria magna tribueret , locupletemque ex e-
gente, neque tam dicto audientem , quam sibi imperan-
tem, efficeret.) Sperabat igitur , si commendaticias eo
ab adolescente ad dynastam litteras accepisset, fore sibi in
proclive quod cuperet. Itaque astute ac maliciose ho-
minem adiit ; atque his verbis alloquitur : Emanavit in
vulgus, commeneruisse me culpam, quam propter dynasta
me domo foras ejecerit ; idque magnam ea res mihi of-
fensionem & contemptionem apud omnes attulit. Oro,
obsecro, ut mihi subvenias, & conceptam hanc nomini
meo maculam deleas, quæ omnes cogitationes , omnia
consilia, omnes spes meas evertit. Te deprecatore , dy-
nasta nihil denegare cuiquam audet. Scribe ad eum , ut
mensum unum, neque eo amplius , me suorum familia-
rium loco ac numero habeat, quo elapso, ipse me pro ex-
puncto.

puncto habebō , ac , si per te licebit , quasi ab eo exau-
ctoratus , tuam in domum , tanquam in aliam militiam ,
transibo , tibi que famulus serviam . Homo ventosus , glo-
riarumque plenissimus , gloriosum sibi fore putavit , si
palam fieret , homines , dimissa dynastarum familiari-
tate , quod apud eas gentes honestum in priinis existi-
matur , in beneficio & gratia suam appetere . Itaque in-
flatum accipit ; atque ad dynastam litteras dat ; in qui-
bus hæc omnia exponit ; & majorem ab eo in modum
petit , ut exorari se sinat ; & adolescenti animum ex-
pleat ; nihil enim sibi gratius posse accidere , quam ut
adolescens intelligat , se ab eo tantum amari quantum
ipse existimat . Ob signat litteras , atque adolescenti tra-
dit . Qui statim ad dynastam refert ; qui tum ruri erat ,
ut diximus . neque dubitavit , æstate summa , meridie ip-
so , duodecim millium iter pedibus facere . Dynasta , lit-
teris lectis , ac vehementi illa commendatione expu-
guatus , exclamat , Vincat ; dummodo sciat , eum , quem
commendatum tantopere cupiat ; quandoque suis rebus
exitio futurum . Neque ita multo post cœpit omnem il-
li honorem habere ; videlicet , ceteris , ut mos est illa-
rum partium , honoris ergo aperto capite coram ipso
stantibus , soli innuere , ut se tegetet , soli sua consilia cre-
dere , soli rerum suarum fidem habere , soli res omnes ,
quibus aliqua inesset utilitas honorque , mandare , illum
in oculis ferre , solum adhibere convivam sibi , solum
ipsi in cubiculo socium ; in rheda proximum esse . Quæ
ubi Styliolus & litteris multorum , & sermone omnium
accepit ; sane , ut par est , commotus , scribit ad dynastam ,
mirari se vehementer , quod adolescentem nondum sibi
remisisset : mensem enim jam præterisse , quo elapso , ipsi
se ille quodam quasi sacramento obligaverat . Dynasta
adolescenti litteras tradit ; mandatque , ut , quæ sibi vi-
deantur , ad illius postulata rescribat . Qui statim Styliolo
respondit , ejus se impudentiam , vel stultitiam potius , satis
mirari non posse , quod , tanquã a bajulo aliquo mercede
conducto , suas ab ipso operas exigat , qui plures domi
suaë alat , honestiore , quam ipse sit , loco ac genere ortus ,
qui ipsi latrinam lavent . quamobrem posthac cavebit
male , si sapiet , nam , si pergit esse odiosus , sentiet , qui-

cum ipsi res sit, quemque hominem habere ludibrio possit. Dynasta vero, ex rure in urbem reversus, data perpetuando atque etiam exaggerando, majora in dies summi in adolescentem amoris signa præbebat. cui etiam omnibus rebus instrui exornarique cubiculum iussit, conclavi illi impositum, ubi Styliolus cubitare solitus erat. Sed audite hominis insolentiam atque fastidium. Tanta illa apud dominum gratia ferox, totos dies noctesque saltando, cursitandoque, eo Styliolum adegerat, ut neque somnum capere, neque alteri cuiquam rei dare operam posset. is enim erat strepitus, crepitus, sonitus, ut cubiculum una cum ea ædium parte supra caput ejus ruere videretur. De quibus injuriis sæpius questum ad dynastam ivit. sed non aliud ab eo potuit responsum exsculpere, nisi, illum esse puerum; puerorum autem juveniliter exultantium lusus cum risu jocoque ferri oportere. Itaque desperans, simulque, quod nimia pueri illius gratia sibi esset invisa, in ultima ac remotissima urbis parte ædes conduxit, eodemque tanquam exulatum abiit. Sed vix è limine pedem extulit, cum puer cubacula in præstantissima ædium parte, quæ illius fuerant, occupat, ac veterem ab eis possessorem in perpetuum excludit. Sed, quo in dies magis auctoritate gratiaque pollebat, eo etiam arrogantius insolentiusque efferebatur. Qua insolentia eatenus progressus est, ut olim in prandio, cum proximus dynastæ accumberet, neque quidquam nisi pisces ederet, (etenim, ex veteri earum gentium religione, eo die carnibus vesci religio erat,) venerit, (fortasse quia valide fluctuasset mare,) ut non quidquam fere piscium captum esset, quique aderant, care indicarentur. Itaque apponebantur illi pisces sane vulgares, sardæ, soleæ, mituli. Curaverat autem architriclinus, ut dynastæ siluri libra carissimo emptæ anteponeretur. Quod ille obsonium, cum prægustasse, ac suave recteque curatum offendisset, honoris & amoris ergo adolescentulo tradidit. Os hominis impudentiamque cognoscite. Circumstabant triclinium viri complures nobiles, honesti, aperto capite, viri illius principis imperia expectantes, ut ad nutum præsto essent. Ille, stulta ac barbara arrogancia elatus, offam illam, caro emptam,

canibus, cunctis spectantibus, objicit. At, qui aderant, mirari, pallefcere, horrere; dynasta quietus efle, tantamque adolescentis injuriam tacitus mufitare. Adjecit ad tam infignem depecti muneris contumeliam inulto arrogantiuf factum proxima fupiore ætate. Dynasta in propinquam urbi villam fuam, vitandi ætus caufa, fe receperat; cū Megalobulo cognato fuo, qui complura oppidula dominatu regio obtinet, una ibi ut eflet: neq; fecum quemquam adduxerat, præter circumpedes paucos, & adolescentem, qui noctu, velut corporis ipfius cuftos, in proccetone cubaret. At ille, nocte intempefta, nemine confcio, furrexit, & ad urbem, citato equo, tranfcurret. Paulo poft dynasta experrectus matulam pofcit; nemo accurrit: nomine adolescentem vocat; non refpondet: iterum, ac tertio appellat; nihilo magis. tum è lecto profiliens circumpedem feorfum alio in conclavi excubantem excitat; lumen proferre jubet; ac copulati quærunt, investigant; atque ædes inveniunt, foribus tanquam faucibus apertis, hominem foras evomiffe, quem, libidine incenfum, ac geftientem erumpere, intus continere non potuerant. Fit clamor; accurrunt alii, à quibus intelligunt, adolescentem equum confcendifle, & citato in urbem curfu ad libidines fuas explendas advolaffe. Sed dynastam male illud urebat, quod abiens ille fores non obferaffet, fed apertas reliquiffet. fuerat enim in poteflate cuiufvis, vel inimico, vel furi, ufque ad lectum venire, ipfumque dormientem opprimere. Atque iratus cognatum Megalobulum vocat, improbum adolescentis factum, exponit; enimvero hoc non efle ferendum, fed curandum, ait, ut intelligat, quid fit principes viros illudere. Megalobulus, cui ægre erat in primis, cognati fui famam, ob nimiam gratioforum fuorum potentiam, malevolis iniquorum fuorum fermonibus dilacerari, neque antea, ob ejus præftantiam dignitatis, aufus erat eum, ut tantam infamiam fugeret, admonere; continuo datam occafionem arripuit, atque hortari hominem cœpit, ne poft hac impuris ac plebeiis iftis fuam vitam exiftimationenique committeret: fibi efle ternos liberos, forma atque ætate præftantes, quorum opera strenua atque fideli poffit uti, fi velit; eos ipfi

dare, donare, dicare: de reliquo sibi curæ fore, ne tanta hæc contumelia sceleroso illi, sicut & ceteræ, procedat in numerum. Atque ita ab eo discedit, ut qui homines quatuor robustos, atque ad pulsandum verberandumque exercitatos, se inventurum dicat, qui advenienti ligna tanquam parochi prabeant; adeo ut totos tres menses continuos lecto se commovere non possit. Nec fuit abeundum longius. Nam quatuor, ex eadem familia, quibus adolescens crudeliter imperabat, hanc ejusdem verberandi provinciam ad se receperunt. Neque aliud expectabatur, nisi ut rediret: nam redeunti pro adventicia cœna res mala erat parata: cum ecce solutissimo animo redit, in atrium ædium se infert, recta ad dynastam intrat. Qui una cum Megalobulo suavis colloquiis pomeridianas horas traducebat. Illi, qui fustes jam ceperant, signum expectabant, quo homini caput, scapulas, & brachia dedolarent. Sed quid existimatis? jussissene, illos in adolescentem intruere, vel saltem eum graviter ab se increpitum suis ab oculis removisse? vel, si minus tantopere sævire vellet, attamen tristiore vultu, quo se commotum intelligeret, aspexisse? Minime. Quid ergo? Accutrens, irruit homini in amplexum, adventum gratulatur: atque, Hodie appositus est nobis, inquit, in prandio pepo, quo neminem ante hunc diem neque formæ melioris, neque succi suavioris me comedissemini. Vin' degustare? Sic opinor. Accitoque tricliniasta, Refer huc, inquit, eam peponis partem, quam jussimus in cœnam servari; ac ser una tecum cenophorum nivati vini quam optimi. Faciam, inquit tricliniasta, quod jubes. At diligenter, ait ille, at mature. satin hoc mandatum est tibi? Nec mora: affertur pepo; allatum sua ipse manu concidit, adolescenti anteponit; ipse pocula implet, ipse cyathissat; hortatur, ut bibat, & amissas ex itinere vires reficiat. Quo facto permotus Megalobulus statim rhedam conscendit, & in sua se castella recepit.

Dum ita ille sermones cædit, interea in oppidum, edito amœnoque in loco situm, ascendimus. In quo forum maximum, pulcherrimi fontes, tum plures latæ viæ perpetuæ, multis transversis divisæ, privata ædificia quampluri-

plurima atque ornatissima continebant. Sed , dum ille loqueretur, nihil nobis longius videbatur, quam dum dicendi finem faceret. Eramus enim cupidi cognoscendi, quænam esset natura loci, qui ritus , quodque hominum genus. Atque audimus, agrum illum esse eorum omnium feracissimum, quæ sunt ad victum necessaria ; vini, olei, tritici: homines vero quietissimos, officiosissimos; à furtis vero ita abhorrentes , ut si qui forte nummi cuipiam excidant , nemo ad eos tollendos sese demittat; præterea hospitem advenarumque adeo studiosos amantesque , ut quemquam , qui illuc se contulisset, violare, vel digito attingere , inexpiabilis cujusdam sceleris loco duceretur. Quibus cognitis, venit nobis in mentem, si vera essent quæ dicerentur, ibi consistere, neque alias regiones persequi , ac maris pericula rursus obire. Quæ postea oratione illorum aliquanto ampliora esse , nos ipsi quoque cognovimus. Itaque sedem ac domicilium ibi nostrum collocare, &c, quod reliquum vitæ daretur, traducere constituimus. Atque in suscepta sententia stabilivit nos philosophi illius oratio , qui vitia libidinis erat versibus persecutus, qui ibidem omnes æquo esse jure aiebat, neque plus uni licere, quam alteri. id adeo contingere , quod omnes fere essent pares , neque quisquam alteri dignitate divitiisque anteiret. quam rem ille in summa felicitatis parte ponebat, esse enim intolerabilem potentiorum superbiam & injustitiam. sibi vero facilem eam esse orationem, quod in eorum iniquitatibus non semel hæsisset, & in primis, quod sibi, bene de aliquot principibus viris merito, quorum nomina non reticebat, pessime gratia relata fuisset. Atque aliud ita orsus est carmen.

*Est opera precium pernoscere divitis artes ;
 Nempe quibus viciis hic totus langueat ordo.
 Quem, quotquot laterant probroso vulnere mentes,
 Corripiunt animi morbi, nec deserit ullus.
 Hunc primum aëreo ventosa superbia curru
 Abripit, admotis & vanum foliis inflat.
 Nec sic inflatus tumidos ostendere vultus
 Dignatur tenui, rerum cui copia desit.
 Iam non humano concretum sanguine; verum*

Se putat aetheriis affinem civibus esse ;
 Ac Iovis aeterni solium tetigisse beatum :
 Quod prope divinos tradi sibi poscit honores,
 Dum patitur , capite obstipo genibusque minorem
 Auxilium donis inopem votisque precari.
 At neque ventosi tantum gaudetque superbi
 Nomine ; sed vitiis longe pejoribus ardet.
 Surgit amor nummi , & fulvi sitis atra metalli
 Insilit exultim , atque imus sedet alta medullis.
 Ut cupido rapidis uruntur pectora flammis
 Turpis avaritia ! studioque ut flagrat habendi !
 Dum tenui ereptas fidoque impune sodali
 Injustus sibi cogit opes , atque addit acervo :
 Vel pacta artifices fraudat mercede misellos :
 Emptis sive negat precium persolvere rebus.
 Nec scivum potis est animum tetigisse querela
 Infantum , aut lacrima , resonantiaque atria circum ,
 Creditor elusus querulis qua vocibus implet ;
 Dum , Mihi redde meum , magnis clamoribus instat ,
 Quo pueris caraque simul frigusque famemque
 Depellam uxori . scissis qua vestibibus agra
 Sape dolet tenebris siccos se jungere soles.
 Ipse graves inter gemitus , mœstasque querelas ,
 Cruclis gaudet latis accumbere mensis ,
 Et symphoniacos lacrimis componere cantus.
 Iam , qua sic aderit turpis vel dira libido ,
 Qua non continuo venas inflaverit illi ,
 Ac tumidas rapido victrix impleverit aestu !
 Sic , ut nulla quies membris animoque supersit ,
 Optatam donec valeat contingere metam.
 Vertitur in rabiem furis ardentibus acta
 Sape libido furens , sibi dum dolet esse negatum
 Quod cupit , aut alios parili sibi munere findi
 Quadram poscentes obliquo lumine cernit.
 Vnde pudicitiam precio qua vendere nolit ,
 Aut cupidi propere insanis occurrere votis ,
 Huic olido coeno sputantur saepe fenestra ,
 Aut lapidum dira franguntur grandine postes ,
 Quique audax abiit , bolum sectatus eundem ,
 Vel faciem retulit famoso stigmate turpem ;

*Vel caput & scapulas præduro fuste dolatas ;
 Vel fera non bellam subiit per vulnera mortem.
 Sic gladio miscetur amor, dum lividus ultro
 Vult sine rivali, quod diligit, ipse potiri.*

His auditis, & urbe tota perlustrata, ædes in edito
 urbis colle conduximus ; unde ab una parte prospectus
 erat in agrum lepidissimus ; in mare ab altera. Tum ex
 ea pecunia, quam nobiscum attuleramus, fundum, qui
 nos aleret, coëminimus.

LIBER IX.



Vmma igitur animi tranquillitate, cun-
 ctis ad voluntatem euntibus, fruebamur ;
 sed summam in primis voluptatem ca-
 piebamus ex ædibus nostris, & ex hor-
 to, illis adjuncto, ubi ver fere perpetuum
 vigeat : etenim flores ibi lectissimi, omni
 tempore anni, herbæ semper virentes, ar-
 bores sua semper viriditate vestitæ, lauri, cupressi, myr-
 ti, hederæ ; quarum arborum frondibus tectæ aves, qui-
 bus nemo, neque balistis, neque retibus, neque viscatis
 viminibus, molestiam exhibet, aures cantu demulcent :
 ædes vero ita bono, ita apto in loco consurgunt, ut æsta-
 te totum diem sub dio incoli possint, hyeme autem ita
 à mane usque ad vespèram à sole possidentur, ut um-
 bram, nisi si in puteo quæras, invenire non valeas. Tum
 doctis & illustribus viris, quorum in ea insula non par-
 vus est numerus, arcta atque jucunda consuetudine im-
 plicati, ocium fere nostrum terebamus in litteris. In iis
 Nicorusticus, amœno elegantique ingenio, varia atque
 multiplici rerum maximarum eruditione imbutus, sed
 incommoda fere semper valetudine, suis doctissimis ser-
 monibus, ac præsertim elegantissimis versibus, aures
 nostras implebat. Hic longe majore apud omnes esset
 existimatione atque amore, nisi unum illi vitium omnem
 ingenii commendationem everteret. etenim, vana qua-
 dam sui ipsius opinione inflatus, omnes præ se contem-
 nit ; neminem, extra se unum, quidquam sapere, nemi-
 nem

nem quidquam esse arbitratur. quid quærimus amplius? Scriptores veteres omniumque virtutum laude præstantes, quibus omnium seculorum consensus & auctoritas principem in poëtis locū assignat, ad sui iudicium acuminis revocare, ac de diuturna regni possessione est conatus dejicere. Placutius, exacta jam ætate vir, præter summam rerū omnium scientiam, egregio poemate, tragœdia, aliisque præclaris ingenii sui monumentis editis clarus, multitudine librorum, quos, tum soluta oratione tum versibus, tum patrio tum Latino sermone, docte eleganterque conscriptos, est paratus emittere, nostram discendi sitim explebat. Sannius, in quo perfecta oratoris laus prope expressa conspicitur, id quod est in nobis bonum alebat. Etenim ita hic loquitur, ut dici melius non desideres; ita, præter has politissimas artes, quarum studio tenemur, quæcunque à philosophis, de rerum causis, de cælo, de natura deorum traduntur, memoria intelligentiaque complectitur, ut non didicisse, sed suo ea Marte peperisse videatur. Lidomarus, cui primæ in Græcis litteris deferri dicuntur, sua nobis epigrammata recitabat, in quibus faciendis, adeo felix existimatur, ut, eruditorum iudicio, proxime ad veterum Atticorum elegantiam, suavitatem, & acumen, dicatur accedere. Cæloolithus, ingenio peracri, & studio flagranti, & doctrina singulari, doctiores nos in dies reddebat. ita enim est Græcorum disciplinis instructus, ut nihil eum fugere existimetur, quod eorum litteris traditum contineatur. Multa quoque erant in manibus Pterotii, ad veterum sapientiam elegantiamque conscripta, quæ magnam illi inter eruditos famam efficiunt; atque, ut est ingenio eximio, & nunquam cessante, alia deinceps multa editurus dicitur, unde magis liceat de ejus excellenti facultate atque doctrina existimare. Hic vir longe doctissimus, ille est, qui, ut antea commemoravimus, in cujusdam inepti reprehensionem incurrerat, quod ad litteratorum hujus ævi numerum, Iannum quendam scriptorem comœdiantū aggregasset. Atque de hoc Iano, cum diligentius inquireremus, invenimus, eum quidem humili loco natum, sed ingenio alto atque præstanti, ab ineunte ætate, à parente, qui nihil altum, nihil se ipso majus, animo

conciperet, illi fuisse arti addictum, quam ipse nosset, & in qua sese exerceret; at illum, hac in te patris imperio minus obsequentem, quamquam parens ad imperium minas adderet, traditam sibi artem respuisse libero ingenuoque fastidio, atque ad præstantiora studia animum adjecisse, eo ardore, ea vi, ut solus, sine magistro, sine duce, naturæ tantum bono ductus, non postremum picturæ, poësis, ac musicæ gradum attigerit. ac correctori illi, si quod ex ore petulantius dictum excidit, ignoscendum fuit: erat enim iratus judici, qui nescio quid decreverat contra rem ipsius, injuria. Verum, quod ad virum illum doctissimum attinet, mira hominis virtus, incredibilis humanitas, magnitudoque animi, lapides etiam ipsos potest, ut se ament, adigere; nos vero, tanquam sibi adjudicatos, arctissimo amoris vinculo habet adstrictos. adeo enim nullum in eo ambitionis, malignitatis, invidiæque vitium residet, ut etiam eruditorum laudibus, quibus alii, qui ejusdē sunt professionis, plerunque invident, detrahunt, tenebras offundunt, ipse, novo atque inaudito humanitatis exemplo, faveat, opes & amicitias paret, suoque præconio lumen atque splendorem adjiciat; cedo tres mihi homines, auro, cum istis moribus; dignus profecto, qui, omnium eruditorum literis, posteritatis memoriæ tradatur; si quidquam tamen inveniri potest, ad ejus memoriam nominis propagandam, ingenii ipsius monumentis feracius. Dynasta vero, nomine Ophio, abundanti doctrina ac scientiæ copia refertus, cui ille honorariam operam navat, ejus etiam studiis, bonis ac doctis viris favendi, obsequitur. iis enim domi suæ hospitium, iis amorem suum ac studium, iis diurnum cibum, pro facultatibus exhibet. Erat sæpe nobiscum Icosippus, cujus videndi diu fueramus cupidissimi; quamquam satis ex suis eum scriptis cognitum haberemus. huic tantum, eruditorum omnium consensu, tribuitur, ut omnium fere artium scientiam, omnis antiquitatis memoriam, totam Latini sermonis rationem, omnem ejus artis pene infinitam vim & materiam scientia comprehensam habere existimetur. Multum etiam utebamur Homosio, præstanti ingenio ac nobilitate viro, cui nihil ab ingenio, nihil ab arte, nihil à studio

deest, omnia, quæ in istis artibus, libero homine dignis, continentur, ipse percepit. nam si sit scribenda epistola, tum Græce, tum Latine, tum vernacule, est prudentium eloquentissimus; si agendum de re gravi negotium, est eloquentium prudentissimus; si sit pangendum carmen, ac præsertim epigramma, ex Catulli vel Martialis officina illud prodiiisse existimatur. Iam vero nostrum ad se amorem ac studium attraxerat vir singulari ingenio, eleganti doctrina, acerrimo judicio, optimis moribus, summo genere præditus, Aristides; cum eo fere quotidie eramus, ille nos rheda tollere, in suburbanum suum, urbi proximum, ducere; ibi, vel eruditis sermonibus, vel poetarum oratorumque lectione, ad lene desinentium aquarum murmur, ad avium cantum, ad auræ inter arborum ramos dulciter obstrepentis sibilum, ad agrorum circumcirca patentium despectum, cum eo nos, quidquid erat ocii, conterere. Hic vir egregius in primis, in amplissima familia natus, tum sua sponte, tum parentum diligentia, ad probitatem & ad omnes bonas artes instructus, eo robore atque ea indole virtutis & continentiae fuit, ut, spreto voluptatibus, illud unum ad laudem cum labore directum iter habuerit. Fratrem habuit dynastam, non unum è multis, sed inter multos prope singularem. nam pluribus antea pro Rep. laboribus ac muneribus egregie functus, eum locum atque ordinem meruerat; tum, incredibili vir ingenio, doctrina, magnitudine animi, judicii acumine, regendis imperio populis datus, admirabili quadam laude, provinciae præfuit: verum cum ad summam gloriam effloresceret, calculi morbo sublatu, triste sui desiderium reliquit. Vivit adhuc eorum mater, quæ, annos nata quatuor & octoginta, in exemplum matronarum suspicitur. Hæc tam admirabilis tamque nobilis scæmina, quemadmodum excelso fortique animo, quemadmodum incredibili constantia, bonorum jacturam, familiae detrimenta, præterea tum viri tum filiorum longe præstantissimorum interitum tulerit, dicerem, si explicari oratione cuiusquæ posset; neque nunc ulla senectute impeditur, quo minus familiam regat, quo minus retineat auctoritatem & imperium in suos, quo minus det operam sedulo, ut vigeat in illa domo mos patrius & disciplina.

Dum

Dum igitur inter has necessitudines læti ævum agita-
 mus, ecce tibi ex improvise Gallonius nostris sese ocu-
 lis objicit. Dii boni! *O qui complexus, & gaudia quanta
 fuere!* Cœpimus percontari, quid sibi vellet ille ejus tam
 inopinatus adventus, quid ferret novi, salvane omnia. At
 ille, Dynasta, inquit, meus, sive vitio animi, sive otii
 abundantia, quia non habet; in quo illud utilius consu-
 mat, omiſſis ceteris studiis, fere quotidie rus abit, ac
 sumpto in manus arcu, aviculas, dum incitatore per
 aëra volatu feruntur, sagitta confodit, tantumque studio
 & exercitatione profecit, jam ut nemo certiore illo,
 ad feriendum, manum habere existimetur: audivit,
 maximam in hac urbe bonorum arcuum copiam esse;
 propterea, ad eosdem comparandos, me cum pecunia
 misit. Sed dii me servant, dii bene mihi volunt, cum
 tantam insperato lætitiā objiciunt, ut vos conspicer-
 teneam, amplectar, quos, nunquam suspicatus sum, in
 his regionibus me esse visurum: jam bene sit dynastæ
 meo, bene sit illi ejus vel infaniæ vel studio, quo rapi-
 tur; bene sit arcubus, sagittis, avibus, quibus ille pestem,
 labem, & exitium parat; quæ omnia diris antea preci-
 bus execrabar, quod propter ea maturius esset surgen-
 dum, hac illac concurrandum, arcus ferendi, sagittæ
 suppeditandæ, collapsæ in foveas, lacus, rubeta, ac spi-
 nas aves quærendæ, investigandæ, excipiendæ; bene sit,
 inquam, his rebus omnibus; nam absque iis si forer, nun-
 quam tanta hac me amœnitate amœnus onerasset hic
 dies. Nec minus, excipit Æmilius, iis rebus, quæ tan-
 ta te cura ac sollicitudine onerant, æquum est nos bene
 precari. non enim ad nos minor, ex tuo adventu, lætitiæ
 redundat, nec minus Diespiter amicam nobis operam
 tradit. Nam quis est omnium mortalium, quem te uno
 magis conventum expetamus? proinde, dum hanc ur-
 bem incoles, apud nos sis volumus; atque interim tibi,
 ut mos est, cœnam viaticam dabimus. Benigne, inquit
 Gallonius; nolo vobis molestus esse. Omnis tibi facul-
 tas recusandi erepta est, ait Paulus Æmilius, propterea
 quiesce. non enim potes effugere à nobis hospitium &
 cœnam. Sed quid illic rerum agitur unde advenis? estne
 novi aliquid, quod sit operæ pretium nos scire? pax
 ibi

ibi atque ocium, an sollicitudo vel incēror agitur? Immo, inquit Gallonius, omnes, animis in lætitiā effusis, gestiunt, triumphant, exultant. allatum est enim, Nicephorum Regem, tot secundis præliis nobilem, tot victoriis inclytum, quem male omnes formidabant, in acie, à manipulari quodam, inter brachium humerumque, sagittā percussū, diem extremum obiisse. itaque supplicationes ad omnia pulvinaria decreta, deorum immortalium ædes, pictis peristromatis, & stragula veste, auro sericoque contexta, ornata; earum postes, hedera, lauro, myrtoque protecta; pavimenta recentibus cespitibus constrata; crebri noctu ignes accensi. est operæ precium audire, tubarum tympanorumque sonitus, symphonicorum undique cantus, sanctas acclamantium ac diis gratulantium voces, quod exitum illud ac pestem, ab urbe, ab agro, ab aris, à focis avertissent. erat enim metus, ne demum Rex ille, tot victoriis ferox, atque animi impotentia insolens, eo copias adduceret, urbemque nobilissimam, ac diuturna tot annorum pace, referatam opibus atque divitiis, invaderet, sana ac domos spoliaret, cædem & incendia faceret, postremo, armis, cadaveribus, cruore, atque luctu omnia compleret. quin ajunt, palam solitum eum dicere, se, pulsīs dynastis, vel ad internecionem datis, Urbem hanc, in Regni cujusdam formam redacturum, cui ipse cum imperio ac potestate præesset. At ego, Mira, inquam, narras, Galloni; sed cedo, quomodo Rex ille tam ferox, cui nemo jam posse videbatur obsistere, tam infelicem exitum vitæ habuerit. nam cum apud vos essemus, multa de militari ejus virtute, multa de singulari hominis felicitate, accepimus. Dicam, inquit Gallonius; jam Rex ille, tot successibus fretus, tantos spiritus sumserat, tantum audacia processerat, ut non dubitaret, nullis protectus armis, ac pene nudus, pericula præliorum inire, tanquam in dextera sua secundos belli exitus, decus, famam, gloriam, denique fortunam, haberet. sed deorum consilio factum existimo, ut in illam tam stultam sui fiduciam delaberetur; nam ubi decretum est superis, scelerum pœnas ab hominum sævitia, iniquitate, atque importunitate repetere, nihil illis faciendum videtur prius, quam

ut iis, quibus sunt irati, mentem & consilium adimant. itaque dum ille, remotis armis, equo circumiens, unumque inque hortatur, sagitta, ut dixi, confossus interiit. atque huc demum, tot hominis spes, cogitationes, contentiones, conatusque reciderunt. Quibus acceptis, Quam durum est, inquam, ô Galloni, more gigantum bellare cum diis! qui superbiam, ambitionem, deorum contemptum, tanquam montes congerit, quibus cælum expugnet, non tam scalarum gradus, quam ruinæ periculum struit: ille prope æqualem se superis infert, qui in terris diis minorem gerit. spreta atque contempta religio seras tandem, sed graves, à suis desertoribus pœnas exigit. nulla re ita fundantur imperia, ut veræ religionis cultu studioque, ubi exultat religio, ibi perfidia, peculatus, avaritia, invidia, perjurium, ambitio, injuria, scelus, sacrilegium viget. sed satis philosophatum est. gaudemus, civitatem illam, tanto metu vacuum, pacem, lætitiâ, & amoenitatem exercere. tu jube interea sarcinulas tuas in nostras ædes inferri; nam ex tibi patent ut tuæ, cum nos contra tuis usi fuerimus ut nostris. Geram, inquit ille, vobis morem, magis id adeo, ut studiis vestris obsequar, quam quod hospitio aut re ulla indigeam. nam herus meus, in iis rebus, ex quorum amore non est sanus, nulli neque operæ neque sumptui parcat. Cum igitur ad nos divorteret hospitio Gallonius; lepide atque hilariter à nobis exceptus; die quodam, à prandio, ingens ad aures nostras clamor accedit. Cupidi cognoscendi, quid esset, ad ostium accurrimus, atque, lictores inter, oneratum catenis hominem, honesta facie, ac vestitu sane opulento, conspiciunt. rogamus ex popularibus unum, quid illic hominis sit, quoque abripiatur, num forsan in carcerem, cujusnam criminis reus efficiatur, num capitalis, num manifesto deprehensus ad tribunal judicum rapiatur. Minime, respondet ille; sed ad portum adducitur, ut in navim impositus, eo deportetur, ubi se furti alligavit; at ejus furti, quo mea sententia, nullum auidi neque lepidum neque ridiculum magis; ita nimis hic quidem est graphicus sycophanta. & quo magis ejus in furando artem leporemque admitemini, iis manus est adita, quibus non est in toto orbe terrarum neque cautius

tius neque ad rem attentius quisquam. Hic vir, in specie, ut videtis, honestus, consueverat, ad signum Palladis, quod in æde istorum, summa atque antiquissima prædium religione, non solum à popularibus, sed à vicinarum etiam urbium incolis colitur, totos dies, genibus minor, orare. quamobrem bonis illis viris cœpit esse in admiratione atque honore; quin tantum apud Palladem auctoritate & gratia eum posse arbitrabantur, ut nulla res esset tam ardua, tam difficilis, tam supra naturæ vires, quæ ab ea impetrari, ipso deprecante, non posset. sed ubi satis visum est illi, aream concinnasse, in qua palumbes, seu potius vulpes illas, exciperet, cœpit in ea cibum offundere; ac torquem è sinu aureum extrahit, qui erat quinque pondo: accurrunt omnes ad bolum; suunt, inspicunt, laudant. ille, jam sibi propositum esse, ait, tam divitem Palladi torquem dicare, sed sibi in præsentia opus esse auri pondo, quo æs alienum dissolveret, atque existimationem suam tueretur; proinde si auderent mutuitanti credere, se, post biduum, aurum omne renumeraturum; interea, quo ipsis cautum esset, torquem illum pignori opponere, qui quinques tanto pluris esset, quam aurum quod peteret; tenerent, inspicerent; num vel in pondere, vel in auri substantia, quidquam titubatum sit, quærant. illi sumunt, jubent eum esse bono animo, ac postridie reverti, nec tamen sibi ipsi defunt, sed peritos advocant, torquem ostendunt, una cum iis ad pondus & ad coticulam exigunt; atque inveniunt, aurum esse, lectum, purum, & ad pondus respondere. itaque, de communi omnium sententia, statuunt, quandoquidem satis ipsis cautum esset, auri illi libram mutuam dare. postridie revertitur, ac sine ulla mora aurum, quod poposcerat, mutuum accipit; gratias agit, ac, Propediem, inquit, qua via discessit, ad vos aurum revertetur. Sed quia jam deæ sacrum esse torquem placuit, date mihi quæso hanc veniam, ut manibus illum meis Palladis collo circundem. Illi, Ita, inquit, de nobis meritus es, ut nihil tibi postulanti denegandum esse videatur. atque eadem opera jubent scalas afferri, signoque admovent. nam illud altius erat positum, quam ut manibus cuiusquam posset attingi. il-

le ascendit; dat auro osculum, eoque deinde deæ collum
geminatis nexibus implicat; descendit, ac genibus nixus,
alias preces supplex effundit; postremo, omnibus illis,
honoris gratia, stipatus, cum gratiarum actione, mi-
grat è fano foras. Dies unus abit, alter, tertius, plures;
nec religiosus ille oratum, ut antea, venit, neque uspiam
apparet. itaque, qui mutuum dederant, mirari; sed ni-
hili pendere, immo deos rogare, ut eo abire illum vel-
lent, unde nunquam rediret; quod si ita esset, nusquam
potuisse rectius aurum mutuo locari. sed aliquot post
dies, cum spes esset, nunquam eum rediturum, detrahunt
è collo Palladis torquem, ut ejus auri fulgore oculos
pascere, tum, ut aurifici, quem adduxerant, venderent.
at cum eum aurifex diligentius aspiceret, ejusque sua
manu pondus exigeret, Non est, inquit, hic torques ille,
quem olim mihi æstimandum obtulistis, sed longe di-
versus ab illo ille enim erat ex auro puro, hic est ex au-
richalco conflatus. illi mirari, atque, insanire eum, dice-
re; etenim se adfuisse, cum torques Palladis collo dare-
tur. Agite, inquit ille, ut vultis, vobis sublitum est os
pulchre: nam, cum simulabat se Palladi dare, falsum
torquem pro vero supposuit. tum vero illi, verba sibi
data esse, intelligunt, atque, O furem elegantem, cla-
mant, dignumque qui aureo recte suspensus pendeat per
pedes. sed non dimittendum tempus, verum curan-
dum, ut in potestatem judicum veniat. nec mora, Præ-
torem adeunt, rem narrant, lictores ad eum ex fuga re-
trahendum impetrant; &, qua sunt in suis rebus saga-
citate, odorati sunt, huc enim castra movisse. Qua re ni-
hil illis potuit magis ex sententia contingere. etenim,
tota hæc insula fures, utpote communi ocio inimicos,
tanquam mare mortuorum corpora, evomit, nec apud
se versari permittit. quamobrem, omnibus custodiis sub-
jectus, illis est traditus: in hos scripti fuere ab homine
arguto versiculi isti, quibus eorum irridetur acumen;
qui, cum plus cæteris videre se jactent, inventi fuerint
minus oculati, quam unius manus veteratoris.

*Olim fama fuit, vos cernere latius Argo,
 Sed cecos talpa nunc patet esse magis;
 Præstinctos nitida radiantis luce metalli,
 Ipse manu in fraudem dum veterator agit.
 Esse ullum vobis quis posthac credat acumen,
 Ducta quibus furis plus videt una manus?*

Sed satis mirari non possum, quam illi fiducia, Prætoris fidem implorare, aut eidem os suum ostendere ausi sint; qui Prætor, paucos menses ante, arguta atque ridicula testamenti cuiusdam interpretatione, ludos eos maximos fecerat, & in sermones hominum adduxerat; jure an injuria, nihil ad hoc tempus. Teneo, inquit Gallonius, quid dicas; res est ridicula, & continuo ad nos allata, dedit, ut ais, sermonibus locum, atque insuper, quod perpetuo rideremus. Sed (in nos intuens) narra quæso, istorum gratia; quamquam Poëtam, nescio quem; audio scripsisse rein versibus. Boni, inquit, isti viri, locupletum hereditatibus inhiare vulgo creduntur; neque dubito, quin iminerito hac fama laborent; sed quotusquisque potest sermones iniquorum effugere? ajunt igitur, eos locupletem ac nobilem quendam hominem adegisse, ut ipsos omnium suorum bonorum heredes institueret. erat huic fratris filius, adolescens honestus ac probus; huic rogati sunt eam hereditatis partem restituere, quæ maxime ipsis placeret; & quia eum patruus in filii loco diligebat; ipsorum custodiæ fideique mandavit. testator moritur; isti, ut fama est, totam sibi hereditatem usurpant, inopi ac misero illi vix tenuem quandam particulam tradunt. qua injuria commotus, vocat eos in jus ad Prætorem; illi accurrunt; queritur adolescens, ex tanta patrum ipsius hereditate, cujus, si ea in istis fides esset quæ esse deberet, bonam ad se partem venire oportebat, nihil fere, nisi plorare, relictum; orat, obsecrat, ut tantum sibi restitui jubeat, quantum ad inopiam, qua urgebatur, sublevandam esset satis. respondent isti, rogatos se esse, ex testamento, eam illi partem bonorum restituere, quæ ipsis placeret; placere autem eam, quam elargiti

giti essent ; ac falli adolescentem , si crederet , se nummo ab eis amplius litium terrore erasurnum. jubet Prætor tabulas testamenti proferri ; tradunt illi ; aspicit , legit , atque invenit , rogatos esse heredes , eam adolescenti partem restitnere , quæ ipsis placuisset : tum paululum astitit , severa fronte , quasi consilia in animum convocans , quo consuleret , quid potissimum agi deberet ; & cum paulum in ea cogitatione defixus hæsisset , Arbitror , inquit , me invenisse , quid adolescenti , exæstimatoris voluntate , debeatur : nempe scriptum video , eam adolescenti hereditatis partem tribuendam esse , quæ vobis maxime placeat ; utra igitur earum partium vobis magis placet , eam in quam adolescentem vocastis , an ea , quam vobis attribuistis ? Ea , inquiunt , quam ad quotidianum sociorum victum , atque ad deorum immortalium cultum elegimus. At hæc ea est , subdidit Prætor , quæ , patrui testamento , fratris filio debetur ; vobis autem eam sumite , quam adolescenti reliquistis , quæque minus placebat. fit clamor omnium & risus ; illi plura loqui prohibiti , tanquam artificio suo capti , tristes ab jure discedunt. His dictis , ille abiit. Gallonius in quadam armorum officinam , ibi proximam , ad procuranda dynastæ sui negocia se confert ; sub vesperam , arcubus & sagittis onustus , domum regreditur : neque ita multo post , cœnam poscimus , accumbimus , cœnamus ; cœnati , plura ille de nobis , ac nos de illo percontati , sermonem in multam noctem produximus , ac Prætoris in primis astum admirati sumus , quo adolescenti subvenit , & cupiditatibus hominum obviam ivit. At ego , Si vera , inquam , esset avaritiæ istorum fama , id quod in præsentia non quæro ; sed si , inquam , hæc fama valeret , & cum habitent hic apud nos , leve aliquid avidi atque appetentis animi signum ostenderent , profecto , publico consilio , extra urbem ejecti , cogerentur mutare coloniam. sunt hic homines quietissimi atque ab omni prorsus cupiditate alieni , nec ferre possunt eos , quos transversos lucri cupiditas agit. At isti , inquit Gallonius , in commune consulunt ; quid facerent iis , qui non privata cujuscumque bona , atque profana , sed publica , sed deorum immortalium religioni consecrata , impio ac

nefario scelere domum suam avertunt , dum procuratoris, vel administratoris nomine, debacchantur ac regnant? at nemo istorum, apud eos unde venio, in iudicium vocatus , pœnas tanto sceleri debitas solvit. etenim, non furti contra eos agitur, sed leviori actione configitur. ut, quod indignissimum est in his causis, non de improbitate, avaritia, rapacitate istorum hominum, sed de jure civili iudicium fieri videatur. itaque, cum oportet eos ad carnificem dari, ac virgis cæsos in crucem agi, videas erectos ante iudicem stare, defendi ac foveri ab iis, qui postulant, idem sibi licere, si ad ejusmodi procuraciones administrationesque perveniant. audite unius istorum furtum lepidissimum, ac risum continete, si potestis. Multa dicuntur esse, in circumjectis huic mari insulis, Palladis sana, in quibus ea sanctissime religiosissimeque colitur; sed mira quædam in insula Daphnia privatim ac publice est Daphniæ Palladis religio; neque solum incolæ, verum etiam ceterarum insularum gentes & nationes eam maxime colunt, in suis rebus dubiis ac difficilibus invocant, adeunt, rogant. tanta enim est auctoritas ac vetustas ejus religionis, ut, quemadmodum de Cerere Ennensi inquit Tullius, cum illuc homines eunt, non ad ædem Palladis, sed ad ipsam Palladem proficisci videantur. Est ibi, unde huc sum profectus, insigne xenodochium, nationis cujusdam barbaræ, quod pulchrum atq; magnificum Palladis Psychiæ templum habet adjunctum: id locuples in primis templum, per certos ejusdem nationis viros, ad id præsertim electos, administratur. hi, ut leges eorum sunt, suffragiis unum sibi quotannis œconomum legunt; ad hunc summa rerum omnium redit, hic annuis templi vectigalibus exigendis & curandis præest, hic ædituis ac sacerdotibus imperat; hic ad xenodochii templique necessarios sumptus pecuniam enumerat. igitur quidam, qui, anno superiore, œconomus Palladis Psychiæ, ejus pecunias administraverat, magistratu abiens, cum ad œconomum, qui ipsi successerat, rationes, ut mōris est, redderet, profert tabulas in quibus erat præscriptum, minas triginta à se esse persolutas in rem Palladis Psychiæ in primis utilem, neque cui, neque quam ad rem datæ essent,

essent, adscriptum. Oeconomus instabat, urgebat, ut ostenderet, cuinam, & quam ob causam, tantam pecuniam tulisset expensam. ille recusare, eique se esse probaturum dicere, cui maxime opus esset. Ergo vocatur in jus ad prætorem peregrinum; quo, casu, eo die veneram, à dynasta meo missus, ut suis verbis Prætori reum quendam commendarem. ille adest; repetuntur ab eo minæ illæ triginta. respondet, eas iis, quibus debebantur, expensas. Cuinam? ajunt. Nauarcho, inquit, qui me, uxorem, liberos, ancillas, servos, in insulam Daphniam advexit; tum stabulario, ad quem per mensem integrum divertimus, quique nos opipare lauteque, dum illic fuimus, lepidis obsoniis accepit. Rogant rursus, instant, urgent, ut dicat, quænam tanta nosocomii necessitas, illuc eum navigare, ac tantos sumptus facere compulisset. Qui aliquando coactum, ait, se eam navigationem suscepisse, ut Palladem Daphniam, pro Pallade Psychia oraret, ejusque illam fidei tutelæque commendaret. Hic omnes, qui aderant, cachinnos extulere. Summa Prætoris voluntas erat, furem illum manifestarium in minas triginta condemnandi. Sed quidam ex eadem natione, quo ipsis, ejus exemplo, honestius furari liceret, dicunt pro testimonio, nihil ab eo novi esse commissum; ita ab omnibus fieri solere. Tum Prætor interrogat unum ex iis, qui ceteris acrius pro illo depugnabat, quemnam cuperet causam illam obtinere, xenodochium an Verrium; id erat oeconomico illi nomen; qui, Verrinum, ait. nam bonus vir est, antea quam veniremus huc, emit mihi in popina jentaculum quinque drachmis, una sextarium floris vini veteris, altera caseum mollicellum, farcimen, panes; reliquis tribus carnem vitulinam assam, & pullos gallinaceos: tum duas liberali forma filias habet, quarum ego alteram amo, & illa me contra; qui est amor, ut inquit ille, cultu optimus; atque, arrhabonem amoris, hunc anulum mihi misit, ac præterea sudaria duo, quorum unum ecum hic habeo, alterum domi custodio. Instantatus est omnium risus; ceteri testes stomachari, atque ebrium illum esse dicere. Eodem tempore veniunt à summis viris ad prætorem commendationes diuissis manibus mul-

ræ. Itaque *Solvuntur visu tabula, missusque recedit.* Hic
 ego excepi, At hunc, ne salus quidem ipsa, apud nos
 fervare potuisset. Atque ut ad cupiditates hominum, un-
 de digressus es, redeam, dicam id, quod superioribus
 diebus, apud Amphitheatrum, hincemet oculis vidi. Iace-
 bat prope illud in via pauperculus quidam extinctus:
 evocatus est statim curiæ illius magister, intra cujus di-
 tionis terminos mortuus ille jacere existimabatur; ut
 eum efferendum humanumque curaret. Etenim hic,
 ad curiarum magistrorum non solum pertinet, dividere ar-
 genti nummos in viros, res divinas procurare, curiali-
 bus suis opem ferre; verum etiam, mortuos sepulturæ
 mandare; unde non parum ad eos lucri redundat, ex
 funerum videlicet pompis, ex divitum ac nobilium vi-
 xorum sepultura. verum lex, quot & quantæ sint homi-
 num cupiditates, intelligens, præcipit, ut eos, quibus
 rei nihil est, sepultura gratis afficiant. Magister igitur cu-
 riæ vocatus accedit, qui desperans, se ab illo funere posse
 lucelli quidquam abraderè, ostendit, munus illud suum
 non esse, sed proximæ curiæ magistro totum incumbere.
 accersitur ille; qui item, ob eandem causam, illud à se
 onus removet, atque in alterum rejicit. fit pugna inter
 eos, & contentio: sed demum, re infecta, uterque dis-
 cedit. verum quidam eorum, qui aderant, sive miseri-
 cordia, sive rei indignitate commotus, cucullum, ex
 charta confectum, mortui manibus inserit, cum pagel-
 la, quæ demonstrabat, non posse inopem illum humo in-
 jectæ contegi sine prætereuntium misericordia. Vix hora
 intercesserat ab hoc ejus invento, cum cucullus ille re-
 pertus est nummis æreis argenteisque refertus. Tum vi-
 dere licuit magistrorum illorum cupiditatem: nam ubi
 ejus lucelli nuncius eorum pervenit ad aures, continuo
 dant sese in cursum, atque obvios quosque in cursu, ca-
 pite, aut cubito, aut pectore offendunt, aut genua; ac pene
 ruperunt sibi ramices currendo. Itaque, eodem fere mo-
 mento temporis, ambo perveniunt, incipiuntque jurgiis,
 maledictis, clamoribus, inter se contendere, ac sibi
 quisque defuncti illius cadaver asserere, ac suum esse af-
 firmare. Sed re ad magistratus delata, statim, concursu
 populi factò, pulsati sunt è civitate, atque in malam rem
 missi,

jussi, quantum potest, abire. Ad extremum, multis verbis ultro citroque habitis, cum jam somnus obreperet, nos lectulis commendavimus. Postridie mane, cum etiam tum nos lectus haberet, accipimus, esse ad januam ignotum quendam, qui nos magnopere evocaret. quærimus, qua ætate, qua facie, quo habitu esset. respondetur, esse hominem senem, audacem, ore neque ita elegante neque venusto, sed quod sæpe iratum canem imitaretur; præterea tunica togaque ad talos usque demissa. Itaque seminudi ad ostium accurrimus, honorosice hominem excipimus; quærimus, quis sit, quid poscat, quid jubeat. Ille vicissim humaniter mutuam salutem reddit. atq; Vt sciatis, nos sumus omnium longe doctissimi, dignique cujus amicitiam ultro expetitur adveniat; sed fama humanitatis vestræ capti, & quod alias vos vidisse meminimus, eam vobis magni beneficii loco deferimus; ea utimini, ut vultis. Nos gratias illi maximas agimus; ac vicissim operâ nostram pollicemur. At Paulus Æmilius, Vbinam, inquit, nos vidisti? te enim ante hunc diem neque vidimus neque novimus. at jam subvenit, ubi tibi conspecti forsitan fuimus; in Eudemia, tum, cum in illum cœtum litteratorum hominum, qui ibi cogitur, venimus. At ille, Facis, inquit, adeo injuriam, cum me in eorum numerum refers, qui Minutii Sinistri domum frequentant: egone in illius ædes pedem inferrem? egone in illum conventum venire sustineam, ubi nemo est, qui mihi sit ingenio, eruditione, doctrina, longo intervallo proximus, ubi ex illis novorum voluminum, tanquam novorum operum, architectis, nemo dignus est præ me, qui figat palum in parietem? sed jam malo, me ex meis scriptis, quam ex mea vel cujusquam oratione, noscatis. ea enim propediem sum editurus, quibus lectis, scœnum dicetis alios esse oportere, præ ut eorum divinitas quæ afferet. pudet dicere, sed dicendum est tamen, vincent gloriam omnium superiorum; nihil in eis mediocre, nihil usitatum, nihil commune invenietis, sed omnia summa, omnia nova, omnia ex ingenii mei acumine magnitudineque deprompta. dic, ut audeat, ex sciolis illis, ad ea quisquam accedere: profecto infinitate doctrinæ, tanquam fulgore, perstrictus

refugiet, vel desperatione debilitatus, omnem simul discendi scribendique voluntatem abjiciet. Quid multum moror? quemadmodum de acipensere dixit Pontius Scipioni, qui multos ad eum piscem erat invitaturus; mea scripta paucorum hominū sunt, quorum fama compulsi viri doctissimi ac domi suæ nobilissimi ab ultimis orbis terræ partibus ad me recta venerunt, ut mecum amicitias jungerent, ut mea perlegerent. qui, duobus vel tribus lineis lectis, continuo exclamarunt, O divinum hominem! ô dignum, cujus causa tam multos, ac prope innumeros, itineris labores, ac pericula susciperemus! Tu quidem, inquit Paulus Æmilius, oratione tua me simul incendis ac deterres, invitas ac rejicis, vocas & expellis. nam eximia ista scriptorum tuorum pulchritudine, quam memoras, sentio me vehementer impelli ad legendum; rursus, ingenii mei tenuitatis conscientia retineri: nam vereor, si in ea inciderim, ne in iis sciolis, de quibus commemorasti, inveniar, ac verbum prorsus nullum intelligam. Scientiam vero regendæ Reip. subjicit ille, quis me rectius est affecutus ac plenius? multæ Respub. multa Regna, stant hodie, meis præceptis institutisque servandis. quam multi Reges & Tetrarchæ, à me admoniti, gubernandæ Reip. formam mutaverunt! nonne eorum ad me oratores fere quotidie noctu conveniunt, ut meam, de rebus ad salutem & incolumitatem Regum suorum pertinentibus, sententiam exquirant? verum, ita interdum sunt molesti, ut meo non liceat dare operam negotio, at non parum sæpe, mei quoque ipsius rationem me habere, contingit: nam cum, scribere aliquid aggressus, si ab eorum aliquo interpellor, jubeo eum in proximum cubiculum secedere, ibique tantisper manere, donec vel orationis vel carminis, quod laborat in fine, sententiam expleam. quid? Regis Nicephori adventus, qui erat aliis formidabilis, si in Eudemiam, ut constituerat, victor irrupisset, mihi uni jucundus accidisset: nam eram illi in honore & gratia, quod sæpe meas cartas legisset, meæque vim doctrinæ sapientiæque admiratus fuisset: tum magna mihi necessitudo cum eo intercedebat, qui erat Regi à secretis, ejusque consiliis intimus. nec mirum est,

tam incredibili meum pectus sapientia esse completum:
 ab optima enim schola optimisque magistris profectus,
 in orbis terræ quasi theatrum prodii: etenim duobus
 summis viris, atque dignitate principibus, navavi ope-
 ram juvenis; quorum alter, cum plurimum sciret, id
 etiam ab omnibus sciri & prædicari cupiebat; alter ve-
 ro, cum nihilominus sapientia doctrinaque præstaret,
 id non tam celebrari quam ignorari malebat. Interpel-
 lavi hoc loco, ac, Tibi, inquam, libenter operam da-
 mus; sed vides, ut pene nudi sumus, ac *matutina parum*
cautos jam frigora mordent. nam quo tibi advenienti cele-
 rius obviam iremus, vix tunicæ sumendæ spacium ha-
 buimus. mitte nos, amabo, ut calceos pedibus, & hu-
 mero pallium demus, ut ora manusque lavemus: vel,
 si nos audias, ire hercle melius est te intro, & nobis-
 cum una diem hunc frangere. Non tantum, inquit
 ille, est ab re mea ocii. nam, quod pene oblitus fueram,
 dandæ mihi sunt duæ duobus potentissimis Regibus,
 de rebus maximis, epistolæ. quamobrem jubeo vos
 valere. Nos quoque, subjicimus, Te validum atque in-
 tegrum esse cupimus. sed quodnam tibi nomen esse di-
 camus? Suffeno, inquit ille, est mihi nomen. Suffene
 igitur vale, & caput istud tuum magnum ac laudabile
 iis Regibus ac Rebuspub. serva, quibus maxime est opus
 te salvo. Omni igitur molestia, ejus abitu, levati, su-
 spicari cœpimus, num hic ille esset philosophus, qui
 olim Rhetoricam, Physicam, Geometriam, atq; omnes
 artes, in tabulis descriptas, & tanquam coloribus ex-
 pressas, se esse nobis daturum pollicitus est. atque; Tam
 verum est illum esse, inquit Paulus Æmilius, quam me
 vivere. sed jam ad corpus curandum eamus, censeo. Ve-
 rum, dum calceos induimus, dum cæsariem pectimus,
 dum manus lavamus, ecce tibi, venit ad nos quidam fa-
 miliaris noster, qui magnam se Neptuno gratiam habe-
 re ajebat, quod salvum à se & incolumem amisisset: ab
 ea enim insula se redire, in qua prætor ille, de quo su-
 pra commemoravimus, ob severitatem judiciorum cla-
 rus ac nobilis, jus dicebat. Etenim eo omnibus velis re-
 misque contenderat, ut pecuniam, cujus jam dies adve-
 nerat, à potentiori debitore sibi numerandam exigeret.

nam statuerat, si eo pratore non exegisset, nunquam se eam esse visurum; neque sua spe fuisse deceptum, quod totum, quod debebatur, ne nummo quidem uno minus, retulisset. Nos adeptam illi victoriam gratulamur, atque amice admonemus, ne posthac cuivis temere, potentiori præsertim, pecunias credat. At non minore, inquit, erat opus auxilio. Etenim superbus ille, non modo, debitam mihi pecuniam se redditurum non esse, jactabat, verum me etiam verbeream ex homine statuum effecturum minitabatur. At si pergis, inquit, molestus esse, nunquam cuiquam largius præbita sunt publicitus ligna, ut tibi præheri senties. Ego tamen, ab amicis sublevatus, me admodum animo non demitto, sed Prætorem adeo, rem narro, tabulas profero, quibus jurejurando devincta debitoris mei, sub testibus, fides continebatur; contumacia ejusdem verba ac minas expono. Ille, Bono sis animo, inquit, mox tibi damnatum cogam ingratiis, quod debeat, reddere. Simulque ad viatorem conversus, I, inquit, hominem conveni, eique meis verbis nuncia, ut tecum simul veniat ad me. nec in se quidquam sit moræ: ita mihi rem esse dicito. Qui repente, vocatus, accurrit. norat enim ingenium Prætoris, qui suum imperium deferi abjicique non patiebatur. Quem simul Prætor ut vidit, continuo (credo, ut rem mihi magis expeditam daret,) tantundem pecuniæ afferre eum jubet, quantum mihi debebatur. Ille, quo gratiam à Præторе iniret, existimabat enim, id mutuo à sese posci, domum, avibus ac ventis citius, advolat, pecuniam accipit, desert, delatam Prætori adnumerat. Prætor à me illam auferri, & simul caveri jubet, amplius, eo nomine, neminem, cujus petitio sit, petiturum. Ille, cum jam paratus esset clamare, immo cum vim sibi fieri diceret, atque homini, domi suæ cum primis nobili, peregrinum, tenuem, obscuroque loco natum anteponi, quem semper ipse contemserit, vix hominem duxerit, nec ipsum, ad persequendum, tam audacem ac tam vehementem fore existimaverit, Tace sis, inquit Prætor; ad eamne rem fumosas majorum tuorum imagines habes, ut per eas æquitatem communis juris transeas, ut tenuiorum fortunas tuam esse prædam velis,

ut

nt, bona sua repetentium, libera corpora fustibus, servorum more contrundas? at bene tecum agitur, quod te, quantum potest, in remotissimas insulas deportari non jubeo. verum unam hanc noxiam mitto: at si aliud unquam admiseris tale, de te mihi, securi, supplicium dabitur. Postremo, aliis verborum contumeliis male acceptum à se dimisit. Et sane, violentus ille, qua est contumacia, quod verbis interminatus fuerat, re perfecisset, nisi Neptuno me credidissem; atque ejus beneficio celeriter essem in has oras advectus. Sed interim cum apud Pratorem expecto, dum meus creditor veniat, ac pecuniam afferat, unam atque alteram controversiam, maxime perplexam & implicatam, suo illo admirabili artificio diremit. Aratorum apud eos homines numerus ordo est longe honestissimus, & quoniam Reip. magno esse usui existimantur, plurimis honoribus ac præmiis afficitur, quorum illud est præcipuum, quod iis unus, summo cum imperio ac potestate, præficitur, apud quem, quod sibi quisque ab aratore deberi contendit, repetat lege atque judicio, sive causæ sint criminum, sive in jure civili versentur; neque huic, ut ceteris judiciis, sorte datis, certa lex præcipitur, quam in judicando sequatur: verbi causa, Si patet, Lucium verberasse, vel occidisse Titium, condemna eum. Sed nulli formulæ adstrictus est, quomodo apud vos senatus, quomodo Princeps, quomodo olim populus, in cujus locum Princeps successit. itaque deprecationi est apud eum locus. quod genus causæ à judiciis repelli debere plerisque videtur, ubi crimen, non confessione, sed inficiatione repellitur: at potest apud eum sic agi, ut loquitur filius ad parentem, Ignosce judex, erravi, lapsus sum, temere feci, pœnitet, ad clementiam tuam confugio, delicti veniam peto, ut ignoscas oro; non peccabo posthac nunquam. quo fit, ut quemadmodum, pro peccato magno filii, paululum supplicii satis est patri, ita etiam capitali aratoris delicto, levis quælibet pœna judici illi satis magna videatur. Unus igitur ex hoc aratorum numero, nulla fere de causa, furem gladio transverberatum, ad plures transmiserat. ne multa. ejus nomen, suum ad judicem, deferitur: ibi ille accusatur, testes in eum dantur;

nec cum haberet quid responderet, res enim erat manifesta, nec erat locus inficiationi, fecisse eum videri pronuntiatur. Quid poenæ constitutum in eum fuisse existimatis? Non aliud, nisi ut ne per annum araret. Erat ei, quem occiderat, frater, itidem futor; hujus ille sutrinam quotidie obambulare, præter ejus oculos ingredi, ludos eum facere, ac verborum aculeis fodere. In tot ille injuriis cum aliquandiu se forticulum præbuisset, demum victus, à Prætorè quæsitum auxilium venit. cui ille, Quid tibi vis faciam? nihil mihi juris in eo est, ejus ad judicem ambula, eoque tuas querimonias defer: ille enim solus hominis insolentiam potest poena judicioque constringere. Multum sane, inquit ille, profecero; quin ultro irrisus abiero. At tu, subdidit Prætor, nimis nihili homo es, cui nihil venit in mentem, quo te hac molestia in perpetuum liberes. Ille hac prætoris voce erectus confirmatusque, Iam, inquit, teneo quid agam; jam faciam, ne impurus ille arator, impune, indignis me modis irriserit. nam si hodie, ut solet, ludificaverit, nunquam ad solis occasum vitam produxerit. Verum, dum consilia ejusmodi sibi in animum advocat, atque huic, de homine interficiendo, palmam dat, ecce qui Orco destinatus fuerat adest, ac, more suo, cubito futorem impellit, dictis exagitat, lædit, irridet. Ille jam nihil verbis esse locum existimans, secum, Quid cesso, inquit, quod cogitaveram, aggredi, strenueque perficere? Eademque opera, pugionem educens, ejus lateri totum capulotenus infigit. Fit continuo concursus hominum, & clamor: comprehenditur, vinctus ad prætoris tribunal adducitur. Prætor, quid negotii sit, quærit. Accusatores, Facinus indignum, clamant, hic scelerosus, impurus, tantum animi habuit ad audaciam, ut aratorem unum è medio sustulerit, hominem ita utilem Reip. atque manifesto in facinore deprehensus, tuum in conspectum adducitur, ut, causa cognita, supplicium de eo quam æcerbissimum sumas. Quærit Prætor ex eo, num tanto se facinore obligasset. Qui audacter confidenterque adstans, Non ita, inquit, apud te, Prætor, verba faciam, ut solitum est à reo ad judicem agi, Non feci, non cogitavi, falsi testes, fictum crimen: immo, Lap-
sus

sus sum, feci, hominem occidi, atque ejus morte maximas & innumerabiles injurias ultus sum, quibus ab eo fueram laceffitus: etenim, non satis habuit, fratrem mihi unicum atque carissimum, ferro necare, sed totos etiam dies, ante sutrinam ineam obambulans, non cessabar, modo sibi digna, mihiq; indigna, in me dicta congerere, modo genu vel cubito ictum me pene ad terram affigere, modo scurrilibus jocis ludos omnibus facere: quibus contumeliis impulsus, atque adeo ad eas ulciscendas attractus, & simul, ut ostenderem, me non foeminam esse sed marem, quando ille dedita opera malam rem quæreret, induxi animum, eo illum infortuno mactare, quo fratrem meum affecerat. Tum Prætor, se esse iratum, simulans, Itane, inquit, pessime, legirupe, parricida, sacrilege, ausus es unum ex aratoribus vita devolvere? jam te ulciscar probe, jam tibi condigne, pro tuis meritis, gratiam referam. Atque ab accusatoribus petiit, quænam exempla edita fuissent in eum aratorem, qui fratrem illius occidisset. Nulla sane, inquit, alia, nisi quod jussus est, per annum aratione desistere; quæ pœna apud nos maxima existimatur. Optime, ait Prætor. Tum ad reum conversus, quæsit ex eo, quoniam se artificio tueretur. Qui, sutorem se esse, respondit. Sutor es? inquit Prætor; jam jam periisti: eja igitur, quandoquidem arator, qui fratrem occidit tuum, magnæ, singularis, ingentis pœnæ loco, prohibitus est, per annum arare; tibi quoque prohibeo, ne, annum integrum, ad sutrinam accedas, neque calceos cuiquam, quam velit sit nobilis potensque, concinnes. His actis, quæsit ab accusatoribus, num satis exempli in illum improbum statutum esset, num ipsis, hoc illius supplicio, factum esset satis; jam vero, quisnam erit posthac tam sceleratus, tam audax, qui tanta pœna constituta, sustineat aratori manus afferre? Itaque sutor incolumis, magna omnium cum voluptate, dimittitur, atque ex reis eximitur: aratores, non solum sibilis, sed etiam convicio exploduntur. Vix illi è jure excefferant, cum mulier ingreditur vidua, lacera veste, scissis genis, solutis crinibus, querens, clamans, Prætoris fidem implorans. Cui Prætor, Quid negotii est? ait; quid affers?

affers? Vim, inquit illa, metum, contumeliam, curam, jurgium, atque inopiam. Vnde, ait Prætor, tantus hic tibi thesaurus mali advenit? Ab homine, inquit illa, fortunato ac nobili, qui cum, me rei totius ignara, filia meæ virgini vitium obtulisset, atque à me esset in ipso pene flagitio deprehensus, ne clamores tollerem, ne cognatorum, atque adeo popularium fidem implorarem, lacrimans, orans, obsecrans, induxit me, ut sibi ignoscerem; quod persuasisset amor, saturitas, adolescentia; fidem dans, ubi eam vellem nuptum dare, ducentas se mihi minas numeraturum; atque aliquot post dies, cum ego instarem atque urgerem, sua manu syngrapham scripsit. ignotum est, tacitum est, creditum est: denique decrevi egomet quoque facere, ne, si populus rescisceret, ad damnum etiam admigrarent infamiae: sed dii, familiae nostræ omnino non irati, honestam filia meæ condicionem obtulerunt, adolescentem videlicet, modicis quidem opibus, sed probum ac strenuum. is venit ultro ad me, rogans, gnata meam sibi uxorem ut darem. placuit condicio, sponendi, ac doti viginti illas minas dixi, quas iste ex syngrapha sua debebat. venio ad eum, quid sit actum enarro, ut pecuniæ promissæ faciat copiam rogo, quo sponsa quamprimum in viri manum conveniat. ille iratus, negare, quidquam à se mihi deberi, præter malum magnum atque maturum; tum innumeras innocenti mihi dicere contumelias, deinde inimitari, ni quantocius suo è conspectu properarem abire, se jam sementem mihi in ore facturum, pugnoscque consitutum; postremo addere, si pergerem molesta esse, se sædo mihi stigmate faciem deturpaturum. ego ejus verba ac minas nihili pendere, freta æquitate tua, ac syngrapha, qua satis mihi filiaque meæ cautum esse existimabam; ac nihil mihi prius faciendum duxi, quam ut cognitorem aliquem pararem, qui inficiatori illi, in eo nomine, litem intenderet: atque eum invenio, quicum olim magnus viro meo usus consuetudoque intercesserat; syngrapham ostendo. qua ille perlecta, Nisi, inquit, aliunde argentum depromas, quod filia tuæ des, prorsus ex hac syngrapha ne nummum quidem unum potes abradere: tota enim est nugatorie scripta: nam ad id,

id, quod promittit, testes, suos coleos adhibet. quo audito, tum ego lacrimis ac voci non parcere, queri, ac lamentari fortunas meas, cælum atque astra crudelia dicere, ac cogitare, quo potissimum mortis genere mihi lethum consciscerem. cognitor, ut me desperatione exanimatam videt, misericordia cominotus, conatur jacentem meum animum erigere, & in spem cogitatione inque meliorem inducere; & simul est auctor, ut homini dicam impingam: sæpe enim fieri, ut res dubias, egenas atque inopes consilii, deus aliquis, vel casus, certas atque opiparas reddat. pareo; atque dies est hodie, quo die sortiri dicam, ex lege, debeas. Prator sane cominotus, Nihil fortitione opus est, inquit; ipse mihi causæ istius cognitionem attribuo. Ac circumspiciens, videt nugatorem illum in turba; vocat, acprehendit hominem solum, interrogat, num quid cuiquam promiserit. Negat. Tum Prator jubet syngrapham inspicere, ac, Cognoscis, inquit, manum tuam? Ille non est ausus inficiari; atque ait, Agnosco. Quo igitur ore, subdit Prator, negabas, te quidquam cuipiam esse pollicitum? Atque, ut ejus tentaret sententiam, Quid tibi animi est? inquit, visne promissa persolvere, an non? Mihi quidem, ille, certum est, ait, nihil dare; insanit profecto mulier; si credit, ex hac syngrapha se posse uno saltem nummo locupletiores evadere. Tu igitur, me vivo, Prator ait, quod est à te promissum, non reddas? Minime, ait; non enim æquum est, quod per jocum est actum, velle in serium convertere. Itane, pessime? in re seria jocatus es? tibi non creditur: hoc de testibus exquiratur oportet. atque, Heusdum liCTOR, inquit, sublimem hunc, quantum potest, in carcerem rape; ibi quæstio de testibus habeatur, hoc nimirum modo, ut colei, fune perquam arcte devincti, in sublime trahantur; certum est enim, experiri, num possim ex eis verum exsculperè, utrum vide licet res acta sit joco vel serio. at scin? tantisper pensiles maneant, quoad, quantum puellæ, quam vitiavit, deberi judicatum fuerit, tantum exsolvat: magis enim è re sua esset, si rem hanc sine testibus egisset: nam testibus, corporis pondere, avulsis, ac futuris pro uva pensilibus, intestabilis in perpetuum vivet. Vbi ille miser,

quæ

quæ futura in ipsum essent exempla, percepit, multis cum lacrimis, ac miserabili oratione, orare, obsecrare, obtestari Prætorem cœpit, ut mitius cum ipso ageret, nec tantam in se vim mali pateretur irruere, sed aliam illi multam irrogaret, ac pecuniæ, quantum vellet, imperaret; se enim esse paratum, in præsentia, quidquid iussum esset, exolvere. Ipsa etiam vidua, prout animi mulierum proni sunt ad misericordiam, orabat, ne tantopere sæviret, sibi satis pœnarum esse, si solvat, in eo quod promiserat, fidem. Prætor simulans, se iracundiæ suæ conatum, mulieris deprecatione, sedasse, Magnam, inquit, viduæ isti gratiam habeas; nam absque ea si fores, paratam tibi pestem non effugisses, sed jam, coleis alligatus, per corpus penderes. ac, ne existimes, te tantum hoc flagitium impune ablaturum, utrum vis eliges, aut hujus filiam tecum matrimonio junge, vel talentum eidem magnum, dotis nomine, numera. Adolescens, cum rem sibi melius cecidisse, quam ratus erat, existimaret, atque ab uxore ducenda abhorreret, talento cum Prætore decedit; quod, à trapezitis scœnori sumptum (non enim tum illi pecunia numerata, sed tantum in nominibus erat,) mulieri sine ulla dubitatione persolvit. Atque eodem pene tempore, pecuniæ, ab adversario meo mihi debitæ, adferuntur. quibus acceptis, & ingentibus Prætori gratiis actis, conjeci me protinus in pedes, conscensoque navigio, omnibus diis, ventis, & hominibus operam dantibus, huc sum devectus. Prætorem, inquit Paulus Æmilius, elegantem narras. profecto si sic essent prætores omnes, non tot locis, ut nunc est, fides esset angustior, & creditæ pecuniæ, si non amore virtutis, saltem pœnæ metu solverentur. His dictis, simul una omnes imus in forum, sed alius alia de re, nos animi tantum causa, ut amicos conveniremus, ac de iis, quidnam esset novi, sciscitaremur. Ac primo juvenem aspiciamus, quem multi ambiunt, circumstant, advenisse gaudent; nos quoque accedimus, ac de fortunato homine ac nobili, Megalobulo nomine, aratorum locupletissimo, sermonem haberi comperimus, cui ille navaverat operam diligenter. quærebant enim, ut valeret, quid rerum ageret, cur ipse ab eo discedere constituisset,

apud quem tanto esset in honore & gratia. Vt omnes, inquit, illum dii deæque perdant, jactatorem, nebulo-
nem, ingratum: non, hercle, verbis dici potest tantum,
quantum revera meam illi operam, diligentiam, indu-
striam, studium, suis in rebus omnibus præstiti. ut ma-
lus mihi verba dedit! ut me vana spe ductum illudit! ete-
nim, non semel sed millies, cum mihi gratias ageret,
cum me, ne quiescerem, neve defatigarer, oraret, locu-
tus est ita: Eja age, impiger, strenue, jam prope est,
ut egregio ac singulari aliquo munere, amoris fideique
tuæ gratiam referam; jam ostendam, qui vir sim; jam
tibi perspectum erit, quantum meritis tuis tribuam. Ve-
rum, die quodam, cum preciosum illi munus attulissem,
quod sperarem, saltem fertiles eum agros imitaturum,
qui multo plus reddunt, quam acceperunt; ille, quasi se
meorum in se beneficiorum mole premi opprimique
sentiret, quasi desiderium referendæ mihi gratiæ diutius
ferre non posset, ad armarium accurrit, atque inde ve-
terem, cariosum, ac putridum mustaceum extrahens,
ingentis cujusdam muneris loco, mihi detulit, ac, Vide,
inquit, si promissi mei sim memor, si facta dictis respon-
deant: mori malim, quam desiderari à te fidem meam.
cape hunc igitur, & quotidie mane, dum surgis, fru-
stulum ejus sume, ac mei memor vive. Nec mora, sese
è conspectu proripuit, modestiæ scilicet causa, & quæ
pudori suo confuleret. non enim potuisset non erubescere,
cum me, pro tanto munere, ingentes, immortales
sibi gratias agentem audisset. Tum omnes, O liberalem
hominem! exclamant; ô magnanimum! ô munus egre-
gium, ac principe viro dignum! fuit illud quidem levi-
dense; ut dicitur, & crasso filo. Interea rumor tota ur-
be percrebuit, Icosippum, à prandio orationem esse ha-
biturum, commotum, ut ajebant, tetricorum quorun-
dam simulata atque ridicula religione, qui, cum ipsi
sint flagitiis omnibus cooperti, offensi erant in eo, quod
in quodam opere, quod ediderat, flagitiosi cujusdam ho-
minis factum, sane ridiculum, lepida atque jucunda nar-
ratione exposuisset, vel potius ante oculos posuisset. ita-
que dicebatur jocis facetiisque, magis quam aliqua ma-
jore vi, eos male verberaturus. Nos ejus audiendi in pri-
mis

mis cupidi, rogamus, ubinam hæc esset habenda oratio:
 respondent, In theatro; sed illuc mature accedatis oportet, si est in animo sedere, nec placet loca omnia obseffa invenire. nam huic oratori contingit, ut, cum auditum sit, eum esse dicturum, concursus, audiendi causa, tota urbe fiant, loci in ordinibus occupentur, compleatur theatrum. Nos gratias agimus, & postquam, ociose res novas perquirendo, sermonibus multorum operam dando, voluptatis abunde percepinus, cujus causa in forum processeramus, cumque jam meridies videretur accedere, nos domum inde recipimus, & Gallonium invenimus; qui arcubus & sagittis, quæ domino suo coëmerat, aliisque rebus, convasatis, profectionem in posterum diem ornabat. Itaque, quo attemperate, ad Icosippum audiendum, veniremus, jubemus lectos statui, sterni, cibus instrui, aquam manibus dari. Itaque nos lectis commendamus, accumbimus, prandemus. cum autem à prandio satis quievisse visi sumus, surgimus, ac rogamus Gallonium, ut, quod commodum suo fiat, ne gravetur, nobiscum ad theatrum accedere. cumque ille se non nolle dixisset, eo comitati, multo illuc inaturus; quam fuerat necesse, venimus. nam vix pauci sessum accesserant. itaque jam nos cœperat celeritatis nostræ pœnitere. quid enim ibi tam diu ociosi sederemus? num, ut somno, qui jam sensim obrepebat, indulgeremus? at id non erat neque salutare neque honestum. At Gallonius, quo nos ab eodem vindicaret, cœpit variis ac jucundis sermonibus oblectare, & in primis, solemnem illam ludorum celebritatem in cœlum efferre, qua, tota illa civitas, ob regem Nicephorum interfectum, exultabat. atque, Ex omnibus, inquit, ludis, quibus interfui, placuit mihi vehementer lepidum Poëtæ cujusdam commentum, qui, ut Regem sacrorum, Humanum, id est illi nomen, atque apes, familiæ ejus insigne, laudaret, induxit in scenam Aristæum, qui, ut est apud Virgilium, devinctum catenis Proteum adducebat, ut causam ex eo apud defunctorum exprimeret; atque inde occasione accepta fecit, ut Proteus, multa de Humano, multa de Mellito, fratris ejusdem filio, multa de agro Sabello, in quo prædia atque oppida sane non pauca possidet, multa

multa de futura apum gloria, fausto vaticinio, divinitus caneret. Hanc eandem fabulam idem poëta, qui in actus deduxerat, in breve carmen, heroicis versibus comprehensum, transtulit; cujus exemplum aptud me residet, prolatumque, mihi legendum ac describendum tradidit. Sed ejus legendi partes eidemmet Gallonio, qui illud sapius percucurrerat, in præsentia tradidimus; qui, clara atque suavi voce, sic orsus est legere,

*Stringebat validis religatum Protea nodis
 Pastor Aristæus, matris præcepta secutus,
 Dulcibus, heu, apibus morboque fameque solutis,
 Sciret uti, cujus premeretur numinis ira.
 Vel quis apes celeri raperet, sua munera, morte.
 Namque illum voluit Neptunus singula vatem
 Nolle, nihilque catum, quod sit fueritque, latere,
 Quidve ferat properans venturi temporis ætas.
 At Proteus, nequidquam expertus cætera, tandem,
 Multa fremens ira, tumido sic litigat ore.
 Qua te agitant furia? vel quis deus, improbe, nostros
 Iussit adire focos, artusque onerare catenis?
 Dic; tibi quid nostris debetur sedibus, hospes,
 Aut hostis potius, nectis qui vincula capto?
 Dic, age; & innocuum laqueis simul exue collum.
 Ut tibi nempe loquar, quid vestris me applicet oris?
 Inquit Aristæus, vincis ut membra resolvam?
 Deciperis; non præcepit mihi talia mater:
 Desine velle; tuus labor est mihi dicere; tu scis,
 Tu scis, ô Proteu, scopulos quid jussit ad istos
 Tendere me, lapsis quesitum oracula rebus.
 At tum Carpathius, Neptuni munere, vates
 Sic ait, irarum fluctus sub pectore condens:
 Vera quidem narras, non est me fallere cuiquam;
 Tristis apum jactura acri cor incoquit igni,
 Quas tibi præripiunt offensi numinis ira,
 Et dolor extinctæ Eurydices: miserabilis Orphem
 Cladibus his lenit miseranda fata puella,
 Qua tua præteriens volucris conamina cursu;
 Connubio intactum stabili quo servet amorem,
 Occidit, in talum serpentis dente recepto,
 Et nova sub Stygios penetravit nympha recessus.*

Talia caruleus dum vates ordine pandit,
 Sparsit Aristæus leviter vaga fletibus ora ;
 Et vidi & memini, dixit; nec concidit ulli,
 Quam mihi, flebilior : sed cur nunc sola vocatur
 Infelix in crimen Apis ? cur plectitur insons ?
 Mox, ait , expediam , vastum qui piscibus aquor
 Metitur , Proteus , dictisque petita resolvam.
 Sentit Apis funesta tue contagia culpa ,
 Quod tibi sit nimium cordi , quod summa voluptas,
 Quodque tua culmen supremæque premia laudis :
 Sed lacrimis , sed parce metu, desiste querelis ;
 Non erit, ut semper satis agitetur iniquis :
 Ætas præpetibus properat felicior alis,
 Qua modo , qua genus ingemuit, sobolemque ruentem,
 Regnet Apis veneranda , ipsis seque inserat astris,
 Tergemina fulgens radianti fronte corona.
 Hac rerum domina , inter cuncta superbiet orbis
 Oppida cultus ager , dulcis sua cura, Sabellus.
 Nam simul ac rutilas auro , radiisque superbas,
 Felici regione volans expanderit alas,
 Continuo viridi viduata gramine valles,
 Pingentur vario , bruma fugiente , colore,
 Aeriæque suis excussa frondibus ulmi
 Se in nitidas vertent facies, ac mella remittent :
 Tum ripis , fulvos inter viridesque lapillos ,
 Adnabunt nivei numerofo gutture cygni,
 Luce nova aetheriis fulgebunt sidera campis.
 Si Pomona tibi mites ostendat ocellos,
 Subdit Aristæus, nec tristes explicet unquam,
 Dic, quando tacitis cœlo labentibus annis,
 Æternis tantum continget munus ab astris ?
 Quoque magis libeat properantia promere fata,
 En tibi quæ strinxi fortissima vincula solvo ;
 Exple animum verax mihi nunc, lepidissime Proteu :
 Eia age, quid differs cupida sua gaudia menti ?
 Vincula sed postquam collo pedibusque superbis
 Demta videt , placido vates Neptunius ore
 Sic ait ; ô juvenum confidentissime, quamquam
 Non ita sis meritis de me, ut tibi debita morem
 Nunc mea vox gerat , at dicam, quo clausa voluptas,

Pectoris exigui qua frangere limina gestit,
 Libera communes abiens se fundat in auras.
 Tempore, quo fulgens latis Vrbs regia terris
 Excipiet solio HUMANVM, populisque jubebit
 Iura dare, & placidis Saturnia regna referre,
 Ille, inquam, Humanus, quo sospite rideat orbis,
 Inter qui triplicem ex auro gemmisque coronam
 Vincita geret viridi regalia tempora lauro,
 Fiet, ut emensis totis Apis aurea terris
 Aëra per liquidum fulgentes explicet alas,
 Nec per floriferos saltus, & amœna salicta,
 Iam thyma, jam cythisos carpat, casiasque virentes
 Impigra, sed subiens animoso pectore cœli
 Ardua sidereis redolentia floribus arva,
 Inde sinum referat divino nectare plenum.
 Quod si progenies fratris Mellitus adire
 Oppida dignetur, prisca de voce, Sabella,
 Quos regere imperio populos properabit Amoris,
 Quovis deflectet geminos, vaga lumina, soles,
 Arva licet canis rigeant viduata pruinis;
 Protinus egelidos pellent tepesacta vapores,
 Ac varios tellus educet verna colores,
 Lilia, narcissos, violas, atque alba ligustra,
 Magnamini HUMANI cernes tantum instar in illo.
 Talia facundo Proteus cum sunderet ore,
 Tristitia Aristæus curarum & amara levabat,
 Dulcibus alloquiis, neglecta tœdia vite:
 Abstersisque notis animi mœrentis, amœna
 Fronte ait: ô Proteu, fugiunt ut pectore cura!
 Grandia festiva redeunt ut gaudia menti!
 Perge ergo, atque alacris fatorum arcana reclude.
 Si curas animi vis hæc pulcherrima lucis,
 Nondum nata tibi, tempestatesque serenat,
 Excepit Proteus, quas tunc exorta nitentes,
 Cum late effundens radios illuxerit orbi,
 Ejiciet mentis tenebras! qua nubila pellet!
 Fronte renidenti quot fulmina mittet amoris!
 Musarum jam docta choris comitatus Apollo,
 Carmina disponit; jam latos relinquere saltus
 Preparat Aonios, fontesque, ac frigida Tempe;

Et celeri properare gradu, quo culta vocabunt
 Tum juga, tum valles arvum calumque Sabellum.
 Quas canere in gyrum, lataque agitare choreas
 Incipient, sparsis post candida colla capillis.
 Rustica Hamadryades, facilesque ad furtiva Napæ;
 Aut ubi nigra comas, hirsutaque vertice pinus,
 Delphica vel laurus, frondosaque myrtus opacam
 Nexilibus texant ramis subeuntibus umbram;
 Aut ubi distinguant vernantia floribus arva
 Tum rosa tum viola, tum purpurei hyacinthi!
 Tā iam non tulit Arcipotentis gaudia natus,
 Sed duplices inquit tendens ad sidera palmas:
 O utinam nentes fatalia pensa sorores
 Ante mea celeres non rumpant stamina vita,
 Nec prius eveniat me divum in templa vocari,
 Quam superum cura ac divis dignissima tellus,
 Illa decens fuerit promissa sorte beata.
 Tum me non Helicon teneat, non Thessala Tempe,
 Non fons, quem volitans excussit Pegasus ungui;
 Corripiam cursum nectam talaria plantis,
 Quo, mortalis adhuc, terrestria limina circum
 Ante diem capiam caelestis pabula vita,
 Quamque prius liceat, mensis accumbere divum.
 Ætherios ducam divini nectaris haustus.
 Acrior at Proteus juvenilia pectora dictis
 Talibus exacuit: quæ tum, inquit, pocula blanda
 Latitiae haurires, jam ex omni parte beatus,
 Cum, quæ nunc tenuis, fuscoque infecta colore,
 Florida Apis leni circumvolat arva susurro,
 Dadalea exceptum referens infecta liquorem,
 Tum formosa, ingens, auroque nitentibus alis
 Dulce canens, cali feliciter astra pererret,
 Vnde orbem complexa, suos ad lata vocabit,
 Expulsis late bellis, simul ocia cives.
 Sic intus superat cupidi mihi pectoris ardor,
 Cyrene genitus dixit, sic gaudia crescunt,
 Ut plane immitis jam sit mihi funeris instar,
 Non tenuem fidibus vocem sociare canoris,
 Atque Apis eximias ad sidera tollere laudes:
 Da mihi te facilem, Proteu, junctique canamus,

*Sirius arentes supra dum fulgurat agros,
 Sitque operis merces, operi tribuisse laborem.
 Audiat hæc Doris viridi de rupe canentes,
 Audiat & pelago Nereus, regnator aquarum,
 Mulcentes vacuas latis concentibus auras.
 Accipit hæc hilari Proteus data munia vultu,
 Atque Apis imperium, venturaque regna, nitenti
 Iunctus Aristæo, cecinit sic aurea cantu.
 Supremo dilecta Iovi, quem grata sub antro
 Parvisti Idalio, Curetum sacra secuta,
 Orbis in auxilium venies pro munere tanto,
 Teque fides, decus, ac virtus, & amœna voluptas,
 Et, qua se eripuit terris, Astra sequetur,
 Te duce, dira fames fœdaque examina tabe
 Atra lues fugiet, plenas ac nectare cellas
 Grata Iovi quercus, implexaque nubilus ilex
 Nectareos fundet succos, atque aurea poma;
 Nec jam prateriens sitienti fessus, ab amne,
 Ore bibet latices, dulci sed pocula lacte.
 Pieridum Phœbique decus, lux, maxima cura,
 Qua revoces cantu veterum miracula rerum,
 Ut sua silvestres currant ad carmina quercus,
 Eumenides stupeant, teneat tria Cerberus ora.
 His dictis, Proteus saltu se jecit in aquor.
 Pastor Aristæus materna in tecta recessit.*

Delectavit nos mirabiliter illud carmen, & quod ca-
 put est, à somno atque ab expectandi molestia liberos
 reddidit. Sed vix Gallonius ad ejus carminis calcem
 decurrerat, cum ita ruere hominum multitudo cœpit,
 ut minore vi impetuque torrentes iræ dixisses: ac dicto
 citius impleri sunt omnes, è marmore, sedilium ordi-
 nes: atque inter eos, qui serius venerant, ac frustra ses-
 sum properabant incedere, eum aspicimus, qui mane
 illo patroni sui liberalitatem euarraverat: & quia ali-
 quanto laxius sedebamus, in angustius nos ipsi spacium,
 alter alterum impellendo, contraximus, tantumque spacii
 reliquimus, quantum esset uni satis: tum vocatum eum
 ad nos recepimus. De quo Paulus Æmilius quæsit,
 num senex ille Megalobulus, qui erat ita ridicule par-
 cus in remunerando, pecuniæ inopia laboraret, aut in

magno aliquo ære alieno versaretur. Qui, Immo est, ait,
 longe ditissimus, atque in suis nummis neque terencium
 cuiquam mortalium debet: nam ex fructibus prædio-
 rum, quæ possidet, talenta magna auri tricena statim ca-
 pit; quorum vix bina ad vitæ necessitatem ac ad usum
 domesticum erogat. Ædepol, inquam, mortalem parce
 parcum prædicas. Sexcenta, ait ille, sunt, quæ inemo-
 rem; at illud memorabile de sua liberalitate exemplum,
 antequam huc me reciperem, dedit. Ingens eum cupi-
 ditas ceperat, symphonicos quosdam audiendi, qui ho-
 die laudantur in primis. hæc ejus cupiditas, eorum co-
 ryrhæo renunciatur: qui, pro eo, quod iste, ob munus
 quod sustinet, magno est in honore ac nomine, una cum
 symphonicis statim accurrit. at illi, iussi, ad miracu-
 lum canunt. sed, postquam tres horas, atque eo am-
 plius, misere illos exercitos habuit, pollucibili eos me-
 renda accipi imperat. nec mora, mustacei æque cariosi,
 atque ille, quem mercedem esse voluerat laborum, quos
 pro ipso fuisssem, afferuntur; his spiræ, ac pauca quæ-
 dam bellaria accedunt, quæ, annum integrum, in sua
 supellectile clausa atque constructa, tum primum ad as-
 spiciendam lucem excefferant: vinum etiam illis suppe-
 ditatur, quod aberat propius ab aceto, quam à vino: atq;
 ita saturatos & expletos domum dimisit. Coryphæus,
 qui eos adduxerat, nunquam majoribus sese tricis im-
 plicatum invenit. nam tumultuosissime pene ab illis op-
 pressus est domi, & compulsus, navatæ ab ipsis viro no-
 bili operæ mercedem efferre; quam, si tantulum inora-
 retur, se ab eo repetituros ininitabantur. Itaque, quo se
 à flagitatoribus illis molestis, atque etiam litium pericu-
 lis vindicaret, senas in singulos drachinas de suo distri-
 buit. At videte, si ille ariditate pumicem vincat, si steri-
 litate arenam exuperet. Postquam symphonicos à se di-
 misit, vocat œconomum, queritur, lamentatur, sibi rem
 periisse, se esse eradicatum. atque, Vndecim, inquit, dii
 plusquam est in cœlo deorum immortalium, illum per-
 dant, qui artem musicam invenit, quique per eam victi-
 tant: nam, si non esset hoc genus hominum, qui aërem
 venditant, quique pro aëre rem dari sibi solidam expe-
 tunt, non hæc mihi cupiditas in animum incidisset, vani-
 tas

tas mera , persolæ nugæ. o me fatuum , fungum , bardum ! dum me inanitatibus impleo , illi rebus sese opiparis farciunt. dii boni , quantum in se vini ingurgitarunt ! quantum rerum preciosissimarum in ventrem abstulerunt ! profecto hic illis dies luculentus illuxit , mihi niger emerfit , illis utilis , mihi damnosus evenit. illis amicus , mihi malignus ex orco eripit. ut ego libenter huic diei male facerem , si possem ! ut illi oculos eruerem ! ut mordicus nasum evellerem ? ilicet inusicæ arti , in maximam malam crucem. Ac finem querendi nunquam fecisset , nisi œconomus , qui pulchre illum nosset , alios de rebus domesticis sermones intulisset. Dum hæc loquitur , Icosippus adest , suggestum ascendit , surgit præco , facit populo audientiam ; ille hujuscemodi orationem habet.

Credo ego , auditores , expectari à me longam , atque omnibus verborum sententiarumque luminibus splendidam & ornatam orationem : sed vos spes ista deficiet ; atque , si ea huc gratia venistis , surgatis in oneo , & , qua venistis semita , revertatis. Eorum enim , in quos dicimus , temeritas ac stultitia , non altæ exaggeratæque orationis quasi telis feriri , sed salibus facetiisque elevari desiderat. Quamobrem pro ratione temporis , quod totum hilaritati tribuitur , brevi , jucunda , ac familiari oratione , vos delectare conabor. ac ne mihi sim in mora , ad rem ipsam aggredior. Ex omnibus hujus vitæ rebus , nulla minus firma ad consistendum res est , quam generis humani fragilitas ; neque ullus unquam sapiens , tanto cum plausu , vitæ cursum tenere potuit , quin aliquando , vel ad dexteram vel ad sinistram , de regione deflexerit. Ad hæc , si cui tempus , ætas , occasio , ad fallenda vestigia , tanquam limus subsederit , vel tanquam impetus , ad deflectendum , vim prope attulerit , quid mirum , si hunc errare vel labi contingat ? Satis officio , satis sibi ipse fecerit , si vel in luto totis vestigiis hædere , vel tota via errare , jucundum non duxerit , sed reducenti se ab errore , vel retrahenti à sordibus , manus dare non recusaverit. Verum ex omnibus casibus & erroribus , periculosiores graviorefque sunt multo , errores , & prolapsiones cordis , quam linguæ ; ani-

mi, quam sermonis. Hæ enim culpæ sunt temeritatis, illæ consilii; hæ levitatis, illæ cujusdam quasi immanitatis. Linguae extrinsecus sordes illinuntur, animo turpitudine intrinsecus additur: lingua, dum aliis voluptatem, nobis hilaritatem quarit, sæpe nolentes, quo minime cogitamus, abstrahit; animus, dum, quod incidit in mentem, vult, sese sciens volensque ad nefaria vitia, tanquam ad infames aliquos scopulos, impellit, ac frangit. At petulans, inquires, lingua non tenue corrupti est animi argumentum. ut enim lyra vel fides, concordibus inter se nervis, dulce & jucundum quid recinit, iisdemque discordibus, absonum & inconditum aliquid reddit: ita bene cordatus animus, nullam nisi ex virtute, nullam nisi ex optimis moribus vocem emit: contra intemperans ac pravus, turpibus ex verbis, tanquam ex discordi quodam sono præsertim agnoscitur. Vide, quam nihil agas. Ita fidium & animi, in voce cantuque reddendo, dissimilis est ratio, ut nunquam res duæ minus apte in comparatione jungantur. Non potest lyra vel fides, recte canendo, male convenientium inter se chordarum discordiam dissimulare; sed est necesse, ut ex earum ratione modoque pulsata sonum emittant: sola impuro animo, ut cantus discordibus nervis in fidibus, non respondet oratio. Non petam aliunde hujus rei argumenta, non abibo longius; in his temporibus, in his moribus versabor miseris ac perditis. Quid est tam commune, quam fidem fallere, promissa non facere, alterum blanditiis in fraudem illicere? Quæ omnia quid aliud, nisi ab improbo animo probam orationem proficisci posse, declarant? Quoties, cum lingua juratur, mens tamen injurata retinetur! quoties casta oratio, ad insidiandum pudicitiae virginum, matronarumque castitati, suscipitur! quoties ad evertendos fama, vita, fortunis homines, officii species induitur! Vidi ego, per simulationem amicitiae deceptos ac perditos, quos inimicitiae indictæ apertæque non læserant. Vidi ego præsidia longe munita pudoris & pudicitiae, quæ nulla vis ceperat, fictæ probitatis insidiis expugnari vincique. Quid multa? nullus ad captandos homines certior laqueus

queus immittitur , quam qui pudico proboque sermone contegitur. Hic, quia, joci causa, in ambiguum aliquod verbum delabitur, cum reliqua vita sit continens , timeatur, fugitur ; alter , qui non linguam ad unum verbum, sed manus ad quodcunque facinus tendit , qui non sermonem ad lepidum aliquod factum , quamvis dignum supplicio , explicandum innectit , sed mentem corpusque in omne genus libidinis , tanquam in lutum , demergit, quod castior ejus videtur oratio , amatur, accipitur. At nullum à faceto illo periculum imminet ; at contra magnus à probo isto , si diis placet , metus ostenditur: nemo, in libera illius oratione, rei suæ , vel pudicitiae , naufragium fecit; contra, in istius pudico sermone, multorum innocentium fortunæ, multarum ingenuarum castitas hæsit. Mirum , quantum hunc locum illustrat apologus ille de musculo, qui nunquam lare familiari suo, hoc est , domestici parietis rimis egressus , lucem aspexerat , cui, simul ac exiit, gallus & felis occurrerunt. felis, mansueta ac dormienti similis , quasi non vidisset, dissimulare, oculos interdum aliud convertere, locum non relinquere, nullam vocem dare : contra gallus summa cum festivitate , & maxima voce, accurrere, obviam eidem tendere, maximos ludos inire: musculus, ea voce ac forma perterritus , fugam arripere , in penitissimam sui parietis partem se conferre. forte domi aderat mater, cum sic fugientem eum aspexit, &, Quo te agis, inquit , fili ? quid est , quod te exanimatum video ? cui musculus , Mater mea, perii. mater, Quid tibi est ? ait; quid periisti ? cui tandem misellus ille, Egredienti mihi, inquit, domo , sit obviam , nescio quod animal , bipes, cristatum , plumis tectum, ejecta lingua, fluentibus buccis, ardentibus oculis, quod statim in me impetum fecit ; credo , ut integrum devoraret ; sedebat ex adverso aliud animal , pellitum , placidissimum , videre velles mater, vultu adeo mansueto , adeo venusto , ut nihil supra ; id non se loco movebat, sed oculos, modo graves, somno paululum dabat, modo instar siderum lucidissimos , alio detorquebat. cui mater, Quid audio? inquit, hoc est illud animal , adeo generi nostro infestum , de quo tibi sæpe narravi ; neque aliud quidquam illa man-

fuetudinis simulatione spectabat, nisi; ut te incautum opprimeret; contra, illud alterum, festivum ac petulans, effusissima illa lætitia ludos tantum jocosque tibi parabat. Felis similitudine, religiosus ille designatur, qui linguam quidem continentem habet, sed manus promptas ad quodcunq; facinus gerit; in galli vero protervia, ejus libertas agnoscitur, qui linguam patitur interdum longius excurrere, mores autem facile semper tuetur. At istuc, inquires, cordis linguæque dissidium nunquam sani hominis reprehensionem effugiet, cujus aures ab oratione, cum moribus dissentiente, immane quantum abhorrent. Bene agis; novi locum, ubi te jactes. nam istuc cordis linguæque dissidium, omnibus sapientibus merito semper fuit invisum. Sed duplici ratione, sermonem à corde discrepare, contingit. primum, cum probam orationem vita scèlesta, atque omnibus vitiis contaminata, subvertit. deinde, cum lascivum sermonem ratione modoque adhibitum, vita integra, interdum joci causa ac delectationis assumit. Primum acerrime viri boni insectantur; at prope silentio alterum obruunt. primum flagitiosum ac turpe; alterum humanum risuque excipiendum putatur. primum poena supplicioque constringendum; alterum impunitum ac liberum dimittendum esse censetur. primum execrandum; alterum in his etiam moribus expetendum videtur. postremo, in uno omnia insunt vitia, simulationis, mendacii, improbitatis, prodicionis, nequitiae; in altero vix tenuis quædam nota imprudentiae ac levitatis agnoscitur. Quid si homines gravissimi atque ab omnibus vitiis remotissimi, in hac sunt sermonis levitate versati? Mitto Horatium, Ovidium, quorum uterque obscenis versibus libros suos referat, & tamen alter pudicum se, ait, servatum

ab omni,

Non solum furto, verum opprobrio quoque turpi:
alter vero, Augusto Casari suam probare innocentiam cupiens, sic ait;

Crede mihi, distant mores à carmine nostro;

Vita verecunda est, Musa jocosæ mea est.

Mitto, inquam, hos omnes. M. T. Cicero, qui sibi homini in Rep. novo, nulla commendatione majorum instructo,

structo, sed tantum probitatis innocentiaque praesidiis munito, summos ad honores aditus patuisse confirmat, qui hoc praesertim argumento innocentiam suam omnibus probatam esse vult, quod se honoresque suos, tanquam in aliquo orbis terrae theatro, omnium oculis expositos habuisse putaverit, qui usque eo se probum fuisse gloriatur, ut semper omnia, quae iucunda videntur esse, non modo his extraordinariis cupiditatibus, sed etiam ipsi naturae ac necessitati denegarit; hic inquam vir, tam, suo iudicio, probus, tum alias saepe in orationibus suis, de obscenissimis vitiis, summa cum libertate disseruit, tum praesertim in secunda Philippica, improbissimis Antonii moribus exagitandis, ita repagula omnia modestiae perfringit, ut interdum me partem illam orationis pudeat aspicere. Quis integrior, quis castior, quis melior in Rep. civis Q. Catulo patre fuit? verum, si ex quibusdam epigrammatibus judicare de ejus moribus liceat, quod nefariae libidinis genus ab ejus vita abfuisse credendum est? Quid multa? Pisonem illum, qui ex incredibili in omnibus rebus temperantia, frugi cognomen invenit; nonne iis usum esse verbis in annalibus suis, veterum memoria testatur, quae à paulo verecundo homine sine rubore legi vix queant? At istorum omnium obscena oratio, non est paucorum commissa auribus, sed omnibus seculis tradita, non sparsa in breve nescio quod tempus, sed profeminata in orbis terrae memoriam sempiternam. Sed jam procedat in medium, non unus aliquis vir probus, sed ingens eorum numerus, non unius aetatis ejusmodi hominum conventus, sed multorum seculorum jam inde usque à Zenone magistro profeminata Stoicorum familia: cum istis non modo non esset concessum, corpus suum voluptatibus tradere, sed ne mentem quidem vel brevissimae earum cogitationi permittere, nullis tamen legibus obstringebantur, quominus obscenum quodcunque verbum, ubicunque opus esset, evomerent. Et quia infinitum esset de singulis dicere, unum eligam Catonem, in quem, quidquid ubique severitatis Stoicae fuit, tanquam unum in locum convenisse, multorum litterae tradunt. Hic vir egregius ac magnus, consentiens cum ea disciplina, quam pro-

fitebatur, esse voluit, nullum obscœnum verbum à se rejicere debuit, cum apud senatum, apud populum, perditos suæ civitatis mores execraretur. Quod si est ita, quid eum erat aspicere, qui cum strenuo virtute, cum abstimente innocentia certabat, ab ignavissimo quoque turpissimoque sermonis verecundia vinci? Quid erat tam admirandum, tam incredibile, quam videre, Catonem, quo nullum habebat in terris Iupiter spectaculum pulchrius, in conventu hominum honestissimorum, æque liberos habere ructus ac crepitus? Quid tam reprehendendum, quam eum, qui, partibus suis non semel fractis, nihilominus stetit inter ruinas publicas rectus, in rebus flagitiosissimis, suis nominibus appellandis, turpiter labi? Sed esse, quam videri bonus malebat. Iam vero, si omnem de rebus obscœnis sermonem, qui tamen habeat admistum aliquid leporis & salis, à quocunque hominum cœtu repellimus, licet comœdiam è theatris ejiciamus, fabellas proscribamus, satyram è mundo tollamus, quæ erubescendis cujusque amoribus & cupiditatibus, sublatis nominibus, evulgandis, salutem animis, voluptatem auribus quærit. Nempe, inquires, tuus hic sermo huc redit denique, ut nullis coercendam frenis, exultantem verborum licentia, esse linguam existimes. Non est ita, nimis interdum effusæ hilaritati veniam, non liberam impudentiæ licentiam, efflagito: facetos homines interdum, temporis causa, prope cum ratione insanientes, à calumnia, non, impuros, nulla de causa semper obscœnos, à flagitio vindico. Minus honestam orationem, honestis tamen verbis explicatam, auribus accepisti? non illico frontem contrahas, mentum intorqueas, objuraciones amipias; sed mores dicentis, ætatem, consilia, studium, præterea temporis rationem exquire. si probo quidpiam homini, tempore permittente, ac ceteris rebus non reclamantibus, excidisse comperies, exporrigere frontem, da te illi, hilarem lubentemque te præbe. At hic progressus est longius. At tu naturam, quæ illi præsidio deberet esse, in crimen & invidiam vocas. Omnino sic se res habet, ut quem natura non aptissimum finxit ad jocandum, is, si conetur, ad intolerantiam insanjat: cui idem contingit, quod a fello illi contigisse narratur,

qui

qui ut suis sibi blanditiis domini voluntatem alliceret, ita ut catellum facere viderat, anterioribus pedibus in sublime elatis, iisdemque in dominum demissis, totum os illi contudit. Neque hic tamen, ut asellus qui sic fecerat, fuste accipiendus est, sed propter tempestive delectandi voluntatem quam habuit, dignus est potius, cui severiorum supercilia, & nixa bacillo senectus ignoscat.

Dum hæc maxime loqueretur, assensiones multæ, admirationes crebræ consequabantur; ita multæ acclamantium voces, Pulchre, bene, recte, exaudiebantur, ut nulla orationis pars silentio præteriretur. ac nemo erat in ea concione, qui religiosis illis male non precaretur, qui non eos extinctos cuperet. Sed postquam dicendi finem fecit, à turba gratulantium pene est obrutus. nos quoque, quantum loci ac temporis patiebantur angustia, officium eidem nostrum benevolentiamque præstitimus; atque inde domum revertimur mœsti, quod, desiderio nostro celerius, à nobis Gallonius discederet. Is enim erat noster in eum amor, ut pars viscerum à nobis abrumpi, ejus abitu, videretur. Neque ullus erat relictus hominis retinendi locus. nam ille, qui ejus operas conduxerat, & à quo missus ad arcus coëmendos fuerat, litteris vehementibus revocabatur, quod diceret, innumeram fere vim avium toto cœlo pennas extendere, quæ certissima ejus præda essent, si ille cum arcubus & sagittis adesset. Gallonius, ad quem non minor, quam ad nos ex ea re ægritudo recidebat, Inveni, inquit, rationem, qua non ita celeriter à me distrahamini. quo mihi iter est, in publica totius civitatis lætitia, ob Regis Nicephori mortem, paucis post diebus referendi sunt omnes illi ludi, qui variis anni temporibus à Poliarchis populo dantur. illuc mecum veniatis censeo: capietis enim ab iis spectaculis voluptatem non minimam. Non tam ludorum amœnitas, quæ dicebatur, eosque spectandi cupiditas, quam noster in Gallonium amor, & jucundissima ejusdem consuetudo, fecit, ut nos cum eo ituros diceremus, & constitueremus. Itaque, sine ulla mora, amicis salvere jussis, & in primis Aristide, cui etiam pollicitus

citus sum , me litteras daturum , nos ad profectiorem comparavimus.

LIBER X.



Ostridie mane , postquam aurora illuxit , una cum Gallonio , ac paucis quibusdam mercatoribus , navim petimus , conscendimus , solvimus , vela damus , ac prospera usi tempestate , celerius multo , quam opinio nostra ferebat , optatum portum attingimus. E navi egressi , alius aliud iter arripuit ; qui in mercatura vertebantur , ad sua negocia , nos ad Gallonii ædes proficiscimur. At Gallonio nihil fuit prius , quam ut ad eum recta contenderet , cui arcus sagittasque coëmerat , eaque emtione , quam sibi feliciter evenisse arbitrabatur , animum eidem exple-
ret. Ut igitur ad Gallonii ædes pervenimus , paululum , ut opinor , nausea commotos , quod quidem ætutum abcessit , nos quieti tradidimus. At interea dum Gallonius se domum reciperet , ne expectandi molestia atque fastidio arriperemur , librum aliquem quærimus , lepide de rebus lepidis amcenisque conscriptum , cujus lectione omnis ab animo labor atque fastidium exigeretur. Sed dum multas librorum struices subvertimus , nec ullus adhuc liber nostræ cupiditati conveniens occurrit , audimus , vocari à janua Gallonium. respondemus , domi non esse : ac clara voce rogamus , ut , quisquis esset , ne gravaretur ascendere. obtemperat ille , scalas ascendit , seque nobis in conspectum tradit. Hic erat Aridus , Academicos inter non postremus , & Gallonio amicus in primis. Cui advenienti assurgimus , contra pariter ferimus gradum , conferimus pedes , salutem impertimur , in amplexum irruimus. ille quoque non minus perblande eadem nobis humanitatis signa , amicitiaque officia reppendit. Tum rogavimus , quænam illum ad nos causa attulisset. Ut , inquit , Gallonio , quem ab eo , qui ipsum in portu vidisset , rediisse accepi , tam celerem ac prosperam reversionem gratuler. Rediit ille quidem , dici-
mus ;

mus; sed ut navi egressus est, nondum deos penates salutatum advenit. nam voluit primum rebus domini sui, ut æquum erat, præverti: verum, mox huc eum adfuturum speramus. tu vero, nisi quid magis es occupatus, da te nobis, & interea dum huc ille se recipit, aliquid tuæ suavitatis imperti. Non fuit opus magna vi, ad hominem humanissimum retinendum. Itaque sellas poscimus, atque omnes simul assedimus. At Paulus Æmilius, ex oculis & ex ore, paulum eum perturbatum atque cominotum agnovit, atque, Nisi, inquit, nimis sim audax, quid, obsecro, istuc est tibi? quid commutatus est color? sollicitus mihi, nescio quare, videris. At ille, Ob cuiusdam mihi responsum, quod sane visum est arrogans, aliquantulum animo ægre est. dederat mihi vir quidam librum, quem ediderat, legendum; quem ego, quamquam magnis districtus occupationibus, legi. modo fit mihi obviam, ac meam de illo sententiam exquisit. cui ego, id quod erat, respondeo, eum mihi eloquenter ac docte scriptum videri. ille frontem contrahere, caput quassare, seque mihi esse iratum dicere. quæro, quainobrem. respondet, quod parce se, immo longe infra ejus merita laudassem. expectabat videlicet homo inflatus ac tumidus, dum ego expallescere, illacrimarem, dum clamore sublato dicerem, Non potuit melius hic; non suæ ætatis modo, sed vicit gloriam omnium superiorum. id quia à me non est factum, fortasse invidiæ, atque alienæ laudis odio, assignabat. tum ego commotus, nullum ultra verbum addens, in sua fastosum hominem stulticia reliqui, atque huc properavi, ut Gallonium inviserem, & quod mihi ægre est, apud eum evomerem. Tum ego, Nulla, inquam, ratione ab eo factum existimo, ut ex hoc tuo responso tantopere excandesceret. non enim à te potuit uberius ac cumulatus ornari. nam quæ major expectari poterat oratori laus ab homine ingenio, atque acri sui artificii aestimatore, præter hanc eruditionis & eloquentiæ? nimius hic, in laudando, veritatis tanquam excessus ac superlatio, non tam est probi atque prudentis laudatoris, quam stulti atque improbi adulatoris. At vereor, ait Paulus Æmilius, ne eloquentiam eidem tribuendo, multo plus dederis,

quam

quam ratio ac veritas ipsa largiatur. nonne, ut tu longe melius quam ego nosti, M. Antonius orator in eo libello quem unum sibi excidisse dicit, disertos scribit se vidisse multos, eloquentem omnino neminem? quod si neq; ipse sibi, neque L. Crassus, eloquens videbatur, ille visus esset quem laudasti? At, non sum ego, inquit Aridus, ille asper & durus, ut eloquens nihil esse putem, nisi quod in illam perfectam & exactam eloquentiæ formam includatur; verum ad eos etiam detorqueri id nomen posse existimo, in quibus, si non omnes, aliquot saltem oratoriæ virtutes eniteant. hætenus laudare, humanum atque etiam laudabile arbitror; ceterum divinitatis, aliisque inanissimis titulis afficere ea, quæ ferri tolerarique vix possunt, insani vel nihil plane intelligentis esse, fateri compellor. At non video, excepit Æmilius, quid hæc immodica, atque altius quam par est exaggerata laudatio iis, qui ornantur, utilitatis apportet. immo, ut experientia docuit, multis sæpe obsuit plurimum. etenim nulla res alia ita properantis cursum ad eloquentiæ palmam sistit ac retinet, ut hæc vitiosa & inutilis laudatio, cui, vix fieri potest, quin ille, qui sic inflatur, assensionem præbeat suam. quid ergo? continuo studium remittet, laborem imminuet, neque aliud ultra esse putabit, quo progredi possit. si quis, dum acriter in cursu versatur, à corona spectantium exaudiat, Vicisti, ad calcem pervenisti; quid ille agat, præsertim si sit loci, quo sit decurrendum, ignarus? nonne cursum supprimat, gradum sistat? nonne secum ita loquatur, Cur ego laborem inanem sumo? cur meos rumpo ramices, decurso jam spacio? Ita etiam, qui in hoc quasi curriculo eloquentiæ doctrinæque versantur, si crebris acclamantium vocibus excipiantur, summos eos artifices & magistros deosque vocantium, periculum est, ne, decepti, studium remittant, industriam imminuant, ac desistant ante decursum. Similis, ego subjicio, incommodi ratio obstitit atque adversata est Hortensio, summo oratori ac palmæ jam proximo. erat in Hortensio admirabilis ingenii facultas; sermo, cum concitatus ac vibrans, tum concinnus atque facetus; sententiæ dulces atque venustæ; illud acre ac severum, nec tam fuco puerili illitum,

tum, quam veritatis colore asperum dicendi genus aberat. verum, quia illa dicendi ratio concinna atque venusta, popularierat assensionem in primis accommodata; fiebat, ut clamores & admirationes efficeret. quo vulgi iudicio captus, tanquam si non esset aliquid maturius &, ut ita dicam, senius, quo prima illa veluti eloquentiæ ætas pervenire posset, studium & exercitationem, quæ sunt pabulum eloquentiæ, remisit, sequè eo deduxit, ut, qui diu princeps oratorum, aliquando ænulus Ciceronis, existimatus sit, demum, quoad vixerit, eidem ac multis aliis inferior extiterit. ut satis appareat, quantum ad effecandam crescentis eloquentiæ vim valeat hæc tam præpropera ac festinata laudatio. Ut vos dii omnes deæque adjuvent, inquit Aridus; aspersistis aquam; quemnam invenire potuissem, qui melius medicinam faceret? ita vestris sententiis omnem mihi ab animo ægritudinem depulistis. jam vero quis modus laudandi iis placuerit, qui sic laudari consueverunt? nullus opinor. nulla laudis satietas satis est iis, quibus nullus ambitionis satis est modus: & qui vana sui opinione inflantur, novis semper titulis inhiant: volunt divini, cælestes appellari. atque hæc etiam apud eos vocabula obsolescent. nimis unumquemque natura sui ipsius suarumque rerum amatorem effinxit: utinam parcius hac in re sese gessisset, neque tantam indidisset in animos hominum cupiditatem laudis & gloriæ. ab hoc fonte prodeunt similitudines amicitiæque, quæ cum litteratulis suscipiuntur; prout eos quisque parcius vel liberalius laudaverit. quamobrem multi, ne in has difficultates incidant, simul atque isti suas ineptias recitare cceperunt, simulato aliquo morbo discedunt. atque, ut de aliis taceam, quoties ego, causatus laterum vel capitis dolorem, porrectum ad istorum nugas jugulum extraxi! Linquamus hæc, inquit Paulus Æmilius; statuas, statuas; si diis placet, litteratorum sibi hominum quæsit inopia. homines segnes ac tennes, faciendæ poliendæque orationis artifices, non puduit, summorum Imperatorum præmia, ob res bene gestas, invadere. Leontinus Gorgias tantum sibi honorem est passus haberi à

Græcia, soli ut ex omnibus, Delphis, non inaurata statua sed aurea statueretur. at quod ob meritum, dii boni? quia, circulatorum more, ausus est in conventu poscere, qua de re quisque vellet audire. Isocrati Olympia, Demostheni Athenæ, statuas dedere. quem honorem ne Miltiadi quidem decreverant, qui parva manu decem-
 plicem hostium numerum fuderat, ac prope deleverat, neque aliam tantæ victoriæ mercedem tribuerant, nisi ut in porticu, quæ Pœcile vocatur, cum pugna pingeretur Marathoniam, in decem Prætorum numero prima ejus imago poneretur, idemque hortaretur milites, præliumque committeret. Sapiens videlicet populus, ac nondum largitione corruptus, intelligebat, tenues honores ac raros, esse gloriosos; effusos & intemperantes, invidiosos ac turpes. Hic ego hominum arrogantiam admirans, Estne aliquid, inquam, ultra, quo progredi istorum ambitio possit? Reperietur, inquit Aridus; L. Accius Poëta, cum non essent, qui statuam darent, ipse sibi, si diis placet, statuam faciendam statuendamque locavit. quid potuit facere elegantius homo cupidus monumentorum & laudis? Illud vero perridiculum, quod, cum esset perpusillus ac brevis, per amplam sibi statuam excelsa in basi locavit. Sed quid demum inepti, stulta ista atque impudenti laudis cupiditate, præter cachinnos irridentium extorquent? rident homines cordati & intelligentes, cum audiunt, ea sibi velle pro auro obtrudi, quæ vix plumbi locum obtineant, immo quæ innumeris prope vitiis abundant. At perinde illis accidit, ut quibusdam Imperatoribus, quorum elogiam, in basi statuarum exscripta, risum & stomachum commovent. quis enim risum teneat, cum legat, eos in exemplum fortitudinis, continentia, virtutumque omnium, posteris tradi, quorum imperitia, inertia, avaritiaque, vestigia ac prope cubilia ipsa cernantur? Nec minus apte ridentur insulsæ quorundam adulationes, ea scripta, ut ornata, pura, ac dilucida, admirantium, quibus nihil esse constat incomitius, obscurius, inquinatiusque. Summa denique huc redit, ut nos in laudando non tam sequamur id, quod iis, qui laudantur, placet, quam quod eorum utilitas ac veritas ipsa patiatur. Tum ego, Est qui-

quidem, Aride, quod maximas tibi gratias habeamus; quod huc veneris; nam ante tuum adventum solliciti eramus, cujus potissimum libri lectione, quæ prandium antecedunt horæ, consumerentur: sed tua ista sive disputatio, sive sermo, fecit, ut nihil libros desideraremus: omnibus enim libris fuit nobis longe jucundior. Si quid hodie, inquit Aridus, à me datum est, quod vobis profuit, mecastor mihi est volupe; sed, quod antea volui dicere, ac sum oblitus, velim scire, quænam causa vos huc attraxerit. Celebritas ludorum, qui mox repetendi sunt, diximus, una cum Gallonio in hanc urbem navim vectos adduxit. Factum est à vobis, inquit Aridus, pulchre atque sapienter. ita sunt omnes lepidi atque venusti, ut dicturi sitis, navasse operam, quod huc veneritis, ac perendie illis instaurandis initium fiet. atque perendie, cum aliis fere octo proximis diebus, primo loco certamina eorum, sive hominum sive equorum, edentur, qui inter se cursus velocitate contendunt, ac multos jam dies, in propatulis locis atque directis, sese ad cursuram exercent. hos alii deinceps ludi consequentur. hodie præmia, victoribus proposita, tota urbe circumferentur. neque vobis, spectandi gratia, abeundum est longius, immo ne pedem quidem domo efferendum; quod Poliarchus, qui paucis ab hinc diebus commigravit huc vicinæ; cujusque pater olim sutoriam ignobilem fecerat, mandavit, ut sui honoris gratia, hæc ob suas ædes pompa ducatur. Inter hæc venit à Gallonio nuncius, cum gèrulo, qui sportas duas, ab utraque parte ærumnæ appensas, optimorum eduliorum plenas ferebat. ibi erant pernæ, abdoimen, sumen, suis glandium, pulli gallinacei, tum assitum elixi, farcimina, molle caseum; ac plura vini veteris cenophora. hæ dicebantur esse reliquæ, ex domini mensa collectæ, quas nobis Gallonius mittebat, ut sine ipso prandium iniremus conficeremurque: se enim cogi, suo cum dynasta rus ire, quo arcuum, quos attulerat, jaculando periculum faceret. Nos obsoniis tam lepidis tamque opiparis acti, rogare etiam atque etiam Aridum cœpimus, ut nobiscum rogum incenderet, ac faceret illi prandio funus. Sed Aridus, nulla condicione adduci poterat, ut ad postulata nostra precesque descen-

deret. Tum ego, pene rogando defessus. Vide, inquatti, Aride, quid agas. tua enim culpa, nisi inducas animum manere, magna nobis pars ejus voluptatis, ob quam hæc est à nobis navigatio suscepta, præripitur. nunquam nobis alias contigit hos ludos aspicere. plane sumus in hujus civitatis moribus rudes atque hospites; nemo est, qui docere possit, quæ sint illa præmia, cuique cursorum generi singula designentur. Aridus, hac oratione victus, simulque metuens, ne inurbani hominis notam subiret, in nostra potestate se fore totum, asseruit. Ne multa; hilares accumbimus, prandemus; ac, confecto prandio, sargimus, paulum quieti somnoque indulgemus. Sed aliquanto post, cum jam vergeret in vespertinum dies, excitamur, ad strepitum turbæ, quæ fiebat in via; & continuo, una cum Arido, ad fenestram accurrimus, ac plures, personis indutos, hac illac bacchantes aspicimus; quorum aliqui vultu, habitu, atque sermone, bajulos, alii pistores, alii rusticanos, alii coquos, alii doctores imitabantur: hos tum pueri, tum grandiores, clamoribus ac sibilis insectabantur. Istis, inquit Aridus, hac libertate præbita, ac personarum, tanquam latibulis, tectis, quidvis licet impune in alios dicere; neque quisquam, sibi factam injuriam, queri potest, neque iis unquam, ob hanc causam, injuriarum dicam impingere. Vix horæ unius spacium interjectum est ab hoc sermone, cum vecti sunt plaustro saltatores ad decem, varia veste induti, qui, ut à Poliarcho gratiam inirent, plaustrum sistunt, & in tabulato, quod in medio ejus affabre erat instructum, & tapetiis conchyliatis contratum, ad fidiū tibiārumque cantum lepidam saltationem iniere, eamque variis atque venustis motuum generibus distinctam, fere ad vespēram usque pertraxere. Saltatione transacta, plaustroque è conspectu sublato, magnus tubarum clangor auditur. statim oculos in eam partem convertimus, unde sonus ille in nostras aures videbatur influere. atque in summa via tubicines, ad summum sex, purpura auroque vestitos, & in equis sedentes, aspicimus; hos Pistes undecim (hi sunt circumpedes Poliarchorum, ut diximus,) sequebantur, singula singuli hastilia deferentes, per quæ varii generis & coloris, cuspidibus eorum-

eorundem affixæ vestes dependebant. & quoniam earum vestium mensura inulto hastilium proceritatem excedebat, nam senis vel octonis singulæ ulnis in longitudinem patebant, quod erat reliquum, ne traheretur, Pistium manibus collectum excipiebatur. Atque hæc, inquit Aridus, sunt illa præmia, pro quibus cursura depugnandum est. Viden illud primum ex lanea veste purpureum? pro eo Apochichiri curriculo current, quam maxime possint, ut vincant. sunt autem Apochichiri genus hominum, religione à nobis dissidentium, sed callidum, versutum, fraudulentum, sacrilegum, perjurum; iis palmarium est, aliquem ex nobis in fraudem illicere; & quo die id illis contigit minus, se diem perdidisse conqueruntur. eorum opera in mercatura vertitur, sed levium ac tenuissimarum rerum; videlicet sulphurata permutant vitro, detrita vestimenta coëmunt, atque adeo sarcunt lepidæque concinnant, ut non eadem esse dicas; ita ignorantur; quamobrem, si cui ex nobis pro novis possint obtrudere, non dimittunt tempus, sed foro, ut ajunt, utuntur; præterea, pignoribus acceptis, argentum scænorum tradunt: sed nobis sunt vestigales, ac sumtibus, qui in his præmiis fiunt, res eorum, inagna ex parte, suppeditat. Videtisne illud alterum lutei coloris, ex serico ac tenui aurea lamina textum? id dandum est equo, vel equæ, quæ socias in cursu præterierit. hoc aliis præmium paucis ante annis accessit, (nam antea decem tantum numerabantur,) ob insignem additam huic imperio provinciam. illud Damascenæ vestis viride pueros, illud autem luteum juvenes, ad laudis gloriæque certamen accendit. ac, ne quæ ætas præterita esse videatur, illa senum, spectata satis, donataque jam rude virtus, ea, quam quinto loco præferri videtis, lanea sed cocco imbuta veste, revocatur in cursum. sextam holoserici villosi ac purpurei vestem, victor equus accipiet, alteram, ex numero præmiorum septimam, holoserici item villosi vestem, sed violaceam, equa auferet, quæ prior metam attigerit. Sequebatur preciosius ceteris præmium, Attalica nimirum vestis, nobilium animalium pelliculis subsuta, cujus ego splendore ac pulchritudine captus, Cedo, inquam, Aride, cuiam hæc tam

insignis palma proponitur? Illi, ait, barbaro equo, qui
 victor eorum, qui usque ex Barbaria hinc ad ludos con-
 fluxerunt, præconis voce citabitur. Tum ego, Pape, in-
 quam, quanta vis præmii! profecto, equi dominum, la-
 borum quos itineris causa suscepit, non poenitebit. Sed
 illud album, ex serico, ac tenui argenti lamina con-
 flatum, quosnam vocat in cursum? Equas, ait, equosque,
 tum nostros, tum barbaros: nam mistim current. Quid
 illa, inquam, vestis lanea atque cærulea, cinnam decerni-
 tur? Asinorum velocissimo. Quid audio? inquit Paulus
 Æmilius; etiamne asini in hoc certamen vocantur? ni-
 mium quidem hos ludos spectare velim. At, ne mireris,
 subdidit Aridus, bubalis quoque sua præmia servantur,
 nam lanea illa vestis atque coccinea, quæ postremum in-
 ter præmia locum ac numerum obtinet, bubalo dabitur,
 qui datum sibi spacium prior ceteris decucurrerit. Sed
 postquam spectando satis oculos pavimus, atque animum
 saturavimus; ecce tibi, redit à rure Gallonius, fessus,
 anhelans, ac plenus pulveris atque sudoris, inala multa
 ancupibus, quot sunt, quot fuere, quotque futuri sunt,
 ingerens. at ubi Aridum aspexit, vocem continuit, atque
 iram omnem in tranquillo constituit. Ac, post mutuas
 salutationes & complexus, deum Aridus, magnas no-
 bis gratias agens de prandio, quod sibi dederamus, ab-
 cessit. At Gallonius, qui mane, quo dynastæ sui impe-
 riis obsequens esset, pene jejuns in agrum cum eo secef-
 serat, sibi mensam parari mandavit; in quam, magna ex
 parte, ex reliquiæ sunt illatæ, quas nobis deferendas tra-
 dendasque curaverat. non enim ita multum illis nocue-
 ramus. tum decem illæ avidis famelicisque pransoribus
 satis superque fuissent. Sed postquam quiete atque epu-
 lis est illi lassitudo famesque depulsa, in cælum intuens,
 Magnas vobis, dii immortales, gratias ago habeoque,
 quod vestra præsertim ope auxilioque, dynastæ meo fa-
 ctum sit satis, grataque fuerint quæ fecerim omnia. qui-
 vis enim eorum arcum lepide illi succedit sub manus.
 At, quid vos? subdidit; numne præmia ludorum, qui
 dandi sunt, oculis accepistis? Optime, inquam, vidimus;
 ac nisi Aridus affuisset, qui nos sigillatim de unaqua; re
 docuit, magna parte voluptatis privati essemus. sed deo-

rum munere factum existimo , ut , cum tu abesses , ille veniret , seque quodammodo tui vicarium muneris constitueret. Si quid , inquit Gallonius ; per Aridum bene vobis evenit , gaudeo , eique gratias habeo ; sed futurum est posthac , ut nihil auxiliaria cujusquam opera indigeatis ; ipse vobis ero rei uniuscujusque demonstrator atque interpres , neque uspiam à latere vestro discedam. sed in præsentì cubitum eamus censeo , ac languida , maris agitatione , membra quieti soporique tradamus. Ut fessos nos lectus excepit , confestim somnus occupavit , arcteque constrinxit ; neque prius absolvit , quam mediam circiter noctem suavissimis psallentium vocibus pulsus est , cantuque symphoniæ. Nos rati , ita ut erat , eum è via cantum venire , è lecto desilimus , subuculam & thoracem raptim accipimus , induimus , fenestram aperimus , unde erat despectus in viam , ac plaustrum videmus , formosissima referens Tempe. etenim nemora , ambulacra , pomaria , signa , pergulæ , instar fornicum , dependentibus uvis onustæ , in tela , ante plaustri tabulatum obtenta , eo erant artificio depictæ , ut majoribus semper fornicibus minores succedentes , ac demum in unum angulum exeuntes , protractos in immensam fere longitudinem hortos oculis grato errore subjicerent : & , quod erat longe mirabile , pictæ res illæ , ab incluso intus igne illuminatæ , tantum leporis pulchritudinisque ducebant , ut non eas subsidere , sed extare ac prominere jures ; tantumque exinde luminis expressum coloribus cælum attrahebat , ut , non aliena vi , sed suis opibus , meridiana luce clarius elucescere affirmares. locus ante scenam , ad saltandum relictus , amœnissimo cuidam prato similimus , omni herbarum genere nitens , omni florum varietate distinctus , ver lepidissimum imitari videbatur. albeant ibi ligustræ ; variis sese coloribus violæ induebant ; suos lilia calathos expandebant ; sibimet ipsi narcissus hiabat ; suam amaranthi purpuram nulla temporis injuria deficientem ostentabant ; narcissi suorum inscripta regum nomina præferebant ; plures ac plenas odoris linguas crocus exerebat ; at præ ceteris rosa , virgineas imitata genas , sua late folia diffundeat. In hoc igitur tam amœnum ac lepidum pratum , antequam nos ad

fenestram accederemus , delapsa è calo nubes ac bifariam conscissa , Apollinem cum cithara , ac Venerem cum Nymphis attulerat. quæ primum , ad citharæ cantum , saltationi se dedere ; tum cœpere ita eleganter , ita concinne vocibus canere , ut non facile dixerim , ullius unquam vocis sonum suavius meos in sensus influxisse. His peractis , eadem qua delatæ fuerant nube , exceptæ abierunt ab oculis : ac eodem temporis momento elegans ille hortorum apparatus evanuit , atque eorum loco succedere rupes , valles , ac nemora , unde Nymphæ , ad duodecim , lepidò vestitu ornata , saltantes psallentesque prodierunt. ex altera vero parte , totidem Satyri eruperunt , tennes & agrestes calamos instantes. quos simul ac Nymphæ conspexere , metu percussæ , conatæ sunt ab illis se fuga subducere ; sed demissis ac supplicibus vocibus exorata , ne fugerent , neu timore aliquo corriperentur ; nullam enim eis viam ab ipsis instare , sed gaudia læta , sed festivissimas voluptates ; nam venire , ut lætas secum choreas jungerent. Tum illæ , timore depulso , sistunt fugam , animos sumunt , dant manus ; quibus lepidò inter se nexu conjuncti , ad numerum , in gyrum eunt , ac varios atq; multiplices repetunt flexus. Sed postquam saltationi satis est datum , illi rursus calamos instant : ad quorum cantum hilaris Nympharum chorus , tanquam Satyris illudens , rudes quasdam & inconditas modulari cantiunculas cœpit. Verum in medio cantu , sævi illi & immanes , abjectis calamis , ruptoque fœdere , illas miseras adoriuntur , tenent , amplexibus illigant. Illæ primo , dentibus , manibus , cubitis , genibus niti , se eorum amplexibus solvere , tum deorum atque hominum fidem implorare. postremo , cum hæc illis in irritum caderent , earum una , flebili ac suavi voce , de am ac dominam sylvarum Dianam exorat , ne alumnis suis ac sociis , extremo illo tempore , desit ; sed quavis ratione , quibus vita odio esset , suppetias afferat. Atque hæc omnia , ad fidium cantum , quæ occulte latebant , agebantur. His dictis , rem miram vidisses , earum membra rigorem induere , corticis duritiem attrahere , digitos ac crines in ramos ac frondes abire , totas denique in arbores verti. Tum Satyri , rei novitate attoniti , ac spe sua decepti , tristis

stes, & illusi, ac flebile quiddam canentes, sese sylvis immerfere. plaustrum, cum nihil esset amplius quod spectari posset, alio cursum arripuit. Nos mirabiliter delectati, lectum reperimus, redorinimus, nec ante meridiem è lecto pedem efferimus. Quod Gallonii quidem factum est opera. nam, nisi excitatum nos advenisset, in plures etiam horas somnum produxissemus. Qui clamans, Inusne, inquit, pransum, anuon? ubi libet, licet ire accubitum; nam accuratum est prandium; &; nisi properatis venire, corrumpitur. Nos, quota sit hora, quærimus. Ille, jam jam meridiem, ait, appetere. At ignaviæ nostræ pertæsos, nos è lecto præcipites agimus, vestes sumimus, induimus, ad mensam accurrimus, accumbimus, prandemus. à prandio, nihil fuit antiquius, quam oppidum totum perreptare. etenim redundabat hilaritate & joco. nulla erat domus, in qua, aut non agigaretur convivium, aut convivales ludi non celebrarentur, aut mimi non darentur, aut saltem, quæ fidiū vœcumque cantibus non personarēt. ubi vero nox terras opacavit, pluribus urbis locis ignes, ad lætitiā significandā, incensi, binæ vel ternæ singulis fenestris lucernæ, croceis, albis, roseis, ac cœruleis velaminibus inclusæ, & colorum varietate oculos pascebant, & circumfusas undique tenebras sua luce pellebant. At summa in primis voluptate igneus nos turbo, ut vocant, affecit. etenim, ex summo arcis fastigio, ea crepitantium ignium, crinitarum stellarum instar habentium, erumpens, ita late sese diffudit, ut primum tota cæli regio, igne concepto flagrare, tum ignium eorum materia, sua deorsum sponte tendente, evulsa ex suis sedibus sidera ruere, atque in præceps ferri viderentur. Sed, dum tantarum rerum studio capti, & ad ingentem admirationem traducti, stupentibus similes hæremus, Gallonius à quodam, qui ad spectaculum convenerat, invitatus est; atque adeo attractus ad cœnam. nam cum sæpius, Bene vocas, dixisset, jam gratia est; tandem victus, Cum hac, inquit, condicione veniam, si sit futurus istis hospitibus meis locus, à quibus non possum esse sejunctus. Quippeni? ait ille. etenim, ne sis nescius, ita largiter atque ample obsonavit meus coquus, ut, quod obsonatum est;

præter eos, quos invitavi, non modo duobus, sed pluribus etiam umbris, futurum sit satis. Ne multa, promittimus, ad condictam horam accedimus, venimus in ædes, modicas quidem, sed in regium morem excultas, ibique exornatum ample magnificeque convivium offendimus; & quoniam jam ceteri convivæ convenerant, soleas deponimus, lectos inscendimus, accumbimus, cœnam inimus, eo ciborum nidore, ut milvinam suggereret, ea magnificentia sumptuque, ut (præsertim, quia nullæ ibi sceminæ aderant,) non amicorum convivium, sed Herculanum sacrificium referre videretur. quæ ciborum varietas, lauticia, magnificentia, causa potissimum fuit, ut convivium in multam noctem protraheretur. quo demum expleto, cœptum est, ludis, jocis, atque aliis animi remissionibus initium dari. & primum, rogatus est, voce ad citharam canere, quidam qui ex ore, quod erat glabrum, puer videbatur. hic erat eunuchus, cantandi artificio, magis ibi notus ac celebris, quam ullus apud nos Tigellius aut Hermogenes; qui exilio patriam sedem commutaverat, metuens legum judiciorumque severitatem, quod mulierem, cujus erat cupiens, per vim à viro abduxisset. at ubi ejus suavitatem vocis aures nostræ admiseret, parum abfuit, quin animo linqueremur. non enim alias tanta ex cujusquam cantu voluptas in animum influxerat. equidem, Linum, Amphionem, Orpheum, neque doctius cantasse, neque acrius sensus hominum, voluptate, impulisse crediderim. ita vocem modo molliter delicateque flectebat, modo graviter ac severe mittebat, modo eandem ab acutissimo usque ad gravissimum sonum recipiebat, & quasi quodammodo colligebat, ut non mortalem aliquem, in illud convivium exceptum, sed unam ex illis beatissimis mentibus, cantatum provocatam è cælo juxasses; præsertim cum Virgilianos eos versus pronuntiabat, quibus Dido cum Ænea, læsam ab eo fidem, exposulat,

Disimulare etiam sperasti, perfide, tantum

Posse nefas, tacitusque mea decedere terra?

cum reliquis; quibus versibus Aristoxenus quidam musicus modos fecerat. nemo enim fuit tam asper ac durus,

durus, qui posset lacrimas cohibere. neque, si totam illam noctem induxisset animum cantare, erat ei verendum, ne nos fastidio & satietate defatigatos à sese abalienaret, verum, quia aliis etiam animi oblectamentis illud erat tempus impertiendum, suis ipse cantionibus finem modumque constituit, & una cum aliis oneravit se lætitia & hilaritate. At illud in primis ludi genus omnibus placuit, in quo, proposita ludicra aliqua materia, à ludi magistro singuli per orbem interrogantur, & si quis vel nihil vel inepte responderit, statim capitur ab eo pignus, vel annuli, vel clavis, vel sudarii, vel fagi, vel etiam pallii: quæ pignora postea dividuntur inter præsentēs, ut restituantur iis, unde sunt capta; ea tamen lege, ut si ea recuperare sit in animo, imperata perficiant. verum nihil imperari solet, nisi jucundum atque honestum. quamobrem, si ille, unde ablatum est pignus, canendi artem norit, jubetur vel voce vel fidibus canere; vel, si sciat versus facere, cogitur epigramma, vel odam, vel distichon fundere; vel, si saltare didicerit, coram omnibus saltare præcipitur. Plura sunt, ab acutis & ingeniosis illis hominibus, in hoc ludi genere, eleganter inventa; quorum unum, qui me in primis delectavit, hic exempli gratia subijciam. Fingamus, inquit cœnæ magister, vos omnes peregre domum revertisse, atque in itinere, ut sit, ad cauponem divertisse; rogabo igitur singulatim unumquemque vestrum, ut cauponis primum nomen ad quem divertit, tum tabernæ ejusdem signum, deinde primum ferculum, tum pultem, postea elixum, & assum, deinde vinum, postremo ultimum ferculum sibi antepositum tanquam cœnæ epilogum, narret, ita tamen, ut harum omnium rerum vocabula, ab una eademque littera incipiant & quoties quisque in litteræ immutatione labetur, toties ab eo pignus auferatur. ac, ne sit liberum cuique, quam velit sibi litteram sumere, numerus & ordo sedentium, litterarum etiam ordinem numerumque conservet, ut primus sit A, secundus B, tertius C, atque ita deinceps reliqui omnes. At Gallonius, qui erat proximus à tertio, primum sine ulla dubitatione respondit, cauponi suo nomen fuisse Ballioni, signi loco Bulbum, tum sibi, pro-

primo

primo ferculo Boletos, pro pulre Brassicam, Bëtam, Blitum
 apposita, pro obsonio Bnbulam carnem datam, tum eli-
 xam, tum assam, pro portione vinum Bœotum; postremo,
 cū nullum subveniret ultimi nomen, à littera B incipiens,
 risus est commotus, omnesque hilari voce clamare, Hæ-
 res, captus es, da pignus: ille paululum rubore suffusus,
 manus dat, ac detractum ex digito annulum tradit. Hoc
 ludi genere, eo modo atque ordine quem deformavi-
 mus, transacto, constitutum est præmiū illi, qui in re-
 ferenda inepti cujuscumque in dictis factive stoliditate, at-
 que stupore, ceteris acutius ingenioque præstiterit. ac
 multa quidem à multis fuere in medium allata: sed ego
 pauca tantum referam, quæ memini magis. Scriptor qui-
 dam, inquit unus, cui magnum est in historicis nomen,
 in referendis Regni cujusdam nominibus, scriptum reli-
 quit, Urbem, Lita nomine, hostili manu fuisse deletam,
 atque inde, quidquid erat preciosi vel pulchri, ablatum:
 solum flumen, quod urbem interfluebat, hostibus san-
 ctum fuisse, ac ne digito quidem à quoquam attactum:
 tanquam si possent flumina subripi, ac subrepta in bul-
 gas, vel in vidulum condi. Scriptor alter, inquit alius,
 proditum memoriæ ac litteris tradidit, barbaros olim
 Regnum Carnotis invasisse, ac, pulsas habitatoribus, occu-
 patum, per annos fere quingentos obtinuisse: quod ubi
 eorum, qui pulsi fuerant, progenies rescivit, confestim
 properasse, amissam patriam, armis, recipere, & egre-
 gia aliqua pugna, collapsam atque jacentem majorum
 suorum gloriam famamque sarcire. Hic totus ille cœ-
 tus in magnum repente risum effusus est, ac, Tanta, in-
 quit, accepta clades nonne celerius, quam post quin-
 gentos annos, potuit ad posterorum aures pervenire?
 Accipite, inquit alius, medici plane singularis non mi-
 norem in dictis scriptisque stuporem. Scripsit hic, bu-
 glossam, similem peponis odorem efflare, tum pisces no-
 stri ævi, sive maris sive fluminum, tum salubritate tum
 sapore, deteriores esse superiorum temporum piscibus.
 Sed ex omnibus, quæ dicta sunt ridicule stulta, illi, o-
 mnium concessu, palma delata est, de quo Offuscatus
 academicus commemoravit, qui, Cum, inquit, proximo
 superiore anno, contra rem meam judicatum fuisset in-
 juste,

juste, ac propterea ex animi dolore pene conficerer, me-
mini, me, facto quodam die, in buleuterium contulisse,
quo aliqua ex parte eam mihi molestiam, si fieri posset;
adimerem. neque illud mihi consilium infeliciter cessit.
ea namque ibi voluptas objecta est, quæ litis amissæ do-
lorem multo leviores efficeret. etenim illuc commo-
dum veni, cum jam Poliarchi juri dicundo operam de-
dissent, ac Pomariis ob eorum malitiam vehementer in-
fensi, detribunali descenderent. Itaque iis placuit, se-
natores aliquot, qui aderant, in consilium advocare, in
quo ego quoque sum coactus adesse, quem, paucis die-
bus ante, invitum ac repugnantem in senatum adlege-
rant. quibus convocatis, Poliarchus natu maximus,
Pomariorum astutias atque malitias exponit; consulit;
quid agendum, quænam ratio ineunda, quæ eorum frau-
dibus occurratur, & simul in eos aliquid, exempli gra-
tia, statuatur. At quænam erit hæc ratio? inquit alius;
mihi quidem non venit in mentem, quod placeat, nam,
si eorum mercibus precium statuerimus, continuo eo-
rum plerique, potentiorum hominum, quibus serviunt,
gratia, vel etiam pecunia, impetrabunt, ne lege illa te-
neantur. itaque nullus in hac ratione fructus est, omnis
in ea opera luditur. Inveniendus est, inquit alius, dolus
aliquis, qui dolosis contra paretur, unde sese expediendi
rationem invenire non ita facile possint. Iam jam arbi-
tror me invenisse, ait unus, qui sæpius Poliarchi fun-
ctus erat munere, quique, juris scientia, rerum usu, at-
que omni genere prudentiæ, ceteris præstare existima-
batur. Summa erat omnium expectatio; neque minus
ejus ab ore pendebant, quam si Milesius Thales, aut ali-
quis alius ex illis septem esset dicturus. Atque, Inveni,
inquit, rationem, qua vafri illis ac veteratoribus, ad
legis jugum excutiendum, nihil sit in potentiorum gra-
tia præsidii. Tum illi multo magis ædes aurium vacuas
efficiunt. Qui cum aliquantulum excreasset, muccis na-
res exonerasset, barbam permulsisset, Ego, ait, quo isti
condignas suis sceleribus pœnas luant, edictum secre-
tum ferendum censeo. ita enim plures annabunt thunni,
quam volumus: etenim contra eam legem venire non
dubitabunt, quam non noverunt: itaq; manifestis crimi-
nibus

nibus evicti, priusquam patronorum fidem implorandi spacium habeant, poenas Reip. graves justasque persolvent. Iam paratus eram, illi pro hoc tam gravi prudentique sententia, loco plausus, cachinnos dare, cum eos sibi præripuit alius qui aderat in concilio, non minus, quam ille, bovis corio magis circumtectus quam suo; qui continuo exclamavit, Enge, bene, lepide, laudo commentum tuum. His actis, quoniam id diei tempus erat, dimissum est concilium; neque quidquam decretum. Postquam Offuscatus quievit, consecutus est omnium risus; ac nemo fuit ex numero, quem non cupiditas ingens incessest cognoscendi, quisnam ille esset, & quo nomine vocaretur, in quem tanta sapientia caderet. Sed Offuscatus parcendum hominis dignitati existimavit, nomenque reticuit. Nos cum jam cælum illucesceret, domino domus gratiis actis, domum nostram cubitum ivimus, somnoque, cujus eramus maxime indigentes, indulsumus. Sed postquam illum omnem sepelivimus, de lecto pedem deduximus; & in alterum intulimus, ubi corporis vires, ad mensam uberem, esca atque potione reficeremus: sed tantum inde desumimus, quod esset ipsi naturæ & necessitati satis. tum aliquanto post deducti sumus in stadium seu in viam, in qua ludi dabantur; quæ via non erat brevis curriculo, sed mille ac quingentis circiter passibus in longitudinem patebat. licebat ibi cernere ædium fenestras, stragulis, sericis, aureisque vestibibus ornatas, ac formosissimas in eis mulieres, regalis magnificentix cultu indutas, quæ magis spectaculo erant, quam ludi, qui fiebant: atque tanta ibi erat copia venustatum, ut, tanquam si cœna aliqua dubia esset apposita, dubitares, quo te potissimum verteres. itaque omnes amabilitati animum adjiciebant, omnes oculis epulas dabant. in has olim mulieres aliosque licebat ovorum putamina jacere, referta aquis varii generis odoratis: sed prætor peregrinus, quoniam ipsi olim, in ejusmodi ludis oculus, ovo ictus, pene ex sua sede decesserat, vetuerat edicto, ne quis ea venderet, haberet, jaceret; tantum permittebat, ut ovorum loco, coriandra, amygdala, nuces avellanæ, saccaro conditæ testæque, mitterentur, itaque magna horum copia ad mulie-

res commeabat. omnium generis hominum, personatorum præsertim, tantus erat numerus, ut vix transeuntibus aditus pateret. & in primis, ubi quidam, vetulæ incurvæ, tremulæ, capularis habitu ac persona vestitus, arā Apollini sacram occupaverat, circum lictores aderant, expectantes dum surgeret, aramq; defereret, quo abeuntem comprehenderent, vincirent, & in carcerem conderent: quin etiam minitabantur, nisi aram occupare desineret, se iussuros ignem & farinenta circumdari: sed nihil promovebant. nam tanto ille aram obsidebat magis. inter populi clamores exhibitationesque, illæ identidem voces exaudiebantur, I lictor, colliga manus; atque illa cruciatus carmina sæpius repetebantur, Caput obnubito, arbori infelici suspendito. Hic, ut dici audivimus, cum auditione vel oculis accepisset, anum quandam domi suæ minas triginta in arca clausas habere, dum illa aberat, adulterina clavi, domus fores illius aperuerat, arcam effregerat, & quo nulla vicinis suspicio oriretur, argentum surreptum, una cum aliis quibusdam rebus preciosis, in scapulas conjecerat, & supra vetulæ ejusdem vestem induerat, & colum lateri applicuerat, orique vetulæ personam domo allatam addiderat: quo fiebat, ut unus gibberæ personam referret. vicini, exeuntem arbitrati sunt esse aliquem aniculæ vel amicum, vel cognatum, vel affinem, qui cum ab ipsa ornatum utendum accepisset, neque præterea quidquam exquirendum. sed vix ille è limine pedem extulerat, cum anus revertitur, ac fores apertas offendit, statim suspicata est id quod erat, sibi manum fuisse aditā, de argento; tum muliebri supellectili non parcere; hoc est, clamare, vociferari, deum hominumque fidem exposcere. vicini, nihil esse loci clamoribus, dicere, sed esse opus celeritate: nam si pedibus non parceret, se facile consecuturam personatum furem, anili habitu. non moratur illa, sed flens, ac totidem sibi liberos, quot minas, periisse clamans, per compita, basilicas, ac fora omnia discurret. sed fortuna eam adjuvit; nam furem consecuta est, quem ex sua ipsius veste coluque cognovit. Hic licuit animadvertere, quanta conscientiæ vis sit. nam cum posset dissimulare, se eum esse qui erat, cum facile posset

posset aliqua, evolare, ac turbæ sese subducere, nihil horum fecit, sed in aram confugit, suoque se indicio, tanquam forex, prodidit. Eodem pene momento lictores adfuerunt: nos, à turba pene oppressi, ægre obtinuimus, summa totius corporis contentione, ut inde elaberemur. verum dnobus vel tribus aliis spaciis factis, ne cuiquam molestiam objiceremus, locum in meritorio spectaculo mercede conducimus. sed vix suggestum illud conscenderamus, cum cœpit illac ejus diei pompa transire, hoc ordine. primum, ridiculas inter effigies, ut etiam Romæ in ludis mos est, manducus efferebatur, magnis malis; late dehiscens, & ingentem dentibus strepitum edens; deinde, post lictorum pedestrem turbam, duces eorum ibant in equis; hos itidem pedibus Apochichirorum primi subsequebantur, vestibus sumptuosis induti, redimiculis aureis præcincti, ac pluribus ex suis, virides olearum ramos gestantibus, stipati: tum, ante præmium; de quo erat eo die certandum, tympanotribæ tredecim, ac tibiciues sex, hilari cælum strepitu sonituque complebant: porro sese in conspectum dabat Pistium turba; scipionibus viridi colore depictis innixa; deinceps, post duos ephebos, in equis sedentes, quorum alter ligneum sceptrum, districtum alter præferebat ac; in aciem: equitabat Prætor uterque, peregrinus & urbanus, in medio inter Poliarchos; sed peregrinus trabea candida, ac niveis ad frena ministris utebatur; urbanus in veste aurea, ad talos usque demissa, nitebat: postremo varii ac multiplicis generis iudices, tabelliones, scribæ, pompam claudabant. Eo die, præter multitudinem personatorum, ut diximus, nihil fere, quod admirationem commoveret, aspeximus. Erant grallatores multi, qui, itidem personati, grallis ita longis impositi; ut propemodum manibus ædium fenestras attingerent. Vidimus etiam aliquot, quibus tibialia ac femoralia, ex purpura, ita membris apta hærebant, ut crassitudinem eorum non excederent; quibusque, tum ante tum retro, per foramina ad id facta, subucularum oræ defluebant. hi, tum manibus, tum pedibus, per parietes ædium, cochlearum ritu repabant, ac paulatim ad summum, admirabili dexteritate, egrediebantur. Sed cum pene jam tenebræ orirentur; nosque

nosque jam , expectando defessi , de professione cogitauerimus , ex improvise , populi clamor exoritur , liكتورum interminantium edictiones excipiuntur , Ite , decedite , fugite , en veniunt , adsunt. Respicimus , ac duos videmus , detractis omnibus vestibus nudos , ex æquo , currendi celeritate , contendere , ac ne digitum quidem alterum alteri præcurrere , quainquam uterque socium supplantare , manuque depellere niteretur. His alii quatuor proximi accedebant , sed longo intervallo proximi , ita ut jam de palma desperarent. Sed , qui fuit in eo circulo postreinus , risus nobis mire commovit. etenim , cū palmam jam primus accepisset , ita lente ocioseque suum cursum prosequabatur , ut si non celerrimus ac velocissimus quisque , sed ceteris segnior ac tardior , præmio esset afficiendus. Hunc jure omnes clamoribus , sibilis , dictisq; excipiebant. quibus ille victus tandem , currendi sententia destitit , ac , lapides metuens , in proximam amici cuiusdam sui domum sese recepit. Itaque , cum nihil jam reliquum esset , quod præterea aspiceremus , una cum aliis discessimus. In redeundo accepimus ex eo , qui ipse vidisset , furem illum tam elegantem , è liكتورum manibus elapsum , à periculo tutum esse. quomodo id factum sit , quærimus. Postquam , ait , diu aræ obessor extirerat , liكتورes , quorum ille custodiis asservabatur , discesserunt ; quod deberent , ad ludos ejus diei , prætoribus præsto esse. tum paulatim turba dilapsa , hac illac sese diffundit ; quainobrem ille cum paucis aniculaque relinquitur , quæ , Hecuba in canem conversa latrare luctu filiorum videbatur. at fur , quo illum vomitum absolveret , simulque , dum sibi occasio tempusque daretur , se cruci surriperet , solvit zonam , qua erat præcinctus , atque argento eisque , quæ in scapulis gibbum simulabant , decurrendi ad terram aditum fecit ; quæ deinde sumpta , vetulæ in os impegit , una cum colo ac veste ; ac pedibus salutem suam commisit. illa , argento recuperato , cujus heredem nunquam post eum diem se esse futuram arbitrata erāt , domum hilari solutoque animo rediit. fur vero , cum , amissa præda , ad portam urbis proximam pergeret , incidit in equum , quem chirurgus arbori , cui dam ægro vomicam secaturus , habenis religaverat , ac

mulierculis, ibi stamen nentibus, commendaverat; hunc ille interritus solvit, conscendit. mulieres, quid ad se equus ille pertineat, rogant. fur, imperatum sibi à domino ait, ut ad Iſidis ædem proximam cum eo se conferat; mox enim ibi eum adfuturum, ut uni ex Iſiacis illis crus obliget. mulieres credunt, quiescunt, molestæ non sunt. at fur æditum, qui pro æde Iſidis stabat, orat, ut, si dominus quæsitum se veniat, dicat, equum ad Nympharum portam aquatum esse perductum; proinde, vel expectaret dum rediret, vel si nollet, eo sese conferret. verum furcifer, contra quam dixerat, extra portam Collinam, qua itur ad loca hujus insulæ mediterranea maxime, fugam arripuerat. non ita multo post chirurgus revertitur: nam, morbo inspecto, vomicam immaturam prehenderat, ac proinde nondum ferro tentandam censuerat, ne plus exhiberet negotii: atque equum non videt. quærit de mulieribus, quid eo factum sit. respondent, à quodam, qui suum se esse servum diceret, ad Iſidis ædem fuisse perductum. accurrit ille, atque æditum, qui etiam tum pro foribus templi manebat, interrogat, num equum vidisset. Quidni, inquit, viderim? quin servus etiam tuus, qui in eo sedebat, mihi mandavit, ut tantisper hic te retinerem, dum à porta Nympharum, quo aquatum eum perduxerat, reverteretur, vel, si malles, eo tu ipse contenderes. Chirurgus, aliquid suspicans fraudis, ad portam advolat, ac neque equum neque equitem videt. percontatur janitorem, si equus quisquam eo venisset. qui venisse respondit; sed qui eum vehebat, nulla mora interjecta, suum iter profecutum esse; se quidem existimare, extra portam Collinam egressum. Chirurgus, quod esset ventriosus, & calor summus, & quod occisam hanc rem existimaret, furis insequendi pausam fecit. summa denique huc rediit, ut, qui eques domo discesserat, pedes, ac pulveris & sudoris plenus, reverteretur. Postridie fuit nobis auctor Gallonius, ut personas indueremus, & qua luberet, personati vagaremur: ita enim fore, ut illam in eodem loco manendi molestiam effugeremus, & quicquid ubique, oculorum aut aurium sensum, pulchritudine aut suavitate, commoveret, ociose, & quantum libitum esset

esset, hauriremus. atque, eadem opera, equos nobis, ex dynastæ sui stabulis eductos, ac pulchre phaleratos, attribuit. quibus conscensis, una cum eo, qui in alio item equo personatus hærebat, passim vagari jucunde ac suaviter cœpimus, multa, oculis atque auribus, voluptatum genera varietatesque collegimus: sed nulla nos voluptas eâ magis affecit, quam ex ludrico quodam armorum spectaculo cepimus; quo non facile quidquam dixerim me vidisse in vita magnificentius atque venustius. Equitum enim turmæ, consimili vestitu, ac supra quam dici potest sumptuoso atque amœno, in equis, eodem quo ipsi ornatu atque colore, phaleratis sedentes, primum equos scite lepideque tractare, in gyrum ducere, ad symphonix cantum cogere saltationes inire; quæ etiam gratius ac jucundius ad aures oculosque veniebant, ex crepitaculorum sonitu, quorum ingens numerus, ex auro in laminis argenteis scite eleganterq; illigatus, equorum pedibus & collis hærebat, atque ex variis plumarum generibus, tum equitum galeis, tum equorum capitibus, additis. deinde, postquam satis sunt in hac lepida equorum tractatione versati, cœpere se invicem, districtis acinacis, petendo insectandoque simulacrum equestris prælii referre, postremo, sumptis velitariis, hastis, citatis eas in ligneam hominis effigiem equis dirigere, comminuereque. Multa etiam saltata atque ridicula jacta sunt in plures, à personatis, quibus, inveterata licentia, passim vagantibus, jus est omnia dicere. Quidam, bajuli indutus persona atque habitu, cui scapulæ paulo altius prominebant atque extabant, adeo ut fidium quarundam speciem efficerent, rogatus est à quodam, quanti fides illas venderet. cui ex tempore, Vide, inquit, primum, num sonus tibi probetur. ac tollens aliquanto altius pedem, ingentem crepitum edidit. Erat gladiarii cujusdam filius, ob insignem corporis pulchritudinem, ut fit, fama minus cominoda, ac secunda. hunc cum quidam de grege illo mimorum ab homine noto rheda sublatum circumduci vidisset, O pulchelle, inquit, puer, strenue, fortis; nunquam pater tibi tuus gratiam referet: non enim tam multos ille gladios potest efficere, quam multas tu illi vaginas concinnas, ac tradis. Inter-

rim præmium, ea pompa, qua pridie illud alterum delatum fuerat, circumfertur; nisi quod Apochichiri eorumque primi non aderant: nihil enim reliqua ad eos præmia pertinebant. circumductæ sunt etiam equæ equivæ, tum ejus regionis tum barbari, quibus mixtim, ob novam provinciam illi Imperio adjunctam, decurrendum erat; quo videlicet spaciū illud, atque hominum multitudinem, perhorrescerent minus; & ut quodammodo se ad cursuram meditarentur, ad ludos. nullum erat eis ephippium, quo expeditiores essent ad cursum: pueri, tenui vestitu, nec laxitate, corporis crassitudinem excedente, eos frenis regebant, & calcaribus incitabant. quidam eorum sessoris officium nihil morabantur, quippe quibus ænei orbiculi, loris, ad utrumque latus adductis, appensi, instar calcarium erant: sed multo magis naturalis quædam alacritas animum inflammabat ad cursum. At si ludos, inquit Gallonius, spectare lepidissimos vultis, eo accedatis oportet, aut ubi curriculum istud oritur, aut ubi occidit, utroque enim in loco voluptas maxima capitur. Placuit consilium; ac primum ed iter tendimus, ubi cursus inchoatur. ibi licuit oculis aspicere, quod antea fama & auditione acceperam; videlicet, inesse equis intellectum adhortationis, pugnae, & gloriæ. etenim non antea se commovere, quam signum tuba daretur, arduæ cervicis flexu hilaritatem significare, hinnitu laudibus ac plausibus inhiare, ingenito ardore ac robore feroces victoriam corde concipere, signo dato; tum protinus in pedes sese cuncti conjicere, ad cursuram dare, oculis spectantium eripere, ad palmam contendere, ea vi ac celeritate, ut, si aliud nihil spectasses, non equas, non equos, sed aves, sed ventos in cursu esse jurasses. Personabant omnia faustis acclamantium vocibus, ardebat uniuscujusque cupiditas pernoscenti, cuinam ejus certaminis palma contingeret; atque prout cuiusque studium ex amicitia vel ex naturali quadam animi propensione flagrabat, alius alii victoriam destinabat. Vix è carceribus prodierant, cum ad calces eos pervenisse cognoscimus. nam inde nuncius manavit, Iapiculi equum ceteris superiorem in cursu fuisse. empti, qui ultro citroque commeantes, magna voce, Ianiculi nomen pro-

pronunciarent , celebrarent , efferrent ; qui vitam illi , felicitatem , & fausta omnia deprecarentur. Quærimus à propinquis , quidnam hominis sit iste laniculus. respondent , eum esse professione lanium , cunctis , qui lanienam facerent , pecunia ac pecudum numero facile principem : hujus equos celeritate cursuque ceteris superiores haberi , ac fere nunquam nisi victores domum reverti. itaque ille his præmiis omnes habet arcas , omnia armaria referta , quæ interdum , gloriæ & ostentationis causa , palam omnibus ad visendum exponit. nec mirum : nam antea soli , qui erant genere , splendore , ac nobilitate , omnium primi , suos in hæc certamina equos submittebant ; nunc verò non eo animo equos alunt , ut eos ad saltandum , vel ad currendum edoceant , sed ut rhedæ jungant , qua vel per urbem , vel in agrum , placide vecti ferantur. quamobrem jam tota res hæc rediit ad muliones , lanios , opiliones , vel ad unum aut alterum nosocomium , quod rem pecuariam facit : sed laniorum in primis equi ceteris ad hunc usum præstare existimantur , quod fere quotidie ad cursuram exercentur , dum illi vaccam vel bovem , ex bovili fugientem , equis delati , sectantur ac retrahunt. Nos eo die spectaculis expleti saturatique discessimus. postero die , cum nulli ejusmodi agones ederentur , magna ex parte me domi continui , & Aristidi , sicut antea discessurus promiseram , litteras dedi. argumentum ex quodam sermone desumpsi , quem paulo ante meum discessum cum illo habueram , cum meam vicem dolerem , ac quererem , quod . fortunis penè omnibus amissis , patria domoque carerem , ille vero sanctissimis suis præceptis ac monitis mihi persuadere conaretur , nihil esse mali præter culpam , & unicuique ibi patriam esse ubi ille modeste , temperanter , ac rationi congruenter ævum agitet. Itaque , quod me ad ejus consilia vitam moresque formasse probarem , in hæc plane verba ad eum litteras scripsi.

Flavius Vopiscus Niger Aristidi salutem.

Non bene fortunam dixi fœdamque truce[m]que
 Semper se nostris opponere fortiter ausis:
 Non bene, quod, diis iratis, in luminis auras
 Me matris genitum infelix eduxerit alvus.
 Culpa quisque sua superos sibi sentit iniquos,
 Dum prævum ingenium, ac vitiis deforme, recusat
 Ad quas præscribit ratio componere leges.
 Quod si consiliis patientem accommodet aurem,
 Inveniet faciles atque experietur amicos,
 Quos sibi non aquos, lacrimis ploravit obortis.
 Cui domina est ratio, sapiens censebitur idem.
 Vir sapiens, in se totus teres atque rotundus,
 Sat propria virtute ferox, se conspicit unum,
 Humana intrepido contemnens omnia vultu.
 Hic sibi nulla foris trepidis solatia rebus
 Advocat, invictus, cunctis præstantior ipse.
 Hic, veluti scopulus, fortune fluctibus atris
 Tunditur incassum. nam quis convellere tentet
 Virtutis valido formatum robore pectus?
 Quod fortunati sano si iudice nomen
 Vindicat illo sibi, pulsus qui pectore curis
 Nec dulcis lucri capitur nec honoris amore,
 Quid prohibet fieri me ex omni parte beatum,
 Si nulla accedat menti male sana cupido,
 Et summa victrix ratio dominetur in arce?
 Ipsi iter ad lepida præcludimus ociavitæ,
 Dum placet alterius nimium fors, nostraque sordet,
 Nobis nec finis quarendi poscitur ullus.
 Si bene te novi, famam nomenque beati
 Vel tibi, vel dederim nulli, cui sufficit omne
 Quod Deus & ratio tribuit, nec sidera tundis,
 Scilicet ut Tyrio niteas spectandus in ostro,
 Vel nova possessis jungantur pascua campis,
 Vel fiat voti mentis sententia compos,
 Sed Iovis assiduus sacra versaris in æde,
 Divum virtutes meditans, & totus in illis.
 At decursa licet sæclis properantibus atas,

*Multarumque simul vetus experientia rerum,
 Me satis illud studia ad meliora remittant;
 Æquam perpetuo mentem mihi sedulus ora,
 Et si quid dixi paulo commotior, auris
 Vel da, vel Memori fac sis decedere mente.*

His litteris scriptis, obsignatis, & tabellario traditis, cum jam ultima diei pars recederet, ac prima noctis accederet, deducti sumus à Gallonio in ædes cujusdam, Oro nomine, ut ibi cœnaremus. nam pridie ipse & amici aliquot coierant, in eam noctem, ut de symbolis essent. at nos a symboli venimus, quod Gallonius ære dato, ut immunes ad eum numerum adscriberemur, effecerat. nunquam ædepol nobis fere melius, quod meminimus, fuit; ita nitide fuimus accepti. neque mirum; nam, ut postea dicere audivimus, ille erat architriclinus, solus præter alios: nam ex omnibus, qui profitebantur se esse cœnarum artifices, nemo erat, qui minore dispendio convivas melius nitidiusque curaret. Iam cœnam illam ad umbilicum dimidiatam in ventrem abstulera-
 mus, cum architriclino nunciatur, ut prodiret: nam Poliarchos stare ad januam, qui eum magnopere evocarent. surrexit ille, ac prodiit. reversus, Scitis, inquit, quanam de causa Poliarchi tantopere me conventum esse cuperent? cras publice dandum est ab illis prandium duobus Prætoribus, peregrino & urbano, in buleuterio; sed quoniam, his diebus, liberalius quam par erat obsonando, ac plures invitando, pecuniam, ad inenstruales epulas datam, totam effuderant, ad civium misericordiam confugerunt, ac per magistros curiarum, locupletissimum quinque rogarunt, ut ad prandium conferrent: sed cum tantam pecuniam conficere non potuerint, quæ sufficiat ad instruendum exornandumque, pro hominum dignitate, convivium, currunt ad me, quem sapius sunt experti, modico sumptu solere amplam atque magnificam, in speciem, mensam extruere; atque orant, obsecrant, ut iis, tam calamitoso tempore, opitulatum adveniam, ac se, buleuterium, ac populi istius nomen, ex summa infamia eripiam. Rogavit Gallonius, quoniam ad eum Poliarchi venissent; nam unius tan-

tnm vocem se esse visum audire. Cui, Omnes ad me, inquit architriclinus, mihi supplicatum adierunt, sed ille tantum verba fecit, qui ceteris auctoritate & generis splendore antecedit. nam, cum ex tribus istis Poliarchis unus sutorem, alter lapicidam patrem haberet, solus hic est generis sui antiquitatem, usque ab avo, abavo, tritavo, proferens; quamobrem, ubi ille adest, ceteri mutire non audent. sed superioribus annis res accidit, quæ totam nobilitatis suæ causam jugulavit; sed quia eam à nobis ignorari arbitratur, pergit adhuc, vana isthac nobilitatis jactatione, ferocem facere ac se aliis præponere. Quo tempore hæc urbs à Regis Geryonis exercitu direptione ferroque vastabatur, quidam principili centurio à quodam lanio, qui apud Martis ædem, in foro Trullæ, lanienam faciebat, minas quadraginta, metu mortis injecto, detraxit: verum, morti jam proximus, ne is apud ejus animum scrupulus resideret, (credo, vera existimans ea, quæ de improborum apud inferos suppliciis, ac de inexorabilibus judicibus, Minoë ac Rhadamantho, memorantur,) imperavit suis, ut lanii illius heredibus minas quadraginta numerarent; eum autem dicebat lanium ante annos octuaginta vixisse. ac recte numerum annorum inibat: nam postquam hæc urbs à barbaris direpta est, annus ille agebatur octuagesimus. quod ubi viro huic nobili subolevit, nulla habita ratione majorum, de quorum nobilitate tantopere gloriabatur, quod putaret (ac vere fortasse) genus, sine re; vilius alga esse; venit ad eum, unde illud numerandum erat argentum, ac tabulis publicis aliisque probationibus planum fecit, se esse illius lanii nepotem; ac per hanc rationem quadraginta minis locupletior factus, ab eo discessit. His dictis, cœnaque completa, ille Poliarchis obsonatum proficiscitur; nos domum pulchre cœnati & appoti cubitum ivimus. Erat dies ille, quo apparandum erat ample magnificeque in Buleuterio Prætoribus prandium, dies celebris ac venustatis plenus: etenim nefas erat opificibus elaborare; quibus opera vita erat, in opus ire; mercatoribus tabernas aperire, sine mercimonia exponere: solum jus erat cauponibus, popinas, cauponas ac thermopolia, cominestatū intrare volentibus,

bus, patefacta atq; aperta omnibus horis habere. neq; illis, aut illorum ministris, opus deerat. etenim tam magnus erat aduentium numerus, ut neque possent labori sufficere, neque edulia, aut vinum, poscentibus suppeditare. strata ubique triclinia, ac positæ omnibus in locis mensæ conspiciebantur, in impluviis, in cubiculis, in viis, ante ostia: nullus erat inter discumbentes sermo, nisi ut biberetur; provocabant sese in potationem, atque alii septenis, alii denis, alii quindenis, alii etiam vicenis ludos illos cyathis committebant. Erat in medio foro labrum marmoreum, amplum, latum, ingens; in hoc, pastillis esculentis, quos ibi macherones vocitant, caseo ac butyro conditis, ad summum expleto, infimæ sortis hominibus, à summo quodam viro atq; opulento, eo die datum est prandium: ex altera vero parte fons vini meri manabat, unde macheronibus farti, sitim expellerent. Ludi erant lepidissimi, videre hominum aviditatem, famem, ingluviem; ut raptim, ut tumultuose, ut avidè prælium illud committerent; ut alius alium, aut capite, aut cubito, aut pectore pelleret, aut genu, ne sibi edenti obfisteret; ut ingentes unusquisque bolos sibi in ventrem immitteret; ut prandium illud tuburcinaretur; ut avariter in se vinum ingurgitaret. Illinc post paulo in pompam delata sunt præmia, iis danda, qui victores essent in cursu citati; quæ præmia tria erant, pro varietate ac genere eorum, qui in illud certamen erant descensuri. tria enim, ut dictum est supra, hominum genera ad ejus diei cursum properabant, pueri, adolescentes, ac senes. At simulac ab illa hominum facie atque quisquiliis conspectus est magistratus, continuo exceptus est ab eisdem effusissime, faustis vocibus atq; clamoribus. Quid multis moror? Nemo fere fuit in tanto civium numero, qui non eo die personam indueret, qui non tota urbe debaccharetur, qui non ludens, cantans, saltans, hilarem illumsumeret diem. Postero die nihil est actum, sed paululum omnes à superiorum dierum bacchationibus, vigiliis, compotationibus, ac concœnationibus conquieverunt. qui autem illum consecutus est dies, deo, cui Indici nomen erat, solemnis ac sacër, dedit nobis amplem ridendi materiam. Fuere, qui dicerent, eo die soli-

tam esse piperis magnam vim inter quadruplatores delatoresque distribui : sed ex vulgi opinione magis , quam quod cuiquam id compertum foret , hæc fama valebat : verum ex hac vulgi opinione vir quidam summus cepit occasionem , familiaris cujusdam sui , famæ parum secundæ , fidem vindicandi . erat hic illi intimus à cubiculo ; verum in suspicionem venerat , quod regi cuidam barbaro , neque ita multum imperio illi scedere amicitiaque conjuncto , clam per litteras arcana omnia detegeret . invitatus est igitur ab iis , qui erant consilii totius participes , ut secum ad ædem , divo illi sacram , religionis atque animi etiam causa prodiret . erat enim illa edito atque amceno in loco locata . Ille , qui esset ignarus , quos de se ludos præbiturus esset , non negavit , ac venturum se dixit . nec mora ; rhedam inscendit . at ubi paululum progressus est , continuo aliæ complures rhedæ , quæ in angiportis clam dispositæ latebant , callidorum ac veteratorum hominum plenæ , subsecutæ sunt . quod cum ille ex strepitu rotarum animadvertisset , rogavit , quidnam eæ sibi rhedæ vellent . cui unus , Putasne , solos nos deorum esse cultores ? aliis etiam eadem , quæ nobis , pietas inest ac religio ; properant illo , quo tendimus , ut indant ignem in aram , deoque illi sacrificent . Sed simulac est ventum ad ædem , continuo , qui rhedis vehebantur , ejecerunt se in terram , & quemadmodum in officio novorum Poliarchorum fieri solet , cœperunt , detecto capite , eidem honoris gratia præire . Ille consistere , mirari , & , quemnam res illa habitura esset exitum , expectare ; cum videt in aditu vestibuloque templi , venire sibi obviam æditum , argenteo cum polubro , piperis pleno , ipsiunque rogare , ut , tanquam delatorum omnium inagister ac dominus , partem suam piperis non recusaret accipere . ac tum demum , ludum se esse factum , intellexit ; & , tumidus ira , ac præ pudore , ubi esset , ignorans , tacitus ludicatoribus suis in turba sese subduxit , in ædiculas ibi proximas immergit ; & ubi primum , solis discessu , terris obortæ sunt tenebræ , noctis beneficio occultatus , domum clam rediit , ac , totum triduum , hominum conspectum lucemque vitavit . Proxima luce , ad solitam hilaritatem ludum-

que tota civitas rediit : & quoniam non satis liquebat, cuinam ex senibus , qui biduo ante cucurrerant , palma deberetur , revocati sunt rursus in cursum. Biduo post, eadem pompa , de qua dictum est , alia tria præmia deferuntur. hæc, ceteris preciosiora, proposita erant equabus equisque, tum vernaculis tum barbaris, ut ea in suo quisque genere sibi reciperet, qui certaminis victor pronuntiaretur. Equarum præmium adepta est una ex equili nosocomii, Æsculapio dicati: equorum palmam, novo atque admirabili spectaculo , occupavit unus ex Coponii, equorum locatoris, stabulo. nam cum sessoris imperiti culpa eripi sibi victoriam intelligeret, eodem excusso, atque æmulis equis, impetu , morsu , & calce rejectis , atque infra se relictis , demum victor pervenit ad calces. Postremo Numida , quem diu adversa tempestate jactatum , tertium post mensem , fortuna in illud litus ejecerat , unum ex equis, quos navi advexerat, certamini objecit. hujus tanta dicebatur esse celeritas , ut per centena millia & quinquaginta, continuo cursu, sibi insidentem nulla fere lassitudine ferret. itaque tantum intervallum inter ipsum atque ceteros equos interjectum erat, vix ut illi in eodem curriculo esse viderentur. Noctu , nobilium liberi , regio sane ornatu , multos ad cereos , Trojam luserunt. Extremo eorum ludorum die, ducti sumus à Gallonio illuc , ubi totum illud spacium, quod decurritur, occidit , ut liceret aspicere , quemadmodum victores , eo decurso , palmam attingerent. quo simul ac prætores cum Poliarchis pervenere, præmiis in via relictis , conscenderunt partem quandam ædium ingentium, quæ ad eum locum pertinebat, unde erat prospectus usque ad ultimam viam, à cursoribus obeundam, statimque ab ædium earum domino , qui dicebatur esse nobilis quidam orator, ab amplissima Rep. atque omnium maxima , legationis jure ac nomine ad dynastas missus ; statim , inquam , ab eo mittuntur illis large atque ampliter munera , nobis ante eum diem incognita : nimirum cucurbitæ, fere integræ, citrea , mala cydonia, Persica, pruna , atque alia ejusmodi , saccaro , cujus nomen vix Romæ auditur, mire condita , argenteis in polubris ; quæ statim illi partiti sunt cum iudicibus aliisque,

que, qui in eo comitatu aderant; unde ad nos etiam, Gallonii opera, qui plures eorum usu amicitiaque comprehensos habebat, pars aliqua non tenuis, tanquam à fonte, defluxit. nulla unquam esca palato nostro gratior atque jucundior accessit; adeo ut quasvis alias epulas, quantumvis lautas atque magnificas, præ illa scœnum esse dixerimus. Inter hæc exauditur clamor ingens, equo illi barbaro plaudens, qui fuerat pridie palma donatus. hic equabus equisque, qui tum mixtim currebant, infra se relictis, ad calces prope devenerat. sed inter exultationes succlamationesque populi, lubrico quodam in loco, fallente vestigia, una cum sessore, prolapsus, humi procubuit. verum, ante quam surgeret, ac sessorem dorso reciperet, præteritus est ab equo Ianiculi Ianii, quem ille rursus in certamen produxerat, ac præmio excidit. Erant ibi mimi, qui plura in prætereuntes dicta jaculabantur: sed nullum exauditum est, nisi proletarium ac frigidum; cuiusmodi illud fuit, quod iactum est in pistorem, cui furnus, & pala ex ligno qua panis in furnum inficitur, male processerat, ac propterea decoctorum numerum auxerat. Bono animo es, nam, quod tibi pala detraxit, furca restituet: atque illud alterum, in pomilionem dictum, quem quidam, per jocum, appellabat gigantem, cum ranis bella gerentem, atque omnia ejus fere generis ridicula erant, quæ verbo, duos sensus habente, continentur; ut illud, quo enuchus, illac pertransiens, visus est, à quodam populo commendari, cum dixit, Subvenite huic populares, nam nisi vobis testibus utatur, uxore in perpetuum prohibebitur. hæc plerumque frigida sunt; & à vilissimo quoque iactantur. Sed ineptus sim, si velim omnes eorum ineptias commemorare, quibus licitum erat ineptire. Illud vero risimus, quod gradario cursu venientem ad nos asinum aspeximus, ut præmio potiretur. nam ex viginti ferme asinis, qui illud curriculum inierant, unus perpetuo illud tenuerat; ceteri, ut transversum aliquem angiportum aspexerant, quorum multis lata illa ac perpetua via distinguitur, statim illac, sive naturali ignavia, sive clamore perterriti, iter deflexerant, spacioque excesserant, neque ulla vi cogi potuerant, ut directum illud ad præmium

mium iter prosequerentur. Postremo, bubalorum cur-
 su, tot dierum ludi completi sunt atque perfecti; qui bu-
 bali, inauratis cornibus, ac multis æneis crepitaculis or-
 nati, tum stimulis agitati atque confossi, impellebantur
 in cursum. sed cum placide potius viam ingredi, quam
 naviter cursum capeßere, viderentur, neque id magno-
 pere laborarent ii, quorum intererat, suum aliis bufa-
 lum anteire; quæſivimus, quorsum illhæc tam insignis
 eorum indiligentia spectaret. respondent, nihil referre,
 quisnam sit prior quisve posterior, donec ad calces de-
 ventum sit; ibi enim magnam rerum commutationem
 fieri: nam præmio proximi, variis ignibus arte manu-
 que factis, ac magnum ex se fragorem crepitumque
 edentibus, perturbati atque confusi, locum numerum-
 que mutabant; &, qui erat postremus, fiebat primus,
 & qui primus, postremus. palmam tulit Argyrotychi,
 viri primarii, atque opibus, divitiis, honoribus, longe
 præstantis, bufalus; qui nihil eo strepitu crepituque
 flammarum exterritus, ausus est metam attingere. Dixi-
 mus, quæ diversorum erant temporum spectacula, in
 aliquot dies continuos fuisse coacta. quamobrem illud
 etiam post hos ludos spectaculum redditum est, cujus
 specie ac voluptate vulgus maxime ducitur. id autem
 est, vetulæ, ut ajunt, ferra per ventrem obducta, scissio
 atque diremtus. quæ fabula inde ortum habuit, quod
 illi homines, esuriales quasdam summa religione ac cæ-
 rimoniis, serias celebrant, quas pueri ac mulierculæ
 vetulam esse quandam fingunt, Esuria nomine, matrem
 esuritionum, scædam, strigosam, atram, incurvam, tre-
 mulam, labiis demissis, gementem; & quoniam seriæ
 illæ multos dies auferunt, cum ad earum medium per-
 ventum est, rumor tota urbe dissipatur, vetulam sumi,
 ceteris capularem magis, & Acherunticam, quam, Esu-
 riæ loco (cui cum immortalis senecta contigerit, nocere
 non possunt,) divaricatis cruribus, in publico ferra se-
 cent ac dividant: & quo major ejus rei fides peregrinis
 fiat, quorum magnus semper numerus ex propinquis in-
 sulis in eam insulam confluit, biduo ante, insigne, in
 media platea, multis è tabulis, pulpitem extruunt, ibi-
 que ita apte ferram accommodant, ut vetula illi subjecta
 coin-

commode dividi bifariam posse videatur. neque est difficile, homines simplices, & in moribus civitatis plane hospites ac rudes, in errorem inducere. immo iis facile persuadetur, hunc ibi esse motem, ut, qui scalas in eam plateam attulisset, ubi spectaculum illud erat edendum, easque parietibus plateæ circumductis applicuisset, singulos earum gradus, senis ac septenis etiam drachmis, cupidis spectandi locaret. unde plures, ex compitis, angiportis, tabernis, conspiciebantur cum scalis bene longis emergere; atque ille sibi felicior ceteris videbatur, qui grandiore[m] graviore[m]que humeris potuisset imponere; quod majori eam lucro sibi fore consideret. at, ubi longius processerant, ac propius ad forum, quo scala deferenda erat, accefferant, continuo eos lanii, pomarii, farto- res, cetarii, ac præsertim piscatores, per quorum forum iter erat habendum, multa aqua perfundere, surpiculis piscariis cædere, lanea veste, polline aut atro fædoque colore imbuta, verberare, album vel atrum ipsorum ori colorem inducere. qui demum exterriti, ac pejora metuentes, scalis abjectis, fuga salutem quærebant. atque hic erat eorum ludorum finis. Iam vero vocavit nos ad ingentem delectationem, atque adeo ad vehementem admirationem, illa ejus virtus, illa vis, illa sapientia, illa ejus absoluta omnibus numeris eloquentia, qui ob perfectam, ut antea diximus, omnium rerum scientiam, ob incredibilem memoriæ magnitudinem, ob paratam, de singulis rebus, quæ in disputationem cadunt, ex tempore dicendi facultatem, veteri nomine amisso, Teras appellatur. ingens nos olim cupido ejus audiendi incesse- rat; sed ob brevitatem temporis, quo illic fuimus, tanta hæc voluptas ab animis nostris absuit. at tunc peropportune nobis cecidit, ut eum audiremus, cum in solemnî quodam sacrificio, cæsis diis immortalibus hostiis, & gratiis actis, suggestum conscendit, atque omnibus attente audientibus, cœpit, ita doctè, ita eleganter, ita scienter, de deorum providentia, qua mundus gubernatur, loqui, ita acriter, vehementer, perditos hujus ævi mœurs insectari, ut non dicere sed tonare ac fulminare, non orationem sed flammam & incendium tradere videretur. genus dicendi acre, vehemens, inci-

tatum, atque ita ejus proprium, ut nemo illud imitatione posset exprimere; sententiæ acutæ quidem sed graves, dulces sed utiles, venustæ sed aptæ, quæque in animos influant. denique, nihil in ejus oratione desideravimus, quod in illam perfectam eloquentiæ formam ac speciem includatur. aderant viri duo, omnium doctissimi, alter, ejusdem quo philosophus ille instituti atque ordinis, Crepitaculo nomine; de quo mira quædam narrabantur, ac pene extra naturæ ordinem; nimirum enim, cûsum suum transcurrisse, atque adeo magistrum antea, quam discipulum, extitisse: nam etiam tûm adolescentem, ac pene puerum, omnia habuisse percepta, ac memoria comprehensa, quæ Aristotelis omniumque Philosophorum placitis continentur, addebant, eundem, adversis fortunæ fluctibus diu multumque jactatum, & ad varios ærumnarum scopulos, miserandum in modum, afflictum, demum Regis potentissimi patrocínio, tanquam portu exceptum, tutam ac quietam in litterarum studiis vitam exigere. alter vero, qui aderat, mathematicis disciplinis ad miraculum excultus esse dicebatur, unde etiam sibi opes & amicitias peperisset, verum ex oculari, quod tubum opticum vocitant, à se invento, quo res, infinito propemodum intervallo à nobis disjunctæ, atque adeo ab aspectus judicio remotæ, oculis subjiciuntur vel aliquanto majores repræsentantur, nominis sui memoriam posteris reliquisset. Eodem tempore emanavit à Poliarchis edictum, ut, cum postridie mane ludi, quî Kal. Maji dari soliti sunt, essent referendi, nemo sine aliquo flore, vel saltem sine aliquo viridi ramusculo, conspiceretur in via; quod si quis contra edictum fecisset, posset à quovis frigida impune perfundi, nequè, madido, injuriarum actio daretur. itaq; bonum hercle factum, pro se quisq; ut meminisset, quæ imperata essent, pro imperio Poliarchico. quamobrem dabat unusquisque operam, ac novæ in primis nuptæ, ut, pro anni tempore, insignem aliquem florem, vel pretio, vel precibus, invenirent, quæ capiti aut pectori infererent; ac passim tota urbe ambulabant, qui gelsiminos, caryophyllos, tum vernaculos tû Indicos, venderent; atq; allatum est ad nos, caryophyllû unum vernaculû drachmis decem venisse. ardebã cupiditate

tate incredibili cognoscendi, ex quonam genere ludorum Indi illi essent, qui tam amœno tamque festivo Maji nomine nuncuparentur. at Gallonius, Postridie, inquit, animus vobis explebitur, eorumque notitiam vestris potius oculis, quam alienæ linguæ, referetis acceptam. Postero die lati consurgimus, totum fere oppidum lustramus; ac nullam fere domum invenimus, quæ protectos lauro vel hederæ postes, vel saltē recentes ante ostium cespites, non haberet; neminem offendimus, qui florem, vel ejus loco viride quidpiam non manu gestaret. nos quoque, ne legi fraudem faceremus, neque, in poenam delicti, frigida perfunderemur, flosculis manus ornamus, ac, tuti ab injuria, Buleuterium ascendimus. ubi, ante illas ædes sumptuosas atque magnificas, proceram arborem, suo denudatam cortice, multoque perunctam sevo, conspiciamus; è cujus vertice pendebant sarcinina, casei, ligulæ Sericæ, palumbi, aviculæ, & alia id genus multa, quorum præcium minam non excedebat. Iam plenum erat forum, parata omnia, neque aliud expectabatur, nisi ut à Poliarchis prælii committendi signum daretur. sed eorum unus ceteris erat in mora, qui dicebatur, apud tonsorem barbam ponere, & supervacuo pondere caput exonerare: huic omnes absenti mala multa ingerebant, quod, humili loco natus, ita se gereret, ut si longa serie Regibus atque Principibus esset annexus. nam, quia paululum ipsi pecuniæ accesserat, ita elati erat animi, ut nunquam cum aliquo opifice, quamvis præsentē, nisi per intervuncium, loqueretur. verbī causa; cum tonsor barbam illi capillumque tondebat, speculum manu tenebat, & si quid à tonsore titubatum animadvertisset, puerum, qui erat ipsi à cubiculo, qui- que in proximo conclavi ejus imperia præstolabatur, evocabat, atque, Heus tu, ajebat, dic tonsori, ut genis barbam altius reseceat. quod cum fecisset, rursus eum revocabat, atque, Heus tu, dic tonsori, prolixius mihi mento barbā effluere, proinde paululum ferro coërceat. eundem morem servabat in sutore, cum novi illi calcei afferrentur. nam, eo præsentē atque audiente, puerum, qui semper in aliud cubiculum secedebat, his verbis evocabat, Heus tu, cui cum præsto esset, ajebat, Dic suto-

ri, calceum hunc dextero pedi non ita apte hærere, sed eo esse aliquanto laxiorem; proinde videat, unde error emanet, atque illum corrigit. In pauca ut conferam, nunquam visus est, cum opifice aliquo, quamvis præfente ut dixi, nisi per interpretem loqui. qui tandem, diu expectatus, lepide tonsus, eleganterque calceatus, aliis Poliarchis stomachantibus, adfuit. Nec mora; Poliarchi omnes populo se in conspectum dant, in moeni-ana, tapetiis pulchre vestita atque ornata; qui simul aspecti, & excepti sunt populi clamore, tympanorum strepitu, tubarumque sono. Tum signo dato, veniunt in medium, in veste lineæ, qui parati erant, Majum, id illi arbori erat nomen, scandere, divisi in classes quatuor, ex ultima plebe constatas. Fit pugna inter eos & contentio, quinam primum arborem illam accedant, eamque conscendant. res agitur pugnis, colaphis, calcibus, cubito, genu, pede: itaque se invicem urgebant, pellebant, verberabant, supplantabant; alter alteri os, caput, collum, feriebat, contundebat, commitigabat, ut nullum autumno pomum sit æque mite, ut illorum erant ora & capita pugnis mitia ac mollia. denique, unusquisque erat alteri pro gymnasio, in quo ille verberando se exerceret. atque hæc omnia ad populi sibilos, ad tubarum sonum, ad tympanorum strepitum fiebant. at quæ pars, rejectis aliis, superior discesserat, Majum ambiebat: tum unus, ceteris audacior ac promptior, manibus, genibus, pedibus eidem advolutus, conabatur sursum ascendere; sequebantur alii, ex eodem grege, cum castulis, ac sacculis plenis arenæ, cujus ope auxilioque tentabat ille, an trunco illi, nodis vacuo, ac sevo, ut diximus, delibuto, manibus posset hærere: ac sæpe fiebat, ut, qui ad verticem usque se contulisset, statim deorsum, omnium cum risu, relaberetur. sed, cum tandem unus, prope rependo ad summum arboris egressus, potuit ramos, ibi prominentes, manibus apprehendere, confestim, in signum victoriae, uni ex avibus ibidem alligatis vincula demerere, ac facere potestatem avolandi quo vellet, deinde pendentia indidem præmia per vim evellere, rapere, sociis tradere; postremo direptis rebus omnibus, & in culcos ablatis, omnes ejus gregis, ovantibus similes, disce-

Q

debant,

debant, seque aliquo in popinam immergebant, neque ad vesperam usque edendi potandique finem faciebant. Interea magnum nos desiderium ceperat amicorum, quos domi reliqueramus; ac me præsertim Aristidis conveniendi, videndi, amplectendique cupido ingens incesserat, cujus amœnissimum suburbanum cum eo sæpius adieram, ibique ad omnem animi remissionem ludumque descenderam. cujus cum mihi veniret in mentem, & anni tempus lepidissimum, nimirum autumnus, miram ejus inspicundi perfruendique voluntatem injiceret, angebar animi, quod tantam mihi voluptatem, locorum intervalla præriperent: sed ceteris spes reversionis leviozem eam molestiam efficiebat. Itaque, cum antea scripisssem, nos illuc brevi adfuturos, his cum eo versibus lusi.

*Nunc tua nunc tempus lepidò nitidissima vultu
Rura fere totos concelebrare dies;
Mensibus Autumni latis cum vinea sulcis
Ipsa suas gremio divite jactat opes,
Nectare cum liquido vel plenis uva racemis
Albet, vel Tyrio murice tincta rubet,
Arboribus pendent curvi cum pondere rami,
Ac niveos ficus puniceosque ferunt,
Pomaque virgineum frontis referentia cultum,
Ac tectas pingui veste virente nuces.
Eja age, formosi pateant mihi ruris honores,
Neve obsit durus janitor ante fores;
Vel tecum rheda de more inductus, amœnam
Ingrediar villam, subsiliamque nemus,
Et qua subjectos prospectat collis in agros,
Vel Iovis æterni regia tecta videt,
Aut ubi conspicuus liquidis fons obstrepit undis,
Plurimus & laxo piscis in orbe natat,
Vel patula fagi, frondosa aut vitis in umbra,
Dum recinunt tenui gutture carmen aves,
Te spectem gaudens, adsim tibi dulce loquenti,
Et cupidas aures ad tua dicta feram,
Vel si percurras speciosa volumina Tulli,
Vel relegas docti carmina culta viri,
Europa aut quinos deductum carmen in actus*

*Si resonet claro dulcius ore tuo ,
 Carmen , quod dudum , sic te mandante , peregris
 Cui soli ingenium serviet omne meum.
 Adset Alexander (ni invisa negocia nolint)
 Quodque leges , avidis auribus ipse bibat;
 Cui tam Plautini numeri placuere jocique ,
 Innumeri cujus , te referente , sales
 Longe majorem sunt visi habuisse leporem ;
 Tanta tua , memini , gratia vocis erat ,
 Iratamque mea est facies imitata catellam;
 Libera dum risus detinet ora frequens.
 Intermissa igitur repetamus gaudia ruris ,
 Et properet risus , ludus , amorque , jocus.*

Proximus jam dies illuxerat; &c. cum etiam tum in lecto essemus, audimus, evocari à janua Gallonium. hic erat amicus quidam ejus summus, atque sodalis, qui introductus, magna vi petere à Gallonio cœpit, ut domum suam veniret, equos ligneos spectatum, qui, eo die, liquido erant in stadio decursuri; ubi etiam paratum erat prandium, ut assolet in his ludorum celebritatibus: etenim nullam fere esse domum, unde ludi illi spectari jucundius possent: nam se dedisse operam, ut inde prospectus ad metam usque pateret, ad quam esset decurrendum: proinde manum daret, & sequeretur. Gallonius hospitii jura objecit; nunquam enim se commissurum dicens, ut nos relinqueret, quod foras commissatum abiret. Immo, ait ille; duc tecum etiam hospites: atque adeo, ut tu sis sciens, nunquam pedem hinc efferam, nisi promiseris, teque una cum illis venturum constitueris. Placide, inquit Gallonius, abstine ab ira, nihil opus est minis, si duobus istis hospitibus meis futurus est apud te locus: quin insanirem, capital facerem, si, relicta tua cereali mensa, meam quotidianam inopemque persequerer: nolo tanto me scelere obstringere, nolo tantâ ventri meo injuriam damnumque conflare. quamobrem, si non es occupatus, si non est molestum, si lubet, tantisper mane, dum isti se lavent; vestiant, poliant: tum ultro dabimus ipsi nos tibi tanquam judicatos, ut vincias, ducas, rostrisque ad mensam tuam pollucibilem alliges. Tum ille, Satis verborum est, ait; quanto facias rectius, si a-

gas, quod agis, ac properes venire? It dies, ac me necesse est domi quamprimum adesse. sumptoque in manus Virgilio, cœpit clara voce ludos, in Anchisæ honorem editos, legere. nos interim quærimus de Gallonio, quoniam sint isti equi lignei, & quænam sint viæ liquidæ, per quas illis decurrendum esset. respondet, omnis generis navigia hoc ab eis nomine appellari, quod iis, non minus per liquidas cæruleasque vias vehamur, quam mannis & canteriis per itinera sicca atque terrestria. hodie, inquit, propositis præmiis, futurum est, piscatores inter, certamen, uter eorum, sua vectus horia, Albam (quod est flumen intra urbis mœnia fluens) excurrerit, ac metam attigerit. delectabit vos, istos etiam ludos adspicere, atque apud amnem frigidissimum, molestos istos intempestivosque calores abigere, qui hoc tempore autumnum defæviunt. Eamus, inquit Paulus Æmilius, gestique ab hoc etiam ludorum genere voluptatem mihi parare. Tum Gallonius, Amice, ubi vis, ait, duc nos quo lubet; jam tibi nulla, neque in me neque in istis, est mora. Itaque ille præire, nos sequi. Sed simulac è limine pedem extulimus, fit nobis obviam quidam, pallio ad talos usque demisso obvolutus, qui quamvis se conaretur occultare, non potuit tamen Gallonii notitiæ subducere; qui, Dii boni, inquit, ubi sunt circumpedes, quibus iste stipatus incedebat? quoniam, obsecro, exulavit? ubi est rheda, qua vehebatur, quoniam gentium exulatum abivit? Audi, inquit amicus, res est ridicula: hic, tum ex mercede, quam locandis ad aliena negotia operis suis exegerat, tum ex fructibus, quos ex pingui sacerdotio collegerat, ac præsertim ex eo, quod, suum defraudans geniun, comparferat annuos sibi redditus, talenta ad tria magna pepererat, sed cum partæ opes atque divitiæ aliam sibi viderentur vitam, alios mores exposcere, ut esset, in quo eas posset honeste profundere, obtinuit, ut pullatos inter Epistatas cooptaretur: ac statim cœpit obolis duodenis obsonare, cum quinis antea sole-ret; tum circumpedes, qui ipsum sectarentur, quatuor mercede conduxit, rhedam paravit, ædes invenit, instruxit, ornavit, quæ adeptum honorem in primis decerent, sed deinde, in otio, magnitudinem sumptus cum

animo suo reputans, quo lacerari rem suam videbat, & augeri alienam, coepit stulticiâ ipsum suâ poenitere, hominum ambitiones execrari, veterem statum cupere revocare si posset, ac dicere, Quid ego egi? in quod me conjeci malum? perii miser. ne multa; ex ægritudine in morbum incidit. arcessitur medicus, adest, apprehendit ægro brachium, atque ex venis, æqualibus intervallis sese moventibus, omnem comperit ab eo febrem abesse. sed, qui probe hominem nosset, statim, quo genere morbi laboraret, invenit; atque, Hujus, inquit, morbi causam reperisse me arbitror; sed in manu tua est, vim ejus effugere: nam si circumpedes duos domo, quantum potest, extrudas, si paucioribus obolis obsones, maximam tibi hujus ægritudinis partem præcideris. Ita in eum dii ament, inquit ille, ut tu medicus es præter ceteros; immo bonus poteras esse ariolus; bene, docte, prudenter; id mihi ægre est, id mihi dolet; perge. Iam vero, subjicit medicus, si circumpedes omnes, in malam rem jubeas abire, si sumtibus parcas, quos facis in rheda, si veterem in reliquo victu abstinentiam revoces, omnes tibi è corpore morbi maculas eximes: secus enim, nego, te posse sanari. Hui medicum elegantem, exclamat; nemo poterat melius medicinam facere. jam non Hippocratis modo sapientiam, sed ipsum etiam in te Hippocratem immigrasse, adigor ut credam: vah, quanta vis doctrinæ! quantus rei medicæ usus! jam inhecule sic agamus, morbi causæ removeantur. Nec dimisit tempus; nam proscripsit illico rhedam, equos produxit ac vendidit, domum, dimissis famulis, vacuum fecit, mensam, longius sumptu progressam, ad veteris parsimoniam rationem revocavit. Dum hac maxime loquitur, venimus ad ædes in fluminis ripa locatas, amœnas sane atque affabre factas, ubi, qua parte à flumine alluuntur, facta ab ædilibus potestate, inceniana ille temporaria, Sericis intenta velis, extruxerat, unde, non solum erat prospectus in flumen, verum etiam in nemora, colles, atque vineta, quæ in adversa ripa virebant. Diu aspectus ille jucundissimus oculos nostros detinuit, ac pavit; sed nondum expletos saturatosque proximum ad se conclave attraxit, lucidum, elegans, ornatum, ubi pa-

ratum erat ample magnificeque convivium. sed dum tabulas pictas suspicimus, dum signa, ex ære ac marmore, laudamus, dum varios sermones cædimus, magnæ diei pars labitur, hiræque latrantes cœperunt nos prandii admonere; ac prior dominus, domus, Cur, inquit, diei nocemus? cur non imus accubitus? jam paratum est prandium; jam ii, quibus paratum est, adsunt. Qua ejus voce compulsi, lectos inscendimus, prandium inimus, ea ciborum turbæ refertum, ut, quid potissimum sumeres, ignorares. at nos, ceteris prætermisissis, unumquodque quod erat bellissimum, carpsimus. sed postquam bibendi, vescendi, fabulandique nos satias cepit, surgimus, & ad moeniana contendimus, commodum, cum ad flumen juvenus, natandi causa, conflueret; quorum juvenum is erat numerus, ut iniri vix posset; ac, detractis sibi vestibus, fere omnes saltu, vel ex cymbis, vel ex saxis sese jaciebant in amnem, unde alii capite, alii pube, alii crurum tenus extabant, alii supinabant sese, ac cubantibus similes, ferri secundo amne sinebant. Sed cum jam calores magna ex parte remisissent, ab omni fluminis parte, lembi, cymbæ, lintres, scaphæ, tanquam ex abdito, emerferunt, cœperuntque ultro citroque discurrere, atque aliæ, protectæ velis, vel viridis vel crocei vel cærulei coloris, à remigibus pellebantur, varia atque eleganti veste indutis; aliæ symphoniacos, aliæ musicæ peritos artis, suavissima canentes voce, deferebant; aliæ tympanotribas, tubicines, cornicines, evehebant; aliæ peregrino milites habitu, gladiis Persicis succinctos, deportabant; qui navigium identidem statuentes, ad tibicæ cantum, ludicrum armorum certamen exhibebant; aliæ, hilares, ludentes, vino genioque indulgentes, ac permistos scæminis viros continebant. Inter hæc omnia, majus quoddam navigium, onerariæ par navi, adverso flumine veniens, aspicitur; &, quod erat admirabile, neque remiges neque remi patebant, quorum illud impetu pulsuque promoveretur. quod navigium, non procul à nobis, quasdam ante ædes constitit, ubi dynasta Parthenius ludos illos spectare dicebatur. nec mora; pugiles, ad viginti, in stega apparuere, ibique pugilatum inceperunt: qui ita strenuam, ita fortem operam dederunt

runt, ut eorum nemo, quamvis male cœlis contusus, ingemisceret. His defessis, ac prope ad languorem datis, successere totidem alii, integri atque recentes: hi luctatores erant validi atque robusti, quos præmii spes in pugnam attraxerat, ac nudi atque peruncti, dum initium luctæ daretur, expectabant: cum tandem eorum unus, sorte ductus, cum altero, qui se obtulerat, prior sese composuit. Lex certaminis erat ejusmodi, ut, qui ex aliquo pari adversarium, atque alios vicissim duos, ad terram dejecisset, certum in locum secederët, tantisper dum alii de tribus itidem victores evassent; tum, cum eorum unoquoque singulatim depugnaret, ac, si eos ad unum omnes profligasset, præmio potiretur, sin minus, illud ejus esset, qui ceteris ad terram abjectis rectus extitisset. Atqui videre erat alios, summa totius corporis firmitate complicatos brachiis, tanquam laqueis, adversarios profligare atque prosternere, alios, suis diffisos viribus, eosdem dolis supplantare atque subvertere. at ubi quisquam alteri succubuerat, continuo præsto erat unus cum vini cyatho, quem victus victori propinabat: id erat conciliatæ inter ipsos gratiæ significatio. His ludis expletis, quo artificio navis illa prodierat, eodem abscessit. ac novum quoddam ludi genus inchoatum est, nobis antea incognitum. pendebat, in medio fœnis, ad utramque fluminis partem alligati, per pedes anser, futurus præmium illius, qui avulsum à reliquo corpore ejusdem collum retulisset; quod cum natatores multi, suis cymbis evecti, sæpius conarentur, minus assequi poterant: nam partim, anseris collum apprehendere, partim illud nequibant abrumpere; ac fiebat, ut isti diu in aëre dependentes, ac sua corporis mole deorsum abrepti, vel in cymbas, vel in profluentem, omnium cum risu, devolverentur. Duabus circiter horis in hac hilaritate consumtis, horias ad duodecim, pari fere impetu venientes aspicimus, atque ex clamore hominum, ex tubarum sono, ex liëtorum edictionibus, qui cymbas, ultro citroque commeantes, decedere, atque ad ripas appellere imperabant, eas esse horias comperimus, quæ inter sese de præmio certabant. Erat autem earum cursus ita incitatus ac vehemens, ut avium potius volatui, quam navigi

cujuspiam celeritati propius videretur accedere. instabant remiges, urgebant, quantum vis humana poterat, remis undas pellebant, verberabant, sindebant. earum una, in oculis nostris, antecedentem alteram, gravi ictu percussam, subvertit ac submersit: remiges, narandi arte periti, ad ripas, ad unum, incolumes pervenere. neque illis minore fuit opus artificio: nam alioqui in rapidissimos vortices illapsi, ab iisque abrepti, facile fuissent in profundum abstracti. alia, quæ ad proximum vadum impeggerat, cum nemo esset qui eam conaretur extrahere, constitit; ceteræ omnes cursum tenuere. Non expectavimus, dum, præconis voce, certaminis victrix citaretur: sed gratiis amico, qui nos tam liberaliter acceperat, actis, discessimus.

Omnium postremi ludi erant plebei, quibus dies proximus erat allaturus initium, quibusque decreveramus non interesse, sed domum abire; quod ferebamus moleste, Gallonio nos tanto esse sumtui tantæque molestiæ. sed castigati ab eo, qui, quod in nobis sumeret, lucrum esse, non damnum, agebat, profectioem in biduum distulimus. Atque, ad ludos istos quod attinet, si suo tempore fiant, mense Majo, octavo quoque die, à plebeis hominibus celebrantur, quo die opifices, ab operis feriati, totos hilaritati se tradunt. hi summo inane, una cum uxoribus ac liberis, secedunt in agrum, duobus circiter millibus passuum procul ab urbe, olim celebri cuiusdam familiæ, ab Imperatore Cæptio dono datum, & secum equos, asinos, vino, pane, caseo, aliisque cibariis onustos, adducunt; quibus parvulos etiam pueros suos & infantes imponunt; ferunt etiam citharas, fides, sistra, atque alia ejusmodi instrumenta musica, ad quorum cantum vocem exercendo, itineris molestias leviores efficiunt; tum perveniunt in æquatam agri planiciem, arboribus fere in quincuncem dispositis confitam; in cujus summo, rudi ac rusticano opere factus fons inest, cujus aquæ frigidæ, dulces, nitidæ, atque perennes, ad irrigandum eum locum sese diffundunt. ante hunc fontem, mensa in armorea, longa, quadrilatera, varias inter ac proceras arbores, paulo supra terram extenditur; quam qui prior occupat, beatus habetur. hic animi

mi curis ac sollicitudinibus valere iussis, dant omnes sese variis ac jucundis oblectationibus, nam alii seorsum à ceteris saltant, alii puellarum choris immisti, festas atque alacres ducunt choreas, alii cithara, alii voce, alii fidibus canunt, alii olea, alii trocho, alii pila datatim ludunt, alii ligneis orbiculis vel lamellis certant, uter propius ad lamellam vel orbem accedat, qui, signi gratia, præmittitur, ad quem ceteri dirigantur; alii amant, alii potant, alii currunt; omnes denique paulo ante meridiem, una cum uxoribus ac liberis, in herba sese projiciunt, & ad arboris cujuspiam umbram edunt, potant, animo obsequuntur, atque operant sese hilaritudine. veniunt eo citharædi, fidicines, & ad citharæ fidiumque cantum, extemporario carmine, de discumbentium virtutibus canunt, à quibus deinde, grati scilicet animi causa, auferunt, vel vini cyathum, vel carnis porcinae vel vitulinae frustum, vel pulli gallinacei alam, vel placenta vel casei partem. accurrunt eodem omnis fere generis meretrices, sive mercatorum amicae, sive servulorum scorta diobolaria. Verum, esca atque potione expleri, sanctæque Saturitati gratiis actis, surgunt omnes, ac largius etiam quam antea, saltationes, cantus, choreas, aliosque ludos, quos intermiserant, repetunt, & usque ad occidentem solem fere producunt. multæ, inter æquales, horum ludorum causa, affinitates, multæ inter inimicos pactiones & fœdera conciliantur. is denique horum ludorum est finis, ut, cum ad vesperas sit, omnes eadem qua venerant alacritate domum revertantur. Ludis omnibus transactis, cum jam nihil esset, quod detinere nos posset, nullis Gallonii precibus, nullaque ejusdem vi, retineri potuimus, ne ad penates nostros, unde nos ille deduxerat, reverteremur. atque adeo fortuna nostris optatis ac votis occurrit, ut eadem, quæ nos advexerat, navis è portu jam solveret, quam obrem multis Gallonio gratiis actis, ac laribus vialibus, ut nos bene juvarent, invocatis, in eam conscendimus, ac diis, ventis, atque hominibus operam dantibus, salvi & incolumes domum revenimus. Sed civitatem sane commotam ac perturbatam offendimus, graphici cujusdam sycophantæ lepidissimo furto. atque eo perturbatiores erant omnes animo, quo vide-

bantur ab omni spe prorsus exclusi, ejus sycophantiæ vindicandæ, nam celeriter ille surripuerat sese de urbe, ac jam longius abierat, quam ut eum quisquam, omnibus ut ajunt velis remisque, consequi posset. Est ibi caupo, non sui solum ordinis, sed multo etiam superioris, longe locupletissimus: hic nobilem cauponiam facit, neque cujusvis fortis homines excipit, sed viros tantum nobiles, ac si usus veniat, ipsos etiam Reges atque dynastas, etenim ea est illi supellex, ut non ad unius privati hominis usum, sed ad regalis magnificentiae cultum, comparata esse videatur. in ea sunt peripetasmata, aulæa, toreumata, vasa Corinthia, argentea, tum pura, tum sigillis emblematisque perfecta. hæc in adventu virorum principum solitus est palam exponere. præterea magnam vim pecuniæ in arcis armariisq; semper habet inclusam, solutam ab iis, quos exceptos hospitio, lepide nitideque, suis sumtibus, alit. hujus bonis sycophanta quidam callidus ac doctus inhiabat, atque id unum præter cetera studebat, quemadmodum cauponi inane adiret, ejusque ad se habentiam averreret. verum, die quodam, cum, in regionem suarum astutiarum ingressus, omnes perlustraret, ea illi maxime placuit, quæ monebat, ut, si vellet ea quæ cogitaverat sibi feliciter cedere, ad cauponis amicitiam aditum aliquem viamque muniret. itaque venit ad eum ac simulat, se summum quendam virum esse, ex remotissima nescio qua insula, illucque navigio advectum, ut, regionis amenitate, à curis animum relaxaret; propterea velle apud ipsum divertere, ubi sciret, hospitibus bene esse solere ac laute; sibi autem esse in animo pecuniæ non parcere, quo mollius nitidiusque curetur. Caupo gratias agit, neque alium esse locum affirmat, ubi sibi lepidius esse possit, quam ibi. Admissus igitur cauponis in domum, nihil sibi esse faciendum prius existimavit, quam ut sese penitus in ejus familiaritatem immergeret. neque res fuit magni laboris ac temporis. nam brevi totum hominem possedit. at ubi vider, satis sese ad illum insinuassee, segregat eum solum, ac, Tuis, inquit, in me benefactis facile superas, ut sis mihi superior quam quisquam alius, atque aliquid propter me tibi eveniat boni: verum id, cujus nunc occasio datur, non illud

illud est, quod pueri clamitant in faba se reperisse, sed Cræsi divitiarum, sed montes auri. quamobrem si fidem das, te taciturnum, veram tibi causam, quam me huc adegit, exponam. Caupo, pecuniæ studiosus in primis, hac oratione erectus, affirmat, jurat, quod apud ejus aures deposuisset, salvum indidem eum esse sumturum; immo non tutius fidei quidquam, quam sibi, committi. Ille igitur, non solum se, inquit, esse cum primis domi suæ nobilem, verum etiam Astrologum summum, ariolum, divinum, ac magicæ artis longe peritum, ejusque artis beneficio perspectum habere, in quadam parte publici agri, cujus loci signa ac notas probe teneret, ingente in latere thesaurum; hunc se velle defodere, cum eoque pariri; sed opus esse silentio: nam si id cuiquam suboleret, utrumque pænas legibus esse daturum, quæ vetant, glebam unam in publico agro commoveri, nisi prius facta à magistratibus potestate; sed nondum tempus idoneum ad eam rem esse, quod essent expectandi siderum quorundam ortus compositionesque, sine quibus quidquid ipsi tentassent, teterrime caderet; verum, ut ex calî conversione perspectum haberet, tempus illud propius abesse. idque malus ea causa faciebat, ut posset hominem diutius exedere. nam postquam piscis hamum voraverat, perinde, tum in prandis cœnisque, tum in ceteris rebus honorifice eum habebat, ac si Rex aliquis esset, vel Imperator eximius; ac ne verbum quidem de mercede faciebat; quod crederet, omnia sibi largius, quam vellet, ex thesauri massa proventura. interea novus ille magus, quo ejus spes aleret, quotidie, obortis tenebris, ducebat eum in apertam atque patentem agri planiciem; ibique, sumto in manus astrolabio, siderum motus se notare assimulabat. sed cum quatuor jam menses abiissent, neque amplius prolatando, ac diem ex die ducendo, sine fraudis suspitione posset hominem ludere, die quodam fit illi obviam, ac lætus venit, exclamat, Venit nox illa tam expectata, tam amœna, tam hilaris; quæ te ex cauponibus, hominum mendicabulis, eximat, atque, ob divitias, regibus ipsis exæquet. quamobrem, concubia nocte, illuc quo duceris, cum ligonibus istis quos asservandos curabis, mecum eas oportet, defossoque terræ gremio, illum

illum ex ea fœtum extrahamus, qui jam diu luci deripitur. sed quia magicis cantionibus sunt prius manes evocandi, ac vinculis constringendi, atque ii præsertim lemures, quibus thesauri custodia commissa est, (nam secus, omnis noster labor esset inanis ac vacuus,) ideo quotquot tibi domi sunt claves, in medium afferas; nam iis, cum mortuorum ossibus, ac certis herbis, ad minorem lunam resectis, brevem illos in gyrum, quem radio descripero, compellam, in eoque concludam, & tanquam obserabo, ne commovere se audeant. Ille, qui nihil etiam tum mali suspicaretur, quidquid habebat clavium, in medium attulit. quarum simulac ille potitus est, ad Tres viros recta contendit, ac, Si mihi, inquit, fides publica datur, thesaurarium vobis furem manifestarium dabo. Iussus, fide publica, dicere, indicat, cauponem illum divitem convenisse secum, ut proxima concubia nocte, cum ferramentis, ad agrum publicum accedant, ac thesaurum ibidem abstrusum effodiant, ac, si sibi minus credant, conquistores illius in domum immittant. nam invenient, inquit, in culina, in angulo, ad lævam manum, ferramenta ad fodiendum necessaria. illi, lictoribus missis, hominem statim cum tota familia comprehendunt, & in carcerem condunt. at sycophanta, occasionem tam lepidam nactus, clavibus, quibus inferna monstra decreverant in gyrum concludenda, angulos omnes ædium & conclavium miseri illius cauponis sibi pervios facit, capsas & armaria omnia aperit; atque inde thesaurum eruit, magnam videlicet vim argenti, ac preciosa alia multa; quæ omnia convasata, in navigium, quod pridie conduxerat, attulit, ac nemine persequente, in alias regiones, longe ab iis disjunctas remotasque, se contulit. sed paucis diebus post, canpone è vinculis exempto, ac pecunia multato, hujus doli detecti sunt; quos cum non possent magistratus vindicare, omnes cives animo erant anxio atque suspensio. Nos, publicis curis in eos ad quos pertinebant rejectis, ab omni sollicitudinis mœrore animos nostros curamque laxare nitebamur: ac frequenter domi Charopini cujusdam eramus, locupletis hominis ac nobilis; qui cum esset omnium rerum imperitus ac rudis, inter litteratos ha-

beri volebat, & cum vix posset librorum indices legere, insignem bibliothecam, omnium librorum varietate refertam, extiruxerat; in quem invenimus scriptos hos ver-
sus.

*Scriptorum totis famosa volumina terris
Colligis, & pluteis das, Charopine, tuis.
Quid tibi cum libris, quorum nec nomina saltem
Nec titulos prompta voce referre queas,
Quosque sinis, multo conspersos pulvere, blattis
Et gratas avidis muribus esse dapes?
Nam nullum tangis, sed, tanquam sacra prophanus,
Non digna metuis collutulare manu.
Numne times fias, tractandis forte libellis,
Doctior, aut stolidus sis stupidusque minus?
Hoc cave te moveat; sic est tibi crassa Minerva,
Proficere ut valeant plus, mihi crede, sues.*

Sed erat plane vir bonus, ac nobis in primis amicus. sed citius, ut dicitur, flammam in ore ardentem contineas, quam vir acutus ingeniosusque bona dicta teneat; bona scilicet dicta, quæ, ut quidam interpretantur, falsa sint atque ridicula.

IN EVDEMIAM
IANI NICII ERYTHRÆI

I Ane, pluis : multus lepidi ruit imber aceti.
Tempus erat : pellant, hoc Iove, secla sitim.

GREGORIUS AYALA.

F I N I S.

CORRIGENDA.

*Pag. 35. lin. 1. ita interpunge: ridendave, conjux, & l. 2. pro
sua? lege tua? p. 61. lin. penult. & seq. positus versus Horatia-
norum esse debebat, qui in ejusmodi odis esse consuevit. p. 70. l. 29.
ubi exemplaria aliqua habent ingens, lege insignis. p. 95. l. 29. pro
polliceretur lege pollicita esset. p. 129. l. 8. pro cur lege sic. p. 151.
l. 6. lege antistite. p. 227. l. 24. lege, sine interpunctione media, ve-
litaribus hastis. Mittimus minutiora cetera.*

